

# Odoodee Baibel

Odoodee New Testament Portions

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

Matiyu .....	4
Maka .....	46
Luka .....	71
Yonee.....	114
Diye Di Odo .....	145
1 Tesalonika .....	184
2 Tesalonika .....	188
2 Timoti .....	191
Taites .....	195
Palimon .....	198
Yemes .....	200
1 Yonee.....	205
2 Yonee.....	210
3 Yonee.....	211
Yuda.....	212

# Matiyu

## Matiyu booka goo eyo bei

Matiyu yo Yesu o hamamee dili odo 12 ee ma kulodu hee yoso. Yo o hu hee Libai deliso. Yu odooso Yesu mapoo tei talame to hogugu hagee yayo dimapoo teneeso. Esiga yayo to hogugu hagee ma kulodu Booka Nape mapoo taka goo ee Yesuye medee tobuloso tomo sileeso. Osoloso Yesu Yu odooso bamelee Kelisoso.

### Yesuwo amawe dio (Luka 3:23-38)

<sup>1</sup> Yesu Keliso yo Deibidiyo amawe, osoloso Deibidi yo Eibalahameeyo amawe. Esiga Yesuwo amawe dio dia hu hagooso.

<sup>2</sup> Eibalahameeyo owolo Aisek, osoloso Aisekeeyo owolo ee Yekob, Yekobeeyo owolo ee Yuda, osoloso Yekobeeyo owolo dio abo.

<sup>3</sup> Osoloso Yudayo owolo ee Peles dio Sala dio (osoloso egee bia dia owee ee Tamala), osoloso Peleseeyo owolo ee Heslon, osoloso Hesloneeyo owolo ee Lam.

<sup>4</sup> Osoloso Lameeyo owolo ee Aminadab, osoloso Aminadabeeyo owolo ee Nason, osoloso Nasoneeyo owolo ee Salmon.

<sup>5</sup> Osoloso Salmonowo owolo ee Bowas (Bowaseeyo owee ee Leihab), osoloso Bowaseeyo owolo ee Obed (Obedeeyo owee ee Lut), osoloso Obedeeyo owolo ee Yesi.

<sup>6</sup> Osoloso Yesiyo owolo ee wiligi odo 12 toboloso badebei Deibidiso. Deibidiyo owolo ee Solomon. (Solomonowo owee ee daga Yulayayo osobo.)

<sup>7</sup> Osoloso Solomonowo owolo ee Lehobowam, osoloso Lehobowameeyo owolo ee Abiya, osoloso Abiyayo owolo ee Asa.

<sup>8</sup> Osoloso Asayo owolo ee Yehosapat, osoloso Yehosapateeyo owolo ee Yeholam, osoloso Yeholameeyo owolo ee Yusaya.

<sup>9</sup> Osoloso Yusayayo owolo ee Yotam, osoloso Yotameeyo owolo ee Ahas, osoloso Ahaseeyo owolo ee Hesekeya.

<sup>10</sup> Osoloso Hesekeyayo owolo ee Manase, osoloso Manaseyo owolo ee Amon, osoloso Amoneeyo owolo ee Yosaya.

<sup>11</sup> Yosayayo owolo ee Yekonaya, osoloso Yosayayo owolo dio abo.

Beame domo omapoo Isalael odooso odo abo sabolo ha temeleso, diba Babilon mi mapoo dabalame iyado diso. <sup>12</sup> Esiga Isalael odooso Babilon mi mapoo dala ma kulodu debei beame omapoo Yekonayaye giso holo soomagooso, o hu ee Selatiyel. Osoloso Selatiyeleeyo owolo ee Selubabel.

<sup>13</sup> Osoloso Selubabeleeyo owolo ee Abiyud, osoloso Abiyudowo owolo ee Eliyakim, osoloso Eliyakimeeyo owolo ee Asol.

<sup>14</sup> Osoloso Asolowo owolo ee Sadok, osoloso Sadokowo owolo ee Akim, osoloso Akimeeyo owolo ee Eliyud.

<sup>15</sup> Osoloso Eliyudowo owolo ee Eliyesel, osoloso Eliyeseleeyo owolo ee Matan, osoloso Mataneeyo owolo ee Yekob.

<sup>16</sup> Osoloso Yekobowo owolo ee Yosep. Esiga Yosepeye Meli huso. Osoloso Meliye Yesu edebeeyo takolone Keliso deli ee soomagoo.

<sup>17</sup> Esiga Eibalahameeye badebei beame omaga bei mooloogooloso di wiligi odo Deibidiye badebei beame omapoo, Kelisowo amawe dio 14 odo hagee biaso debeiso. Osoloso wiligi odo Deibidiye badebei beame omaga bei mooloogooloso di Babilon odo oso Isalael odo dala ma kulodu gilimado di beame omapoo, Kelisowo amawe dio 14 odo hagee biaso debeiso. Osoloso abaga bei mooloogooloso di Yesu soomagoo beame mapoo, Kelisowo amawe dio 14 odo hagee biaso debeiso.

### Yesu Keliso soomagoo (Luka 2:1-7)

<sup>18</sup> Yesu Keliso soomagoo goo ee egeesee moloso. Owee Meli Yosepeeye hulame dadagoloso debeiso. Esino diba huilega dobolone, Meli yo Dio Tei oso kitulugu maga koowasi moodoo goo ee eyo nediliyo ogoloso gooleedooso. <sup>19</sup> Esino Yosepeeye goo hagee dulooso, gowoolone Meli pagalame gooleeso. Esino Yosep yo Godeeyo howo woola tekepo badeli. Esiga odo susuga eyo howo woola Meli pagalai yo goomegele. Egeeseelone Meli hulame dadaga ee ma da pagalame yo goomogaso.

<sup>20</sup> Yosep yo goo hamaga goolone badoboome, Godeeyo momaiye oso sapootia mapoo yimapoo sibiles egeesee takaso, "Yosep, Deibidiyo amawe, no Meli hulei na ebi. Bei, yo Dio Tei oso kitulugu maga koowasi moodooloso ka badoso. <sup>21</sup> Esiga yo giso holo soomagalaiso. Egeeseega nayo o hu Yesu hedi. Bei, o odo oso dibada goo tokenee eyo nei telega pagalame, yayo diba pidileiso," diso.

<sup>22</sup> Esiga Godeeye o odoo yimaga to toloso kokodo takomo sili odoo yimaga to taka goo oso tei dalame, goo susuga hagooso tei peledabaso. Bei, yayo egeesee takaso,

<sup>23</sup> "Sobo obuo giso dia goo gooleedele poogoo oso koowasi moodooloso giso holo soomagalaizo.

Osoloso odoo susuga oso o hu ee Imanuwel dolone dabalaiso," diso.

Hu eyo bei ee Godee ibolo hodobo badoso.

<sup>24</sup> Esem Yosep yo tia hogabuloso Godeeyo mo-maiyeso yimapoo taka to ee dodolone Meli huso.

<sup>25</sup> Esino Yosep dio Meli dio hedebe delega badolone, Meliye giso holo soomagooso. Esem Yosepeeye holope o hu Yesu hediso.

### Giwo hesigeli odoo oso Yesu agalame di

**2** Helodeeye Yu odoowo wiligi odoo toboloso badebei beeame omapoo, Yudiya mi toowa ma kulodu Betilhem mi pepooko mapoo Meliye Yesu soomagooso. Yesu soomagoloso hamamee giwo hesigeli odoo oso osokoso sibili maga Yolusalem mi mapoo sibadeeso. <sup>2</sup> Diba Yolusalem mapoo peledoboloso egeesee takomo silesibiso, "Ibada midee mapoo dobolone egeino, giwo toowa osokoso sibili omapoo molome egeiso. Iyo giwo egee ogoloso, wiligi odoo hee olo soomagoo doloso gooleedoloso hamapoo ka sibadee. Esiga holope Yu odoowo wiligi odoo toboloso badalame soomagoo ee kasomo? Bei, iyo o hu dokodoo poudalame ka sibadee," dee takomo silesibiso.

<sup>3</sup> Esino wiligi odoo Helodee sabolo osoloso Yolusalem mapoo debeli odoo susuga sabolo oso goo hagee duloso diya gooleeso. <sup>4</sup> Egeeseelone Helodeeye tei moso wiligi odoo tebisa sabolo osoloso tei eligili odoo gilimadoloso dimapoo egeesee takaso, "Godee maga to toloso kokodo takomo silesibili odoo oso takolone Keliso kamapoo soomagalaigonala?" diso.

<sup>5</sup> Esem diayo nei egeesee takaso, "Yudiya mi toowa ma kulodu Betilhem mi pepooko mapoo soomagalaigona diso. Bei, Godee maga to toloso kokodo takomo sili odoo oso egeesee hoguguso,

<sup>6</sup> Betilhem Yuda mi ee ma kulodu,

Nayo Yuda mi toowa ee ma kulodu goo toowa ka moloso.

Bei, nee mi omaga wiligi odoo tabalai ee sibileiso.

Yayo mo odoo Isalael mi mapoo debeli odoo ee bamalaiso,' dee takeliso."

<sup>7</sup> Esem Helodeeye goo hagee duloso, giwo hesigeli odoo mapoo giwoso peledaba beeame ee gooleedalame diba mada gilimadooso. <sup>8</sup> Osoloso diayo nei taka duloso diba Betilhem mapoo diye dolone to egeesee takaso, "Niba dilesos holope egee medee esiameloso ogoloso see wedi sibleso amapoo takee. Egeeseega anosee yimapoo dilesos o hu dokodoo poudileiya," dee takaso.

<sup>9</sup> Esem giwo hesigeli odoo oso Helodeeye to duloso dulone, giwo diayo dia mi mapoo egei hedebe onosee see egeiso. Diba giwo egee ogoloso diya goomoga

sabolo giwoso malalo dime hamamee deede diso. Diba giwo egee hamamee dodomo dime, giwoso dilesos holopeso badebei moso eyo tobudu pounee meleeso.

<sup>11</sup> Esem giwo hesigeli odoo oso holopeso badebei moso eyo kulodu gadilesos egeino, holope owee Meli dio badoboome egeiso. Esem diayo gawuloso dobolone holope eyo hu dokodoo poudooso. Osolosos emegei di bi gold molee, osolosos siga medee sisigagili bi medee tekepo, osolosos mopoodoo soos kolo mapoo hedili hageesee yimapoo teneeso. <sup>12</sup> Esino diba see wedi dilame tiano, sapootia mapoo Godeeye dimapoo egeesee takaso, "Niba see wedi duga, Helodeeye badebei maga na di. Esino niba eli hee maga nibada mi mapoo ka diyadee," diso. Esem diba to ee dodolone eli hee maga dibada mi mapoo diyadeeso.

### Isipi mi mapoo kukulo di

<sup>13</sup> Osolosos hamamee giwo hesigeli odoo olo dime, gesi omapoo Yosep tiamolome, sapootia mapoo Godeeyo momaiye oso siblesos yimapoo egeesee takaso, "No hogabuloso holope sabolo osolosos owee sabolo gilimadoloso Isipi mi mapoo kukulo di. Bei, Helodeeye odoo oso holope egee wooloomalame esiamos sibileiso. Esiga niba kukulo dilesos Isipi mi mapoo dabalame di. Niba omapoo dilesos doga, niyo see wedi sibilei beeame ee ayo nimapoo takalaiso," diso.

<sup>14</sup> Egeesee taka duloso gesi omapoo Yosep hogabuloso holope sabolo owee sabolo gilimadoloso Isipi mi mapoo kukulo diso. <sup>15</sup> Diba omapoo dilesos Helodee towa belesos bameleeso. Esiga goo hagee tei peledabaso, Godeeye o odoo yimaga to toloso kokodo takomo sili odoo yimaga taka to sabolo tebilame. To ee hagooso,

"Ayo mo holo Isipi mi ee poogolosos sibilame iso."

### Giso holaisos pilugu

<sup>16</sup> Esino giwo hesigeli odoo oso Helodee mapoo takalame see wedi sibilega, eli hee maga dibada mi mapoo wedi di goo ee duloso yo diya kamanaso. Osolosos yayo eyo nediliyo egeesee gooleeso, "Giwo hesigeli odoo oso giwo dia midee mapoo egei beeame omaga simi dugo bakadio olo poogooso. Esiga ayo mo odoo mapoo takolone, giso holaisos dugo bakadio poogoo sabolo osolosos dima hamamee sooloogamagoo sabolo piligiye daga, holope egee sabolo wooloomalaiso," diso. Esiga yayo o odoo mapoo to kitulugu teneeso, diayo Betilhem mi mapoo osolosos mi pepusos abo koola mapoo bumos di, omapoo dilesos giso holaisos pepusos susuga piligilame. Esem diayo dilesos giso holaisos dugo bakadio osolosos dima hamamee sooloogamagoo sabolo piluguso. <sup>17</sup> Esiga goo hagooso peledoboome Godee maga to toloso kokodo takomo sili odoo Yelemayaye taka to sabolo tebiasos. Bei, yayo egeesee hoguguso,

<sup>18</sup> "Diya goohelame Lama mi ee ma kuloduga pisa ee duso.

Bei, sobo Laiseleeye owolo dio halo ka pusumo siloso.

Esiga yo pisa koo koodobuoso.

Bei, owolo dio susuga olo piluguga."

### Yosepeeye Nasalet mi mapoo see wedi simi

<sup>19</sup>Yosep Isipi mi mapoo osee badoboome, wiligi odoo taba Helodee taso. Esememe Yosep tiamolome sapootia mapoo Godeeyo momaiye oso sibilesu yimapoo egeesee takaso, <sup>20</sup>"No hogabuloso holope sabolo owee sabolo gilimadoloso Isalael mi mapoo see wedi di. Bei, giso holo egee wooloomalame esieli odoo egee bia olo wediaso," diso.

<sup>21</sup>Esememe Yosep to hagee duloso, holope sabolo owee sabolo gilimadoloso see Isalael mi mapoo wedi diso.

<sup>22</sup>Esino Helodee teme, see owolo Akaleyoseeye Yudiya mi mapoo wiligi odoo toboloso badebeiso. Esememe Yosep goo hagee duloso mi omapoo dilei ebiaso. Esememe sapootia mapoo Godeeyo momaiye oso see tobu sibilesu yimapoo egeesee takaso, "No Yudiya mi mapoo na di," diso. Yosep yo momaiyeso egeesee taka duloso see Gelili mi toowa ma kulodu Nasalet mi pepooko mapoo badalame diso. Esiga Godee maga to tolosokokodo takomo silesibili odoo oso taka to sabolo tebiaso. Bei, diayo egeesee takaso, "Edebeeyo yo Keliso dolone Nasalet odoo dalaiso," diso.

### Yonee odoo howo oluguli odoo oso to taka

(Maka 1:1-8, Luka 3:1-18, Yonee 1:19-28)

**3** Osoloso Yesu Nasalet mi mapoo badoboome, Yonee odoo howo oluguli odoo oso sibilesu Yudiya miwe poogoo mi mapoo Godeeyo to egeesee takomo siliso, <sup>2</sup>"Niba goo goolee su wudoloso nibada tokenee maga miligi pie. Bei, Godeeye wiligi doloso badeli goo oso sibilei olo koola tooboo," dee takomo siliso. <sup>3</sup>Esiga Yonee odoo howo oluguli odoo eyo goo maga Godee maga to tolosokokodo takomo sili odoo Aisayaye egeesee takaso,

"Odoo heeso miwe poogoo mi omaga egeesee idagoo,

'Lodeeye sibilei eli moodee.

Osoloso o eli medee hoodo magee,' dee takomoloso."

<sup>4</sup>Yonee yo kemol be too oso dugo dusa kaloso silone, gala koloso bagi mapoo gudu masi kaloso siliso. Osoloso nei yayo nali ee tapala sabolo koo sabolo nali. <sup>5</sup>Odoo susuga oso Yolusalem abaga osoloso Yudiya abaga osoloso Yoden howo palaga debeli mi maga Yoneeye taka to ee dulame sibadeeso. <sup>6</sup>Diba Yoneeye taka to ee duloso dibada goo tokenee yilige bugume, Yoneeye diba Yoden howo mapoo howo olugulo.

<sup>7</sup>Esino Yoneeye odoo howo olugumolome, Pelisi odoo susuga sabolo osoloso Sedisi odoo susuga sibilesu omapoo peledabaso. Esememe Yoneeye diba ogoloso dimapoo egeesee takaso, "Niba hebise, nimapoo odoo agayo takolone, niba Godeeye kamana goo egee sibo

maga mada piadabalai tebia, dee ka takana? <sup>8</sup>Esiga niyo debei goo maga nibada goo tokenee mapoo tei miligi pia goo ee eligi. <sup>9</sup>Osoloso niba niso nediliyo niba Eibalahameeyo amawe dioga, Godeeye kamana goo maga mada piadabalaiso, dee na goolee. Bei, ayo nimapoo taka. Godee yimapoo kitulugu moloso, yo hagooso see Eibalahameeyo amawe dio palai. <sup>10</sup>Esiga kabee homo bei mapoo olo magoo moloso. Esiga homo kaso ko tekepo pelega mologa, homo egee holoso dou mapoo toodalaiso.

<sup>11</sup>Nibada goo tokenee goo mapoo miligi pia maga ayo niba wulo howodee mapoo olugulo. Esino odoo ama hamamee egee sibo oso Dio Tei nima kulodu tenelaiso. Osoloso yayo yimapoo tei tele poogoo odoo ee dou mapoo toodalaiso. Esiga yayo kitulugu oso a dagadi. Esiga ayo o homo mapoo kali bi ee todilei a tebile. <sup>12</sup>Yayo witi wo ko sabolo osoloso so ee pilame o tou teli bi mopoodoo doloso badoso. Osoloso witi wo ko ee mosopoo kukuleiso. Osoloso witi wo so ee dou koo semili mapoo toodalaiso," diso.

### Yesu howo olugu

(Maka 1:9-11, Luka 3:21-22)

<sup>13</sup>Beeame domo omapoo Yesu Gelili mi maga Yoden howo mapoo Yoneeye yo howo olugulame simiso.

<sup>14</sup>Esino Yoneeye Yesu yo howo olugulei gowoolone yimapoo egeesee takaso, "Bei kasee maga no ayo howo olugulame amapoo ka simiyo? Nayo a howo olugulei tekepo," diso.

<sup>15</sup>Esememe nei Yesuye yimapoo egeesee takaso, "Epedee hamapoo nayo a howo olugulei tekepo. Bei, goo hagee Godeeye goomoga goo oso," diso. Esememe Yonee to hagee duloso Yesu howo olugulo.

<sup>16</sup>Osoloso Yesu howo oluguloso gasibilesu tobulodulone egeino, Kei mi osulu yamagoloso Dio Tei oso molo masi pusibilesu yimapoo pubalegeme egeiso. <sup>17</sup>Esememe Kei mi ma dokodooga toso egeesee taka, "Hagee ayo diya gooma mo Holo oso. Ayo yimapoo diya goomogo," dee takaso.

### Saitenso Yesu kukulo egei

(Maka 1:12-13, Luka 4:1-13)

**4** Osoloso hamamee bo holo dia wiligi odoo Saitenso Yesu kukulo agalame, Dio Tei oso Yesu miwe poogoo mi mapoo ido palaso. <sup>2</sup>Yo beeame 40 osoloso gesi 40 ee ma kulodu nei nelega sileeme yo diya hodi-  
aso. <sup>3</sup>Esememe kukuli odoo Saitenso sibilesu Yesu mapoo egeesee takaso, "No tei Godeeyo owolo daga, nayo yo hagooso see wo pe dee takee," diso.

<sup>4</sup>Esino Yesuye nei egeesee takaso, "Godeeyo to booka mapoo hogugu oso egeesee takooso, 'Edebeeyo habebe nei nolone badoga, gie badeli talaime. Esino Godeeyo to wo masi nolone badoga, yo gie badeli talaiso,'" diso.

<sup>5</sup>Esememe Saitenso see Yesu idoloso Godeeyo hu dokodoo poudili mi Yolusalem mapoo ido diso. Osoloso tei moso tegei omu ma dokodoo ido peleso tobulodume yimapoo egeesee takaso, <sup>6</sup>"No tei Godeeyo

owolo daga, no moso omu ma dokodooga miyomoo bologobigi. Bei, Godeeyo to booka mapoo hogugu oso egeesee takooso,

‘Godeeye o momaiye mapoo,  
no medee bamelee, dalaiso.

Egeeseega diayo no dia deeso douguleiso,  
no yo mapoo homodobiya.”

<sup>7</sup> Esemee Yesuye nei egeesee takaso, “Godeeyo to booka mapoo hogugu oso see tobu egeesee takooso, ‘Nee † wiligi odoo Godeeye taka to ee dada beleso agalame yimapoo na kukulo ege,’ diso.”

<sup>8</sup> Osoloso Saitenso Yesu see mubi toowa ma dokodoo ido palaso. Osoloso yayo mi edebee yo bia susuga oso toowa di sabolo osoloso oso tekepo ee yimapoo eligiso. <sup>9</sup> Esemee Saitenso yimapoo see egeesee takaso, “Nayo amapoo gasuwuloso a dokodoo poudooga, mi susuga hagee ayo namapoo tenelaiso,” diso.

<sup>10</sup> Esemee Yesuye yimapoo egeesee takaso, “Saiten, no amaga peegoo di. Bei, Godeeyo to booka mapoo hogugu oso egeesee takooso, ‘No †† hedebe nee wiligi odoo Godee mapoo gawuloso o hu dokodoo poudolone o to mapoo ka mesimo sile,’ diso.”

<sup>11</sup> Esemee Saitenso Yesu poogoloso diso. Esemee momaiyeso sibilesa Yesu pidiso.

#### Yesuye Gelili mi mapoo o tou bei mooloogoo

(Maka 1:14-15, Luka 4:14-15)

<sup>12</sup> Yonee odoo howo oluguli odoo ee neliga moso ma kulodu magoo goo ee duloso, Yesu see Gelili mi toowa ee ma kulodu o midee Nasalet mapoo wedi diso. <sup>13</sup> Osoloso yo Nasalet poogoloso see Kapeniyum mi mapoo badalame diso. Kapeniyum mi hagee Gelili abei palaga mapoo doso. Mi egee bala bakadio Sebulun dio osoloso Naptili egee bia dia mi. <sup>14</sup> Godee maga to toloso kokodo takomo sili odoo Aisayaye taka to sabolo tebilame goo hagooso tei peledabaso. Bei, yayo to egeesee takaso,

<sup>15</sup> “Gelili odoo, niba Yu odoonee sabolo doso.

Nibada mi Yoden howo hodiokoo Gelili abei palaga mapoo moloso.

Osoloso odoo aboso nibada mi ee Sebulun sabolo osoloso Naptili sabolo dia mi deliso.

Esiga niba mo to dui.

<sup>16</sup> Neliga ma kulodu debeli odoo, niba gadeebugu toowa agalaiso.

Osoloso odoo susuga oso teli mi mapoo debeli odoo, nimapoo gadeebugu toowa oso pounileiso.”

<sup>17</sup> Osoloso beame domo omapoo Yesuye Godeeyo to takalame bei mooloogoolone egeesee takomo sileeso, “Nibada goo goolee su wuduloso nibada goo tokenee maga miligi pie. Bei, Godeeye wiligi doloso badeli goo oso sibilei olo koola toobooso,” dee takomo sileeso.

† To Isalael odoo dimapoo taka hagee Booka Nape mapoo hogugu moloso. (Deut 6.16) †† To Isalael odoo dimapoo taka hagee Booka Nape mapoo hogugu moloso. (Duet 6.13)

#### Yesuye o hamamee dili odoo abo daga malalo gilimadoodoo

(Maka 1:16-20, Luka 5:1-11)

<sup>18</sup> Beeame heeso Yesu Gelili abei palaga maga dimeleeno, di kebili odoo bakadio Saimon dio osoloso omolo Endulu dio egeiso. Saimonowo hu hee Pita. Esemee diba dia pei howo kulomoo ogusamo silesibume, Yesuye sibulone diba egeiso. <sup>19</sup> Esemee dimapoo egeesee takaso, “Niba ama hamamee deede sibe. Niba daga di kebigeli odoo doloso debeiso. Esino see epedee beame domo hamaga niba see odoo susuga Godee mapoo gilimadoloso sibili odoo doloso dabalaiso,” diso. <sup>20</sup> Esemee diba to egee duloso dia pei omapoo saga poogoloso Yesubolo diyadeeso.

<sup>21</sup> Osoloso diba omaga dulone egeino, di kebili odoo Sebediyo owolo bakadio Yemes dio osoloso omolo Yonee dio egeiso. Dibada amabolo du ma kulodu pei mopoodoolone debeiso. Esemee Yesuye dimapoo egeesee takaso, “Niba ama hamamee deede sibe,” diso. <sup>22</sup> Esemee diba to ee duloso dibada pei sabolo osoloso dibada ama sabolo du ma kulodu saga poogoloso Yesubolo diso.

#### Yesuye odoo paigiga susuga tekepo moodooga

<sup>23</sup> Esiga Yesuye Gelili mi toowa ma kulodu mosobia susuga mapoo silone, dibada howo gisili moso susuga ma kulodu to tekepo Godeeye wiligi doloso badeli eyo goo ee eligimo sileeso. Egeeseemo silone odoo paigiga susuga sabolo tekepo moodoogamo sileeso. <sup>24</sup> Esemee Gelili mi hodiokoo mi toowa Siliya deli omapoo debeli odoo oso yayo goo moodoomo silee goo ee duso. Goo egeesee maga odoo susuga oso paigiga opusomo opusomo di odoo ee Yesuye tekepo palame yayo badebei mapoo iyado sibadeeso. Esiga paiye opusomo opusomo di oso too odoo hagee diayo Yesu mapoo iyado sibadeeso. Odoo aboso odoo dala toowa too ee iyado simiso, osoloso odoo aboso odoo bo holo paladee iyado simiso, osoloso odoo aboso odoo todili iyado simiso, osoloso odoo aboso odoo su kakawa poogoo iyado simiso. Esemee Yesuye diba susuga tekepo paso. <sup>25</sup> Osoloso odoo mooloogoodoo bei oso Gelili abaga osoloso Dekapolisi ‡ abaga osoloso Yolusalem abaga osoloso Yudiya abaga osoloso mi abo Yoden howo hodiokoo debeli mi maga Yesuye badebei mapoo sibilesa yima hamamee deede diyadeeso.

#### Yesuye mubi ma dokodoo odoo mapoo eligi

(5:1-7:29)

**5** Yesuye odoo mooloogoodoo bei oso yimapoo sibadee ogoloso, mubi ma dokodoo peleso biaso. Esemee o hamamee dili odoo oso yimapoo sibadeeso. <sup>2</sup> Esemee omapoo yayo Godeeyo to dimapoo eligilame bei mooloogoolone egeesee takaso,

‡ DEKAPOLISI - mosobia dee bakadio tiadoo mooloogoodoloso hedi eyo hu toowa oso.

**Goomoga sabolo dabalai**

(Luka 6:20-23)

<sup>3</sup>“Edebeeyo Godeeye diba pidilame yimapoo kibiloso doga, diba goomoga sabolo dabalaiso.

Bei, diba Godeeye wiligi doloso ka badoso.

<sup>4</sup>Osoloso edebeeyo goohele sabolo pupusugolone doga, diba goomoga sabolo dabalaiso.

Bei, Godeeye diba pidileiso.

<sup>5</sup>Osoloso edebeeyo mesie sabolo doga, diba goomoga sabolo dabalaiso.

Bei, hamamee mipoo susuga hagee dibada mi dalaiso.

<sup>6</sup>Osoloso edebeeyo goo tekepo Godeeye goomoga goo ee talai ono diya goolee sabolo doga, diba goomoga sabolo dabalaiso.

Bei, diayo Godeeye goomoga goo ee talame, yayo diba pidileiso.

<sup>7</sup>Osoloso edebeeyo emegei sooloo dolone doga, diba goomoga sabolo dabalaiso.

Bei, nei Godeeye dimapoo sooloo dolone badalaiso.

<sup>8</sup>Osoloso edebeeyo hedebe Godee mapoo goo hoodolone doga, diba goomoga sabolo dabalaiso.

Bei, diayo Godee agalaiso.

<sup>9</sup>Osoloso mesie dabalame segeli odoo doloso doga, diba goomoga sabolo dabalaiso.

Bei, Godeeye diba owolo dio dalaiso.

<sup>10</sup>Osoloso edebeeyo Godeeyo howo woola goo tekepo too maga dala tolone doga, diba goomoga sabolo dabalaiso.

Bei, diba Godeeye wiligi doloso ka badoso.

<sup>11</sup>Osoloso niyo amapoo tei too goo maga edebeeyo nimapoo to tokenee takoloso dala tenelone nimaga gamenee goo takooga, niba goomoga sabolo dabalaiso. <sup>12</sup>Esiga niba sigabolone goomege. Bei, Kei mi mapoo nei toowa niyo talame nibada hu sabolo olo mopoodoo doloso moloso. Esiga nimapoo dala tenelone egee do egee dia amawe diayo Godee maga to tololo kokodo takomo silesibili odoo daga hoogoo debei mapoo dala hedebe egeesee tenemeleeso.”

**Solu sabolo gadeebugu sabolo**

(Maka 9:50, Luka 14:34-35)

<sup>13</sup>“Mi toowa mapoo debeli odoo mapoo niyo solu masi ka doso. Esino soluso hadali me poogooga, nayo solu ee see hadalame kasee moodolaiyo? Esiga solu hadali me poogooga, yo goo mauwe malaiso. Osoloso mi mapoo togobuguga, edebeeyo dokodooga homoso ebidileiso.

<sup>14</sup>Esiga mipoo toowa hamapoo debeli odoo susuga mapoo niyo gadeebugu masi ka doso. Bei, mubi ma dokodoo mi edebeeyo bia mologa, mi egee mada malaiame. Haye. Yo medee woola molo egeliso. <sup>15</sup>Esiga odoo heeso keme pouloso tolo oso koo gagali. Haye. Yo keme pouloso odoo susuga oso o moso kulodu dobolone gadeebugu ee agalame woola pou mage-liso. <sup>16</sup>Egeesee maga niyo mipoo toowa hamapoo debeli odoo mapoo gadeebuguloso dabalai tekepo.

Egeesega odoo susuga oso niyo goo tekepo tolone egee do ogoloso diayo nibada Ama Godee Kei mi ma dokodoo egee bado o hu dokodoo poudileiso.”

**Godeeye tei magoo hogugu**

<sup>17</sup>“Esiga Moseseeye tei magoo hogugu sabolo osoloso Godee maga to tololo kokodo takomo silesibili odoo oso Godeeyo to hogugu ee ayo peegoo magalame ka simidoo, niyo dee na goolee. Haye, ayo egeesee salame ka sibile. Esino ayo wulo diayo taka goo susuga ee tobuloso talame ka simi. <sup>18</sup>Esiga ayo nimapoo taka. Mipoo toowa sabolo kei sabolo mauwe pegelega osee mologa, Godeeye tei magoo ma kulodu hu bei pepuso heeso peegoo osugabalaiame. Esino tei oso taka goo susuga oso tobuloso peledabalaiso. <sup>19</sup>Esiga edebeeyo Godeeye tei magoo ma kulodu tei pepooko hedebe mapoo mesilega badolone, emegei dimapoo goo egeesi masi moodoolame eligimo siloga, yo Godeeye wiligi doloso badeli mapoo diya pepooko doloso badalaiso. Esino edebeeyo Godeeye tei magoo susuga mapoo mesiloso badolone, emegei dimapoo goo egeesi masi moodoolame eligimo siloga, yo Godeeye wiligi doloso badeli mapoo toowa doloso badalaiso. <sup>20</sup>Esiga ayo nimapoo taka. Niyo Godeeye tei magoo mapoo mesie goo oso tei eligili odoo sabolo, osoloso Pelisi odoo sabolo oso Godeeye tei magoo mapoo mesili goo ee dagadilega poogooga, niba Godeeye wiligi doloso badalaima.”

**Kamanali goo**

<sup>21</sup>“Esiga Godeeye olo daga hoogoo ibada amawe dimapoo to egeesee taka goo ee niba olo duso, ‘Emegei bei mauwe wooloomalai tei. Esiga edebeeyo emegei bei mauwe wooloomaga, o goo meedileiso.’

<sup>22</sup>Esino goo hamaga ayo see egeesee takooso. Edebeeyo emegei dimapoo kamana sabolo badoga, yo goo meedili mapoo ido palaiso. Osoloso edebeeyo emegei dimapoo no tokenee odoo daga, niyo yo wiligi odoo tebisa dimapoo ido peleso o goo meedilei tekepo. Osoloso edebeeyo emegei dimapoo no boobada odoo daga, yo nei Dou mi mapoo toodalai tekepo.

<sup>23</sup>Esiga nayo Godee mapoo emegei di bi tenelame badolone epedee omapoo nee odoo oso namapoo egee gowoomolo gooleebuguga, nee emegei di bi ee omapoo magoloso see saga dilesio nee odoo omapoo emegei di to takee. Osoloso see wedi sibilesio emegei di bi egee Godee mapoo tenee.

<sup>25</sup>Esiga namapoo goweli odoo oso no goo meedilei mapoo ido duga, no eli domopoo yibolo dulone yayo namapoo gowe egee molo pagalame yibolo saga emegei dee. Esino nayo goo egeesee moodelega poogooga, yayo no goo meedili odoo mapoo ido peleso nee goo meedileiso. Egeesega goo meedili odoo oso no neliga moso gibadeli odoo mapoo tenelaiso. Egeesega see yayo no neliga moso ma kulodu toosoolaiso. <sup>26</sup>Esiga ayo namapoo taka, no neliga moso ee ma kulodu badolone nayo peegoo dilei eli



agalaima. Esino molee yayo hesia sabolo tobuloso nayo yimapoo teneega, no peegoo dileiso.”

**Adaba kooka sobo sabolo hedebe deli goo sabolo osoloso sobo pegeli goo**

(Matiyu 19:19, Maka 10:11-12, Luka 16:18)

<sup>27</sup> “Esiga niba to egeesee taka olo duso, ‘Adaba kooka sobo sabolo kooka giso sabolo hedebe dalai tei,’ diso.

<sup>28</sup> Esino ayo nimapoo egeesee takooso, edebeeyo emegei dia kooka sobo mapoo howo todolone goo goolee ma kuloduga yibolo hedebe dalame gooleega, o goo goolee oso yo sobo egee sabolo olo hedebe diso. <sup>29</sup> Esiga nee howo deedeede oso no tokenee talame gidoduga, nee howo deedeede egee tabigilei tekepo. Bei, nee howo bakadio sabolo badolone Dou mi mapoo dilei tekeponee. Esino nayo howo hedebe sabolo Kei mi ma dokodoo gadilei tekepo. <sup>30</sup> Osoloso nee dee deedeede oso no tokenee talame gidoduga, nee dee deedeede ee kobigilei tekepo. Bei, nee dee bakadio sabolo badolone Dou mi mapoo dilei tekeponee. Esino nayo dee hedebe sabolo Kei mi ma dokodoo gadilei tekepo.

<sup>31</sup> Osoloso niba to egeesee taka olo duso, ‘Edebeeyo osobo pagalame gooleega, yo sobo pegeli peipa mapoo to hoguguloso osobo mapoo tenee,’ diso.

<sup>32</sup> Esino ayo nimapoo goo hamaga egeesee takooso, nosobo na peegee. Esino kooka sobo agayo giso hee sabolo hedebe daga, yayo osobo egee pagalai tei mauwe. Esino yayo wulo goo hee maga osobo poo-googa, yayo osobo ee goo tokenee mapoo gidodusu. Bei, sobo ogoso giso hee mapoo obuoga, yo odoo heeyo giso ee peedee huso. Osoloso edebeeyo sobo omoye poogoo ee huga, yo odoo heeyo osobo ee peedee huso.”

**Goo talame tei mageli**

<sup>33</sup> “Osoloso daga hoogoo ibada amawe dimapoo to egeesee taka ee niba olo gooleedooso, ‘No goo tei moodoolame Godee mapoo tei magooga, tei egee na gababie,’ diso. <sup>34</sup> Esino ayo goo hamaga see egeesee takooso, no goo hee moodoolame tei na ye. Esiga no Kei mi eyo hu hesialoso tei na ye. Bei, mi egee Godeeye wiligi doloso badeli oso. <sup>35</sup> Osoloso mipoo toowa eyo hu hesialoso tei na ye. Bei, mi egee Godeeye o homo kokusoloso badeli mi oso. Osoloso Yolusalem mi eyo hu hesialoso tei na ye. Bei, mi egee wiligi odoo Godeeye mi oso. <sup>36</sup> Osoloso nee wiligi mapoo sigilone tei na ye. Bei, nayo egee takoo goo oso nee wiligi ma kulodu wudu heeso opusomo dalai tebile. <sup>37</sup> Esiga odoo heeso nimapoo sibilesu takolone tou hagee teye dee takooga, niyo goo egee talai goomogoga, yimapoo hedebe niyo goomoga goo ee takee. Osoloso niba goo ee talai gowooga, niyo hedebe gowe goo ee takee. Bei, niyo egeesee selega poogooga, niba game-nee takooso. Esiga gamenee takeli goo ee Saiten maga siboso.”

**Nei su teli goo**

(Luka 6:29-30)

<sup>38</sup> “Osoloso niba to egeesee taka olo duso, ‘Odoos heeso no woolone nee howo tabuguga, nei odoo o howo tabigilei tekepo. Osoloso see odoo heeso nee maga mapoo woolone mei hedebe dobuguga, nei o mei dobigilei tekepo.’ <sup>39</sup> Esino ayo goo hamaga see egeesee takooso, no odoo heeso namapoo tokenee goo kasee moodooga, nayo yimapoo nei goo egeesi masi na moodee. Esiga odoo heeso nee haleegi mapoo kobuguga, see nee haleegi hodio mapoo kobugulame heligi magalai tekepo. <sup>40</sup> Osoloso edebeeyo nee sedi talame goomogolone no goo meedili mapoo ido duga, nayo nee sedi egee sabolo osoloso nee kekeisoo dugo sabolo yimapoo tenee. <sup>41</sup> Osoloso odoo heeso o bi kadaloso yibolo mi hee koola mapoo dilame sibilesu no giga, see nayo yibolo hodobo o bi eli sage kadadilei tekepo. <sup>42</sup> Esiga edebeeyo namapoo bi howaga, yimapoo wulo tenee. Osoloso edebeeyo namapoo bi howadalai goomogoga, yimapoo tenee.”

**Nimapoo ha teli odoo sooloo dele**

(Luka 6:27-28,32-36)

<sup>43</sup> “Esiga niba to egeesee taka olo duso, ‘Nee odoo sooloo dolone namapoo ha teli odoo hegie,’ diso.

<sup>44</sup> Esino ayo goo hamaga nimapoo egeesee takooso, nimapoo ha teli odoo ee sooloo dele. Egeesee lone nimapoo dala teneli odoo halo dokodoo takolone ka debee. <sup>45</sup> Esiga niyo goo hageesee tolone doga, goo oso niba tei ibada Ama Kei mi ma dokodoo badeli Godeeyo owolo dio doloso egee do goo ee ka eligiso. Egeesee ma kulodu Godeeyo howo woola tekepo debeli odoo sabolo osoloso tokenee teli odoo mapoo osoko pa sabolo howo sabolo tobuloso tenemoloso.

<sup>46</sup> Esiga niba hedebe nimapoo sooloo deli odoo ee sooloo dolone doga, niba nei tekepo talaisomo? Haya, talaima. Bei, tokenee teli odoo sabolo egeesee seliso.

<sup>47</sup> Osoloso niyo hedebe nee odoo mapoo mo odoo dolone badoga, egee goo tekepowa? Haya, peegoo debeli odoo sabolo goo hageesee teliso. <sup>48</sup> Esiga niba da Ama Godeeye odoo susuga sooloo dolone egee bado egeesi masi niba nosee odoo susuga sooloo dolone ka debee.”

**Bi mauwe odoo pidilei goo**

**6** “Esiga niba wulo edebeeyo agalame goo tekepo na tomo silesibe. Bei, goo hageesee tomo silesiboga, nibada Ama Godee Kei ma dokodoo badeli maga nei talaima.

<sup>2</sup> Egeesee ma kulodu niba bi mauwe odoo mapoo bi teneega, odoo howo woola na tenee. Bei, goo goolee bakadio gweli odoo oso odoo susuga oso hedebe diba tekepo doloso takalame, diayo goo hageesee howo gisili moso mapoo osoloso mosobia domopoo tomo silesibiliso. Esiga ayo nimapoo taka. Diayo goo egeesee tomo silesibume, odoo susuga oso diba

ogoloso goomogolone egee do maga dibada nei tolone ka doso. Esiga diba Godee maga nei hee talaime. <sup>3</sup> Esiga nayo bi mauwe odoo mapoo bi tenelame gooleega, nayo dimapoo mada tenee. Egeeseega Nama Godeeye nayo mada tekepo goo egee tomolo ogoloso namapoo nei tenelaiso.”

### Godee mapoo takeli goo

(Luka 11:2-4)

<sup>5</sup> “Esiga niyo Godee mapoo takolone goo goolee bakadio gweli odoo masi na debee. Bei, diba odoo susuga oso agalame, mosobia domopoo osoloso howo gisili moso ma kulodu malalo peleso tebisamolone Godee mapoo takalai, diba goomegeliso. Esiga ayo nimapoo taka. Diayo goo egeesee tolone egee do maga diba nei tolone doso. Esiga diba Godee maga nei hee talaime. <sup>6</sup> Esino nayo dokodoo takalame gooleega, nee moso ma kulodu gadileso osulu kisiloso edebeeyo koo egeli Nama Godee mapoo dokodoo ka takee. Egeeseega nayo mada yimapoo egee takomolo ogoloso yayo namapoo nei tenelaiso.

<sup>7</sup> Osoloso niyo yimapoo takolone Godeeye goo gooleedele poogoo odoo oso dibada godee mapoo takeli egeesi masi takolone na debee. Bei, diayo Godee mapoo taka ee ma kulodu goo mauwe to diya sage takeliso. Bei, diayo goolee diayo sage takooga, dia godeeso duleiso, dee gweliso. <sup>8</sup> Esiga niyo diba egeesi masi goo mauwe Godee mapoo takolone na debee. Bei, niyo goomoga goo ee nibada Ama Godee yayo malalo olo gooleedoloso ka badoso. <sup>9</sup> Esino niyo Godee mapoo takooga, hageesee takee, ‘Ibada Ama Kei mi ma dokodoo badeli,

beame susuga ma kulodu hedebe nee hu oso toowa doloso mele dee, odoo susuga oso dokodoo poudalame.

<sup>10</sup> Esiga nayo wiligi doloso badeli goo oso sibilei iba goomogo.

Osoloso Kei mi mapoo nayo goomoga goo egee tomolo goo ee

see mipoo hamapoo debeli odoo oso tolone ka dabalame.

<sup>11</sup> Osoloso beame susuga ma kulodu nei iyo nalai imapoo tenee.

<sup>12</sup> Osoloso ibada goo tokenee hapoloso boobado bigi. Bei, iba nose odoo susuga oso goo tokenee susuga imapoo moodeli ee boobado bigiliso.

<sup>13</sup> Osoloso iba goo tokenee mapoo na gidodi dee.

Esino iba Saitenso kitulugu omaga peegoo gilimado di.

[Bei, nayo wiligi doloso badeli goo sabolo, osoloso nayo kitulugu egee molo sabolo, osoloso nee hu oso toowa doloso kookaiyo moloso osee malaiso.

Hagee tei goo.]’

<sup>14</sup> Esiga odoo aboso nimapoo tokenee goo moodooga, niyo dia tokenee ee boobado bigi. Niyo egeeseega, nei nibada Ama Kei mi ma dokodoo egee bado oso nibada tokenee hapoloso boobado bigileiso.

<sup>15</sup> Esino odoo aboso nimapoo goo tokenee moodooga, niyo dia tokenee ee boobado bigilega poogooga, nei nibada Ama oso nibada goo tokenee ee hapoloso boobado bigileime.”

### Nei tei doloso Godee mapoo takolone dabalai goo

<sup>16</sup> “Osoloso niba nei tei doloso Godee mapoo takolone dobolone, goo goolee bakadio gweli odoo oso moodeli egeesee na moodee. Bei, diba nei tei doloso dobolone, mudu poudoloso debeliso, odoo susuga oso diba nei tei doloso debei ee ogoloso gooleedalame. Esiga ayo nimapoo taka. Diayo goo egeesee moodoolone egee do maga, edebeeyo dia hu dokodoo olo poudooso. Goo egeesee maga Godeeye dimapoo nei hee tenelaiso. <sup>17</sup> Esino no nei tei doloso badolone Godee mapoo takalame gooleega, nee mudu howo hapoloso wudu guloso ka badebee. <sup>18</sup> No egeesee badoga, odoo susuga oso nayo nei tei doloso egee bado goo ee diba gooleedalaime. Esino odoo susuga oso koo egeli Nama Godeeye nayo mada nei tei doloso egee bado goo ee ogoloso namapoo nei tenelaiso.”

### Bi bei doloso badalai goo

(Luka 11:34-36, Luka 12:33-34, Luka 16:13)

<sup>19</sup> “Esiga niba mi toowa hamapoo haga bi bei mooloogoo magoloso na debee. Bei, mi toowa hamapoo nibada bi abo siso naliso. Osoloso abo emisias ki nadoloso tokenee peliso. Osoloso abo heli teli odoo oso gasibilesos heli teliso. <sup>20</sup> Esino niba Godeeye goomoga goo ee tolone ka debee. Niyo egeesee seega, Godeeye Kei mi mapoo nei nimapoo tenelaiso. Mi omapoo siso nee bi koo nali, osoloso mi omapoo bi emisias ki nadoloso koo tokenee peli, osoloso heli teli odoo oso gasibilesos nee bi heli koo teli. <sup>21</sup> Nimapoo bi bei toowa ma mologa, nibada goo goolee oso omapoo meliso.

<sup>22</sup> Esiga nee su mapoo nee howo oso keme masi ka moloso. Osoloso nee howo oso tekepo mologa, nee su susuga gadeebugu malaiso. <sup>23</sup> Esino nee howo oso tokenee poga, nee su susuga neliga malaiso. Egeesee ma kulodu namapoo gadeebugu egee molo semidiloso badoga, no tei diya neliga ma kulodu badoso.

<sup>24</sup> Esiga edebeeyo wiligi odoo bakadio eyo to mapoo mesiloso silone tou talai tebile. Bei, yo o wiligi odoo hee goomogolone hee gowoolaiso. Egeeseelone yayo wiligi odoo heeyo to mapoo mesiloso silone, see heeyo to mapoo mesileime. Esiga niyo Godee mapoo mesimo silone molee toowa tolosos badalai goo mapoo mesilei tebile.”

### Tei tolosos dobolone haga na goolee

(Luka 12:22-31)

<sup>25</sup> “Esiga ayo nimapoo taka, niyo dobolone nei nalai sabolo osoloso howo nalai sabolo osoloso dugo kalai sabolo omapoo haga na goolee. Bei, nei nalai bi oso goo toowa koo moloso. Haye. Esino nibada gie badeli

goo oso goo toowa ka moloso. Osoloso kali bi oso goo toowa koo moloso. Haye. Esino nibada su oso goo toowa ka moloso. <sup>26</sup> Esiga niba só ogoloso goolee. Diba nali bi dieso sogoloso koo gooloogali. Osoloso diba nei nali bi magalai moso mauwe. Esino nibada Ama Godeeye Kei mi ma dokodoo egee bado oso dimapoo nei nali bi ka tenemoloso. Esino Godeeyo howo woola só oso goo toowa koo moloso. Esino niyo goo toowa ka moloso. <sup>27</sup> Esiga edebeeyo kali bi sabolo osoloso nei nali bi sabolo omapoo diya gooleega, o gie badeli see hoogoo sagilisomo? Haye.

<sup>28</sup> Esiga niba kasee maga kali bi mapoo haga goolee sabolo ka dabala? Esino niba doobudu meli palapalawa tekepo ogoloso goolee. Bei, diba dieso nediliyo pidilame tou koo teli. Osoloso dugo dieso kalai koo duseli. <sup>29</sup> Esiga ayo nimapoo ka taka, daga Solomonoye wiligi odoo toboloso badebei mapoo yayo kali bi medee tekepo kalaga meleeso. Esino doobudu meli palapalawa oso tekepo oso dugo tekepo Solomonoye kali ee daga-di. <sup>30</sup> Esiga doobudu meli palapalawa tekepo oso epei bou gasibilesa moloso, see beeamo hee mapoo wooseliso. Esino Godeeye palapalawa omapoo dugo masi tekepo ka kadili daga, a tei toso, Godeeye nimapoo dugo tekepo tenelaiso. Bei, niyo Godeeyo howo woola goo toowa ka moloso. Odoo niba tei too kibile.

<sup>31</sup> Esiga niba goo koudulone dobolone egeesee na goolee, 'Iyo nei sabolo howo sabolo kamapoo talaisoba? Osoloso iyo dugo kalai bi kamapoo talaisoba?' dee na goolee. <sup>32</sup> Bei, peegoo debeli odoo oso bi hageesee maga diya goolone debeliso. Esino Nama Godeeye bi niyo talame goomegeli ee yayo malalo olo gooleedooso. <sup>33</sup> Esiga niba Godeeye wiligi doloso badeli goo ee goolone, daga malalo nibada Ama yayo goomoga goo ee tolone ka debee. Niyo egeeseega bi susuga niyo egee esigamolo ee nei yayo nimapoo tenelaiso. <sup>34</sup> Esiga niba godigi gooso peledabalai mapoo goo haga koudulone na debee. Bei, godigi eyo goo ee godigi eyo goo oso. Esino niba epei eyo goo ee goolone ka debee."

### Emegei dia goo wulo goo mauwe na meedi

(Luka 6:37-38,41-42)

**7** "Niyo nee odoo heeyo goo wulo goo mauwe na meedi. Esino niyo egeesee meediga, nei Godeeye nibada goo onosee hedebe egeesee meedileiso. <sup>2</sup> Bei, niyo emegei dia goo kasee meediga, nei nibada goo onosee Godeeye hedebe egeesi meedileiso. Niyo goo tebia hedebe egeesi meediga, nei yayo niba nose tebia hedebe egeesi meedileiso.

<sup>3</sup> No kasee maga nee odoowo howo mapoo gelesi pepooko egee molo medee ogolone, hee nee howo mapoo homo toowa egee molo egelega ka pagala? <sup>4</sup> Osoloso nee howo mapoo homo toowa egee molo egelega no see kaseega nee odoo mapoo takolone, 'Nee howo mapoo gelesi pepooko egee molo ayo tabiga,' dee ka takeliyo? <sup>5</sup> No tei goo goolee bakadio gweli odoo. Bei, daga nee howo mapoo homo toowa egee

molo ee tabigi. Egeeseega nee odoowo howo mapoo gelesi pepooko egee molo medee ogoloso nayo tabigilei tebileiso.

<sup>6</sup> Godee mapoo tenelai bi ee so mapoo na tenee. Bei, soso namapoo see wedi sibilesa no palaiso. Osoloso namapoo bi tekepo egee molo be mapoo na togobise. Bei, beso bi mapoo homosoo tooboomo siloga tokenee palaiso."

### Esiaga agalaiso

(Luka 11:9-13)

<sup>7</sup> "Esiga ayo nimapoo taka, niba woose. Egeeseega, nimapoo tenelaiso. Osoloso niba esie. Egeeseega, niyo agalaiso. Osoloso niba osulu mapoo kalamadi. Egeeseega osulu nimapoo yamagalaiso. <sup>8</sup> Bei, woosali odoo oso goo talaiso. Osoloso esieli odoo oso goo agalaiso. Osoloso osulu mapoo kalamadili odoo mapoo osulu yamagalaiso.

<sup>9</sup> Esiga edebeeyo owoloye wo nalame woosaga, yimapoo yo tenelaisomo? <sup>10</sup> Osoloso yayo see di nalame woosaga, nayo yimapoo sa tenelaisomo? Haye. <sup>11</sup> Niba tokenee odoo, esino niyo nibada owolo dimapoo bi tekepo tenelai goo ee niba gooleedooso. Esiga ibada Ama Godee Kei mi ma dokodoo egee bado yayo yimapoo bi woosali odoo mapoo bi tekepo teneli goo ee niba gooleedooso. <sup>12</sup> Niba edebeeyo goo hee nimapoo moodoolame goomogoga, daga niyo dimapoo goo egee moodee. Bei, Moseseeye eligi goo sabolo osoloso Godee maga to toloso kokodo takomo silesibili odoo oso to hogugu oso eligi goo eyo bei ha-gooso."

### Osulu pepooko

(Luka 13:24)

<sup>13</sup> "Esiga osulu pepooko maga gadi. Bei, Dou mi mapoo dili osulu ee diya toowa osoloso eli onosee diya toowa. Egeesee maga odoo bei oso osulu omaga galagadilesa eli omaga ka diyadagamoloso. <sup>14</sup> Esino gie badeli mapoo gadili osulu ee diya pepooko. Osoloso eli omapoo dili onosee diya pepooko. Esiga odoo aboso eli egee ogoloso omaga ka diyadagamoloso."

### Gamenee goo eligili odoo medee hoodo ege

(Luka 6:43-44)

<sup>15</sup> "Niba obeeamo! Gamenee goo eligili odoo medee ege. Bei, diba kolo ma dokodooga odoo tekepo masi nimapoo sibiliso. Esino dibada kulodu dobu so kamanali egeesi masi nimapoo sibiliso. <sup>16</sup> Esiga niba di-ayo suso goo moodoo maga diayo egee do goo ee ogoloso gooleedeliso. Bei, pigi ko sabolo osoloso geleipi ko sabolo we ti maga ko koo peeya. <sup>17</sup> Esiga homo su tekepo oso homokoko tekepo peliso. Osoloso homo su tokenee oso homokoko tokenee peliso. <sup>18</sup> Esiga homo su tekepo oso homokoko tokenee koo peeya. Osoloso homo su tokenee oso homokoko tekepo koo peeya. Haye. <sup>19</sup> Egeesee ma kulodu homo su kaso homokoko tekepo pelega mologa, homo egee

heemagoloso dou mapoo toodalaiso. <sup>20</sup> Esiga game-nee goo eligili odoos ee diayo goo moodoo maga dia goo ee ogoloso niba gooleedalaiso.

<sup>21</sup> Esiga haga odoos susuga oso amapoo Lodee, Lodee dolone egee do oso Godeeye wiligi doloso badeli mapoo gasibileime. Esino odoos agayo mo Ma Godee Kei mi ma dokodoo egee bado yayo goomoga goo ee tomo siloga, hedebe odoos egee bia oso gasibileiso. <sup>22</sup> Esiga goo meedili beeame mapoo odoos aboso sibilesa amapoo egeesee takalaiso, 'Lodee, Lodee, iyo nee hu maga Godeeyo to takomo silesibiliso, osoloso nee hu maga odoos bo holo paladee peegoo hasisobugu dolone silesibilulone goo toowa opusomo di moodoomo silesibiliso,' dee takalaiso. <sup>23</sup> Esino nei ayo dimapoo egeesee takalaiso, 'Niba a gooleedele. Esiga niba amaga peegoo diyadee, niba tokenee teli odoos,' dee takalaiso."

### Moso tegeli odoos bakadio

(Luka 6:47-49)

<sup>24</sup> "Edebeeyo to ayo eligi duloso mesiloso siloga, yo odoos medee gweli oso moso tagalame mi nelegedi dooloso omou sooloso moso tegei odoos egeesi masi badoso. <sup>25</sup> Bei, i sabolo howo sabolo simiso, osoloso howo duwa oso o moso mapoo weino, moso egee kibiya meleeso. Bei, moso omou mi nelegedi doloso omou ka sooga. <sup>26</sup> Esino edebeeyo to ayo eligi duloso mesilega siloga, yo odoos medee koo gweli oso moso tagalame mi nelegedi doolega omou sooloso, moso tegei odoos egeesi masi badoso. <sup>27</sup> Bei, i sabolo howo sabolo simiso, osoloso howo duwa oso o moso mapoo woome, moso egee kibilega saga goboloso guobuguso."

<sup>28</sup> Yesuye goo hagee eligimeleso koodobume, odoos susuga yayo eligi du oso diya howoogadooso. <sup>29</sup> Bei, yayo eligi ma kulodu tei eligili odoos oso eligi egeesi masi koo eligime. Esino yayo odoos diya kitulugu oso eligi masi eligiso.

### Yesuye odoos agagisa bia tekepo pa

(Maka 1:40-45, Luka 5:12-16)

**8** Yesu mubi ma dokodooga kumoo moulome, odoos mooloogoodoo bei oso yima hamamee diyadeeso. <sup>2</sup> Egeesee semelee beeame domo mapoo odoos agagisa bia † sibilesa Yesuwo homo beiyopoo ebiso miyomoo tugusaloso egeesee takaso, "Lodee, nayo a tekepo moodoolai goomogoga, a tekepo moodee," diso.

<sup>3</sup> Esemee Yesuye o deeso odoos egee sigilone egeesee takaso, "Ayo no tekepo palai a goomogo. Esiga no tekepo pe," diso. Esemee epedee omapoo o kolo mapoo agagisa bia mauwe poogooso.

<sup>4</sup> Esemee Yesuye yimapoo egeesee takaso, "Nayo dileso no ayo tekepo moodoo goo ee odoos abo mapoo na

† ODOOS AGAGISA BIA: Yu odoos dia tei oso takolone, odoos agagisa bia hageesee ee Godeeyo howo woola kee kauwe deliso. Osoloso Yu odoos diba sigilei tei deliso. Goo egeesee maga yo tekepo palame Yesu mapoo ka howa.

takee. Esino nayo dileso Godee ogo odoos ogo doloso domo badeli odoos mapoo nee su tekepo pa goo ee ka eligi. Osoloso odoos susuga oso ogoloso no tekepo moodoo goo ee gooleedalame, nayo Moseseeye tei magoo ee dodolone, nee su tekepo moodoo omaga emegei di bi tenee," diso.

### Loum ha teli gibadeli odoos oso tei too goo

(Luka 7:1-10)

<sup>5</sup> Yesu Kapeniyum mi mapoo dileso peledoboome, Loum ha teli odoos 100 gibadeli odoos †† oso yo pidilame Yesu mapoo sibilesa egeesee takaso, <sup>6</sup> "Lodee, mo tou teli odoos hee diya paiyega su kakawoo buguloso tiamoloso," diso.

<sup>7</sup> Esemee Yesuye yimapoo egeesee takaso, "Ayo sibilesa yo tekepo palaiso," diso.

<sup>8</sup> Esino Loum ha teli odoos gibadeli odoos oso nei egeesee takaso, "Lodee, nayo mo mosopoo sibilei, a tebile. Esino mo tou teli odoos ee tekepo palame, no wulo omaga tobudulone toso idagee. <sup>9</sup> Bei, anosee odoos abo dia tou teli odoos. Osoloso odoos aboso mo tou teli odoos doloso dobolone mo to mapoo mesiloso silesibiliso. Esiga ayo mo tou teli odoos hee mapoo, 'no koo diye' daga, yo omapoo diliso. Osoloso see odoos hee mapoo takolone, 'no hamapoo sibeye' daga, yo sibiliso. Osoloso see mo tou teli odoos hee mapoo takolone, 'no goo hagee teye' daga, yo goo ee teliso. Esino mo tou teli odoos ee tekepo palame nayo wulo toso idagee."

<sup>10</sup> Yesu to hagee duloso howodolone yima hamamee sibadee odoos susuga mapoo egeesee takaso, "Ayo nimapoo taka, ayo Isalael mi mapoo silee ee ma kulodu kibiya tei too odoos hee yo egeesi egele. <sup>11</sup> Esiga ayo nimapoo taka, mi opusomo opusomo di maga sibilesa, Godeeye wiligi doloso badeli Kei mi mapoo Eibalaham, Aisek, osoloso Yekob sabolo hodobo mooloogoodoloso nei nalame dabalaiso. <sup>12</sup> Esino Yu odoos tei tele poogoo ee Dou mi mapoo toodalaiso. Egeeseega omapoo dobolone mei gisile sabolo pupusigilone dabalaiso."

<sup>13</sup> Esemee Yesuye Loum ha teli gibadeli odoos mapoo egeesee takaso, "No nee mosopoo di. Nayo goo peledalaiso doloso tei too oso goo peledabalaiso," diso. Egeesee semelee mapoo Loum ha teli gibadeli odoos o tou teli odoos mosopoo paiyega tiamelee odoos ee olo weidooso.

### Yesuye odoos susuga tekepo pa

(Maka 1:29-34, Luka 4:38-41)

<sup>14</sup> Osoloso Yesu Pitayo mosopoo diso. Yo omapoo dileso egeino, Pitayo nalobo paiyeso kolo dei moodoome tiamolome egeiso. <sup>15</sup> Esemee Yesuye sobo egeeyo dee mapoo sigime, paiye weidooso. Osoloso yo toboloso wo siloso Yesu mapoo teneeso.

<sup>16</sup> Osoloso habe omapoo odoos susuga oso bo holo paladee susuga Yesuye badebei mapoo iyadoo sibadeeso. Esemee yayo to kitulugu sabolo takeme, bo

†† Loum ha teli odoos 100 gibadeli odoos hagee Yu odoonee.

holo susuga odoo ma kuloduga peegoo hasisobugulo, odoo paigiga susuga ee tekepo paso. <sup>17</sup> Esiga Godee maga to toloso kokodo takomo sili odoo Aisayaye daga hoogoo to taka sabolo tebilame siso. Bei, yayo egeesee takaso, "Yayo ibada paiye susuga egee molo yayo tolone iba tekepo paso."

### Yesuye di hamamee dadalai goo

(Luka 9:57-62)

<sup>18</sup> Yesuye odoo susuga oso yimapoo sibilesi mooloo-goodoo ogoloso, o hamamee dili odoo mapoo egeesee takaso, "Iba abei hodiokoo dalo soowoomo," diso. <sup>19</sup> Osoloso beame omapoo tei eligili odoo heeso sibilesi yimapoo egeesee takaso, "Eligili odoo, nayo kamapoo dusomo, nayo di ayo hamamee deede sileiso," dee takaso.

<sup>20</sup> Yesuye nei yimapoo egeesee takaso, "Dobu soso debeli mi moloso, osoloso soso tieseli dibada ou moloso. Esino Odoo Holo ayo tieli moso mauwe," diso.

<sup>21</sup> Osoloso odoo abo Yesu ma hamamee dadagamo silesibili ee ma kulodu odoo heeso Yesu mapoo egeesee takaso, "Lodee, a no dadalai goomogo. Esino nayo epedee amapoo beame tenee, a mo ma toga bouleiya." dee takaso.

<sup>22</sup> Esem Yesuye nei yimapoo egeesee takaso, "No a deede sibe. Tei tele poogoo odoo ee odoo wedia masi doso. Esiga diayo dia odoo wedia eyo kou ee boulei tekepo," diso.

### Yesuye i sabolo howo ki sabolo hamaga taka

(Maka 4:35-41, Luka 8:22-25)

<sup>23</sup> Esem Yesu o hamamee dili odoo sabolo abei mapoo meilesi du mapoo dalaga poogoloso diyadeeso. <sup>24</sup> Diba diyadagamolome, haga bologelega i toowa sibume, howo ki toowa simiso. Osoloso howo ki toowa oso sibulone dibada du ma kulodu howo sasooso. Esino Yesu du ma kulodu tiameleeso. <sup>25</sup> Esem Yesu o hamamee dili odoo oso dileso Yesu tidibugulone yimapoo egeesee takaso, "Lodee, nayo iba pidi. Iba howoso nalasoo!" dee takaso.

<sup>26</sup> Esem Yesu yo tia hogabuloso dimapoo egeesee takaso, "Niba kaseega haga ka ebiala? Niyo tei too diya pepooko," diso. Osoloso yayo toboloso i sabolo howo ki sabolo koodobilame to kitulugu sabolo takaso. Esem i sabolo howo ki sabolo omapoo koodobume, abei see howo gie paso.

<sup>27</sup> Esem Yesu o hamamee dili odoo oso goo hagee ogoloso howoogadolone egeesee takaso, "Odoo hagee ogoo odoo bele? Poo sabolo osoloso howo ki sabolo oso o to mapoo duloso koodobiaso," dee takaso.

### Yesuye odoo bo holo pala bakadio tekepo pa

(Maka 5:1-20, Luka 8:26-39)

<sup>28</sup> Osoloso Yesu abei hodiokoo daboogoloso Gadala odoo eyo mi mapoo dileso peledabaso. Yo omapoo dileso peledaboome, odoo bo holo pala bakadio oso

odoo bi maga yimapoo sibadeeso. Odoo bakadio ha-gooso halabagamo silesibulone diya kitulugu sabolo silesibume, mosobia odoo oso wedia eyo bi eli omaga koo silesibili. <sup>29</sup> Esem odoo bo holo pala oso Yesu mapoo sibilesi toso neligidi egeesee takaso, "Godeeyo owolo, nayo imapoo ogoo goo moodoolame ka simiyo? No Godeeye beame magoo mapoo sibile-ga wulo domo mapoo iba ee tokenee palame ka simiyo?" diso.

<sup>30</sup> Diayo tebisamelee koola mapoo be hu mooloo-goodoo toowa oso mi namo silesibiso. <sup>31</sup> Osoloso bo holo oso Yesu mapoo howolone egeesee takaso, "Nayo iba peegoo hasisobuguga, iba be ma kulodu galaga di dee takee," diso.

<sup>32</sup> Esem Yesuye diba be ma kulodu galagadi diso. Egeesee seemelee domo omapoo odoo bakadio hagee bia dia kuloduga bo holo peegoo galagadileso be ma kulodu galagadiso. Esem be mooloo-goodoo susuga oso godobia maga kukulo meilesi, howomoo wediaso.

<sup>33</sup> Be bali odoo oso goo hagee ogoloso, saga o mosobia mapoo hoguodileso be mapoo goo peledaba sabolo osoloso odoo bakadio tekepo pa goo ee oposusumo sileeso. <sup>34</sup> Esem mosobia omapoo debeli odoo susuga oso Yesu agalame diyadeeso. Diba dileso yo ogoloso yimapoo howolone egeesee takaso, "No ibada mi hamaga peegoo di," dee takagameleeso.

### Yesuye odoo su kakawa poogoo tekepo pa

(Maka 2:1-12, Luka 5:17-26)

**9** Osoloso see Yesu o hamamee dili odoo sabolo du ma kulodu meilesi bulumaloso o middee Kapeniym mapoo dalo soowaso. <sup>2</sup> Diba omapoo dalo sooweleso peledaboome, odoo aboso odoo su kakawa poogoo ee kida mapoo tiediloso Yesu mapoo imado sibadeeso. Esem Yesuye diayo tei too goo ee ogoloso odoo su kakawa poogoo yimapoo egeesee takaso, "Emegei, no howaleege. Nee goo tokenee ee olo hapoloso boobado buguso," diso.

<sup>3</sup> Esino tei eligili odoo abo oso Yesuye egeesee taka duloso gowoolone diesono egeesee takaso, "Odoo ha-gooso Godee bolo takoo," diso †.

<sup>4</sup> Esino Yesu diayo goo goolee olo ogoloso egeesee takaso, "Niba kasee maga ayo taka goo mapoo dooboo goolone diya gowoolone ka dabala?" <sup>5</sup> Niba odoo su kakawa poogoo hagee ege. Yimapoo goo kasee takalai oso sebe ka mololo? Ayo odoo su kakawa poogoo mapoo 'Nee tokenee ayo olo boobado buguso,' dee takooga, o tokenee boobado bugu ee niyo gooleedalame. Esino ayo yimapoo takoo, 'No toboloso nee kida toloso di,' daga, yo toboloso duga, odoo tekepo peli kitulugu amapoo molo doloso niyo gooleedalaiso. <sup>6</sup> Esino Odoo Holo amapoo kitulugu olo teneeso, mi toowa hamapoo goo tokenee hapoloso boobado bigilei goo ee niyo ogoloso gooleedalame,

† Tei eligili odoo diba Yesu yo Godeeyo owolo, osoloso goo tokenee hapalai kitulugu Godeeye tenee yimapoo moloso doloso tei tele.

ayo nimapoo eligileiso." Osoloso yayo odoo su kakawa poogoo mapoo egeesee takaso, "No hogabuloso nee kida toloso mosopoo di," diso. <sup>7</sup> Esem e odoo su kakawa poogoo toboloso o mosopoo diso. <sup>8</sup> Esem e odoo susuga oso goo hagee ogoloso howoogadolone Godeeyo hu dokodoo poudulone debeiso. Bei, Godeeye kitulugu hagee odoo mapoo tenee ogoloso.

### Yesuye Matiyu idoo

(Maka 2:13-17, Luka 5:27-32)

<sup>9</sup> Goo hagee koodobume Yesuye dulone egeino, tekisi molee teli odoo Matiyuye tekisi molee mageli moso ee ma kulodu badoboome egeiso. Osoloso Yesuye yimapoo egeesee takaso, "Ama hamamee sibe," diso. Esem e yo toboloso Yesuye di hamamee diso.

<sup>10</sup> Yesu o hamamee dili odoo sabolo Matiyuwo mosopoo peleso nei nolone doboome, tekisi molee teli odoo sabolo osoloso tokenee teli odoo oso sibilesi dibolo mooloogoodoloso nei nolone debeiso. <sup>11</sup> Esino Pelisi odoo oso goo hagee ogoloso gowoolone Yesuwo hamamee dili odoo mapoo egeesee takaso, "Bei kasee maga nibada eligili odoo oso tekisi molee teli odoo sabolo osoloso tokenee teli odoo sabolo nei nolone ka badabala?" diso.

<sup>12</sup> Esem e Yesuye to hagee duloso nei egeesee takaso, "Odo paile poogoo ee melesenee neli odoo mapoo koo diya. Esino hedebe odoo paigiga oso melesenee neli odoo mapoo ka diya. <sup>13</sup> Esiga Godeeyo to booka ma hogugu oso egeesee takooso, 'Emegei sooloo dolone nei pidi nei pidi dolone dabalai goo ee ayo diya gooleeso. Esino nei niyo amapoo gala hu woloso tenelai goo ee ayo haga koo gweli,' dee takooso. Esiga niyo dileso to hagee takoo goo eyo bei medee gooleede. Bei, ayo simi hagee, Godeeyo howo woola tekepo teli odoo ee gilimalame ka sibile. Esino tokenee teli odoo ee gilimadoloso Godee mapoo sibilame ka simi," diso.

### Yesuye nei tei doloso debeli goo ee eligi

(Maka 2:18-22, Luka 5:33-39)

<sup>14</sup> Beeame heeso Yoneeyo hamamee dili odoo oso sibilesi Yesu mapoo egeesee takaso, "Ibulo osoloso Pelisi odoo sabolo Godee mapoo takolone dobolone nei tei doloso debeliso. Esino bei kasee maga nee hamamee dili odoo ee nei tei delega ka dabala?" diso.

<sup>15</sup> Esem e Yesuye dimapoo wudu takolone nei egeesee takaso, "Sobo hulei odoo oso sobo hulame nei mopoodoo doloso o odoo gilimileiso. Egeeseega o odoo susuga sibilesi gooholone nei tei doloso dabalaisomo? Haye. Diba goomoga sabolo sobo huli odoo sabolo hodobo dobolone nei nolone hodobo dabalaiso. Esino beeame heeso sobo huli odoo ee dimaga peegoo ido duga, diba nei tei doloso dabalaiso."

<sup>16</sup> Yesuye wudu takolone see egeesee takaso, "Edebeeyo dugo nape mapoo dugo dia koodoloso omapoo opodoloso koo dusiya. Bei, dugo egee hapoloso magooga, dugo dia oso gawoolone sesegawe oso, dugo nape ee tologodoloso ou toowa moodoolaiso. <sup>17</sup> Os-

oloso see edebeeyo wain i dia ka tolo gout be koloso moodoo nape mapoo koo salama seeya. Bei, wain i dia oso kitulugu oso ka tolo be gout koloso moodoo nape ee gabuguga, wain i ee hodalaiso. Osoloso ka tolo gout be koloso moodoo ee tokenee palaiso. Esiga wain i dia ee medee ka tolo gout be koloso moodoo dia mapoo salama salai tekepo. Egeeseega wain i sabolo osoloso ka tolo gout be koloso moodoo sabolo tokenee palaime."

### Yesuye sobo holo sabolo osoloso sobo hee tekepo pa

(Maka 5:21-43, Luka 8:40-56)

<sup>18</sup> Yesuye Yoneeyo hamamee dili odoo mapoo to os- ee takomolome, howo gisili moso gibadeli odoo oso sibilesi Yesuwo homo beiyopoo gawuloso badolone egeesee takaso, "Mo sobo holo epedee taso. Esiga nayo sibilesi yo o gie badeli see talame nee deeso sige," diso. <sup>19</sup> Esem e odoo ogoso toboloso dime, Yesu o hamamee dili odoo sabolo tebisaloso yibolo hodobo diso.

<sup>20</sup> Diba osee diyadaga molome, sobo hee aso woolooma koodobilega dugo 12 ma kulodu badebei oso Yesuwo dugo mapoo sigilame yima hamamee sibilesi egeesee gooleeso, "Ayo dugo Yesuye ka eyo su mapoo wulo sigoga, a tekepo palaiso," dee gooleeso. Osoloso hegi sibilesi sigeso.

<sup>22</sup> Esem e epedee omapoo Yesu bidi toboloso sobo ogoloso yimapoo egeesee takaso, "Mo holo, no howaleege. Nayo amapoo tei too maga no olo tekepo paso," diso. Esem e epedee omapoo sobo egee olo tekepo paso.

<sup>23</sup> Osoloso Yesu see abaga howo gisili moso gibadeli odoo eyo mosopoo palaso. Diba omapoo peleso egeino, odoo aboso goohole sabolo dobolone bogobou masi gawulone doboome egeiso. Esem e odoo aboso pupusigameleeso. <sup>24</sup> Yesuye goo hagee ogoloso dimapoo egeesee takaso, "Niba peegoo diyadee. Sobo holo hagee koo tamoloso. Esino yo wulo tiamolo," diso. Esem e diayo Yesuwo to duloso tei telega poogoloso wulo yiligameleeso. <sup>25</sup> Esino Yesuye odoo susuga peegoo diyadee doloso sobo holo oso tamelee moso ee ma kulodu peleso o dee mapoo tooso. Esem e sobo holo tamelee oso ta maga see hogabiaso. <sup>26</sup> Esem e mi su koola omapoo debeli odoo mapoo goo hagee dudobugoso.

### Yesuye odoo howo neliga sabolo osoloso odoo to koo keli ee tekepo pa

<sup>27</sup> Yesu moso omaga miyomoo meilesi dimeleeno, odoo howo neliga bakadio oso yima hamamee toboloso dulone toso neligidi takolone egeesee takaso, "Deibidiyo amawe †, nayo iba sooloo dologa, iba pidi," dee takomo diyadeeso.

<sup>28</sup> Osoloso Yesu yo see moso kulodu polome, odoo howo neliga bakadio oso yayo badebei mapoo sibadeeso. Esem e Yesuye dimapoo egeesee takaso,

† Deibidiyo amawe deli hu eyo bei ee Godeeye hudi magoo dolone takooso.

“Niba tei tosome, ayo niba tekepo moodoolai a tebia?”  
dee takaso. Esemé diayo to nei egeesee takaso, “O,  
Lodee. Iba tei toso,” dee takaso.

<sup>29</sup> Esemé Yesuye dibada howo mapoo sigolone  
egeesee takaso, “Niyo amapoo tei too goo maga niyo  
goomoga goo ee peledabalaiso,” diso. <sup>30</sup> Esemé dibada  
howo ee tekepo paso. Esino Yesuye to kitulugu sabolo  
dimapoo egeesee takaso, “Niyo dilesó goo hagee  
odoo abo mapoo na takee,” diso. <sup>31</sup> Esino odoo baka-  
dio oso mi su koola omapoo debeli odoo susuga  
mapoo Yesuwo goo ee oposusumo diyadeeso.

<sup>32</sup> Odoo howo neliga tekepo pa bakadio oso epedee  
omaga peegoo diyadaga molome, odoo aboso odoo  
bo holo pala Yesu mapoo ido simiso. Odoo hagee bo  
holoso yima kulodu badolone, to kelega badeliso.

<sup>33</sup> Esino Yesuye bo holo ee yimaga peegoo ha-  
sisobugume, yo see to keiso. Esemé odoo susuga oso  
goo hagee ogoloso howoogadolone egeesee takaso,  
“Iba Isalael mi ma kulodu daga goo hageesee egele,”  
dee takaso.

<sup>34</sup> Esino Pelisi odoo oso egeesee takaso, “Bo holo dia  
wiligi odoo oso Yesu mapoo kitulugu teneega, yayo ki-  
tulugu omaga bo holo peegoo hasisobugulone ka si-  
lo,” dee takaso.

#### Yesuye odoo susuga diya sooloo deli

<sup>35</sup> Osoloso Yesuye mi susuga ma kulodu silone, Yu  
odoowo howo gisili moso susuga ma kulodu to tekepo  
Godeeye wiligi doloso badeli goo ee eligimo sileeso.  
Osoloso yayo odoo paigiga susuga tekepo poomo  
sileeso. <sup>36</sup> Egeeseelone Yesuye odoo susuga ogoloso  
diya sooloo dalaso. Bei, diba pidili odoo mauwe goo  
tiadoloso dobolone, sipi beso odoo diba bali mauwe  
debeli egeesi masi debeiso. <sup>37</sup> Esemé Yesuye o  
hamamee dili odoo mapoo egeesee takaso, “Homolee  
ma kulodu nei susuga olo bi moodooloso goolai ee  
moloso. Esino nei ee gooloogalai tou teli odoo haga  
beinee. <sup>38</sup> Esiga homolee gibadeli odoo mapoo woose,  
yayo o homolee ma kulodu nei gooloogalame tou teli  
odoo abo diye dalame,” diso.

#### Yesuye odoo 12 hesiga

(Maka 3:13-19, Luka 6:12-16)

**10** Yesuye o hamamee dili odoo 12 gilimadoloso,  
yayo dimapoo kitulugu teneeso, diayo silesibu-  
lone odoo susuga dima kulodu bo holo paladee ee  
peegoo habuguloso, odoo paigiga susuga tekepo  
palame.

<sup>2</sup> Esiga Yesuye diye di odoo 12 hagee bia dia hu ee  
hagooso. Saimon, o hu hee Pita, osoloso omolo Endu-  
lu, osoloso Sebidiyo owolo bakadio Yemes dio Yonee  
dio, <sup>3</sup> osoloso Pilipi, osoloso Batolome, osoloso Tomas,  
osoloso tekisi molee teli odoo Matiyu, osoloso Alpiye-  
seeyo owolo Yemes, osoloso Tadiyes, <sup>4</sup> osoloso Loum  
gamalee mapoo ha teli odoo Saimon, osoloso Yudas-  
Iskaliyot (yayo hamamee Yesu ha teli odoo dimapoo  
tiasalaiso).

#### Yesuye odoo 12 diye di

(Maka 6:7-13, Luka 9:1-6)

<sup>5</sup> Yesuye odoo 12 hagee bia diye dolone dimapoo  
egeesee takaso, “Niyo duga, Yu odoonee mapoo os-  
oloso Samaliya odoo mapoo na di. <sup>6</sup> Esino niba Isalael  
odoo mapoo di. Bei, diba sipi be hu oso diba bali odoo  
mauwe debeli egeesi masi doso. <sup>7</sup> Esiga niyo dilesó  
Godeeyo to egeesee takee, ‘Godeeye wiligi doloso  
badeli goo ee olo koola tooooso,’ dee takomo  
diyadee. <sup>8</sup> Egeeseelone odoo paigiga susuga tekepo  
pe, osoloso odoo wedia mapoo see gie badeli tenee,  
osoloso odoo agagisa bia see tekepo pe, osoloso odoo  
ma kulodu bo holo paladee peegoo hasisobigi. Ayo  
nimapoo kitulugu hagee nei mauwe teneeso. Esiga  
niyo odoo susuga pidimo silone, tou eyo nei talame na  
howamo silesibe.

<sup>9</sup> Niyo dulone molee sabolo, osoloso o sabolo, os-  
oloso sedi bakadio sabolo, osoloso homo mapoo kali  
bi hee sabolo, osoloso susu sabolo toloso na diyadee.  
Bei, tou teli odoo ee dia tou eyo nei talai tebiliso.

<sup>11</sup> Niyo mi hee mapoo dilesó, mi omapoo odoo hee  
niba medee egeli esie. Niba odoo egeesee ogoloso yi-  
bolo hodobo o mosopoo debée. Osoloso mi egee poo-  
goo dilega osee dobolone, yibolo o moso omapoo de-  
bee. <sup>12</sup> Osoloso niba moso hee mapoo ido pologa, niyo  
moso omapoo debeli odoo mapoo emegei di to  
egeesee takee, ‘Godeeyo mesie goo oso nibolo mele  
dee.’ <sup>13</sup> Egeeseega moso ee ma kulodu debeli odoo  
oso emegei dolone mesie sabolo niba moso kulodu  
iyado pologa, Godeeyo mesie goo oso dibolo malaiso.  
Esino diayo niba dibada moso kulodu iyado pelega  
poogooga, Godeeyo mesie goo oso dibolo malaimo.  
<sup>14</sup> Esiga niba mi hee mapoo duga, edebeeyo niba idile-  
ga poogoloso nibada to mapoo mesilega poogooga,  
mi egee poogoloso dulone, megegu nibada homo  
mapoo mologa omapoo te, Godeeye komonolone  
dimapoo dia goo tokenee eyo nei tenelai goo ee  
gooleedalame. <sup>15</sup> Esiga ayo nimapoo taka, mosodei ka-  
so niba sibadeega, ogoloso goomoga sabolo niba  
iyadelega poogooga, nei Godeeye meedilei beeamo  
omapoo, dala toowa diayo talai oso Sodom bia sabolo  
osoloso Gomola bia oso dala talai ee dagadileiso.”

#### Dala egee sibo eyo goo

(Maka 13:9-13, Luka 21:12-17)

<sup>16</sup> “Esiga ayo niba sipi be hu masi dobu so kamanali  
ma kulodu diye deeso. Esiga niba hebise masi  
dobolone medee goolee sabolo bolone ka debée. Os-  
oloso niba molo masi dobolone niyo debei ma kulodu  
goo tokenee mauwe debée.

<sup>17</sup> Esiga niba obeeamo. Edebeeyo niba toloso goo  
meedili moso mapoo ido polo dolone dabalaiso. Os-  
oloso niba dibada howo gisili moso mapoo ido peleso  
wooloogolone dabalaiso. <sup>18</sup> Osoloso niba mo goo ma-  
ga gamalee wiligi odoo tebisa sabolo osoloso wiligi  
odoo toowa tebisa abo dia mudugiyopoo ido peleso  
omapoo holoogalaiso. Esino niyo omapoo peleso mo

goo ee dimapoo osoloso Yu odoonee mapoo takolone dabalaiso. <sup>19</sup> Egeesee ma kulodu edebeeyo niba goo meedili moso mapoo ido pologa, niyo takalai goo ee haga na goolee. Bei, beeame omapoo Dio Tei oso niyo takalai goo goolee tekepo ee nimapoo tenelaiso. <sup>20</sup> Esiga niba niso goolee takalaime, esino Nama Godeeye Dio Tei nimapoo tenee oso nibolo toboloso goo goolee tekepo teneega niyo egeesee takalaiso.

<sup>21</sup> Beeame omapoo edebeeyo emei dio omolo dio wooloomalame diba goweli odo mapoo tiasalaiso. Osoloso amaye owolo mapoo egeesee salaiso. Osoloso owoloye dibada ama dio owee dio mapoo mesilega poogoloso diba wooloomalame tiasalaiso. <sup>22</sup> Bei, niyo amapoo tei too goo omaga odo susuga oso nimapoo hegia toowa malaiso. Esino edebeeyo eyo tei too kibiloso badolone hoo poogoo mapoo dilesa peledobooga, yo badoboso kookaiyo gie badeli talaiso. <sup>23</sup> Esiga odo susuga oso nimapoo dala teneega, mi omaga mi hee mapoo kukulo diyadee. Esino ayo nimapoo taka. Niyo egeeseelone Isalael mi toowa ma kulodu mi pepooko susuga mapoo Godeeyo to osee takomo silesiboga, Odo Holo ayo omapoo sibileiso.

<sup>24</sup> Esiga hamamee dili odo oso dia eligili odo ee dagadilesa koo badoso. Osoloso tou teli odo oso dibada wiligi odo taba ee dagadilesa koo doso.

<sup>25</sup> Egeesee ma kulodu dibada eligili odo mapoo goo heeso peledaba hedebe egeesee oso o hamamee dili odo dimapoo peledobooga, diba goomoga sabolo dabalai tekepo. Osoloso wiligi odo taba mapoo goo heeso peledaba hedebe egeesee oso o tou teli odo dimapoo peledobooga, diba goomoga sabolo dabalai tekepo. A nibada wiligi odo doloso ka badoso. Esiga odo aboso a hu tokenee Belsebul † hediga, niba nosee hu diya tokenee hedigileiso.”

### Mi odoobolo na ebi

(Luka 12:2-7)

<sup>26</sup> “Esiga niba goweli odo ee bolo haga na ebi. Bei, goo susuga mada egee molo see woola peledabalaiso. Osoloso edebeeyo koo duli goo ee see woola takooga duleiso. <sup>27</sup> Esiga ayo nibolo silone goo abo hedebe nimapoo takeli susuga ee see niyo woola yiligebigi. Osoloso ayo nimapoo goo hee mada dulu mapoo takooga, goo egee niyo moso omu ma dokodoo peleso see woola takee. <sup>28</sup> Esiga niba odo nimapoo goweli ee bolo haga na ebi. Bei, diba hedebe su wooloomali ee gooleedoo, esino dio wooloomalai diba tebile. Esino niba hedebe Godeebolo obulone ka debee. Bei, yayo nibada su sabolo osoloso dio sabolo tokenee palame, Dou mi mapoo toodalai yo tebia. <sup>29</sup> Esiga niba goolee, só pepuso bakadio ee wulo molee ko ta hede-boso teli. Esino ee ma kulodu só pe heeso talai ee ibada Ama Godeeye koo goomogoga, só pe egee talaimo. <sup>30</sup> Esiga nibada wiligi mapoo wudu susuga egee molo, Godee yo olo gooleedoo. Bei, yayo susuga olo hesigaso. <sup>31</sup> Esiga niba haga obugulone na debee. Bei,

† Belsebul ee Saiteneeyo hu hee.

Godeeyo howo woola sóso goo toowa koo moloso. Haye. Niyo goo toowa ka moloso.

<sup>32</sup> Esiga odo agayo odo howo woola tobudulone yayo amapoo tei too goo ee yiligebuguga, nei ayo mo Ma Godee Kei mi ma dokodoo egee bado eyo howo woola yo mo odo dalaiso. <sup>33</sup> Esino odo agayo odo howo woola tobudulone yayo amapoo tei tele poogoo goo ee woola yiligebuguga, nei ayo mo Ma Godee Kei mi ma dokodoo egee bado eyo howo woola yo mo odoonee dalaiso.”

### Domo pilei goo

(Luka 12:51-53; 14:26-27)

<sup>34</sup> “Esiga niba ayo mi toowa hamapoo mesie goo tosi-mi dee na goolee. Haye, ayo mesie goo tosi-bile, esino domo pilame ka simi. <sup>35</sup> Esiga ayo simi goo eyo bei egeesee moloso.

Giso holo oso amabolo domo pileiso.

Osoloso sobo holo oso oweebolo domo pileiso.

Osoloso gisowo osobo oso odoowa dio domo pileiso.

<sup>36</sup> Esiga egeesee ma kulodu nee soosooso namapoo ha teli odo doloso dabalaiso.

<sup>37</sup> Edebeeyo ama sabolo, owee sabolo, owolo giso holo sabolo, osoloso sobo holo mapoo diya goolee sabolo badolone, hee a goolee pepooko mologa, yo ayo di hamamee deede sibilei tebile. <sup>38</sup> Osoloso odo agayo talai sabolo dala toowa talai sabolo goo medee moodelega poogoloso, ayo di hamamee dedelega poogoga, yo ayo di hamamee deede sibilei tebile.

<sup>39</sup> Esiga edebeeyo o gie badeli eyo nediliyo balai daga, o gie badeli ee osugobalaiso. Esino edebeeyo mo goo maga o gie badeli osugobooga, yo badoboso kookaiyo gie badeli talaiso.”

### Nei tekepo talai

(Maka 9:4)

<sup>40</sup> “Edebeeyo niba o mosopoo gilimado pologa, yayo a ido poloso. Esiga edebeeyo o mosopoo a ido pologa, yayo mo Ma Godee a diye di ee ido poloso. <sup>41</sup> Osoloso edebeeyo Godee maga to toloso kokodo takomo sili odo ee ogoloso, o mosopoo ido pologa, yo Godee maga to toloso kokodo takomo sili odo oso nei teli yinosee hedebe egeesi masi talaiso. Osoloso edebeeyo Godeeyo howo woola odo tekepo ogoloso, o mosopoo ido pologa, yo Godeeyo howo woola odo tekepo oso nei teli yinosee hedebe egeesi masi talaiso. <sup>42</sup> Osoloso edebeeyo mo hamamee dili odo hee wuluge ogoloso yimapoo bi pepooko wulo howo egesi keneega, yo nei toowa talaiso. Esiga hagee tei goo.”

**11** Yesu o hamamee dili odo 12 mapoo goo hagee taka koodobuloso see Gelili mi toowa ee ma kulodu Godeeyo to takomo silame diso.

### Yesu dio osoloso Yonee odo howo oluguli dio

(Luka 7:18-35)

<sup>2</sup> Yonee odo howo oluguli oso neliga moso ma kulodu badolone, Kelisoye goo tomo silee duloso o



hamamee dili odoo abo Yesu mapoo diye diso. <sup>3</sup> E-eme diba dilesu Yesuye badebei mapoo peledoboloso yimapoo egeesee takaso, "Yoneeye iba namapoo diye dolone to egeesee takeeyena, 'No tei Keliso iyo hagee bamolo odoo osomo? O, iba odoo hee bamalaiyo?'" diso.

<sup>4</sup> Esem Yesuye nei dimapoo egeesee takaso, "Niba see wedi dilesu niyo egei goo sabolo osoloso niyo du goo ee Yonee mapoo takee. <sup>5</sup> Bei, odoo howo neliga oso see medee ogowa. Osoloso odoo bagi daga poo-goo sabolo see tekepo poloso ka silesiba. Osoloso odoo agagisa bia sabolo tekepo poloso ka silesiba. Osoloso odoo dulu tabaga onosee tekepo poloso to taka see duliso. Osoloso odoo wedia sabolo hogooga bu-losu see silesiboso. Osoloso to tekepo hagee bi mauwe odoo oso duluga moloso. <sup>6</sup> Esiga odoo agayo ayo goo moodoo ee ogoloso diayo amapoo tei too goo ee pegelega poogooga, Godeeye dimapoo goomoga goo tenelaiso."

<sup>7</sup> Yonee o hamamee dili odoo oso see wedi diyadeeme, Yesuye odoo mooloogoodoo mapoo Yoneeyo goo takalame bei mooloogooso. Osoloso yayo egeesee takaso, "Niba miwe poogoo mi mapoo ogoo goo agalame ka diyo? Pooso sibulone obu dabisa ee agalame ka diyo? <sup>8</sup> Niba edebeeyo dugo tekepo kaloso badoboome ee agalame ka diyo? Haye. Bei, dugo tekepo kalagali odoo ee wiligi odoo tebisa oso debeli moso tekepo mapoo debeli. <sup>9</sup> Esino niba wulo Godee maga to tolosu kokodo takomo sili odoo ee agalame ka diyo? O. Niyo dilesu egei odoo Yonee hagooso Godee maga to tolosu kokodo takomo sili odoo daga hoogoo debeli ee yayo dagadilesu ka badoso. <sup>10</sup> Bei, Godeeyo to booka mapoo hogugu oso egeesee egee takoo ee Yoneeyo goo ee takooso, 'Ayo mo to tosili odoo yo daga malalo diye dalaiso, odoo susuga oso nayo sibilei mapoo mopoodoo doloso debeeye dalame,' diso.

<sup>11</sup> Esiga ayo nimapoo taka. Odoo daga hoogoo debeli susuga ee Yoneeye dagadilesu ka badoso. Esino edebeeyo Godeeye wiligi doloso badeli goo mapoo odoo wuluge oso Yonee dagadilesu ka badoso. <sup>12</sup> Esiga odoo howo oluguli Yoneeye Godeeyo to takomo silee beeamo omaga bei mooloogoloso abaga simino epedee hamapoo tokenee teli odoo oso ha teli odoo masi Godeeye wiligi doloso badeli goo ee tokenee palame diya kitulugusu. <sup>13</sup> Yonee sibilega badoboome, Moseseeye eligi goo sabolo osoloso Godee maga to tolosu kokodo takomo sili odoo susuga oso hogugu oso Godeeye wiligi doloso badeli goo ee takemeleeso. <sup>14</sup> Esiga niyo to diayo taka hamapoo tei toga, niyo Yonee see Ilaya dalaiso. Bei, Godeeyo to booka mapoo hogugu oso Ilaya sibilei goo ee takemeleeso. <sup>15</sup> Niba dulubolo, esiga ayo hagee takoo medee hoodo dui."

<sup>16</sup> Osoloso Yesuye see egeesee takaso, "Odoo epedee beeamo hamapoo egee do odoo ee kasee masi dosomo? Diba holaiso masi go domopoo dobolone emegei dimapoo nei takoo nei takoo dolone dobolone egeesee takagameliso, <sup>17</sup> 'Iyo goomoga ko-

saiya poume, niba hepele. Osoloso iyo goohele ko-saiya poume, niba pisile,' diso. <sup>18</sup> Niba odoo egeesi masi doso. Bei, Yonee odoo howo oluguli yayo sibilesu nei haga toowa namo sile, osoloso wain i keesoo nele. Esino niyo yo bo holo paladoo, dee takeliso. <sup>19</sup> Osoloso hamamee Odoo Holo a olo simiso. Ayo sibilesu wo sabolo wain i sabolo namo sileeme, niyo a nei sabolo yugune sabolo dooboo nali odoo, dee takeliso. Osoloso niyo a tekisi molee teli odoo sabolo, osoloso tokenee teli odoo sabolo hedebe doloso ka badeli deliso. Esino odoo agayo Godeeyo goo goolee tekepo gooleedoloso tomo siloga, yayo Godeeyo goo goolee ee tekepo dolone ka eligiso."

### Yesuye odoo tei tele poogoo eyo goo taka

(Luka 10:13-15)

<sup>20</sup> Yesuye mi abo mapoo goo toowa opusomo di moodoomo sileeme, odoo mi omapoo debeli oso dia goo tokenee su wudelega poogoome, yayo odoo egee bia dia goo ogoloso dimapoo diya takolone egeesee takaso, <sup>21</sup> "Kolasin bia sabolo Betesaida bia, dala toowaso niba bamoloso. Bei, ayo nibada mi mapoo goo toowa mudu opusomo opusomo di ee moodoog-amo silee egesi masi Taya bia mapoo osoloso Saidon bia mapoo moodoogamo silee diepi, diba haga booloogelega, dibada goo tokenee maga miligi pialoso debeliyo. Osoloso diayo dibada goo tokenee maga miligi pia goo ee eligilone dugo tokenee kelekaloso dosu holugaloso silesibiliyo. <sup>22</sup> Esino ayo nimapoo taka, Godeeye goo meedilei beeamo mapoo dala toowa Kolasin bia sabolo osoloso Betesaida bia oso talai oso Taya bia sabolo osoloso Saidon bia oso talai ee dagadileiso. <sup>23</sup> Osoloso Kapenyum mosobia niba Kei mi ma dokodoo ido palaiso, dee goolone ka dosomo? Haye. Niba tolosu Dou mi mapoo toodalaiso. Ayo nibada mi mapoo goo toowa mudu opusomo di moodoog-amo silee egeesi masi Sodom mi mapoo moodoog-amo silee diepi, Sodom mi tokenee pelega epedee hamapoo osee meliyo. <sup>24</sup> Esino ayo nimapoo taka, Godeeye goo meedilei beeamo omapoo dala toowa Kapenyum bia niyo talai oso Sodom bia oso talai ee dagadileiso."

### Amapoo sibilesu hese

(Luka 10:21-22)

<sup>25</sup> Esem Yesuye egeesee takaso, "Ma, Kei mi sabolo osoloso mipoo sabolo nayo wiligi doloso ka badoso. Esiga a namapoo goomogo. Bei, nayo wiligi doloso badeli goo mada egee molo ee, odoo goo goolee toowa mapoo yiligebigile. Esino nayo goo goolee dele poogoo odoo mapoo yiligebugusu. <sup>26</sup> O. Tei takoo, Ma. Goo hagee nayo goomoga goo oso."

<sup>27</sup> Yesuye see tobu egeesee takaso, "Mo Maye goo susuga amapoo olo teneeso. Esiga odoo heeso Owolo a gooleede. Esino hedebe mo Maye Owolo, a ka gooleedoo. Osoloso odoo heeso mo Ma gooleede. Esino hedebe Owolo ayo mo Ma ka gooleedoo. Odoo ogu bia mapoo Owolo ayo mo Mayo goo ee yiligebigil-

ame goomogoga, odoo egee bia oso mo Mayo goo ee diba nose gooleedalaiso.

<sup>28</sup> Esiga edebeeyo hegi bi masi kadaloso silone kwa-su sabolo siloga, niba amapoo sibe. Egeeseega ayo nimapoo hasali tenelaiso. <sup>29</sup> Osoloso ayo eligi goo ee ogoloso mo goo peedee. Bei, a mesie odoo. Esiga niba hasalame amapoo sibe. <sup>30</sup> Bei, goo ayo eligi ee dadalai haga kodianee. Osoloso bi masi ayo nimapoo eimedilame egee molo ee diya poopeeya.”

**Pelisi odoo dia hasali beeame maga Yesubolo toso agadiga**

(Maka 2:23-28, Luka 6:1-5)

**12** Yu odoowo hasali beeame heeso, Yesu o hamamee dili odoo sabolo witi wo ko segei ee ma kuloduga diyadaga meleeso. Osoloso Yesu o hamamee dili odoo oso diya houdume, witi wo ko gooloogaloso nalagamo diyadeeso. <sup>2</sup> Esem Pelisi odoo oso goo hagee ogoloso Yesu mapoo egeesee takaso, “Bei kasee maga nee hamamee dili odoo oso iyo hasali beeame mapoo witi wo ko ka gooloogayo? Diayo ibada tei gababuoso,” diso.

<sup>3</sup> Yesuye nei egeesee takaso, “Deibidiye o odoo sabolo houdume diayo moodoo goo ee Godeeyo toso booka mapoo hogugu niyo hesigeleyo? <sup>4</sup> Bei, Deibidiye Godeeyo tei moso ma kulodu gadileso tei wo toloso o odoo sabolo neso. Esino tei wo hagee ibada tei ee dodolone Godee ogo osoloso odoo ogo doloso debeli odoo hedebe oso nali. Esino Deibidiye o odoo sabolo wo ne oso tei magoo ee gababiaso. <sup>5</sup> Osoloso Mosese-eye tei hogugu ma kulodu to hee hageesee egee takoo niyo hesigeleyo? Goo egee Godee ogo osoloso odoo ogo doloso debeli odoo oso hasali beeame mapoo tei moso ma kulodu dia tou teliso. Diayo goo egeesee moodeli oso tei magoo gababiliso. Esino Godeeye goo egee ogoloso tokenee dee koo takeli.

<sup>6</sup> Esiga ayo nimapoo taka, goo hee dia epedee hamapoo sibileso egee molo oso tei moso oso kitulugu ee dagadileso ka moloso. <sup>7</sup> Esiga Godeeyo to booka mapoo hogugu oso egeesee takooso, ‘Niyo emegei pidilei ono ayo diya goolone niyo nei amapoo gala wooloso teneli goo ee ayo haga koo gooleeso,’ diso.

Niyo to eyo bei medee kibiya gooleedoloso ka debei diepi, niyo mo hamamee dili odoo ee tokenee odoo dee takele pegeliyo. <sup>8</sup> Bei, niyo hasali beeame egee Odoo Holo ayo wilingi doloso ka badoso.”

**Yesuye odoo dee hodio seeseegedoo poogoo tekepo pa**

(Maka 3:1-6, Luka 6:6-11)

<sup>9</sup> Yesuye to taka hagee koodobuloso see omaga di-ayo howo gisili moso mapoo palaso. <sup>10</sup> Osoloso moso eyo kulodu odoo dee hodio seeseegedoo poogoo badoboome egeiso. Egeesee ma kulodu Pelisi odoo aboso Yesu tokenee odoo dalame eli esilone yimapoo egeesee takaso, “Ibada tei magoo oso takolone iyo

hasali beeame mapoo odoo tekepo palai tekepowa?” diso. †

<sup>11</sup> Esino Yesuye nei dimapoo egeesee takaso, “Nima kulodu odoo heeso o sipi be hedebe oso niyo hasali beeame mapoo wulu ma kulodu toodubuoga, yayo yo hudilega pagalaisomo? Haye. Yayo yo wulu ma kulodu badoga see hudileiso. <sup>12</sup> Esiga Godeeyo howo woola sipi beso goo haga toowa koo moloso. Haye. Edebeeyo goo toowa ka moloso. Esiga edebeeyo ibada hasali beeame mapoo goo tekepo talai ee tei mauwe.”

<sup>13</sup> Esem Yesuye odoo dee hodio seeseegedoo poogoo yimapoo egeesee takaso, “Nee dee seeseegedoo poogoo egee see hoodode,” diso. Esem odoo egee o dee see hoododeme, dee egee tekepo poloso o dee tekepo hodio egesi masi meleeso. <sup>14</sup> Esem Pelisi odoo oso goo hagee ogoloso komonolone dia howo gisili moso maga peegoo diyadeeso. Osoloso diayo dileso Yesu toloso woolame diesono to mouso.

**Yesu yo Godeeye hesia**

<sup>15</sup> Esiga diayo to mou goo ee yo olo gooleedoloso, Yesu yo see mi hee mapoo diso. Esem odoo susuga oso yo deedee diso. Esem odoo paigiga susuga dima kulodu melee ee yayo tekepo paso. <sup>16</sup> Osoloso yayo dimapoo to kitulugu sabolo egeesee takaso, “Niyo mo goo hagee odoo susuga mapoo na oposisiye,” diso. <sup>17</sup> Godee maga to toloso kokodo takomo sili odoo Aisayaye taka to sabolo tebiaso. Bei, yayo egeesee takaso,

<sup>18</sup> “Ege, hagee mo tou teli odoo.

Yo ayo hesia.

Ayo yo diya goolone

yimapoo diya goomogoso.

Ayo mo Dio yimapoo tenelaiso.

Osoloso tei goo ee yayo Yu odoonee susuga mapoo takalaiso.

<sup>19</sup> Osoloso yayo odoo hee sabolo toso agadigilone to boowoalime.

Osoloso yayo eli domopoo eligiga to neligidi takalaima.

<sup>20</sup> Osoloso yayo tiosi seegee magoo ee gobigileime.

Osoloso keme pepooko paimologa yayo semi-dileime.

Esiga odoo tei too kibile poogoo yayo egee pidimolo goo ee epedee pagalai mauwe.

Esino odoo susuga oso Godeeye goomoga goo ee dodomolo ogoloso omapoo koodobileiso.

<sup>21</sup> Esiga o hu maga Yu odoonee susuga oso diayo du-lone egee bamolo gie badeli ee talaiso.”

**Yesu dio Belsebul dio**

(Maka 3:20-30, Luka 11:14-23)

<sup>22</sup> Beeame omapoo odoo aboso odoo hee howo neli-ga mapoo bo pala oso to kelega badebei odoo ee Yesu mapoo ido simiso. Esem Yesuye yo tekepo paso. Es-

† - Pelisi odoo aboso Yesu mapoo hageesee takaso, bei, diayo tei goo ee dodolone dia hasali beeame mapoo odoo paiye ee moodoolai tei.

eme domo omapoo odoo egee olo howo puo ogoloso see to keiso. <sup>23</sup> Odoo susuga oso goo hagee ogoloso howoogadolone egeesee takaso, "Odoo hagee Deibidiyo amawe bele," diso.

<sup>24</sup> Esino Pelisi odoo oso goo hagee duloso egeesee takaso, "Yesuye Belsebul oso kitulugu maga bo holo peegoo hasiso bigiliso. Bei, Belsebul yo bo holo dia wiligi odoo," diso.

<sup>25</sup> Esino Yesuye diayo goolee goo ee gooleedoloso dimapoo egeesee takaso, "Mi toowa mapoo debeli odoo oso abo puloso dieso nediliyo ha toga, mi toowa egee malaime, tokenee palaiso. Osoloso soosoo heeso o, mosobia heeso abo puloso dieso nediliyo ha toga, diba dabalaima, tokenee palaiso. <sup>26</sup> Esiga Saiten oso bo holo peegoo hasiso buguga, dia mooloogoodoo ma kulodu abo puloso dieso nediliyo ha talaiso. Yayo egeesee seega, yayo wiligi doloso badeli goo oso kookaiyo osee malaisomo? Tokenee palaiso. <sup>27</sup> Esino ayo bo holo peegoo hasisobigili kitulugu hagee tei Belsebul oso kitulugu maga ka hasisimo silo daga, nibada hamamee dili odoo oso bo holo peegoo egee hasisimo silesibo kitulugu egee kamapoo teliyo? Esiga diayo takooga niyo amapoo egee takoo goo ee tei goonee, dee takalaiso. <sup>28</sup> Esino ayo Godeeyo Dio Tei oso kitulugu maga bo holo peegoo ka hasisimo siloso. Goo oso Godeeye wiligi doloso badeli goo oso olo nimapoo simi goo ee ka eligiso.

<sup>29</sup> Esiga odoo heeso kitulugu odoo eyo moso mapoo peleso bi heli talame gooleega, yo daga kitulugu odoo egee tiso tialogoloso magalaiso. Osoloso hamamee o moso kulodu peleso o bi heli talaiso.

<sup>30</sup> Esiga edebeeyo abolo tebelega poogooga, yayo amapoo ha tomoloso. Osoloso edebeeyo abolo odoo Godee mapoo gilimado sibilega poogooga, yayo odoo Godee maga peegoo hasisobugu domoloso. <sup>31</sup> Esiga ayo nimapoo taka. Goo tokenee susuga edebeeyo teli sabolo osoloso emegei dimapoo to tokenee takeli goo ee Godeeye hapoloso boobado bigileiso. Esino edebeeyo Dio Tei eyo goo maga to tokenee takooga, o goo tokenee egee Godeeye hapoloso boobado bigileime. <sup>32</sup> Osoloso edebeeyo Odoo Holo amaga to tokenee takooga, Godeeye o goo tokenee egee hapoloso boobado bigileiso. Esino edebeeyo Dio Tei eyo goo maga to tokenee takooga, yo goo tokenee moloso kookaiyo osee malai ee toso. Esiga o goo tokenee egee Godeeye hapoloso boobado bigileime."

### Homokoko maga homo o su ka gooleedeeya

(Luka 6:43-45)

<sup>33</sup> "Esiga homo tekepo oso homokoko tekepo peliso. Esino homo tokenee oso homokoko tokenee peliso. Esiga homo su susuga oso ko pa maga ka gooleedeeya. <sup>34</sup> Esiga niba tokenee odoo hebise masi dobolone niyo see goo tekepo takalai tebile. Bei, edebeeyo goo goolee dia sooloo ma kulodu egee molo ee dia magaso takooga woola yiligebigiliso. <sup>35</sup> Esiga goo tekepo teli odoo oso goo tekepo o goo goolee mapoo meli ee o magaso woola yiligebigiliso. Osoloso goo to-

kenee teli odoo oso goo tokenee o goo goolee mapoo meli ee o magaso woola yiligebigiliso. <sup>36</sup> Egeesee ma kulodu ayo nimapoo taka. Goo meedilei beame mapoo odoo susuga oso goo tokenee diayo taka goo eyo bei ee Godee mapoo woola yiligebigileiso. <sup>37</sup> Esiga Godeeye goo meedilei beame mapoo, to no takeli goo sabolo tebia nee goo meedileiso. Egeesee ma kulodu no to tekepo takomo sili daga, yayo no odoo tekepo dalaiso. Esino no to tokenee takomo sili daga, yayo no odoo tokenee dalaiso."

### Edebeeyo goo toowa opusomo di moodoo ee agalame goomoga

(Maka 8:11-12, Luka 11:29-32)

<sup>38</sup> Beeame heeso Pelisi odoo abo sabolo osoloso tei eligili odoo sabolo oso Yesuye badebei mapoo sibilesi egeesee takaso, "Eligili odoo, nayo kitulugu too egee tei Godee maga simidoo doloso gooleedalaiya, nayo goo toowa opusomo di hee moodee," diso.

<sup>39</sup> Esemee Yesuye nei dimapoo egeesee takaso, "Odoo epedee hamapoo egee do niba diya tokenee. Osoloso niyo amapoo tei talai goweliso. Esiga niyo ayo wulo goo toowa opusomo di moodoo ee agalame amapoo takeliso. Esino ayo nimapoo goo toowa opusomo di hee eligilei mauwe. Esino hedebe Godee maga to toloso kokodo takomo sili odoo Yonayo goo ono nimapoo eligileiso. <sup>40</sup> Yona beame bakadio hedebe di osoloso gesi bakadio hedebe di ee ma kulodu di toowa eyo gemedei ma kulodu badebeiso. Esiga Odoo Holo anoose beame bakadio hedebe di osoloso gesi bakadio hedebe di mapoo midoo ma kulodu ta malaiso. <sup>41</sup> Esiga Niniba odoo oso goo meedilei beame mapoo nibolo hodobo toboloso nibada goo meediloso, niba tokenee odoo dalaiso. Bei, Yonaye Godeeyo to dimapoo takeme, diayo dia goo tokenee maga goo su wuduloso miligi piaso. Esino ayo Yona dagadileso ka badoso. Esino ayo Godeeyo to nimapoo takeme, niyo duloso nibada goo tokenee maga goo su wuduloso miligi pile. <sup>42</sup> Osoloso goo meedilei beame mapoo Siba mi eyo wiligi odoo taba sobo onosee nibolo hodobo nibada goo meediloso niba tokenee odoo dalaiso. Bei, wiligi odoo taba Solomonoye eligi goo ee dulame yo eli sage abaga simiso. Esino ayo Solomonoye dagadileso ka badoso. Esino niyo mo to dulei ka gowooso."

### Bo holoso see wedi sibili goo

(Luka 11:24-26)

<sup>43</sup> Esiga bo holoso odoo maga peegoo gaduga, yo dilesi dobudu yayo badalai mi ee esiamo sileiso. Yo mi esiamo siloso koo ogoga, eyo nediliyo egeesee takalaiso, <sup>44</sup> 'A mawo daga badebei moso mapoo see wedi dileiso,' dee takalaiso. Osoloso yo see sibilesi ogoga, gelesi kadee doloso bi medee mopoodoo ma molo agalaiso. <sup>45</sup> Eseega yo see dobudu wedi dilesi bo holo diya kitulugu abo 7 gilimadoloso sibilesi moso omapoo dabalaiso. Egeesee odoo hagee eyo daga badebei poogoloso see diya tokenee badalaiso. Esiga

goo tokenee teli odoo epedee hamapoo egee do niyo daga debei poogoloso see diya tokenee dabalaiso. Bei, niyo ayo eligi goo mapoo tei tele poogooga."

**Yesuwo owee sabolo osoloso omolo dio**

(Maka 3:31-35, Luka 8:19-21)

<sup>46</sup> Yesuye odoo mooloogoodoo mapoo to osee takomolome, owee dio osoloso omolo dio sibilesa peegoo tebisamolone, yimapoo to takalame goomogaso. <sup>47</sup> Esememe odoo heeso Yesu mapoo egeesee takaso, "No ege, noowee dio osoloso nomolo dio namapoo to takalame sibilesa peegoo tebisamolone," dee takaso.

<sup>48</sup> Esino Yesuye nei yimapoo egeesee takaso, "Mo wee ogumo? Osoloso molo dio ogumo?" diso. <sup>49</sup> Esememe yayo o hamamee dili odoo dimapoo dee kou takolone egeesee takaso, "Niba ege, odoo egee bia ee mo wee osoloso molo dio oso. <sup>50</sup> Esiga edebee mo Ma Kei mi ma dokodoo badeli oso goomoga goo ee tomo siloga, odoo egee bia ee molo dio, osoloso mo booba dio, osoloso mo wee dio oso," dee takaso.

**Witi wo ko segei maga wudu taka**

(Maka 4:1-9, Luka 8:4-8)

**13** Beeame hedebe ogoso Yesu moso kuloduga peegoo dilesa Gelili abei pee mapoo meilesa bisa. <sup>2</sup> Yo omapoo badoboome, odoo susuga oso yayo eligi goo ee dulame yimapoo sibilesa diya mooloogoodooso. Esememe Yesu yo du mapoo dapoogoloso eligilone badoboome, odoo susuga mubiyodoga tebisamolone duluga meleeso.

<sup>3</sup> Osoloso yayo goo susuga maga wudu takolone odoo susuga mapoo eligilone egeesee takaso, "Niba dui. Beeame heeso odoo hee witi wo ko segalame diso. <sup>4</sup> Yo witi wo ko sogomo sileeme, ko abo eli domopoo misigedibaso. Esememe só aboso sibilesa neso. <sup>5</sup> Osoloso witi wo ko abo yugo kauwe mi mapoo misigediba ee bou saga pisigaso. Esino osoko pa oso dei moodoolone witi wo ko saga wediaso. Bei, too delaga. <sup>7</sup> Osoloso witi wo ko abo daga weti kauwe kadee mapoo misigedibaso. Osoloso bou pisigaso. Esino weti sabolo palaga tiso tiademe susuga wediaso. <sup>8</sup> Osoloso witi wo ko abo mi tekepo mapoo misigedibaso. Osoloso oso bou pisigaloso kakauwuloso ko diya palagaso. Egeesee ma kulodu witi wo ko aboso homokoko 100 egesi palagaso. Osoloso aboso 60 egesi palagaso. Osoloso aboso 30 egesi palagaso. <sup>9</sup> Odoo niba dulubolo, esiga to ayo hagee takoo medee dui!"

**Bei kasalame Yesuye wulo ka wudu takomo siliyo?**

(Maka 4:10-12, Luka 8:9-10)

<sup>10</sup> Osoloso Yesu o hamamee dili odoo oso sibilesa Yesu mapoo egeesee takaso, "Nayo kasalame odoo mapoo wulo ka wudu takomo siliyo?" diso.

<sup>11</sup> Esememe Yesuye nei dimapoo egeesee takaso, "Niyo Godeeye wiligi doloso badeli goo ee diya gooleedalaiso. Godeeye wiligi doloso badeli goo ee daga mada meleeso. Esino Godeeye epedee hamapoo nimapoo olo yiligebugusu. Esino yayo odoo abo

mapoo yiligebigile. <sup>12</sup> Esiga to taka duli odoo mapoo Godeeye goo goolee tekepo bei tenelaiso. Esino edebee mo to dulega poogooga, Godeeye yimapoo goo goolee tekepo pepooko egee molo see eyo peedee dalaiso. <sup>13</sup> Ayo odoo mapoo wulo wudu takomo siliso. Bei,

'diayo ogoloso medee kibiya egelega pagalame.

Osoloso diayo duloso goo eyo bei medee kibiya gooleedelega pagalame.'

<sup>14</sup> Osoloso Godee maga to tolosa kokodo takomo sili odoo Aisayaye taka to oso goo diayo moodeli sabolo tebiaso. Bei, yayo egeesee takaso,

'Diayo medee hodu dilesa to taka duleiso, esino goo eyo bei diayo medee kibiya gooleedalaima.

Osoloso diayo medee hodu dilesa agalaiso, esino goo eyo bei diayo ogoloso gooleedalaima.

<sup>15</sup> Bei, diba tei goo ee gooleedalai gooolone, dieso dibada deeso dia dulu tobodo osoloso dia howo gisigaso.

Esiga diba goo eyo bei ee gooleedalai tebile.

Esino diayo ogoloso, osoloso duloso goo goolee tekepo tolosa, amapoo wedi simi diepi,

ayo dibada goo tokenee hapoloso boobado bigiliyo.'

<sup>16</sup> Esino Godeeye mo hamamee dili odoo nimapoo goomogoso. Bei, niyo ayo moodoo goo ee ogoloso duloso gooleedoo maga. <sup>17</sup> Esiga ayo nimapoo taka.

Godee maga to tolosa kokodo takomo sili odoo daga debei sabolo osoloso Godeeye howo woola tekepo debeli odoo oso niyo epedee egee ogomolo goo ee agalai doloso bameleeso. Esino diayo egele. Osoloso niyo epedee egee dumolo goo ee dulei doloso bameleeso. Esino diayo dule."

**Wudu taka goo eyo bei**

(Maka 4:13-20, Luka 8:11-15)

<sup>18</sup> Yesuye see tobu egeesee takaso, "Esiga witi wo ko segei maga wudu taka goo eyo bei medee dui. <sup>19</sup> Esiga odoo abo witi wo ko oso eli domopoo misigediba egesi masi doso. Diba to tekepo Godeeye wiligi doloso badeli goo ee duloso medee kibiya gooleedelega poogooga, Saitenso sibilesa Godeeye to dibada sooloo ma kulodu meele yayo peedee deliso. <sup>20</sup> Osoloso odoo abo witi wo ko oso yugo kauwe mi mapoo misigediba egesi masi doso. Esiga diayo Godeeye to taka duloso goomoga sabolo saga teliso. <sup>21</sup> Esino Godeeye to oso dia sooloo ma kulodu too medee koo meili. Esiga diayo Godeeye to duloso beeame deiyepo mapoo tei teliso. Esino diayo Godeeye to mapoo tei too goo maga hegi goo sabolo osoloso dala goo oso dimapoo siboga, diayo Godeeye to mapoo tei too goo ee saga pegeliso.

<sup>22</sup> Osoloso odoo abo witi wo ko oso daga weti kauwe kadee mapoo misigediba egesi masi doso. Diba Godeeye to duloso tei teliso. Esino mi hamapoo dabalai maga goo kodia sabolo osoloso bi bei doloso dabalame goolee oso dibada tei too tokenee peliso.

Egeesee maga diayo tei too goo oso homokoko masi koo peli.

<sup>23</sup> Osoloso odoo abo witi wo ko oso mi tekepo mapoo misigediba egesi masi doso. Diayo Godeeyo to duloso gooleedeliso. Esiga odoo aboso homokoko masi 100 egesi peliso, osoloso aboso 60 egesi peliso, osoloso aboso 30 egesi peliso."

#### Witi wo ko sabolo osoloso obu ko sabolo

<sup>24</sup> Osoloso Yesuye see hee wudu takolone odoo mooloogoodoo mapoo egeesee takaso, "Godeeye wiligi doloso badeli goo ee egesi masi moloso. Odoo heeso witi wo ko o homolee mapoo segeiso. <sup>25</sup> Esino gesi odoo susuga tiesamolome, yimapoo ha teli odoo oso sibilesa yayo witi wo ko segei homolee omapoo obu ko sogoloso diso. <sup>26</sup> Esiga witi wo ko segei olo kauwudoloso ko poome, obu ko segei sabolo hodobo palaso.

<sup>27</sup> Esem o tou teli odoo aboso sibilesa egeesee takaso, 'Nee homolee ma kulodu hedebe witi wo ko segeino, see kasee maga obu sabolo ka paladeeyo?' dee takaso.

<sup>28</sup> Esem yayo nei egeesee takaso, 'Imapoo ha teli odoo oso sibilesa ka segei molodoo,' diso.

Esem o tou teli odoo oso yimapoo egeesee takaso, 'Iyo dilesa obu egee tigoaloso peegoo togobisilei no goomogodo?' dee takaso.

<sup>29</sup> Esino yayo dimapoo egeesee takaso, 'Haye, niyo na tige. Bei, niyo tigaga, witi wo ko segei sabolo tigebigiyaga. <sup>30</sup> Esiga o diesono hodobo esee paladee dee. Osoloso ko goalai beame mapoo mo tou teli odoo oso daga obu ee tigoaloso dou mapoo toodee dalaiso. Esino witi wo ko segei oso paladee ee gooloogaloso mo nei mageli moso mapoo mooloogoo magee dalaiso.'"

#### Yesuye ko pepooko masted deli sabolo osoloso yist maga wudu taka

(Maka 4:30-32, Luka 13:18-21)

<sup>31</sup> Osoloso Yesuye see hee wudu takolone o hamamee dili odoo mapoo egeesee takaso, "Godeeye wiligi doloso badeli goo ee egesi masi moloso. Odoo heeso ko pepooko masted deli todilesa o homolee mapoo segeiso. <sup>32</sup> Esino ko abo ma kulodu ko masted deli hagee diya pepooko. Esino ko pepooko oso bou pialoso kauwuga, homolee ee ma kulodu homo su oso toowa malaiso. Osoloso soso omapoo sibilesa o dee mapoo ou tegelaiso."

<sup>33</sup> Osoloso Yesuye see hee wudu takolone dimapoo egeesee takaso, "Godeeye wiligi doloso badeli goo ee egesi masi moloso. Soboso wo palawa silame daga homolone, wo toowa ee ma kulodu yist pepooko kukoseliso. Osoloso yist pepooko oso wo palawa ee diya koudiliso."

<sup>34</sup> Esiga Yesuye odoo mooloogoodoo mapoo goo susuga hagee eligilame dimapoo wulo wudu takeliso. <sup>35</sup> Yayo goo hageesee tomo sili egee Godee maga to tolosa kokodo takomo sili odoo oso taka sabolo tebilame ka eligimo sili. Bei, yayo egeesee takaso,

"Ayo odoo mapoo Godeeyo to eligilone wulo wudu takomo sileiso.

Osoloso mi toowa bei mooloogolone goo mada melee ee see ayo woola yiligebigileiso."

#### Witi wo ko sabolo osoloso obu maga wudu taka goo eyo bei

<sup>36</sup> Yesuye odoo mooloogoodoo diye doloso, yo see moso kulodu palaso. Esem o hamamee dili odoo oso yimapoo sibilesa egeesee takaso, "Witi wo ko segei sabolo osoloso obu ko segei omaga wudu taka goo eyo bei nayo imapoo medee kibiya takee," diso.

<sup>37</sup> Esem Yesuye dimapoo egeesee takaso, "Witi wo ko segeli odoo ee Odoo Holo aso. <sup>38</sup> Osoloso witi wo ko segei mi ee mipoo toowa hagooso. Osoloso witi wo ko ee Godeeyo owolo dioso. Esino obu ko ee Saite-neeyo owolo dioso. <sup>39</sup> Egeesee ma kulodu obu ko segeli odoo ee Saitenso. Osoloso goalai beame ee beame hoo poogoo oso. Osoloso witi wo ko goalai odoo ee Godeeyo momaiye oso.

<sup>40</sup> Esiga obu tigoaloso dou mapoo toodeli egesi masi ee beame hoo poogoo mapoo Odoo Holo ayo Saite-neeyo owolo dio ee dou mapoo egeesee toodalaiso.

<sup>41</sup> Egeesee ma kulodu Odoo Holo ayo mo momaiye diye dalaiso, diayo dilesa odoo goo tokenee mapoo gidodili odoo sabolo osoloso goo tokenee teli odoo ee gilimadoloso dou mi mapoo toodalaiso. Eseega diayo ee ma kulodu dobolone pisa sabolo mei gisile sabolo dabalaiso. <sup>43</sup> Esino Godeeye tekepo deli odoo oso Ma Godeeye wiligi doloso badeli mi mapoo osokoso pa masi palaiso. Odoo niba dulubolo, esiga to ayo hagee takoo medee dui!"

#### Molee mada magoo maga wudu taka

<sup>44</sup> "Esiga Godeeye wiligi doloso badeli goo ee egesi masi moloso. Odoo heeso daga hoogoo bi medee tekepo molee toowaso too mi ma kulodu mada magoo ee odoo heeso mi doomeleso egeiso. Yo bi egee ogoloso see tobu miso gagaso. Osoloso goomoga sabolo o mosopoo wedi dilesa o bi susuga odoo abo mapoo teneloso nei molee tooso. Osoloso yayo molee oso mi egee tooso. Osoloso bi medee tekepo mada mi ma kulodu magoo sabolo yayo tooso."

#### Beegee maga wudu taka

<sup>45</sup> "Esiga Godeeye wiligi doloso badeli goo ee egesi masi moloso. Odoo heeso beegee esiamo siliso.

<sup>46</sup> Yayo esiamo siloso beegee medee tekepo ogoga, yo see dilesa o bi susuga odoo abo mapoo teneloso nei molee teliso. Osoloso yo molee oso beegee tekepo teliso."

#### Pei maga wudu taka

<sup>47</sup> "Esiga Godeeye wiligi doloso badeli goo ee egesi masi moloso. Pei howomoo oluguloso di bei mologa egee misiga egesi masi moloso. <sup>48</sup> Egeesee ma kulodu

pei mapoo di bei mologa, di kebili odoososo di bei pei booboosee mapoo gimagoloso dobolone di piliso. Osolososo di tekepo ono o ma kulodu soliso, esino di ede-beeyo koo nali ee peegoo togobiseliso. <sup>49</sup> Esiga beeamee hoo poogoo mapoo goo hageesi masi oso peledabalaiso. Esiga Godeeyo momaiye aboso mipoo hamapoo sibilesoso Godeeyo howo woola tekepo debeli odoosabolo osolososo goo tokenee teli odoos ee domo pileiso. <sup>50</sup> Osolososo goo tokenee teli odoos ee Dou mi mapoo toodalaiso. Eseega diayo ee ma kulodu pisa sabolo dobolone mei gisile sabolo dabalaiso.”

<sup>51</sup> Yesuye o hamamee dili odoos mapoo egeesee takaso, “Niba ayo hagee takoo goo susuga eyo bei medee gooleedosomo?” diso. Esemee diayo nei egeesee takaso, “O. Iba gooleedososo,” dee takaso.

<sup>52</sup> Esemee Yesuye dimapoo egeesee takaso, “Tei too odoos agayo Godeeyo to eligilone, Godeeye wiligi doloso badeli goo ee gooleedolososo badoga, yo moso eyo ama masi badoso. Yayoo moso ee ma kuloduga bi dia sabolo osolososo nape sabolo tolososo ka tosibodaalaiso.”

### Yesu o mosobia oso gowe

(Maka 6:1-6, Luka 4:16-30)

<sup>53</sup> Yesuye odoos susuga mapoo wudu takemelee koodobulososo mi hagee poogoo diso. <sup>54</sup> Yo see wedi dilesoso o middee Nasalet mapoo badolone diayo howo gisili moso mapoo pelesoso Godeeyo to odoos mapoo eligilame bei mooloogoososo. Esemee odoos susuga oso yayoo eligi dulososo diya howoogadolone egeesee takaso, “Odoos hagoososo goo egee eligimoso silo kapoo tobele? Osolososo yayoo goo toowa opusomoso di egee moodoomo silo, kitulugu kapoo tobele? <sup>55</sup> Yo wulo Meliyo owolo. Osolososo yo wulo moso tegeli odoos hamapoo badeli eyo owolo. Osolososo yo Yemes, Yosep, Saimon, osolososo Yudas egee bia dia emei. <sup>56</sup> Osolososo obooba dio onosee ibolo hodobo hamapoo doso. Esiga goo susuga egee Yesuye kasee moodoomo silosomoso?” dee takaso. <sup>57</sup> Esiga diayo egeesee goolone Yesuye eligi goo ee talai goweso.

Esemee Yesuye dimapoo egeesee takaso, “Edebeeyo Godee maga to tolososo kokodo takomoso sili odoos eyo to dulososo mesiliso. Esino o mosobia sabolo osolososo o soososo oso o to mapoo dulososo koo mesili,” diso.

<sup>58</sup> Esiga Yesuye diayo tei telega poogolososo debei goo ee ogolososo o mi omapoo goo toowa opusomoso di abo moodoole poogoososo.

### Odoos howo oluguli Yonee woolooma

(Maka 6:14-29, Luka 9:7-9)

**14** Beeamee omapoo Gelili mi gibadeli odoos Helodeeye Yesuye goo moodoomo silee dulososo o tou teli odoos mapoo egeesee takaso, “Odoos hagee Yonee odoos howo oluguli oso molodoo. Yo ta maga olo hogabiadoo. Esiga yayoo see goo toowa opusomoso di hageesee ka moodoomo silo,” dee takaso.

(Yayoo hageesee takaso. Bei, Yonee telega bado-boome, goo hagoososo peledabaso.)

<sup>3</sup> Beeamee heeso Helodeeye omolo Pilipiyo osobo Helodiyees peedee huso. Esemee Yoneeye goo hagee ogolososo Helodee mapoo diya takolone egeesee takaso, “Nayoo nomolowo osobo peedee hulei tekeponee. Bei, egee tei,” diso.

Esemee Helodee diya komonolone, o ha teli odoos mapoo takolone, Yonee dee tialogolososo neliga moso ma kulodu huse diso. <sup>5</sup> Esemee yo Yonee wooloomalame goomogaso. Esino odooboloso obulone woolomele poogoososo. Bei, odoos susuga oso takolone Yonee Godee maga to tolososo kokodo takomoso sili odoos deliso.

<sup>6</sup> Osolososo hamamee Helodee yo soomagoo beeamee tugodeme, yayoo o odoos gilimadolososo sibilesoso wonolone debeiso. Esemee Helodiyeeseyo sobo holo ososibilesoso dia mudugiyopoo hopoome, Helodee diya goomogaso. <sup>7</sup> Esemee nei Helodeeye goo tei moodoolame takolone yimapoo egeesee takaso, “Nayoo goomoga bi ee amapoo takooga, ayo bi egee namapoo tenelaiso,” diso. <sup>8</sup> Yo to egeesee taka dulososo hopoomelee koodobulososo owee mapoo dilesoso yayoo goomoga goo ee duso. Osolososo see wedi sibilesoso Helodee mapoo egeesee takaso, “A Yonee odoos howo oluguli eyo wiligi onoo goomogoso. Esiga nayoo epedee o wiligi koodolososo tolo mapoo magolososo amapoo tenee,” dee takaso.

<sup>9</sup> Esino Helodee goo hagee dulososo Yoneeyo wiligi koodolososo tenelai yo goomegele. Esino yayoo sobo holo mapoo goo tei moodoolame taka ee dibolo hodobo nei nolone debei odoos oso olo duso. Esiga goo hagee pagalai yo goomegele. <sup>10</sup> Esemee yayoo o odoos mapoo to kitulugu teneeso, diayo dilesoso Yoneeyo wiligi koodolososo tosibilame. Osolososo o odoos oso neliga moso ma kulodu gadilesoso, Yoneeyo wiligi koodolososo tolo mapoo magolososo tosibilesoso, sobo holo mapoo teneeso. Esemee see yayoo tosibilesoso owee mapoo teneeso. <sup>12</sup> Esemee Yonee o hamamee dili odoos oso sibilesoso Yoneeyo kou todilesoso bousoso. Osolososo dilesoso Yesu mapoo takaso.

### Yesuye odoos 5000 mapoo nei pi

(Maka 6:30-44, Luka 9:10-17, Yonee 6:1-14)

<sup>13</sup> Helodeeye Yonee woolooma goo ee Yesu dulososo, o hamamee dili odoos sabolo du mapoo dalaga poogolososo, mi odoos mauwe mapoo hasalame diyadeeso. Esino mi opusomoso opusomoso di mapoo debeli odoos oso goo hagee dulososo Yesuye badebei mapoo mubili sibadeeso. <sup>14</sup> Yesu du maga mubiyodoo dapoogolososo tobudulone, odoos susuga oso mooloogoodoo ogolososo yayoo diba diya sooloo dolone odoos paigiga tekepo paso.

<sup>15</sup> Yesuye egeesemo sileeme, o hamamee dili odoos oso habe sibilesoso yimapoo egeesee takaso, “Osoko olo tolobuo. Esiga nayoo odoos susuga egee do diyadee dee, diayo mosobia koola kee do mapoo dilesoso nei dieso nalai ee moleeso talame. Bei, mi iyo hagee do mapoo odoos mauwe. Esiga mi hamapoo nei mauwe,” dee takaso.

<sup>16</sup> Eseme Yesuye dimapoo egeesee takaso, "Niyo diba nei talame diye dee na takee. Esino niyo nei dimapoo tenee," diso.

<sup>17</sup> Eseme nei diayo yimapoo egeesee takaso, "Imapoo wo si hedebe dee tiadoo sabolo osoloso di bakadio moloso," diso.

<sup>18</sup> Eseme Yesuye nei dimapoo egeesee takaso, "Wo si sabolo osoloso di sabolo amapoo tosibe," diso. <sup>19</sup> Eseme yayo odoo susuga pukusi mapoo bulume dee takoloso, wo si dee tiadoo sabolo di bakadio toloso Kei mi ma dokodoo bolone Godee mapoo goomoga to takoloso wo popeiso. Osoloso o hamamee dili odoo mapoo nei egee teneme, see diayo odoo mooloo-goodoo mapoo piso. <sup>20</sup> Eseme odoo susuga oso nei tebia nega diya edigime nei hosudelega abo poo-gooso. Osoloso diayo nei naloso abo poogoo ee, Yesu o hamamee dili odoo oso misigamo dilesou bou ma kulodu soo bou 12 egesi metamagisaso. <sup>21</sup> Osoloso giso sabolo sobo sabolo osoloso holaiso sabolo oso nei hagee neso. Esino hedebe gisowe hesiga ee 5000.

#### Yesuye howo ma dokodooga di

(Maka 6:45-52, Yonee 6:15-21)

<sup>22</sup> Yesuye 5000 odoo mapoo nei pi koodobuloso, o hamamee dili odoo mapoo egeesee takaso, "Daga niyo du toloso abei hodiokoo dalo soowee. Ayo odoo hagee bia diye doloso a hamamee ka sibileigo," diso.

<sup>23</sup> Osoloso yayo odoo mooloo-goodoo olo diye doloso, see obusomo badalame mubi dokodoo howo gisilame palaso. Yo mubi dokodoo peleso badoboome neligaso. <sup>24</sup> Esino beame omapoo o hamamee dili odoo oso du mapoo toboloso abei domopooga diyadaga meleeso. Eseme poo sabolo howo ki sabolo simi oso dia du diya bidigaso.

<sup>25</sup> Osoloso gesi domo kudi takeme, Yesuye abei ma dokodooga dimapoo diso. <sup>26</sup> Eseme diayo Yesuye simi ogoloso dio dulone diya ebigaso. Bei, diayo goolee bosu siba bele dolone diya googaso.

<sup>27</sup> Eseme Yesuye saga dimapoo egeesee takaso, "Niba howaleege. Haga na ebi. Ayo siba," dee takaso.

<sup>28</sup> Eseme Pitaye egeesee takaso, "Lodee, tei nayo siboga, nayo anosee howomoo meledoboloso howo ma dokodooga namapoo sibeye dee," diso.

<sup>29</sup> Eseme Yesuye nei egeesee takaso, "Sibe." Eseme Pita howomoo meledoboloso howo ma dokodooga Yesu mapoo diso. <sup>30</sup> Esino yo dulone egeino, poo toowa simi oso howo ki toowa sibume, yo diya ebiaso. Egeesee lone yo howo kulomoo oumo moume to neligidi egeesee takaso, "Lodee, a pidi," dee takaso.

<sup>31</sup> Eseme Yesuye o deeso Pita saga toloso yimapoo egeesee takaso, "Nayo tei too ee diya pepookodoo. Bei kasalame nayo tei too goo ee ka poogoowo?" diso.

<sup>32</sup> Osoloso o bakadio du ma kulodu dapoogoome, poo simi omapoo koodobiaso. <sup>33</sup> Eseme o hamamee dili odoo oso Yesuwo homo bei mapoo gasuwoloso dobolone egeesee takaso, "No tei Godeeyo owolodoo," diso.

#### Odoo paigiga Genesalet mi mapoo debeli oso Yesu mapoo simi

(Maka 6:53-56)

<sup>34</sup> Yesu o hamamee dili odoo sabolo abei dapoogoloso Genesalet mi mapoo dia du oluguso. <sup>35</sup> Mi omapoo debeli odoo oso Yesu hoodo ogoloso mi opusomo opusomo di mapoo Yesu olo sibago doloso to takomo diso. Eseme odoo aboso odoo paigiga susuga Yesu mapoo ido sibadeeso. <sup>36</sup> Osoloso odoo paigiga oso Yesu mapoo howolone egeesee takaso, "Iyo wulo nee dugo su mapoo sigilei soowayo?" diso. Eseme odoo paigiga oso Yesuwo dugo su mapoo sigime, odoo egee bia wegigadooso.

#### Tei Godeeye eligi sabolo osoloso edebeeyo eligi goo sabolo

(Maka 7:1-13)

**15** Beame hedebeso Pelisi odoo abo sabolo osoloso tei eligili odoo abo oso Yolusalem maga sibilesi Yesuye badebei mapoo mooloo-goodoloso yimapoo egeesee takaso, <sup>2</sup> "Bei kasalame nee hamamee dili odoo oso ibada adaga dia goo ee dedel-ega poogoloso dia dee hapelega nei ka nasomo?" dee takaso.

<sup>3</sup> Eseme Yesuye nei dimapoo egeesee takaso, "Bei kasalame niyo tei Godeeye eligi goo ee poogoloso see nibada adaga dia goo ee ka dodomo silosomo?" <sup>4</sup> Bei, Godeeye egeesee takaso, "Namamo to mapoo osoloso nooweeyo to mapoo mesiloso ka silesibe. Esino edebeeyo ama mapoo osoloso owee mapoo to tokenee takooga, yo wooloome," diso. <sup>5</sup> Esino niyo egeesee eligiliso, odoo heeso ama dio owee dio biso pidilame tei magoo ee dadalai gowooga, yayo wulo takolone bi egee Godee mapoo tenelame olo to magoloso ka moloso, dee takalai tekepo deliso. <sup>6</sup> Goo egeesee maga edebeeyo ama dio owee dio pidilame niyo hamaga takeliso. Niyo goo egeesee moodolone, Godeeye tei magoo goo ee dedelega see nibada adaga dia goo ee dodolone ka doso. <sup>7</sup> Niba goo bakadio gweli odoo. Godee maga to toloso kokodo takomo sili odoo Aisayaye nibada goo maga tei goo takaso. Bei, yayo goo Godeeye taka egeesee hoguguso,

<sup>8</sup> "Odoo hagee bia oso dia magaso wulo gamenee amapoo goomoga poudiliso.

Esino dibada sooloo ma kulodu tei amapoo mesili goo ee mauwe.

<sup>9</sup> Esiga diayo amapoo goomogolone mo hu dokodoo poudili goo eyo bei mauwe.

Bei, diayo tei edebeeyo eligi goo ee ayo eligi masi see diayo odoo mapoo eligimo silesibiliso."

#### Ogoo gooso odoo tokenee ka peliyo?

(Maka 7:14-23)

<sup>10</sup> Yesuye odoo susuga gilimadoloso dimapoo egeesee takaso, "Odoo susuga niba mo to hagee dulo-oso medee gooleede. <sup>11</sup> Esiga edebeeyo nei ne oso Godeeyo howo woola yo tokenee koo peli. Esino ede-

beeyo o sooloo ma kuloduga goolee to tokenee ee takooga oso Godeeyo howo woola yo tokenee peliso," dee takaso.

<sup>12</sup> Osoloso o hamamee dili odoo oso yimapoo sibilesos egeesee takaso, "Pelisi odooso nayo taka goo mapoo egee kamanaga no ogoloso gooleedosomo?" diso.

<sup>13</sup> Esemee Yesuye nei dimapoo egeesee takaso, "Nei howo mo Ma Kei mi ma dokodoo badeli yayo segele susuga ee o too sabolo tigadoloso togobileiso. <sup>14</sup> Esiga Pelisi odoo ee nei howo segei egesi masi moloso. Niyo diba haga na goolee. Diba odoo howo neliga masi doso. Esiga odoo howo neliga heeso odoo howo neliga hee ido duga, o bakadio ou mapoo tigidibileiso."

<sup>15</sup> Esemee Pitaye egeesee takaso, "Nayo wudu taka goo eyo bei yimapoo medee kibiya eligi," diso.

<sup>16</sup> Esemee Yesuye nei egeesee takaso, "Niba to hageeyo bei gooleedelega osee dosomo? <sup>17</sup> Esiga nei niyo toloso nali oso nibada sooloo ma kuludu tokenee koo peli. Bei, nei egee nayo nalo sooloogoloso see nee gemedei maga peegoo gadiliso. <sup>18</sup> Esino odoo o magaso to tokenee takeli goo susuga oso o sooloo ma kuloduga woola takooga goo oso yo Godeeyo howo woola tokenee peliso. <sup>19</sup> Bei, o sooloo ma kuloduga goo tokenee susuga hagooso woola peledebeliso: tokenee gweli goo, osoloso odoo hee wooloomali goo, osoloso adaba kooka sobo sabolo kooka giso sabolo hedebe deli goo, osoloso sobo obuo sabolo giso kadiga sabolo hedebe deli goo, osoloso adaba bi heli teli goo, osoloso emegei dimaga gamenee takeli goo, osoloso emegei dia goo maga to tokenee takeli goo. <sup>20</sup> Esiga goo tokenee susuga hagooso Godeeyo howo woola odoo tokenee peliso. Esino dee hapelega nei nali oso yo tokenee palaime."

#### Yu sobonee oso tei too

(Maka 7:24-30)

<sup>21</sup> Yesu o hamamee dili odoo sabolo mi egee poogoloso see Taya mi toowa sabolo osoloso Saidon mi toowa koola mapoo mi pepuso mapoo diyadeeso.

<sup>22</sup> Diba omapoo dileso peledoboome, sobo heeso Yesuye badebei mapoo simiso. Sobo egee Keinen sobo. Esiga yayo Yesu ogoloso to neligidi egeesee takaso, "Lodee, Deibidiyo amawe, nayo a sooloo dele. Bei, mo sobo holo yima kulodu bo holo peleso badolone yimapoo dala toowa tenee domoloso," diso.

<sup>23</sup> Esino Yesuye to hagee duloso to nei takele. Esemee o hamamee dili odoo oso Yesu mapoo sibilesos egeesee takaso, "Sobo hagooso iba deede silone to neligidi takomo silo. Esiga nayo yo diye dee takee," diso.

<sup>24</sup> Esemee Yesuye nei dimapoo egeesee takaso, "Godeeye a hedebe Isalael odoo sipi be hu masi osug-obuloso egee do mapoo diye diso," dee takaso.

<sup>25</sup> Esemee sobo hagooso see sibilesos Yesu o homo bei mapoo gasuwoloso badolone egeesee takaso, "Lodee, a pidi," diso.

<sup>26</sup> Esemee Yesuye nei sobo yimapoo wudu takolone egeesee takaso, "Holaiso dia nei toloso see so mapoo tenelai tekeponee," diso.

<sup>27</sup> Esino sobo hagooso Yesu mapoo egeesee takaso, "O. Lodee nayo tei takoo. Esino so ee amaye nei nolone kokou miyomoo mou ee nalagamo silesibiliso," diso.

<sup>28</sup> Esemee Yesuye nei yimapoo egeesee takaso, "Sobo, nayo tei too diya toowadoo. Esiga nayo goomoga goo taka ee ayo moodoolaiso," diso. Esemee beeamee omapoo sobo egeeyo owolo sobo holo olo tekepo paso.

#### Yesuye odoo paigiga susuga tekepo pa

<sup>29</sup> Yesu mi egee poogoloso see Gelili abei palaga dimeleeso. Yo see abaga peleso mubi dokodoo biaso. <sup>30</sup> Osoloso odoo mooloogoodoo oso odoo paigiga gilimado sibilesos Yesuwo homo beiyopoo ibedigaso.

Odoo abo bagi daga poogoo, osoloso odoo howo neliga, osoloso odoo su kakawa poogoo, osoloso odoo to koo keli, osoloso odoo paigiga opusomo opusomo di abo sabolo Yesu mapoo gilimado sibadeeso. Esemee Yesuye odoo paigiga susuga egee bia tekepo paso.

<sup>31</sup> Esemee odoo susuga oso goo hagee ogoloso diya howoogadolone Isalael odoo dia Godee mapoo goomoga toowa poudooso. Bei, to koo keli odoo see to keiso, osoloso odoo su kakawa poogoo see to-boloso silesibiso, osoloso bagi daga poogoo odoo see tekepo poloso silesibiso, osoloso odoo howo neliga see egeiso.

#### Yesuye odoo 4000 mapoo nei pi

(Maka 8:1-10)

<sup>32</sup> Osoloso Yesuye o hamamee dili odoo gilimadoloso egeesee takaso, "Odo mooloogoodoo hagee bia beeamee bakadio hedebe di ee ma kulodu abolo hodobo debeiso. Esino see diayo nei mauwe debei ogoloso diba diya sooloo dalaso. Ayo diba nei tenelega diye daga, diba eli domopoo dumologa houdulone diya wosalai malaiso," dee takaso.

<sup>33</sup> Esemee o hamamee dili odoo oso yimapoo egeesee takaso, "Nei mauwe mi hamapoo iyo nei kapoo toloso odoo mooloogoodoo mapoo tebia ka tenelaiyo?" diso.

<sup>34</sup> Esemee Yesuye nei egeesee takaso, "Nimapoo wo si kasolo molosomo?" dee takaso.

Esemee diayo nei egeesee takaso, "Imapoo wo si 7 sabolo osoloso di pepooko abo moloso," diso.

<sup>35</sup> Esemee Yesuye odoo susuga mi mapoo bulume dee takoloso wo si 7 sabolo osoloso di pepooko abo toloso Godee mapoo goomoga to takaso. Osoloso wo si popei, di hwei agisaloso o hamamee dili odoo mapoo teneme, see diayo odoo mooloogoodoo mapoo piso.

<sup>37</sup> Odoo susuga nei ne oso diya edigaso. Esemee nei naloso abo poogoo ee o hamamee dili odoo oso misigaloso bou tegei ma kulodu soo bou 7 egesi metamagisaso. <sup>38</sup> Osoloso giso sabolo sobo sabolo osoloso holaiso sabolo oso nei hagee neso. Esino hedebe gisowe hesiga ee 4000. <sup>39</sup> Yesuye odoo susuga diye



dee takoloso o hamamee dili odoos sabolo meilesos du ma kulodu tebisaloso, Magadan mi koola mapoo dalo soowaso.

### Edebeeyo goo toowa opusomo di moodoo ee agalame goomoga

(Maka 8:11-13, Luka 12:54-56)

**16** Osoloso Pelisi odoos sabolo osoloso Sedisi odoos oso Yesu mapoo sibilesos yimapoo kukulo agalame egeesee takaso, "Nayo kitulugu too egee tei Godee maga simidoo doloso gooleedalaiya, nayo goo toowa opusomo di hee moodee," dee takaso.

<sup>2</sup> Esino Yesuye dimapoo egeesee takaso, "Habe osoko tekepo mougaa ogoloso niyo egeesee takeliso, 'Godigi osoko tekepo polodoo,' dee takeliso. Osoloso gesikolo mi hemiye ogoloso, 'Epei howo sibulodoo,' deliso. Esiga goo egeesee oso peledabalai niba olo gooleedooso. Esino goo susuga ayo epedee hagee eligi sabolo osoloso goo susuga ayo epedee hagee moodoomolo eyo bei, niba gooleedele. <sup>4</sup> Odoos epedee hamapoo egee doo niba diya tokenee. Osoloso niyo amapoo tei talai goweliso. Osoloso niyo wulo goo toowa opusomo di moodoo ee agalame amapoo takeliso. Esino ayo nimapoo goo toowa opusomo di hee eligilei mauwe. Esino hedebe Godee maga to tolosos kokodos takomo sili odoos Yona eyo goo ono nimapoo eligileiso." Yesuye goo hagee takemelee koodobulosos diba poogoo diso.

### Pelisi odoos sabolo osoloso Sedisi odoos oso eligi goos ee na deede

(Maka 8:14-21)

<sup>5</sup> Osoloso Yesu o hamamee dili odoos sabolos abei dalo soowaso. Diba omapoo dilesos dobolone egeinos o hamamee dili odoos oso wo telega boobada neme goo diya koudiasos. <sup>6</sup> Diba goo koudulone doboome Yesuye dimapoo egeesee takaso, "Obeeamos! Pelisi odoos sabolos osoloso Sedisi odoos dia wo ee habiagaa, niba medee koolone ka debee."

<sup>7</sup> Esino Yesu o hamamee dili odoos oso goo hagee duulosos, diesonos to moulone egeesee takaso, "Iyo wo tellega boobada poogoo simigaa Yesuye iba ogoloso egeesee ka takoo," diso.

<sup>8</sup> Esemee diayo goo koudulone debei ee Yesuye ogoloso dimapoo egeesee takaso, "Bei kasee magaa niyo wo telega boobada poogoo simi magaa goo diya koudulone ka dabala? Niyo tei too goo ee diya pe-pookodoo. <sup>9</sup> Esigaa niba ayo kitulugu goo ee gooleedelega osee dosos. Esigaa niba ayo odoos 5000 mapoo wo si dee tiadoolo populoso pi goo ee boobados bugulosos ka dosos. Osoloso diayo wo nalosos abo poogoo, niyo misigalosos bou ma kulodu soos bou bei metamagisaa goos sabolos boobados bugusos. <sup>10</sup> Esigaa niba ayo odoos 4000 mapoo wo si 7 populoso pi goo ee boobados bugulosos dosos. Osoloso diayo wo nalosos abo poogoo, niyo misigalosos bou ma kulodu soos bou bei metamagisaa goos sabolos olo boobados bugusos. <sup>11</sup> Esigaa ayo nimapoo wodee eyo goo magaa takele. Esino bei kasee magaa

niyo goo hagee gooleedelega ka dosomos? Esigaa ayo takaa goo ee niyo Pelisi odoos sabolos osoloso Sedisi odoos oso eligi goo mapoo hamamee dedeyagaa nisos nediliyo medee balame to hagee nimapoo ka takaa." <sup>12</sup> Esemee Yesuye wodee eyo goo magaa takelega, wulos Pelisi odoos sabolos osoloso Sedisi odoos oso eligi goo <sup>†</sup> magaa ka takeme, Yesu o hamamee dili odoos oso omapoo ogoloso olo gooleedoosos.

### Pitaye Yesuwo goo yiligebugoo

(Maka 8:27-30, Luka 9:18-21)

<sup>13</sup> Yesu dilesos Kasaliya-Pilipai mi mapoo silone o hamamee dili odoos mapoo egeesee takaso, "Edebeeyo Odoos Holo a odoos ogu deliyo?" diso.

<sup>14</sup> Esemee diayo yimapoo egeesee takaso, "Odoos abosos no Yonee odoos howo olugulis odoos osodoo, dee takeliso. Osoloso odoos abosos no Ilaya, dee takeliso. Osoloso odoos abosos no Yelemayaa deliso. Osoloso odoos abosos no Godee magaa to tolosos kokodos takomos sili odoos hee daga badebei osos molodoo, dee takeliso."

<sup>15</sup> Esemee Yesuye nei dimapoo egeesee takaso, "Esino hee niyo a odoos ogu deliyo?" diso.

<sup>16</sup> Esemee Saimon-Pitaye nei egeesee takaso, "No Keliso, Godeeye hudii magoo, kookaiyo badobosos gie badeli Godeeyo owolos osodoo," dee takaso.

<sup>17</sup> Esemee Yesuye nei yimapoo egeesee takaso, "Saimon-Pitaa, Yonayo owolos, no goomege. Bei, odoos heesos goo hagee namapoo ka eligile. Esino mo Ma Kei mi ma dokodoo egee bados oso namapoo ka eligi.

<sup>18</sup> Esigaa Pitaa, ayo namapoo takaa, no yo masi badosos. Esigaa ayo yo hagee ma dokodooga mo sosee <sup>††</sup> bei mooloogoolaisos. Egeesee ma kulodu telisos kitulugoo oso sosee hagee dagadileime. <sup>19</sup> Osoloso ayo Godeeye wiligii dolosos badeli osulos ee gibadalame kitulugoo namapoo tenelaisos. Esigaa nayo takolone, edebeeyo mipoo hamapoo goo moodoolai ee tei daga, goo egee Kei mi mapoo olo tei dolosos molosos. Osoloso nayo takolone, edebeeyo mipoo hamapoo goo moodoolai ee tei me daga, goo egee Kei mi mapoo olo tei me molosos."

<sup>20</sup> Osoloso yayos tobudulone to kitulugoo sabolos o hamamee dili odoos mapoo egeesee takaso, "Niyo odoos abo mapoo takolone a Kelisosos, dee na takee," diso.

### Yesu eyo talai goo ee takaa

(Maka 8:31-33, Luka 9:22)

<sup>21</sup> Osoloso beeamee domo omagaa Yesuye o hamamee dili odoos mapoo eyo talai eyo goo ee takomos silame bei mooloogoosos. Egeeseelone yayos dimapoo egeesee takaso, "A Yolusalem mapoo pologaa, Yu odoowo wiligii odoos sabolos, osoloso tei mosos eyo wiligii odoos sabolos, osoloso tei eligilis odoos oso amapoo dala

<sup>†</sup> Pelisi odoos sabolos osoloso Sedisi odoos diayo eligi goo ee wo habia masi molosos. Bei, wo giedege sabolos wo habia sabolos hamagaa, wo giedege tekepo ee tokenee palaisos. <sup>††</sup> sosee hu eyo bei ee tei telagaa odoos susugaa mipoo hamapoo egee doo ee takoosos.

tenelaiso. Osoloso edebeeयो a wooloomaloso, bi mapoo ta moloso beeame bakadio hedebe di mapoo see bi maga hogadileiso," dee takaso.

<sup>22</sup> Esemе Pitaye Yesu peegoo ido dilesо tobudulone yimapoo diya kitulugu sabolo takolone egeesee takaso, "Haye Lodee, goo hagooso namapoo peledebeyaga, Godeeye no gooleegeeye dee," dee takaso.

<sup>23</sup> Esino Yesuye Pita mapoo biditoboloso tobudulone egeesee takaso, "Saiten, no amaga peegoo di. To nayo egee takoo oso ayo Godeeye goomoga goo talai ee eli poo. Bei, nayo to egee takoo Godeeye taka ee koo takoo. Esino edebeeयो taka goo ee takoo," diso.

**Yesu goolone badalai**  
(Maka 8:34-38, Luka 9:23-26)

<sup>24</sup> Yesuye o hamamee dili odoo mapoo see tobu egeesee takaso, "Edebeeयो ayo di hamamee sibilei goomogoga, yo daga eyo goomoga goo tomo sili ee poogoloso, eyo talai sabolo dala toowa talai goo sabolo medee mopoodoo doloso ama hamamee ka sibe.

<sup>25</sup> Esiga edebeeयो o gie badeli eyo goodogoga, o gie badeli ee osugobalaiso. Esino edebeeयो mo goo maga o gie badeli eyo goodegelega poogooga, yo badoboso kookaiyo gie badeli talaiso. <sup>26</sup> Esino edebeeयो mipoo hamapoo badolone, eyo goomoga goo susuga ee tomo siloso, hedebe gie badeli goo ee telega dagaduga, yo see ogoo goo talaisomo? Mauwe. Bei, yayo gie badeli eyo nei talai mipoo hamapoo bi hee mauwe.

<sup>27</sup> Esiga Odoo Holo ayo mo Maye toowa doloso badeli goo omaga o gadeebugu sabolo, osoloso o momaiye sabolo sibilesо, odoo susuga oso goo tomo silee eyo nei ayo dimapoo tebia tenelaiso. <sup>28</sup> Egeesee ma kulodu ayo nimapoo taka. Nima kulodu odoo abo wedilega egee do ee osee doga, Odoo Holo ayo wiligi doloso badalame sibileiso."

**Yesuye Moses dio osoloso Ilaya dio to kei**  
(Maka 9:2-10, Luka 9:28-36)

**17** Osoloso beeame 6 poogoloso Yesuye Pita, Yemes, osoloso Yemeseeयो omolo Yonee esee gilimadoloso mubi hoodee mapoo dabalame paladeeso. <sup>2</sup> Diba omapoo pelesо dobolone egeino, Yesu o su opusomo doloso osokoso poni masi o mudu maga poni molome egeiso. Osoloso o dugo oso heliye diya gadeebugu masi molome egeiso. <sup>3</sup> Diba omapoo dobolone egeino, Moses dio Ilaya dio peledoboloso Yesubolo to kesamolome egeiso. <sup>4</sup> Esemе Pitaye Yesu mapoo egeesee takaso, "Lodee, iba hamapoo dabalai tekepo. Esiga nayo goomogoga, iyo waseme bakadio hedebe di tegelaiso. Hee nee, osoloso hee Moseseयो, osoloso hee Ilayayo dalaiso," dee takaso.

<sup>5</sup> Pita yo to osee komolome, kolobo diya heliye oso sibilesо diba gidisooso. Esemе kolobo ma kuloduga toso egeesee takaso, "Hagee ayo gooma mo holo oso. A namapoo diya goomogo. Esiga o to mapoo medee dui," diso.

<sup>6</sup> Esemе Pita diayo goo hagee duloso diya obulone miyomoo balaboo tiesaso. <sup>7</sup> Esino Yesuye sibilesо

dimapoo sigilone egeesee takaso, "Niba tebise. Haga na ebi," diso. <sup>8</sup> Esemе diba tebisaloso egeino Yesu obusomo tobudume egeiso.

**Yesu o hamamee dili odoo oso Ilayayo goo maga**

**WOOSA**  
(Maka 9:11-13)

<sup>9</sup> Osoloso diba mubi dokodooga see kumoo moulone, Yesuye dimapoo egeesee takaso, "Goo niyo egei ee odoo abo mapoo na takee. Esino Odoo Holo a ta maga see hogado pala ogoloso, niyo hamamee ka takomo silesibe," dee takaso.

<sup>10</sup> Esemе Pita diayo Yesu mapoo egeesee woosaso, "Bei kasalame tei eligili odoo oso eligilone 'Daga mala-lo Ilayaye sibilesо Keliso hamamee sibileigo' dee ka takeliyo?" diso.

<sup>11</sup> Esemе Yesuye dimapoo egeesee takaso, "Ilaya tei sibilesо goo susuga see medee mopoodoo dalaiso.

<sup>12</sup> Esino ayo nimapoo taka, Ilaya yo olo simiso. Esino edebeeयो yo medee kibiya hoodo egelega yimapoo dala tenemeleeso. Egeesee diayo Odoo Holo amapoo dala egesi masi tenemalaiso."

<sup>13</sup> Osoloso diayo Yesuye egeesee taka duloso nei diayo goolee, Yonee odoo howo oluguli eyo goo ee takoo doloso olo gooleedooso.

**Yesuye holope bo holo pala ee tekepo pa**  
(Maka 9:14-29, Luka 9:37-43)

<sup>14</sup> Yesu o hamamee dili odoo bakadio hedebe di sabolo mubi dokodooga meilesо, odoo susuga diba balagamelee omapoo peledoboome, odoo heeso sibilesо Yesuwo homo beiyopoo gasuwoloso badolone egeesee takaso, <sup>15</sup> "Lodee, nayo mo giso holo sooloo dologa yo pidi. Bei, yo todo dolone halaboomo silone, eyo nediliyo howomoo homodobuo osoloso dou mapoo homodobuo dolone dala toowa teliso. <sup>16</sup> Esemе ayo holope egee nee hamamee dili odoo mapoo ido simino, diayo yo tekepo moodolai tebilena," diso.

<sup>17</sup> Esemе Yesuye nei egeesee takaso, "Niba tokenee odoo, tei too mauwe. Niyo amapoo tei talame a beeame kasolo nibolo hodobo ka badalaiyo? Ayo beeame sage nibolo hodobo badebeino, niyo amapoo tei telega osee doga, a nimapoo diya gowooso. Esino holope egee amapoo ido sibe," diso. <sup>18</sup> Esemе bo holo holopeyo kulodu pala mapoo Yesuye to kitulugu sabolo takeme peegoo diso. Esemе epedee omapoo holope egee see tekepo paso.

<sup>19</sup> Goo hagooso dilesо koodobume, Yesu o hamamee dili odoo oso dibusomo dobolone Yesu mapoo egeesee takaso, "Iyo kaseme bo holo holopeyo kulodu pala ee peegoo habigilei kitulugu mauwe ka poo-goowo?" diso.

<sup>20</sup> Esemе Yesuye nei dimapoo egeesee takaso, "Niyo tei too ee diya pepooko. Goo egeesee maga niyo bo holo peegoo habigilei kitulugu mauwe ka poogoo. Esiga ayo nimapoo taka. Niyo tei too goo ee homokoko pepooko masi mologa, niyo mubi mapoo takolone 'no see koo dilesо mele' dee takoooga, tei egeesee salaiso.

Esiga egeesee ma kulodu goo susuga niyo moodoolai tebileiso. [ <sup>21</sup> Esino bo holo hageesi masi peegoo habigili ee hedebe nei tei doloso dobolone Godee mapoo taka maga bo holo peegoo ka habigiya.”]

### Yesu eyo talai goo ee see tobu taka

(Maka 9:30-32, Luka 9:43-45)

<sup>22</sup> Yesu o hamamee dili odoo oso sibilesa Gelili mi mapoo mooloogoodoloso doboome, Yesuye dimapoo egeesee takaso, “Odoos Holo a odoo mapoo tiasalaiso. <sup>23</sup> Osoloso diayo a wooloomalaiso. Esino a bi mapoo ta moloso beame bakadio hedebe di mapoo gie badeli tolosa hogadileiso.” Esemes Yesu o hamamee dili odoo oso to hagee dulosa diya goheleso.

### Tei moso ee pidilame tekisi molee teneli

<sup>24</sup> Osoloso see tobu Yesu o hamamee dili odoo sabolo dileso Kapenyum mi mapoo peledoboome, tei moso ee pidilame tekisi molee teli odoo aboso sibilesa Pita mapoo egeesee takaso, “Nibada eligili odoo yo tei moso ee pidilame tekisi molee teneliso?” diso.

<sup>25</sup> Esemes Pitaye nei egeesee takaso, “O. Teneliso,” diso. Esino Pita epedee omapoo moso kulodu Yesuye badebei mapoo gasibume, Yesuye Pita mapoo egeesee takaso, “Saimon, nayo goo hagee amapoo takee. Mipoo hageeyo wiligi odoo tebisa oso odoo ogu bia dimaga tekisi molee ka teliyo? Odoos diayo bali maga teliyo o, odoo abo maga ka teliyo?” dee takaso.

<sup>26</sup> Esemes Pitaye nei egeesee takaso, “Odoos abo maga ka teli †,” diso.

Esemes Yesuye nei egeesee takaso, “Esiga wiligi odoo diayo bali odoo diba tekisi molee dia wiligi odoo mapoo koo teneli ††. <sup>27</sup> Esino tei moso ee pidilame tekisi molee teli odoo hagee bia ee kemeneyaga, iyo tekisi molee tenelega pagalai tekeponee. Esiga no dileso abei mapoo kimaso di gi. Osoloso di malalo gi eyo maga gwaloso ogoga molee ko molo agalaiso. Esegas nayo molee egee tolosa dimapoo ibada tekisi molee magee,” dee takaso.

### Godeeye wiligi doloso badeli goo mapoo odoo agayo toowa doloso ka badosomo?

(Maka 9:33-37, Luka 9:46-48)

**18** Beame domo omapoo Yesu o hamamee dili odoo oso sibilesa Yesu mapoo egeesee takaso, “Godeeye wiligi doloso badeli goo mapoo odoo agayo toowa doloso ka badosomo?” diso.

<sup>2</sup> Esemes Yesuye holope hee idoloso dima domo to budume, o hamamee dili odoo mapoo egeesee takaso, <sup>3</sup> “Ayo nimapoo taka. Nibaba goo goolee su wu-doloso holope hageesi masi badelega poogooga, niba Godeeye wiligi doloso badeli goo mapoo gadileime.

† Yesuye badebei beame omapoo, wiligi odoo toowa taba oso o ha teli odoo sabolo ha temeleso, odoo diayo dagadi egee bia dimaga yayo tekisi molee teliso. Esino o mosobia maga koo teli.

†† Yesuye to hageesee taka goo eyo bei ee, Godeeyo owolo dio oso tei moso ee pidilame tekisi molee tenelega pagalai ee tei mauwe doloso ka taka.

<sup>4</sup> Esiga odoo agayo holope pepooko hageesi masi o su eyo nediliyo pepooko daga, yo Godeeye wiligi doloso badeli goo mapoo toowa doloso ka badoso.

<sup>5</sup> Osoloso odoo agayo holope hageesi masi mo hu maga o mosopoo ido pologa, yo a ido pala masi ido poloso. <sup>6</sup> Esino odoo heeso tei too odoo hee goo tokenee mapoo gido duga, nei odoo heeso o mu mapoo yo toowa bagagoloso howo bou mapoo toosolai ee dala haga towane. Bei, hamamee Godeeye odoo goo egeesee moodeli mapoo dala toowa tenelaiso.

<sup>7</sup> Eeye-ee, mipoo hamapoo debeli odoo, niba emegei! Bei, mipoo hamapoo niba goo tokenee mapoo gido dili goo diya bei moloso. Esiga goo egeesees sibilesa. Esino goo tokenee mapoo gido dili odoo, niba obeeamo! Godeeye odoo egeesee seli mapoo dala diya toowa tenelaiso. <sup>8</sup> Osoloso nee dee hodio oso no goo tokenee talame gido duga, dee hodio egee kobigi, dee hediliwe badoboso kookaiyo gie badeli talai tekepo. Esino nee dee bakadio dou koo semili mapoo dilei tekeponee. Osoloso nee homo hodio oso no goo tokenee talame gido duga, homo hodio egee kobigi, homo hediliwe badoboso kookaiyo gie badeli talai tekepo. Esino nee homo bakadio dou koo semili mapoo dilei tekeponee. <sup>9</sup> Osoloso nee howo hodio oso no goo tokenee talame gido duga, nee howo hodio egee tabigi, howo hediliwe badoboso kookaiyo gie badeli talai tekepo. Esino nee howo bakadio dou koo semili mapoo dilei tekeponee.

<sup>10</sup> Esiga niba obeeamo. Holaiso hagee bia goo mauwe dee na goolee. Bei, Godeeyo momaiye oso Kei mi ma dokodooga Ma Godeeyo howo woola dimapoo ka bamoloso. [ <sup>11</sup> Bei, Odoos Holo ayo simi hagee odoo Godee maga peegoo osugoba dimapoo gie badeli tenelame ka simi.”]

### Sipi be hu osugoba

(Luka 15:3-7)

<sup>12</sup> “Odoos heeso sipi be hu 100 gibadalaiso. Egeesee ma kulodu sipi be hedebe osugoboodoga, yayo see ogoo goo moodoolaisomo? Sipi be hu abo 99 ee omapoo doga, yo see hedebe osugoba ee esiamo dileiso. <sup>13</sup> Esiga ayo nimapoo taka. Sipi be hu 99 osugobe mapoo yo goomoga moloso. Esino sipi be hedebe osugoba ee esiameliso ogoga, yo diya goomogalaiso. <sup>14</sup> Esiga holaiso hageesee heeso yimaga peegoo osugobalai nibada Ama Kei mi ma dokodoo egee bado yo koo goomogoso.”

### Tei too odoo oso goo tokenee toga, yo pidi

<sup>15</sup> “Esiga tei too odoo oso namapoo goo tokenee moodooga, nayo mada dileso yimapoo o goo tokenee ee takalai tekepo. Egeesee ma kulodu yayo nee to duloso mesioga, yo see goo tekepo mapoo ido siboso.

<sup>16</sup> Esino yayo nee to duloso mesile poogooga, nayo see tei telaga odoo hedebe, o, bakadio egesi gilimadoloso yo agalame di, diayo to nayo taka ee tei takadoo dalame. <sup>17</sup> Egeesee ma kulodu yayo dibada to duloso mesile poogooga, goo hagee tei telaga odoo susuga

sosee ma kulodu egee do mapoo takee. Esino yayo see dibada to duloso mesile poogooga, yo see peegoo badeli odoo o, goo tokenee teli odoo dalai tekepo.

<sup>18</sup> Esiga ayo nimapoo taka. Osoloso niyo ogoo goo ee mi hamapoo tiadoo mologa, Kei mi ma dokodoo osee tiadoo molo agalaiso. Osoloso niyo mi hamapoo ogoo goo ee puobuguga, Kei mi ma dokodoo puobugu molo agalaiso.

<sup>19</sup> Esiga ayo see nimapoo taka. Mipoo hamapoo odoo bakadio oso goo goolee hedebe doloso ogoo goo talame dokodoo takooga, mo Ma Kei mi ma dokodoo egee bado oso diayo goomoga goo ee tei moodoolaiso. <sup>20</sup> Esiga odoo bakadio egesi o, bakadio hedebe di egesi oso sibilesa mo hu maga mooloo-goodoloso dogo, a dibolo hodobo badoso."

### Odoo koo sooloo deli odoo

<sup>21</sup> Osoloso domo omapoo Pitaye sibilesa Yesu mapoo egeesee woosaso, "Lodee, mo tei too odoo oso amapoo goo tokenee toga, ayo nei o goo tokenee ee kasolo boobado bigileiyo? 7 mapoo toobooga ka koodobileiyo?" dee takaso.

<sup>22</sup> Esemee Yesuye nei egeesee takaso, "Haye, hedebe 7 mapoo toobooga o goo tokenee na boobadobigi. Esino o goo tokenee hapoloso boobadobigili ee na koodobie.

<sup>23</sup> Osoloso Godeeye wiligi doloso badeli goo ee egeesee moloso. Wiligi odoo o tou teli odoo oso molee howadooso, see hamamee tebia hedebe egesi yimapoo ka tenelame. Esemee hamamee wiligi odoo oso molee egee see talai goomogolone, o odoo mapoo takolone, odoo molee howadoo egee bia yimapoo gilimado sibeye diso. <sup>24</sup> Esemee o tou teli odoo hee daga molee toowa 10,000 talent † deli ee howadoo ee yimapoo ido simiso. <sup>25</sup> Esemee odoo ogoso molee tebia egesi nei tenelai tebile. Esemee wiligi odoo oso o odoo mapoo egeesee takaso, 'Odoo hagee sabolo, osoloso osobo, osoloso owolo dio, osoloso o bi susuga toloso odoo abo mapoo tenee, nei molee talame. Osoloso see molee egee amapoo tosibe,' dee takaso.

<sup>26</sup> Osoloso o tou teli odoo yayo o wiligi odoowo homo beiyopoo gasuwoloso ebiso miyomoo tugusaloso badolone howolone egeesee takaso, 'Nayo a sooloo dologa beeame deiyepo amapoo tenee. Ayo hamamee nee molee tebia hedebe egesi namapoo tenelaiso,' diso.

<sup>27</sup> Esemee wiligi odoo oso yo diya sooloo dolone yimapoo egeesee takaso, 'Nayo mo molee howadoo eyo nei hamamee amapoo tenelaigo, dee takemenee ee bige peegee. Bei, ayo goo egee olo boobado buguso. Esiga no goomoga sabolo di,' dee takaso.

<sup>28</sup> Osoloso tou teli odoo ee see wedi dulone o odoo tugodooso. O odoo hagooso yimaga molee howadoo ee haga toowanee (goo egee, molee ko 100 denaliyus †† deli ee howadoo). Esino tou teli odoo oso yo ogoloso o gabada mapoo toloso debidolone egeesee takaso,

† talent goo eyo bei hagooso. Odoo heeso dugo 15 ma kulodu tou temelee eyo nei molee toowa talent deli hedebe teliso. †† de-

'Nayo mo molee howadoo eyo nei tebia hedebe egesi amapoo tenee,' diso.

<sup>29</sup> Esemee odoo hagooso tou teli odoowo homo beiyopoo gasuwoloso ebiso miyomoo tugusaloso badolone yimapoo howolone egeesee takaso, 'Nayo a sooloo dologa beeame deiyepo amapoo tenee. Bei, ayo hamamee nee molee tebia hedebe egesi namapoo tenelaiso,' diso. <sup>30</sup> Esino tou teli odoo yo o odoo oso egeesee takeme gowoolone yo todilesa neliga moso mapoo toosooso, yayo nei tebia egesi yimapoo teneega peegoo ka tamagalame.

<sup>31</sup> Esino wiligi odoo o tou teli odoo aboso goo hagee ogoloso diya gowoolone wiligi odoo mapoo takalame diyadeeso. <sup>32</sup> Esemee wiligi odoo yo goo hagee duloso o tou teli odoo ee idoloso yimapoo egeesee takaso, 'No tei diya tokenee odoodo. Nayo mo molee howadoloso see hamamee tenelai tebile neme, ayo no sooloo dolone bige peegee dee takaso. <sup>33</sup> Goo egeesee maga, nayo mo tou teli odoo hee sooloo dala diepi, tekepo meliyo,' diso. <sup>34</sup> Egeesee takoloso wiligi odoo oso komonolone o tou teli odoo ee neliga moso gidebeli odoo mapoo teneeso, diayo yo neliga moso mapoo toosooloso dala tenelame. Osoloso yayo nei tebia hedebe egesi yimapoo teneega peegoo ka tamagalame."

<sup>35</sup> Yesuye to hagee taka koodobuloso see odoo mapoo egeesee takaso, "Esiga niyo nee sooloo ma kuloduga tei too odoo eyo goo tokenee boobado bigilega poogooga, wiligi odoo oso o tou teli odoo mapoo moodoo egesi masi nei mo Ma Kei mi ma dokodoo egee bado oso nimapoo egeesee moodoolaiso."

### Sobo huloso pegeli goo ee eligi

(Maka 10:1-12)

**19** Yesuye goo hagee takoloso koodobuloso Gelili mi poogoloso see Yudiya mi mapoo dulone Yoden howo daloso diso. <sup>2</sup> Yo omapoo dime, odoo mooloogoodoo oso yo dodomo diso. Esemee Yesuye paiye dima kulodu melee susuga ee tekepo paso.

<sup>3</sup> Esemee beeame omapoo Pelisi odoo aboso sibilesa Yesu mapoo gamenee kukulo agalame yimapoo egeesee takaso, "Edebeeyo sobo huloso wulo goo hee maga osobo pagalai tei molosomo?" diso.

<sup>4</sup> Esemee Yesuye nei dimapoo egeesee takaso, "Niba Godeeyo to hesigeleyo? Godeeye mipoo hagee moodoo beeame mapoo giso sabolo sobo sabolo moodooso. <sup>5</sup> Osoloso Godeeye egeesee takaso, 'Esiga gisoso ama dio o wee dio poogoloso see osobo sabolo hedebe doloso badalaiso. Osoloso obakadio su hedebe doloso dabalaiso,' dee takaso. <sup>6</sup> Esiga diayo debei ee ma kulodu diba bakadio nee, esino diba see olo hedebe doloso ka doso. Esiga Godeeye diba hedebe di goo ee see odoo heeso domo na pi."

<sup>7</sup> Esino Pelisi odooso nei Yesu mapoo egeesee takaso, "Bei kasee maga Moseseeye takolone sobo pa-

naliiyus goo eyo bei hagooso. Odoo heeso beeame hedebe mapoo tou too eyo nei molee ko denaliyus deli hedebe teliso.

galame gooleega, sobo pegeli peipa mapoo hoguguloso sobo egee pagalai soowa dee ka takayo?" diso.

<sup>8</sup> Eseme Yesuye nei dimapoo egeesee takaso, "Moseseeye egeino yayo eligi goo mapoo niyo mesilega poogolo neme, bige, sobo pagalai soowa dee ka taka. Esino bei mooloogoo beeamo mapoo sobo huloso pagalai goo ee Godeeye takele. <sup>9</sup> Esiga ayo nimapoo taka, gisoso osobo na peegee. Esino sobo oso giso hee sabolo hedebe daga, omoye osobo egee pagalai tei mauwe. Esiga gisoso wulo goo hee maga osobo poogoloso see sobo hee huga, yo odo heeyo osobo ee peedee huso."

<sup>10</sup> Eseme Yesu o hamamee dili odo oso yimapoo egeesee takaso, "Esiga gisoso wulo goo hee maga osobo pagalai ee tei daga, gisoso sobo hulei tekeponee," diso.

<sup>11</sup> Eseme Yesuye nei dimapoo egeesee takaso, "Goo hagee odo susuga oso dadalai tebile. Esino hedebe Godeeye kitulugu tenee odo oso goo hagee dadalai tebia. <sup>12</sup> Bei, odo aboso sobo huloso holo sooloogamagalai tebile. Bei, diba dibada oweeye ho mauwe soomagooga. Goo egeesee maga diba sobo koo huli. Osoloso odo abo ho tigaga diba sobo koo huli. Esino odo aboso Godeeye wiligi doloso badeli eyo goo maga sobo koo huli. Esiga edebeeyo sobo huli eyo goo maga ayo eligi goo ee talai tebia daga, yo goo ayo eligi hagee medee dadalai tekepo."

#### Yesuye holaiso pidi

(Maka 10:13-16, Luka 18:15-17)

<sup>13</sup> Odo aboso owolo dio Yesu mapoo iyado simiso, Yesuye o deeso diba sigolone diba Godee mapoo takalame. Eseme o hamamee dili odo diayo goo hagee ogoloso hamaga takaso. <sup>14</sup> Eseme Yesuye o hamamee dili odo mapoo egeesee takaso, "Holaiso amapoo sibadee dee, diba na hamaga takee. Bei, edebeeyo holaiso hageesi masi oso Godeeye wiligi doloso badeli mapoo gadileiso," diso. <sup>15</sup> Osoloso yayo o deeso diba sigolone Godee mapoo takoloso see mi hee mapoo diso.

#### Bi bei odo

(Maka 10:17-31, Luka 18:18-30)

<sup>16</sup> Odo heeso Yesu mapoo sibilesi egeesee takaso, "Eligili odo, ayo ogoo goo tekepo ee toga, badoboso kookaiyo gie badeli ka talaiyo?" dee takaso.

<sup>17</sup> Eseme Yesuye nei yimapoo egeesee takaso, "Bei kasalame nayo sibilesi goo tekepo talai goo maga amapoo ka woosoowala? Hedebe Godeeye tekepo ka badoso. Esiga no badoboso kookaiyo gie badeli talai goomogoga, no tei magoo goo ee medee deede." <sup>18</sup> Eseme odo ogoo egeesee takaso, "Tei magoo kagee takala?" diso.

Eseme Yesuye nei yimapoo egeesee takaso, "Odo na wooloome, osoloso adaba kooka sobo sabolo hedebe dee na see, osoloso adaba bi heli na te, osoloso odo hee mapoo gamenee na gigidi, <sup>19</sup> osoloso nama dio noowee dio oso taka to mapoo mesie, os-

oloso nee su no nediliyo egee sooloo dolo egesi masi nee odo hee nose egeesee sooloo dele."

<sup>20</sup> Eseme odo gie kauwa ogoo Yesu mapoo egeesee takaso, "Tei magoo goo susuga ayo tobuloso medee deedeeso. Esino ayo see ogoo goo hee ka moodoolaisomo?" dee takaso.

<sup>21</sup> Eseme Yesuye nei yimapoo egeesee takaso, "No medee teedee badalai goomogoga, nee bi susuga odo abo mapoo teneloso nei molee toloso odo bi mauwe mapoo tenee. Nayo egeesee seega, Kei mi mapoo bi bei nee hu sabolo malaiso. Osoloso a dodomo sibe," diso.

<sup>22</sup> Eseme odo gie kauwa ogoo Yesuwo to duloso diya goohede sabolo diso. Bei, yo bi bei doloso badebeiga. <sup>23</sup> Eseme Yesuye o hamamee dili odo mapoo egeesee takaso, "Ayo nimapoo taka. Bi bei odo oso Godeeye wiligi doloso badeli goo mapoo gadilei diya kalawa. <sup>24</sup> Esiga ayo nimapoo see tobu taka, dugo duseli midole ou maga kemol be toowa oso gadilei kalawa. Esino bi bei odo oso Godeeye wiligi doloso badeli mapoo gasibilei diya kalawa toowa," diso.

<sup>25</sup> Eseme o hamamee dili odo oso yayo eligi goo hagee duloso diya dio dulone egeesee takaso, "Goo egee diya kalawadoo. Esiga odo agayo gadileisomo?" diso.

<sup>26</sup> Eseme Yesuye dimapoo bolone egeesee takaso, "Edebeeyo o gie badeli eyo nediliyo pidilei tebile. Esino Godee yo tebia. Bei, goo susuga yayo moodoolai haga kalawane," diso.

<sup>27</sup> Eseme Pitaye nei Yesu mapoo egeesee takaso, "Ibada bi susuga hoogoo poogoloso nayo di hamamee deede simiso. Esiga iba nei ogoo bi talaiyo?" diso.

<sup>28</sup> Eseme Yesuye nei egeesee takaso, "Ayo nimapoo taka. Godeeye goo susuga see dia moodoolai beeamo mapoo, Odo Holo ayo wiligi doloso badeli mi mapoo badalaiso. Osoloso beeamo omapoo mo hamamee dili odo 12 niba nose wiligi odo oso bili 12 mapoo dobolone, Isalael odo bala 12 ee niyo gidabalaiso.

<sup>29</sup> Osoloso odo agayo emei dio, omolo dio, omoo dio, ama dio, owee dio, owolo dio, osoloso dia mi sabolo, dia moso poogoloso mo goo tomo siloga, diba nei toowa talaiso. Osoloso diba kookaiyo badoboso gie badeli talaiso. <sup>30</sup> Esiga odo abo epedee hamapoo malalo hagee do ee see diba hamamee dabalaiso. Esino odo abo epedee hamapoo hamamee hagee do oso see malalo dabalaiso."

#### Tou teli odo eyo goo maga wudu taka

**20** "Godeeye wiligi doloso badeli goo ee egesi masi moloso. Homolee eyo amaye gesikolodee tou teli odo gilimalame diso, diayo o homolee geleipi ko segei mapoo tou talame. <sup>2</sup> Osoloso yayo odo abo ogoloso yibolo hodobo to mooloso goomoga magooso, beeamo hedebe mapoo diayo tou too eyo nei odo hedebe hedebe dimapoo molee ko † hedebe tenelame. Osoloso diba tou talame diye diso.

† molee ko hageeyo hu ee denaliyus (Matiyu 18:28 mapoo ege).

<sup>3</sup> Osoloso homolee eyo amaye osoko howo 9 domo mapoo yo see wedi dilesa egeino, odoo abo tou telega wulo tebisamolome egeiso. <sup>4</sup> Esemeyayo dimapoo egeeseetakaso, 'Niba see mo homolee mapoo tou talame di. Eseega ayo habe nimapoo niyo tou too eyonei molee tebia tenelaiso,' diso. <sup>5</sup> Esemeyadiba tou talame diso.

Osoloso beeamehedebe omapoo osoko oo domo tooboome, odoo abo gilimado dilesa o homolee mapoo tou teyediso. Osoloso beeamehedebe ososee osoko howo bakadio hedebe di mapoo, yayo see tobo odoo abo gilimado dilesa o homolee hedebe omapoo tou teyediso. <sup>6</sup> Osoloso beeamehedebe omapoo osoko howo deetiadoo mapoo tooboome, yo see wedi dilesa egeino, odoo abo tou telega wulo tebisamolome egeiso. Esemeyayo dimapoo egeeseetakaso, 'Niba kasalame tou telega beeametoowa wulo hamapoo mosoowe ka tebisamalala?' diso.

<sup>7</sup> Esemeyadiyo nei egeeseetakaso, 'Odooheso imapoo o tou teyede takele,' diso. Esemeyadimapoo egeeseetakaso, 'Niba noseemo homolee mapoo tou talame sibe,' deetakaso.

<sup>8</sup> Esemeyahomolee eyo amaye o tou teli eyowiligi odoo mapoo egeeseetakaso, 'Homoleema kulodu tou telagali odoo gilimadoloso dia tou too eyonei molee tenee. Esiganayo nei molee teneega, tou talame hamameedeesibili odoo mapoo daga malalo ka tenee,' deetakaso.

<sup>9</sup> Esemeyoteli odoo oso dia nei talame sibileso mooloogoodoome, odoo tou talame hamameedeesibili dimapoo tou too eyonei molee ko hedebe hedebe di teneeso. <sup>10</sup> Osoloso gesikolodee odoo daga malalo tou talame diyadee oso gooegee ogoloso diayo goolee, diba dia tou eyonei toowa talaiso, deegoolone debeiso. Esinodiba onosee molee ko hedebe egesi tooso. <sup>11</sup> Diba molee egee tolosogowoolone homolee eyo ama mapoo egeeseetakaso, <sup>12</sup> 'Iba beeametoowa osoko pa mapoo tou toowa telagameleeso. Esinodoo hageebia wulo osoko howo deiyepo mapoo tou ka too. Esinonayo kasee magamolee dimapoo tenee hedebe egesi masi imapoo ka tonowala?' diso.

<sup>13</sup> Esemeyohomolee eyo amayedima kulodu odoo heemapoo egeeseetakaso, 'Emegei, ayo gootokenee heenamapoo moodoole. Bei, no beeamehedebe mapoo tou too eyonei molee ko hedebe egesi masitalai doloso tou talame goomoga magooso. <sup>14</sup> Esiganee molee egee tolosodi. Ayo molee namapoo tenee hedebe egesi masi odoo abo mapoo tenelai a goomogo. <sup>15</sup> Bei, mo molee oso mawogoomoga gooeetalai tekepo. Esinokasee magagoo tekepo ayomoodoo ee ogoloso, nayo amapoo ka komonowala?' deetakaso."

<sup>16</sup> Esemeyesuyese egeeseetakaso, "Esiga odoo abo epedee hamapoo malalo hageedo ee see diba hamamee dabalaiso. Esinodoo abo epedee hamapoo hamamee hageedo oso see malalo dabalaiso."

### Yesu eyotalai goo ee see tobutaka

(Maka 10:32-34, Luka 18:31-34)

<sup>17</sup> Yesu Yolusalem mapoo polone o hamamee dili odoo 12 peegoo gilimado dilesa dobolone dimapoo egeeseetakaso, <sup>18</sup> "Goolee! Iba Yolusalem mapoo olo duso. Omapoo Odoo Holo a Yu odoo dia tei mosowiligi odoo tebisasabolo osoloso tei eligili odoo mapoo tiasalaiso. Osoloso diayo mo goomeediloso ayo talai goo ee takalaiso. <sup>19</sup> Osoloso Yu odoonee oso a tolosomanolone woolaiso. Osoloso a woomo dilesa homobulubo magoo ma dokodoo yoguso enigileiso. Esino a bi ma kulodu ta moloso beeamebakadio hedebe di mapoo see gie badeli tolosohogadileiso."

### Yemes dio Yonee dio egee bia dia oweeye goomoga goo ee ogo taka

(Maka 10:35-45)

<sup>20</sup> Osoloso Sebediyo owolo Yemes dio Yonee dio oweeye gilimadoloso Yesu mapoo simiso. Osoloso oweeye goomoga goo ee Yesu mapoo ogo takalame, o homobeiyopoo gasuwoloso badebeiso.

<sup>21</sup> Esemeyesuyeyimapoo egeeseetakaso, "Nayo amapoo ogo goo takalame ka simiyo?" diso. Esemeyayo Yesu mapoo nei egeeseetakaso, "Nayowiligi doloso badalai mi mapoo mo holo bakadio hagee heeso nee deedeedokolo bado, osoloso hee nee deedobusu dokolo bado dalai tekepowo?" deetakaso.

<sup>22</sup> Esemeyesuyedimapoo egeeseetakaso, "Niyegee takoo goo ee niba koo gooleedo," deetakaso. Osoloso yayo Yemes dio Yonee dio mapoo egeeseetakaso, "Dala toowa ayo talame egee molo niba noseeegeeseetalai tebiayo?" diso.

Esemeyadiyo nei egeeseetakaso, "O. Iba tebia," deetakaso.

<sup>23</sup> Esemeyesuyenei dimapoo egeeseetakaso, "Teitakoo, niba noseedala hageeseetalaiso. Esino mo deedeede dokolo dabalai odoo sabolo, osoloso mo deedobusu dokolo dabalai odoo hesigilei amapoo kitulugumauwe. Esino hedebe mo Mayehesiga odoo oso mi omapoo dabalaiso."

<sup>24</sup> Egeeseema kulodu Yesu o hamamee dili odoo abo 10 oso to hagee duloso Yemes dio Yonee dio mapoo diya kamanaso. <sup>25</sup> Esemeyesuyeo hamamee dili odoo susuga gilimadoloso dimapoo egeeseetakaso, "Yuo doonee dia wiligi odoo oso dima hemidu debeli odoo ee kitulugu sabolo gidebeliso. <sup>26</sup> Esino nima kuloduegeeseesalai tekeponee. Esiganima kuloduedebeeyotoowa doloso badalai goomogoga, yo tou teli odoo masimesie sabolo odoo abo halo tou tolone ka badebee. <sup>27</sup> Osoloso edebeeyo malalo badalai goomogoga, yo tou wulayo teli odoo masi odoo abo halo tou tolone ka badebee. <sup>28</sup> Bei, Odoo Holo ayo mipoo hamapoo simi hagee edebeeyo a pidilame ka sibile. Esino ayo odoo pidilame ka simi. Osoloso odoo susuga Godeemapoo iyado sibilame a talame ka simi."

**Yesuye odoo howo neliga bakadio tekepo pa**

(Maka 10:46-52, Luka 18:35-43)

<sup>29</sup> Yesu o hamamee dili odoo sabolo Yeliko mi poogoloso diyadaga molome, odoo mooloogoodoo toowa oso diba dodomo sibadeeso. <sup>30</sup> Egeesee seemelee domo omapoo odoo howo neliga bakadio eli pee mapoo debeiso. Diayo Yesuye simi goo ee dulo to neligidi egeesee takaso, "Lodee, Deibidiyo amawe, nayo iba sooloo dolone pidi," dee takaso.

<sup>31</sup> Esino odoo susuga oso dimapoo diya takolone egeesee takaso, "Niba to mauwe debee," diso. Esino odoo susuga oso dimapoo egeesee takeme, diba dia to dulega see diya neligidi egeesee takaso, "Lodee, Deibidi amawe, nayo iba sooloo dolone pidi," dee takaso.

<sup>32</sup> Esemé Yesuye omapoo kookoodoboloso diba iyadoloso dimapoo egeesee takaso, "Ayo nimapoo ogoo goo moodolai goomogolo?" diso

<sup>33</sup> Esemé diayo nei yimapoo egeesee takaso, "Ibada howo tekepo moodee. Iba agalai goomogo," dee takaso.

<sup>34</sup> Yesuye diba sooloo dolone dibada howo deeso sigeso. Esemé saga omapoo dibada howo tekepo poome, Yesuye di hamamee diso.

**Yesuye Yolusalem mi mapoo di**

(Maka 11:1-11, Luka 19:28-40, Yonee 12:12-19)

**21** Yesu o hamamee dili odoo sabolo Yolusalem mi koola mapoo dulone, Olipi mubi kumoo mi pepooko Betapage mapoo peledabaso. Diba omapoo peledoboloso dobolone, Yesuye o hamamee dili odoo bakadio malalo diye dolone egeesee takaso, <sup>2</sup> "Niba mi hee malalo koogee mapoo di. Niba omapoo dilesos ogoga, donki be o pe sabolo dia mu mapoo ebigiso bagagoloso, omou mapoo bagagoo mologa saga agalaiso. Eseega niyo ebigi pidiga poogoloso amapoo hado sibe. <sup>3</sup> Egeesee ma kulodu odoo heeso nimapoo takooga, niyo nei yimapoo egeesee takee, 'Lodeeye donki be bakadio egee goomogogona,' dee takee. Egeeseega odoo ogoso saga nimapoo takolone donki be egee hado diye dalaiso," diso.

<sup>4</sup> Esiga goo hagooso peledaba ee Godee maga to toloso kokodo takomo sili odoo oso to taka sabolo tebilame ka see. Bei, yayo egeesee takaso,

<sup>5</sup> "Niyo Yolusalem mapoo debeli odoo mapoo takee, 'Ege, nibada wiligi odoo nimapoo olo sibo.

Yo mesie taba. Yo donki be pepooko mapoo buloso ka siboso."

<sup>6</sup> Esemé Yesu o hamamee dili odoo bakadio oso Yesuye taka goo ee tobuloso moodooso. <sup>7</sup> Diba dilesos donki be owee sabolo osoloso o pe sabolo hado simiso. Osoloso dibada kekeisu dugo tigadoloso donki be dia waki ma dokodoo palagaloso, Yesuye omapoo peleso biaso. <sup>8</sup> Esemé odoo mooloogoodoo toowa oso dia kekeisu dugo tigadoloso eli domopoo palagamo dime, odoo aboso weiyo kookooloso Yesuye sibilei eli mapoo palagamo diso. <sup>9</sup> Esemé Yesuye donki be ma

dokodoo buloso dimolome, malalo diyadee odoo sabolo osoloso Yesu ma hamamee sibadee odoo oso to neligidi egeesee takaso,

"Iba Deibidiyo amawe mapoo goomogo.

Odoo Godeeyo hu maga kitulugu sabolo egee sibo yo Godeeye pidiye dee.

Kei mi ma doko hodoo badeli Godee mapoo goomogo," dee takagamo diyadeeso.

<sup>10</sup> Yesu Yolusalem mi ma kulodu gadime, odoo susuga omapoo debei oso diya dio dulone egeesee takaga meleeso, "Hagee odoo ogubele?" dee takaso.

<sup>11</sup> Esemé odoo mooloogoodoo oso nei egeesee takaso, "Hagee Godee maga to toloso kokodo takomo sili odoo Yesu oso. Yo Gelili mi toowa ma kulodu Nasalet mi pepooko maga ka siboso," diso.

**Yesuye Yu odoo dia tei moso ma kuloduga odoo peegoo hasisobugu**

(Maka 11:15-19, Luka 19:45-48, Yonee 2:13-22)

<sup>12</sup> Yesuye Yolusalem mapoo sibilesos tei moso mapoo peleso egeino, odoo susuga oso tei moso tegei ma kulodu gala sabolo bi abo sabolo neiso telaga molome egeiso. Yo goo egee agalai gowoolone, yayo moso ee ma kulodu melee bi eyo ama sabolo osoloso bi ee telaga odoo sabolo peegoo hasisobuguso. Osoloso molee piligeli odoo dia debi pooba sabolo bidigebuguso. Osoloso molo huyado sibilesos nei moleeso teli odoo susuga oso bili pooba sabolo bidigebuguso.

<sup>13</sup> Osoloso Yesuye dimapoo egeesee takaso, "Godeeyo to booka mapoo hogugu oso egeesee takooso,

'Mo tei moso ee edebeeyo sibilesos Godee mapoo takeli moso,' diso.

Esino niyo Godeeyo moso hagee heli teli odoo oso mada wuli moso ka poso," diso.

<sup>14</sup> Egeesee seemelee beeamé omapoo Yesu tei moso ma kulodu badoboome, howo neliga odoo abo sabolo, osoloso odoo bagi dagapoogoo yimapoo sibadeeso. Esemé yayo diba tekepo paso.

<sup>15</sup> Esino tei moso wiligi odoo tebisa sabolo osoloso tei eligili odoo oso Yesuye goo toowa opusomo di moodoomo silee ogoloso diya kamanaso. Egeeseelone holaisoso tei moso ma kulodu dobolone toso neligidi takolone egeesee takaso, "Deibidiyo amawe Yesu mapoo goomogo," dee takaga melee dulo diayo dimapoo diya goweso. <sup>16</sup> Osoloso diayo see Yesu mapoo egeesee takaso, "No holaisoso to egee takoo medee dusomo?" diso.

Esemé Yesuye nei dimapoo egeesee takaso, "O. A duso. Esino niba Godeeyo to booka mapoo hogugu ee hesigelega dosomo? Bei, Godeeyo to booka mapoo hogugu oso egeesee takooso,

'Godeeye holaiso sabolo osoloso holope oso o hu dokodoo poudilei goo ee dimapoo olo eligiso,' dee takaso."

<sup>17</sup> Osoloso Yesuye diba poogoo dilesos Yolusalem mi maga see Betani mi mapoo tilame diso.

**Pigi homoso sia**  
(Maka 11:12-14,20-24)

<sup>18</sup> Gesikolo Yesu Yolusalem mapoo see wedi dulone hodiaso. <sup>19</sup> Esemé dulone pigi homo eli palaga mapoo dime ko pa beleso agalame diso. Esino ko pelega wulo duwe molome egeiso. Esemé Yesuye pigi homo hamapoo egeesee takaso, "No see tobu ko palaime," diso. Esemé epedee omapoo homo saga siaso.

<sup>20</sup> Yesu o hamamee dili odoo oso goo hagee ogoloso dio dulone egeesee takaso, "Pigi homo hagee saga kasee siabele?" diso.

<sup>21</sup> Esemé Yesuye nei dimapoo egeesee takaso, "Ayo nimapoo taka. Niyo tei toloso dobolone goo goolee bakadio delega doga, ayo homo hamapoo moodoo goo ee niba nose egeesee moodoolai tebileiso. Osoloso goo hedebe hagoonosee talai tebile. Esino niyo goo toowa abo moodoolaiso. Egeeseelone niyo mubi hamapoo takolone 'no nediliyo tadoloso howomoo meí' dee takooga, goo oso tei peledabalaiso. <sup>22</sup> Esiga niyo tei tolone Godee mapoo takooga, yayo goo niyo howa eyo nei nimapoo tenelaiso.

**Yesuye kitulugu maga woosa**  
(Maka 11:27-33, Luka 20:1-8)

<sup>23</sup> Yesu see Yu odoowo tei moso mapoo peleso Godeeyo to odoo susuga mapoo eligimolome, tei moso wiligi odoo tebisa sabolo osoloso Yu odoo dia wiligi odoo tebisa oso sibilesa Yesu mapoo egeesee takaso, "No agamo kitulugu maga goo hagee ka moodoomo silala? Odo agayo namapoo kitulugu hagee ka teneeyo?" diso.

<sup>24</sup> Esemé Yesuye nei dimapoo egeesee takaso, "Anosee woosali to hedebe nimapoo woosalaiso. Odo agayo Yonee mapoo kitulugu ka teneeyo, yayo odoo howo olugulame? Kitulugu Godeeye teneeyo o, ede-beeyo teneeyo? Esiga niyo to eyo nei amapoo takooga, anosee ayo kitulugu toloso hagee silo eyo goo ee nimapoo ka takalai," diso.

Esemé diayo to hagee duloso dieso nediliyo to moulone egeesee takaga meleeso, "Iyo kasee takalaisomo? Iyo takolone Yoneeye kitulugu ee Godeeye teneedo, dee takooga, see nei Yesuye imapoo egeesee takalaiso, 'Niba bei kaseme Yoneeyo to mapoo tei tel-ega ka poogoowo?' dalaiso. <sup>26</sup> Osoloso iyo takolone kitulugu odoo maga simigo daga, odoo susuga oso imapoo diya kamanalaiso. Bei, odoo susuga oso takolone Yonee yo Godee maga to toloso kokodo takomo sili odoo deliso." <sup>27</sup> Egeeseelone diayo nei Yesu mapoo egeesee takaso, "Yoneeye kitulugu too goo eyo bei, iba gooleedele," dee takaso.

Esemé Yesuye nei dimapoo egeesee takaso, "Esiga ayo goo hagee moodoomo silame kitulugu too hagee nimapoo takalaime," diso.

**Yesuye holaiso bakadio eyo goo maga wudu taka**

<sup>28</sup> "Esiga niba goo hamapoo kasee gooleesomo? Odo heeso o giso holo bakadio gilimadoloso debeiso. Esiga yayo daga holo mapoo egeesee takaso, 'Mo holo, no epei geleipi ko segei homolee mapoo tou talame di,' dee takaso.

<sup>29</sup> Esino giso holo oso nei egeesee takaso, 'A gowoo,' diso. Esino yo see hamamee o goo goolee su wuduloso tou talame diso.

<sup>30</sup> Osoloso amaye see tobu owolo hee mapoo dileso egeesee takaso, 'No geleipi ko segei homolee mapoo tou talame di,' dee takaso. Esemé owoloye nei egeesee takaso, 'O. A tou talame dileiso,' diso. Esino yo dilega poogooso.

<sup>31</sup> Esiga holaiso bakadio hagee bia hee kaso amaye goomoga goo ka toowo?"

Esemé tei moso wiligi odoo tebisa sabolo osoloso Yu odoo dia wiligi odoo tebisa oso yimapoo egeesee takaso, "Daga holo oso amaye goomoga goo ee tooso," dee takaso.

Esemé Yesuye dimapoo egeesee takaso, "Ayo nimapoo taka. Tekisi molee teli odoo sabolo osoloso domo silesibili sobo oso daga diayo Godeeye wiligi doloso badeli goo mapoo gadulone hee niba peegoo pagalaiso. <sup>32</sup> Bei, Yoneeye nimapoo goo tekepo eligime, niyo o to duloso tei tele. Esino goo tokenee teli odoo hagee bia oso Yoneeyo to duloso tei tooso. Osoloso niyo diayo tei too goo ogoloso goo goolee su wuduloso Yoneeyo to mapoo tei tele poogooso."

**Odo tokenee bali eyo goo maga wudu taka**  
(Maka 12:1-12, Luka 20:9-19)

<sup>33</sup> "Osoloso see hee hagee wudu takoo dui. Beame heeso homolee eyo amaye homolee mapoo geleipi ko segeiso, osoloso pee maga beleeso. Osoloso ko i debilame yo ou poogoloso homolee egee gibadalame doko moso tegeiso. Osoloso yayo homolee bali odoo † abo mapoo beye doloso, yo see mi eli sage mapoo badalame diso. <sup>34</sup> Yo omapoo dileso badoboome, homokoko palagaloso olo bi moodoogaso. Esemé yayo o tou teli odoo abo mapoo takolone o homolee mapoo dileso homokoko egee gooloagaloso o hodio ee yimapoo tosibeye diso. <sup>35</sup> Esino homolee bali odoo oso diayo sibadee ogoloso diba toloso, hee wulo woomele poogooso. Osoloso heeno wulo wooloomaso, osoloso hee yoso wooloomaso. <sup>36</sup> Esemé homolee eyo amaye goo hagee duloso see tou teli odoo bei diyadeeye diso. Esino homolee bali odoo oso diba nose toloso woomele poogoloso abo yoso piluguso. <sup>37</sup> Esemé see hamamee owolo diye dolone egeesee gooleeso, 'Homolee bali odoo oso mo holo mapoo mesilone yo wooloomalaime,' dee gooleeso.

<sup>38</sup> Esino homolee bali odoo oso homolee eyo amayo owoloye simi ee ogoloso dieso nediliyo egeesee taka-

† HOMOLEE BALI ODOO: odoo hagee bia oso homolee mapoo tou too eyo nei homokoko gooloagaloso hodio diayo teliso. Osoloso hodio homolee eyo amaye teliso.



ga meleeso, 'Holo hagooso hamamee ama toga, yayo geleipi ko segei hagee talaiso. Esiga geleipi ko segei hagee see iyo talame yo wooloomamo,' dee takaso. <sup>39</sup> Esemé diayo holaiso hagee homolee maga peegoo ido dilesó wooloomaso. <sup>40</sup> Esiga homolee eyo amaye sibilesó o homolee bali odoó mapoo kasee moodoolai-somo?"

<sup>41</sup> Esemé tei moso wiligi odoó tebisa sabolo osoloso Yu odoó dia wiligi odoó tebisa oso nei egeesee takaso, "Homolee eyo amaye sibilesó homolee bali odoó wooloomaloso see bali odoó abo mapoo beye dalaiso. Osoloso odoó egee bia oso homokoko gooloogalái beame mapoo homokoko gooloogaloso homolee eyo ama mapoo hodie tenee demelaiso."

<sup>42</sup> Esemé Yesuye dimapoo egeesee takaso, "Niba Godeeyo to booka mapoo hogugu ee hesigeleyo? Bei, omapoo egeesee takooso, 'Moso tegeli odoó oso omou gowoolone togobugu oso see epedee hamapoo moso omu domo pupodoo ka moloso.

Esiga goo hagee Lodeeye ka moodoo.

Esiga iba goo hagee ogoloso howoodolone tekepo deeso.'

<sup>43</sup> Esiga ayo nimapoo taka. Godeeye wiligi doloso badeli goo ee nimaga peedee doloso, see Godeeye goomoga goo tomo silesibili odoó omapoo tenelaiso.

<sup>44</sup> Esiga odoó agayo omou omapoo takodi buguloso homodobuoga, yo ki gebisa pagalaiso. Osoloso omou oso odoó hee bulugu magooga, odoó egee balado dileiso," dee takaso.

<sup>45</sup> Esemé tei moso wiligi odoó tebisa sabolo osoloso Pelisi odoó oso Yesuye wudu taka goo ee duloso "ibada goo takolone bado," doloso egeesee gooleeso.

<sup>46</sup> Egeeseelone diayo Yesu talai eli esiaso. Esino odoó susuga oso Yesu yo tei Godee maga to tolosó kokodo takomo sili odoó doloso takolone debei ee duloso, diayo yo talai ebiaso.

### Sobo hu wo ne maga wudu taka

(Luka 14:15-24)

**22** Esemé Yesuye see tobu wudu takolone, tei moso wiligi odoó tebisa sabolo, osoloso Yu odoó dia wiligi odoó tebisa mapoo egeesee takaso, <sup>2</sup> "Godeeye wiligi doloso badeli goo ee egeesee moloso. Wiligi odoó taba eyo owoloye sobo hulei maga nei toowa mopoodoo dooso. <sup>3</sup> Yo nei mopoodoo koodobuloso o tou teli odoó diye dolone egeesee takaso, 'Odoó daga ayo nei mopoodoo hamapoo sibilame taka ee niyo hamapoo gilimado sibe,' diso. Esemé o tou teli odoó oso to hagee todilesó odoó egee bia dimapoo takano, diba sibilei goweso. <sup>4</sup> Esemé yo to egee duloso, wiligi odoó taba oso o tou teli odoó abo see tobu diye dolone egeesee takaso, 'Niba dilesó odoó daga ayo sibeye dee taka mapoo to egeesee takeeye diso, "Be hu olo piliguloso moloso, osoloso nei olo mopoodoo doloso moloso. Esiga niba sobo hu wo ne mapoo sibadeeye," dee takee,' diso. <sup>5</sup> Esemé diayo to hagee todilesó takano, odoó aboso to hagee duloso

gowoolone see dia tou talame diyadeeso. Egeeseelone, odoó aboso dia homolee mapoo diyadeeso. Osoloso odoó aboso dia bi neiso teli moso mapoo diyadeeso. <sup>6</sup> Esemé see odoó aboso to hagee duloso wiligi odoó taba o tou teli odoó ee tolosó piluguso. <sup>7</sup> Esemé wiligi odoó taba oso goo hagee duloso diya komonolone o ha teli odoó mapoo egeesee takaso, 'Emegei piligili odoó hagee bia piliguloso dia mi onosee dou gigaleege,' dee takeme, diayo egeesee moodooso.

<sup>8</sup> Esemé wiligi odoó taba oso o tou teli odoó mapoo see egeesee takaso, 'Nei toowa olo mopoodoo doloso moloso. Esino odoó ayo gi hagee bia ee dia goo tokeené maga hamapoo sibilei tebile. <sup>9</sup> Esiga niyo dilesó mi domo omapoo silesibilone odoó susuga wo nalame gilimado sibe,' diso. <sup>10</sup> Esemé o tou teli odoó oso dilesó odoó susuga gilimadoloso wo nalame sibadeeso. Egeeseelone goo tekepo teli odoó sabolo, osoloso goo tokenee teli odoó sabolo sibadeeso. Esemé odoó moso ee ma kulodu diya muguleso.

<sup>11</sup> Esino wiligi odoó taba oso moso ee ma kulodu odoó agalame gapeleso egeino, odoó hee sobo hu wo ne mapoo kali bi ee kelega sibilesó badoboome egeiso. <sup>12</sup> Esemé wiligi odoó taba oso yimapoo egeesee takaso, 'Emegei, no sobo hu wo ne mapoo kali bi ee kelega hagee bado, no moso hagee ma kulodu kasee gasimiyo?' diso. Esino odoó egee to nei takele.

<sup>13</sup> Esemé wiligi odoó taba oso o tou teli odoó abo mapoo egeesee takaso, 'Odoó hagee dee sabolo homo sabolo tiso tialogoloso moso peegoo neliga mapoo togobigi. Yo omapoo badolone pisa sabolo mei gisile sabolo badalaiso,' diso.

<sup>14</sup> Esiga Godeeye odoó susuga yimapoo sibilame gilimolone ka badoso. Esino yo wulo odoó abo ono ka hesiga moloso."

### Sisa mapoo tekisi molee tenelai

(Maka 12:13-17, Luka 20:20-26)

<sup>15</sup> Osoloso Pelisi odoó oso peegoo dilesó Yesu kukulo agalame to mousó, yayo to tokenee takooga yo ka talame. <sup>16</sup> Egeeseelone diayo dia hamamee dili odoó sabolo, osoloso Helodeeyo hamamee dili odoó sabolo Yesuye badebei mapoo diye diso. Esemé odoó egee bia oso dilesó Yesu mapoo egeesee takaso, "Eligili odoó, iba gooleedoo, no tei goo moodeli odoó. Osoloso nayo Godeeyo goo eligilone hedebe tei goodee ee eligili. Osoloso no odoó bolo koo ebili. Osoloso no odoó su mapoo koo egeli. <sup>17</sup> Esiga nayo kasee gooleedo? Imapoo takee, iyo Loum gamalee wiligi odoó Sisa mapoo tekisi molee tenelai tekepowa?" dee takaso.

<sup>18</sup> Yesuye diayo goo tokenee moodoolame to mou goo ee yo olo gooleedoloso dimapoo egeesee takaso, "Niba goo bakadio gweli odoó. Bei kasee maga niyo a kukulo agalame ka sala? <sup>19</sup> Esiga niyo tekisi molee magalame mooloogoo molee ko hedebe amapoo eligi."

Esemé diayo molee ko hedebe yimapoo tosimiso. <sup>20</sup> Esemé Yesuye dimapoo egeesee takaso, "Molee

hamapoo agamo mudu sabolo osoloso agamo hu oso ka mololo?" diso.

<sup>21</sup> Esemé diayo nei egeesee takaso, "Sisayo mudu sabolo osoloso o hu oso ka molo," diso. Esemé Yesuye nei dimapoo egeesee takaso, "Niyo Sisayo bi ee Sisa mapoo tenee, osoloso Godeeyo bi ee Godee mapoo tenee," dee takaso.

<sup>22</sup> Diba to hagee duloso diya howoogadoloso Yesu poogoo diso.

**Ta maga hogabili eyo goo maga Yesu mapoo woosa**  
(Maka 12:18-27, Luka 20:27-40)

<sup>23</sup> Osoloso beeame omapoo Sedisi odoó abo oso Yesuye badebei mapoo sibadeeso. Odoó hagee bia oso takolone, "Odoó wedia see hogabileime," dee takeliso. Esemé diayo Yesu mapoo sibilesó egeesee takaso, <sup>24</sup> "Eligili odoó, tei magoo Moseseeye hogugu oso imapoo egeesee takooso. 'Gisoso sobo huloso holo soomagelega toga, see omoloye emei tayo osobo bau ee huloso emeiyo hu maga holo soolooga magee,' diso. <sup>25</sup> Esiga odoó heeso giso holo 7 soomagooso. Osoloso daga emeiye sobo huso. Osoloso yo holo soomagelega taso. Esemé omolo yima hamamee soomagoo oso emeiyo osobo bau ee huso. <sup>26</sup> Esino yinosee holo soomagelega taso. Esemé see omolo yima hamamee soomagoo oso emeiyo osobo bau ee huso. Esino yinosee holo soomagelega taso. Egeeseelone giso holo 7 susuga hagee bia oso holo soolooga magelega wediaso. <sup>27</sup> Osoloso hamameedee sobo bau yinosee taso. <sup>28</sup> Esiga odoó wedia maga see hogogadilei beeame mapoo sobo egee tei odoó agamo osobo dalaisomo? Bei, giso 7 oso sobo hedebe hagee huso," diso.

<sup>29</sup> Esemé Yesuye nei dimapoo egeesee takaso, "Niba goo dooboo gweli odoó. Bei, niba Godeeye kitulugu sabolo osoloso o to sabolo gooleedelega ka doso. <sup>30</sup> Bei, odoó wedia ee bi maga see hogogabuoga, diba see sobo huleime, osoloso giso obileime. Esino diba see Godeeyo momaiye oso Kei mi mapoo egee do egesi masi dabalaiso. <sup>31</sup> Esiga niba Godeeye odoó wedia see hogogadilei eyo goo maga taka to hogugu hagee hesigeleyo? Bei, yayo egeesee takaso, <sup>32</sup> 'A Eibalahameeyo Godee, Aisekeeyo Godee, osoloso Yekobowo Godee doloso ka badoso,' dee takaso. Esiga Godee hagee odoó wedia eyo Godeenee. Haye, odoó gie egee do eyo Godee." <sup>33</sup> Esemé odoó susuga oso Yesuye eligi goo hagee duloso diya howoogadooso.

**Tei magoo kaso toowa ka molosomo?**

(Maka 12:28-34, Luka 10:25-28)

<sup>34</sup> Sedisi odoó oso Yesuye taka eyo nei takalai tebile poogoo ogoloso Pelisi odoó susuga diesono hodobo mooloogoodoloso to mouso. <sup>35</sup> Osoloso mooloogoodoo omaga tei eligili odoó heeso Yesu kukulo agalame yimapoo sibilesó egeesee takaso, <sup>36</sup> "Eligili odoó, Moseseeye tei magoo ma kulodu tei magoo kaso diya toowa ka molosomo?" diso.

<sup>37</sup> Esemé Yesuye nei yimapoo egeesee takaso,

"Nayo nee wiligi odoó Godee diya goolee, nee sooloo ma kuloduga goolee sabolo, osoloso nee dioso goolee sabolo, osoloso nayo goo goolee oso diya goolee.'

<sup>38</sup> Esiga tei magoo susuga ee ma kulodu tei hedebe hagooso daga malalo diya toowa ka moloso. <sup>39</sup> Osoloso ee ma hamamee tei magoo toowa egesi masi hee hagooso,

'Nayo no nediliyo diya egee goolee, egeesee goolone nee odoó nosee diya egeesee goolee.'

<sup>40</sup> Esiga Moseseeye tei magoo susuga sabolo osoloso Godee maga to tolosó kokodo takomo sili odoó oso to hogugu susuga eyo bei ee tei magoo bakadio hamapoo moloso.

**Keliso agamo owolowo?**

(Maka 12:35-37, Luka 20:41-44)

<sup>41</sup> Pelisi odoó hodobo mooloogoodoloso osee do-boome, Yesuye dimapoo egeesee takaso, <sup>42</sup> "Niba Kelisowo goo maga kasee gooleesomo, yo agamo owolowo?" dee takaso. Esemé diayo egeesee takaso, "Deibidiyo amawe," diso.

<sup>43</sup> Esemé Yesuye nei dimapoo egeesee takaso, "Bei kaseme Deibidiye Dio Tei maga takolone Keliso yo Lodee dee ka takayo? Bei, Deibidiye egeesee takaso, <sup>44</sup> 'Godeeye mo Lodee mapoo egeesee takaso:

No abolo wiligi doloso badalame mo dee deedee dokolo bie.

Esiga nayo badolone namapoo ha teli odoó ee ayo dagadileiso,' diso.

<sup>45</sup> Esiga Deibidiye Keliso o Lodee diso. Esiga kasee maga Keliso yo Deibidiyo amawe dee ka seeyo?" diso.

<sup>46</sup> Esemé odoó heeso o to su mapoo to nei hee takele. Esiga beeame domopooga dulone, odoó susuga oso Yesu mapoo woosalai obulone yimapoo hee woosele poogooso.

**Yesuye tei eligili odoó sabolo osoloso Pelisi odoó dia goo ee eligi**

(Maka 12:38-39, Luka 11:43-46; 20:45-46)

**23** Esemé Yesuye odoó mooloogoodoo mapoo, osoloso o hamamee dili odoó mapoo egeesee takaso, <sup>2</sup> "Tei eligili odoó sabolo osoloso Pelisi odoó oso Moseseeye tei magoo nimapoo ee eligilei dimapoo kitulugu moloso. <sup>3</sup> Esiga dibada to mapoo mesimo silesibulone, diayo taka goo ee tolone debee. Esino diayo suso goo moodeli ee ogoloso niyo na peedee. Bei, diayo tei ma goo ee nimapoo eligilino, see dieso suso koo edidili. <sup>4</sup> Esiga diayo tei eligi goo oso odoó mapoo hegi toowa teneliso. Osoloso diayo emegei pidilone hegi su ee see dieso koo teli.

<sup>5</sup> Esiga goo susuga diayo moodoo ee wulo edebeeyo agalame ka moodeli. Osoloso diba Godeeyo to abo hogugu ee debege masi diya toowa kaloso ee ma kulodu sooloso edebeeyo agalame silesibiliso. Osoloso edebeeyo agalame, diayo howo gisilone, kali dugo su mapoo ti sage bagagoloso † kalagaloso silesibiliso.

<sup>6</sup> Osoloso ibada howo gisili moso ma kulodu, osoloso wo toowa ne mapoo diba medee malalo peleso bilei ono diya goomegeliso. <sup>7</sup> Osoloso mi domo mapoo edebeeyo dimapoo gawuloso emegei di to takooga ee dulei onosee diya goomegeliso. Osoloso odoo susuga oso diba eligili odoo dalame diya goomegeliso.

<sup>8</sup> Esino odoo susuga oso nimapoo takolone eligili odoo dalai tekeponee. Bei, nibada eligili odoo hedebe ayo ka badoso. Osoloso nima kulodu odoo heeso dagadileso koo badoso. <sup>9</sup> Osoloso mipoo hamapoo odoo heeyo hu dokodoo poudulone, yimapoo takolone ma dee na see. Bei, nibada Ama hedebe yayo Kei mi ma dokodoo ka badoso. <sup>10</sup> Osoloso odoo heeso nimapoo takolone wiligi odoo dalai tekeponee. Bei, nibada wiligi odoo hedebe Keliso aso. <sup>11</sup> Esiga nima kulodu odoo hu toowa too oso nibada tou teli odoo doloso badalai tekepo. <sup>12</sup> Osoloso odoo agayo dieso nediliyo diba si howolone dogo, nei Godeeye diba pepooko dalaiso. Esino odoo agayo dieso pepooko doloso dogo, diba nei Godeeye toowa dalaiso.”

**Eeye-ee, tei eligili odoo sabolo osoloso Pelisi odoo!**

(Luka 11:39-52; 20:47)

<sup>13</sup> “Tei eligili odoo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo edebeeyo Godeeye wiligi doloso badeli goo mapoo gadilei eli poolone ka dogo. Osoloso niba nosee omapoo koo gadili.

[<sup>14</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo sobo bauwe diba ebilame gamenee takoloso, dia moso sabolo bi sabolo niyo toloso omapoo dobolone, nibada goo gagaloso Godee mapoo taka diya sageliso, odoo aboso niba tekepo odoo dee goolame. Esiga goo egeesee maga niba nei dala toowa talaiso.]

<sup>15</sup> Tei eligili odoo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, Yu odoonee oso see Yu odoo dalame niyo mipoo hamapoo odoo esiamo silesibiliga. Osoloso niyo odoo hee toloso goo tokenee niyo eligi oso yo diya tokenee peliso. Goo egeesee moodoo oso niyo yo Dou mi mapoo ido duso. Bei, goo tokenee yayo too oso goo tokenee niyo too ee dagadileso moloso.

<sup>16</sup> Niba odoo howo neliga oso odoo abo gilimado di masi gilimado duso. Esiga Godeeye nimapoo dala toowa tenelaiso. Bei, niyo egeesee eligiliso, ‘Odoo heeso to magolone tei moso eyo hu sabolo tei yeli ee goo haga toowanee,’ deliso. ‘Esino edebeeyo tei moso ma kulodu molee egee molo eyo hu sabolo tei yeli goo ono diya toowa,’ deliso. ‘Esiga see hamamee to magoo ee na gababie,’ deliso. <sup>17</sup> Niba howo neliga boobada odoo. Molee ee goo haga toowanee. Esino tei moso tegei oso goo diya toowa ka moloso. Bei, molee oso

tei moso ma kulodu mologa, molee egee Godeeyo doloso ka moloso.

<sup>18</sup> Osoloso niyo see egeesee eligiliso, ‘Odoo heeso to magolone Godee mapoo emegeidi bi tenelame nei sili dosulu tei moso ma kulodu egee molo eyo hu sabolo tei yeli ee goo haga toowanee,’ deliso. ‘Esino yayo to magolone dosulu mapoo emegeidi bi magoo eyo hu sabolo tei yaga, goo ono diya toowa,’ deliso. ‘Esiga see hamamee to magoo ee na gababie,’ deliso. <sup>19</sup> Niba odoo howo neliga masi. Tei moso ma kulodu bi dosulu mapoo egee molo oso goo toowa koo moloso. Esino dosulu oso goo toowa ka moloso. Bei, emegei di bi teneli ee dosulu mapoo mologa, Godeeyo doloso ka moloso. <sup>20</sup> Esiga odoo agayo to magolone dosulu eyo hu sabolo tei yaga, yo hedebe dosulu eyo hu sabolo koo yeli. Esino yo dosulu eyo hu sabolo osoloso dosulu mapoo emegeidi bi magoo eyo hu sabolo tei ka yeli.

<sup>21</sup> Esiga odoo agayo to magolone tei moso eyo hu sabolo tei yaga, yo hedebe tei moso eyo hu sabolo koo yeli. Esino yo tei moso eyo hu sabolo osoloso ee ma kulodu badeli Godeeyo hu sabolo tei ka yeli. <sup>22</sup> Osoloso odoo agayo to magolone Kei mi eyo hu sabolo tei yaga, yo hedebe Kei mi eyo hu sabolo koo yeli. Esino Godeeyo hu sabolo osoloso yayo bili eyo hu sabolo tei ka yaso.

<sup>23</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo Godee mapoo emegei di bi tenelame kobu sabolo, osoloso nai sabolo, osoloso bi abo pepuso mooloogoo 10 egesi mageliso. Osoloso 10 ee ma kulodu hedebe Godee mapoo tenelone debeliso. Esino nei tei magoo ee ma kulodu goo toowa egee molo ee talai boobado bigiliso. Goo ee, tekepo goo talai, osoloso emegei sooloo deli goo, osoloso tei talai goo. Esiga goo toowa hagee tolone medee ka debbee. Egeeseelone goo pepuso talai na boobado bigi.

<sup>24</sup> Niba odoo howo neliga oso odoo abo gilimado di masi ka gilimado duso. Niba kababoo nibada wo mapoo badoga ogoloso peegoo habigiliso. Esino be toowa kemol oso nibada mudugiyopoo tiamologa egelega poogoloso wulo sooloogeliso.

<sup>25</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, nibada kapu sabolo osoloso peleta ee hedebe kolo ee hapoolone kulodu hapelega pegeli, niba egesi masi doso. Bei, niyo hedebe kolo ono hapeli. Esino nibada sooloo ma kulodu bi goomegeli goo oso diya bei moloso. Osoloso niyo hedebe niso goomegeli goo ee tomo silesibiliso.

<sup>26</sup> Pelisi odoo niba howo neliga odoo. Niba daga nibada kapu sabolo osoloso peleta kulodu hapege. Egeeseega, kolo onosee dasegelega heliye malaiso.

<sup>27</sup> Tei eligili odoo sabolo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niba odoo bi medee mopoodoo doloso meli egesi masi doso. Bei, odoo bi ee dokodoo medee tekepo mopoodoo deliso. Esino odoo bi ee ma kulodu odoo wediayo ki sabolo ku sabolo bei meliso.

† KALI DUGO SU MAPOO TI SAGE BAGAGOO: Edebeeyo ti sage hagee ogoloso, Pelisi odoo diba Godeeyo howo woola medee tekepo, dee gweliso.

<sup>28</sup> Egeeseelone odoo aboso niba ogoloso niba odoo tekepo gweliso. Esino niba goo bakadio gweli odoo. Bei, nibada kulodu goo tokenee bei moloso.

<sup>29</sup> Tei eligili odoo osoloso Pelisi odoo, niba goo bakadio gweli odoo! Godeeye nimapoo dala toowa tenelaiso. Bei, niyo Godee maga to tolosoko kokodo takomo sili odoo wedia dia bi ma dokodoo moso pepuso tagagaloso mopoodoo doloso doso. Egeeseelone Godeeyo howo woola tekepo debeli odoo oso wedia eyo bi sabolo niyo medee mopoodoo doloso doso. <sup>30</sup> Osoloso niyo see egeesee takolone doso, 'Ibada amawe diayo debei beame omapoo iba debei diepi, ibada amawe diayo Godee maga to tolosoko kokodo takamo sili odoo ee pilugu sabolo hodobo hedebe delega pegeliyo,' deeso. <sup>31</sup> Esino niyo egeesee taka goo oso niso nediliyo takolone, Godee maga to tolosoko kokodo takomo sili odoo ee woolomali odoo ee nibada amawe dio dee ka takooso. <sup>32</sup> Esiga goo tokenee namawe diayo bei mooloogoloso poogoo ee see niyo hosude. <sup>33</sup> Niba hebiseyo owolo dio masi. Niba Dou mi mapoo egee du peegoo pia dabalai gooleesomo?

<sup>34</sup> Esiga ayo nimapoo Godee maga to tolosoko kokodo takomo sili odoo, osoloso goo goolee tekepo gweli odoo, osoloso Godeeyo to eligili odoo sibeye dalaiso. Esino niyo odoo abo piligileiso. Osoloso abo homo bulubo magoo ma dokodoo yoguso enigileiso. Osoloso odoo abo Yu odoo dia howo gisili moso ma kulodu woolaiso. Osoloso odoo abo niyo dala tenelone dobolone, mi hee maga mi hee mapoo hasisobugu dolone dabalaiso. <sup>35</sup> Esiga mipoo hamapoo nibada amawe diayo Godeeyo howo woola tekepo debeli odoo ee piligimo simiso. Egeeseelone diayo odoo tekepo Eibol woolooma maga bei mooloogoloso abaga simino Belekaya eyo owolo Sekelaya woolomaso. Esiga diayo Sekelaya tei moso ogo osoloso Godee mapoo gala hu wooloso sili dosulu ogo doloso domopoo tobudume woolomaso. Esiga nibada amawe dio oso daga hoogoo Godeeyo howo woola tekepo debeli odoo pilugu eyo nei dala niyo talaiso. <sup>36</sup> Esiga ayo nimapoo taka. Yu odoo epedee hagee do niyo, nibada amawe dio eyo tokenee eyo nei niyo talaiso."

### Yesuye Yolusalem maga goohele

(Luka 13:34-35)

<sup>37</sup> "Yolusalem odoo, niba kasee maga Godee maga to tolosoko kokodo takomo sili odoo ee piliguloso, Godeeye nimapoo diye di odoo ee yoso ka enigeliyo? Kolokoloso o pe gilimadoloso medee egee wuo egeesee seelame, ayo beame susuga nowolo dio gilimadalai goomogeliso. Esino niba koo goomogelina. <sup>38</sup> Esiga Yolusalem odoo, niba dui. Nibada tei moso tegei ee Godeeye poogoo duga, moso egee mosoowe malaiso. <sup>39</sup> Esiga ayo nimapoo taka. Niyo a see agalaime. Esino beame oso siboga niyo egeesee takalaiso, 'Odo Godeeyo hu maga kitulugu sabolo egee sibo Godeeye yimapoo goomogoso,' dalaiso. Beame omapoo niyo a see agalaiso."

### Yesuye tei moso tegei guobigilei eyo goo ee taka

(Maka 13:1-2, Luka 21:5-6)

**24** Yesu tei moso poogoo dilesos dimolome, o hamamee dili odoo oso yimapoo sibilesos egeesee takaso, "Tei moso tekepo tegei hagee ege," diso. <sup>2</sup> Esemee Yesuye egeesee takaso, "Niba goo susuga hagee medee ege. Ayo nimapoo taka. Moso hamapoo yo hedebeso yo hee ma tobudoo molo agalaime. Esino yo susuga mi mapoo misigedibulosos molo agalaiso," diso.

### Dala goo oso bei mooloogalai beame

(Maka 13:3-23, Luka 21:7-24)

<sup>3</sup> Osoloso Yesu Olipi mubi ma dokodoo pelesos bado-boome, o hamamee dili odoo dibusomos sibilesos yimapoo egeesee woosaso, "Tei moso guobigilei ogo beamesos ka guobigileiyo? Osoloso nayo sibilei mologa, malalo ogoos ka peledabalaiyo? Osoloso mi hoo pagalal mologa, daga ogoos imapoo ka eligileiyo? Nayo imapoo takee."

<sup>4</sup> Esemee Yesuye see dimapoo egeesee takaso, "Niba obeeamos! Odoos heesos tei goodee maga niba peegoo gilimado diyaga. <sup>5</sup> Bei, odoo aboso mo hu maga sibilesos takolone diesos nediliyo diba Kelisosos, dee takalaiso. Egeeseelone diayo odoo bei tei goo maga peegoo gilimado dileiso. <sup>6</sup> Esiga ha too goo sabolos osoloso biliga goo oso peledoboomo duga goo ee dulosos, niba haga na ebi. Bei, goo hageesos oso daga malalo peledabalaiso. Esino beame egee hoo poogoo osonee, hamamee sibileiso.

<sup>7</sup> Mi toowa heesos mi toowa hee sabolos ha talaiso. Beame omapoo mi susuga mapoo nei mauwe pagalal. Osoloso mi susuga mapoo mibia toowa sibileiso. <sup>8</sup> Goo hagoos peledobooga, dala beame oso bei mooloogolone ka seeso.

<sup>9</sup> Egeesee ma kulodu odoo aboso nimapoo dala tenelosos niba piligilame odoo abo mapoo tenelaiso. Osoloso niyo amapoo tei too goo omagas odoo susuga oso nimapoo hegia toowa malaiso. <sup>10</sup> Beame omapoo odoo aboso tei too goo ee pagalal. Egeeseelone diayo emegei tei too odoo ee hegilone, diba ha teli odoo mapoo tiasalal. <sup>11</sup> Osoloso gamenee godee maga to tolosoko kokodo takomo sili odoo aboso sibilesos odoo abo peegoo gilimado dileiso. <sup>12</sup> Egeesee ma kulodu goo tokenee goo oso diya toowa dolone, edebeeyo emegei sooloo deli goo ee me pagalal. <sup>13</sup> Esino odoo agayo o tei too medee kibilosos badolone hoo poogoo mapoo dilesos peledobooga, yo badobosos kookaiyo gie badeli talaiso. <sup>14</sup> Esiga mipoo hamapoo to tekepo Godeeye wiligi dolosos badeli goo ee odoo susuga oso dulame takomo dileiso. Osoloso to tekepo hagee odoo susuga oso olo dulugalosos dogas, mi hoo pagalal beame omapoo peledabalaiso.

<sup>15</sup> Esiga hesigeli odoo, no to hageeyo bei medee gooleede. Bei, Godee maga to tolosoko kokodo takomo sili odoo Daniyeleeye egeesee takaso, 'Niba bi diya tokenee mudu opusomos di oso tei moso ma kulodu mo-

lo agalaiso. Esiga bi ogoso Godeeyo howo woola tei moso tokenee palaiso,' diso. <sup>16</sup> Egeeseega Yudiya mi toowa mapoo debeli odoo oso bi mudu opusomo di ee ogoga mubi ma dokodoo kukulo pele. <sup>17</sup> Osoloso beeamo mapoo odoo moso hau mapoo badoga, see moso kulodu gadilesa o bi na te. <sup>18</sup> Osoloso odoo homolee ma kulodu siloga, o gidei talame mosopoo see na wedi di. <sup>19</sup> Osoloso beeamo mapoo sobo koowasi sabolo, osoloso holope too nedili sobo ee kukulo dilei diya kalawa toowa molo agalaiso. <sup>20</sup> Esiga Godee mapoo takee, niyo kukulo dilei beeamo ee wau beeamo o, iyo hasali beeamo mapoo peledabelega pagalame. <sup>21</sup> Bei, beeamo mapoo dala toowa oso sibileiso. Esiga mi bei mooloogoo beeamo abaga simino epedee hamapoo, odoo susuga oso dala goo hageesi egele. Esino dala goo toowa hagooso sibileso koodobuoga, hamamee dala goo hageesi see agalaime. <sup>22</sup> Esino dala beeamo hagee see Godeeye deiyepo moodoolaiso. Bei, yayo beeamo sage magoo diepi, odoo heeso dala ee ma kulodu badalai tebile pegeliyo. Esino dala ee ma kulodu Godee eyo hesiga odoo ee halo, yayo beeamo see deiyepo moodoolaiso.

<sup>23</sup> Beeamo mapoo odoo heeso sibileso nimapoo takolone, 'Hamapoo ege, Keliso hagooso' o, 'Koo ege, Keliso ogoso,' dee takooga, o to mapoo tei na te.

<sup>24</sup> Bei, gamenee keliso deli sabolo, osoloso gamenee godee maga to tolosa kokodo takomo sili odoo oso sibileso goo toowa opusomo di edebeeyo howeli moodoolaiso, odoo susuga sabolo osoloso odoo Godeeye hesiga oso peegoo dia beleso kukulo agalame. <sup>25</sup> Esiga niba medee dui. Goo hagee peledabelega mologa, ayo daga nimapoo ka taka.

<sup>26</sup> Esiga odoo heeso nimapoo takolone, 'Niba ege. Keliso dobudu badoso,' dee takooga, yo agalame na di. Osoloso see yayo takolone, 'Niba ege. Keliso moso kulodu badoso,' dee takooga, mapoo tei na te. <sup>27</sup> Bei, kei ebiedigaga mi toowa egee gadeebugu egesi masi ogoga, niyo Odoo Holo a sibo agalaiso. <sup>28</sup> Osoloso mi hee mapoo hune mologa, kukodeeso hune egee nalame mapoo busiliso."

#### Odoo Holo oso sibilei

(Maka 13:24-37, Luka 21:25-36; 17:26-36)

<sup>29</sup> "Osoloso hamamee haga boloogelega dala beeamo hagooso dilesa koodobuoga, 'osoko semelaiso.

Egeeseega anosee gadeebigileime.

Osoloso giwo kei ma dokodoo egee molo mi hamapoo tigidibileiso.

Osoloso kei ma dokodoo kitulugu bi egee molo Godeeye halabuga ki me pagalaiso.'

<sup>30</sup> Osoloso beeamo mapoo Odoo Holo ayo sibilei eyo goo ee kei ma dokodooga eligiga, odoo susuga oso agalaiso. Eseeega odoo susuga oso goohela sabolo pupusigileiso. Egeese ma kulodu odoo susuga oso Odoo Holo ayo kolobo maga gadeebugu sabolo osoloso kitulugu toowa sabolo siboga agalaiso. <sup>31</sup> Osoloso kibu neligidi iga, ayo mo momaiye diye dalaiso,

diayo dilesa odoo susuga Godeeye hesiga mi susuga mapoo egee do ee gilimalame.

<sup>32</sup> Osoloso niba sogai maga goo hagee medee gooleede. Sogai du pisigaga ogoloso wau beeamo koola tooboo dolosa gooleedeliso. <sup>33</sup> Esiga goo hagee egesi masi molosa. Goo ayo taka hagooso peledaba ogoga, Odoo Holo ayo sibilei olo koola tooboo dolosa niba olo gooleedalaiso. <sup>34</sup> Ayo nimapoo taka. Odoo epedee hamapoo egee do diba osee dogo goo susuga hagooso peledaba ee diba agalaiso. <sup>35</sup> Esiga kei sabolo mipoo sabolo mauwe pagalaiso. Esino mo to me pagalaime.

<sup>36</sup> Esiga Odoo Holo ayo sibilei beeamo ee odoo hee gooleede. Osoloso Godeeyo momaiye Kei mi ma dokodoo egee do sabolo osoloso Godeeyo owolo anosee gooleede. Esino hedebe mo Ma Godeeye beeamo egee gooleedolosa ka badoso. <sup>37</sup> Esiga Noway badebei beeamo mapoo goo peledaba goo hedebe egesi masi oso Odoo Holo ayo sibilei beeamo mapoo peledabalaiso. <sup>38</sup> Bei, Noway badebei beeamo mapoo, howo duwelega molome odoo susuga oso nei sabolo howo sabolo nolone dobolone sobo hulone debeiso. Diba egeeseelone doboome, beeamo heeso Nowa du toowa ma kulodu gadiso. <sup>39</sup> Nowa du toowa ma kulodu gadime, odoo susuga oso goo peledabalai ee kibiya gooleedelega doboome, howo toowa duwa oso diba howoso neso. Esiga Odoo Holo ayo sibilei beeamo mapoo goo hedebe hageesi oso peledabalaiso. <sup>40</sup> Esino beeamo mapoo odoo bakadio homolee ma kulodu tou tomo silesiboga, odoo heeno ido polone hee mapoo pagalaiso. <sup>41</sup> Osoloso sobo bakadio wo galaga mologa, sobo heeno ido polone hee mapoo pagalaiso.

<sup>42</sup> Esiga niba mopoodoo dolosa koolone ka debee. Bei, nibada Lodee ayo sibilei beeamo ee niba gooleede. <sup>43</sup> Esino niba goo hagee medee gooleede. Edebeeyo mesiyaso o moso mapoo sibilei beeamo ee duga, yo mopoodoo dolosa badolone medee bamalaiso. Osoloso mesiya olo siboga ogoloso yo habigileiso. <sup>44</sup> Esiga niba nose medee mopoodoo dolosa ka debee. Bei, Odoo Holo ayo sibilei beeamo ee niba gooleede."

#### Tou tekepo teli odoo sabolo osoloso tou tokenee teli odoo

(Luka 12:41-48)

<sup>45</sup> "Goo mapoo mesilosa silone tou tekepo teli odoo ee ogumo? Wiligi odoo oso odoo egesi mapoo kitulugu tenelaiso, yayo o tou teli odoo susuga medee bolone yayo dimapoo nei nali pilame. <sup>46</sup> Bei, wiligi odoo yo peegoo dilesa badoboso see sibileso ogoga, o tou teli odoo oso o tou medee tekepo too daga, yimapoo diya goomogalaiso. <sup>47</sup> Esiga ayo nimapoo taka. Wiligi odoo oso o tou teli odoo oso tou medee tekepo too ogoloso, see yimapoo bi susuga ee yayo bamelee dalaiso.

<sup>48</sup> Esino tou tokenee teli odoo oso o wiligi odoo saga koo siboga eyo nediliyo egeese takalai malaiso, 'Mo

wiligi odoo saga koo sibo,' doloso tou teli odoo abo wooloogolone, yugune nali odoo gilimadoloso nei sabolo howo sabolo nolone dabalaiso. <sup>50</sup> Yo egeeseemo silone mopoodoo delega badoga, o wiligi odoo omapoo sibileiso. <sup>51</sup> Osoloso o wiligi odoo oso sibilesyo yo diya wooloso peegoo habigileiso, goo bakadio gweli odoo sabolo dabalame. Osoloso diayo omapoo dabolone pisa sabolo osoloso mei gisile sabolo dabalaiso."

### Sobo obuo 10 eyo goo maga wudu taka

**25** "Beeame omapoo Godeeye wiligi doloso badeli goo oso sibilei ee egesi masi malaiso. Sobo obuo 10 oso dia keme toloso giso sobo hulame siboga, yo tugodalame diso. <sup>2</sup> Osoloso dima kulodu sobo abo 5 ee goo medee koo gweli. Esino sobo abo 5 ee goo medee gweli. <sup>3</sup> Egeesee ma kulodu sobo abo goo medee koo gweli oso dia keme howo keesooloso dulone, howo abo telega diyadeeso. <sup>4</sup> Esino sobo goo medee gweli oso dia keme sabolo osoloso howo abo keesoo sabolo toloso diyadeeso. <sup>5</sup> Diba dilesyo balagameleeno, odoo sobo hulei ee saga sibile. Esem diya diya tila poogoome tiesaso.

<sup>6</sup> Osoloso gesi domo mapoo odoo heeso to neligidi egeesee takaso, 'Sobo hulei odoo ee olo koola sibo. Esiga niba dilesyo yo tugode,' dee takaso.

<sup>7</sup> Esem sobo obuo susuga tiesamelee maga hogogabuloso dia keme wiki medee pailame hoo kookooso. <sup>8</sup> Esino sobo obuo goo medee koo gweli oso sobo goo medee gweli mapoo egeesee takaso, 'Ibada keme howo olo hosudalaso. Esiga niyo iba howo tenee,' diso.

<sup>9</sup> Esem goo medee gweli sobo obuo oso nei dimapoo egeesee takaso, 'Haye. Iyo ibada howo nibada keme mapoo keesoga, iba howo tebileime. Esiga niba howo abo neiso talame bi teli moso mapoo diyadee,' diso.

<sup>10</sup> Esem diba howo talame dime, odoo sobo hulei ee sibilesyo peledabaso. Esem goo medee gweli sobo obuo yo bamelee diba yibolo hodobo nei nalame moso kulodu galagadiso. Diba moso kulodu doboome, osulu kisiso.

<sup>11</sup> Esino sobo obuo goo medee koo gweli diba hamamee sibilesyo osulu mapoo kalamadulone egeesee takaso, 'Wiligi odoo, osulu yade, iba moso kulodu gasibileiya,' dee takagameleeso.

<sup>12</sup> Esino odoo sobo hulame simi oso nei dimapoo egeesee takaso, 'Haye. Niba gasibileime. Bei, ayo nimapoo tei taka. A niba gooleedele,' dee takaso.

<sup>13</sup> Esiga niba medee koolone ka debee. Bei, Odoo Holo ayo sibilei beeame ee niba gooleedele."

### Tou teli odoo bakadio hedebe di eyo goo maga wudu taka

(Luka 19:11-27)

<sup>14</sup> "Osoloso Godeeye wiligi doloso badeli goo ee egesi masi malaiso. Wiligi odoo oso mi eli sage mapoo dilame, o tou teli odoo gilimadooso. Osoloso dimapoo o

bi medee bameleeye diso. <sup>15</sup> Egeeseelone yayo o tou teli odoo mapoo molee tenelone dia goo goolee sabolo tebia teneeso. Egeesee seelone yayo odoo hee mapoo molee ko 5000 teneeso. Osoloso odoo hee yima hamamee taba mapoo molee ko 2000 teneeso. Osoloso odoo hee ee ma hamamee taba mapoo molee ko 1000 teneeso. Osoloso yo see mi eli sage mapoo diso. <sup>16</sup> Esem o tou teli odoo molee ko 5000 too odoo oso molee egee toloso dilesyo bi neiso teli moso togoloso badolone molee ko hodio 5000 too. <sup>17</sup> Osoloso molee ko 2000 too odoo yinosee molee egee toloso dilesyo bi neiso teli moso togoloso badolone molee ko hodio 2000 too. <sup>18</sup> Esino odoo hee molee ko 1000 too yo o wiligi odoowo molee egee toloso dilesyo mada mi doluguso.

<sup>19</sup> Wiligi odoo yo mi eli sage dilesyo beeame sage omapoo badoboso see wedi simiso. Yo sibilesyo yayo molee pi odoo ee gilimadooso, molee oso goo hee moodoo beleso agalame. <sup>20</sup> Esem molee ko 5000 too odoo oso molee tosibilesyo egeesee takaso, 'Wiligi odoo, nayo amapoo molee ko 5000 tenee ee see ayo abaga odoomo dino 10,000 tugodoo hagooso,' diso.

<sup>21</sup> Esem wiligi odoo oso nei yimapoo egeesee takaso, 'No tou medee goosa teli odoo. Nayo tou tekepo too ee ogoloso a goomogoso. Esiga nayo bi pepooko medee bamelee maga nei ayo namapoo bi toowa bameleeye dalaiso. Esiga no mo moso kulodu abolo hodobo goomoga sabolo badalame gasibe,' diso.

<sup>22</sup> Esem molee ko 2000 too odoo yinosee molee tosibilesyo egeesee takaso, 'Wiligi odoo, nayo amapoo molee ko 2000 tenee ee see ayo abaga odoomo dino 4000 tugodoo hagooso,' diso.

<sup>23</sup> Esem wiligi odoo oso nei yimapoo egeesee takaso, 'No tou medee goosa teli odoo. Nayo tou tekepo too ee ogoloso a goomogo. Esiga nayo bi pepooko medee bamelee maga nei ayo namapoo bi toowa bameleeye dalaiso. Esiga no mo moso kulodu abolo hodobo goomoga sabolo badalame gasibe,' dee takaso.

<sup>24</sup> Esem molee ko 1000 too odoo oso sibilesyo egeesee takaso, 'Wiligi odoo, a gooleedoo, no kitulugu sabolo odoo mapoo diya seseli. Osoloso no odoo heeyo nei segei wulo goobada teli. <sup>25</sup> Esiga a nobolo obulone nee molee oso goo hee moodoolega, wulo dilesyo mada mi ka dolugu. Esiga nee molee amapoo tenee ee tebia osee hagee moloso,' diso.

<sup>26</sup> Esem o wiligi odoo oso nei yimapoo egeesee takaso, 'No tou diya tokenee teli wabada odoodo. Nayo goolee, a emegei dia nei segei wulo gooloogali gweliso. <sup>27</sup> Esino nayo kasalame mo molee kawulame molee bali odoo dia moso mapoo magelega ka poogoowo? Nayo mo molee omapoo magoo diepi, ayo see wedi simi beeame mapoo mo molee ogoso toowa poloso mologa teliyo,' dee takaso.

<sup>28</sup> Osoloso wiligi odoo oso o odoo abo mapoo egeesee takaso, 'Niyo yimapoo molee ko 1000 egee molo toloso see odoo molee ko 10,000 too mapoo tenee. <sup>29</sup> Bei, odoo agayo dimapoo tenee bi ee medee

bamologa, nei dimapoo bi bei tenelaiso. Esino odoos agayo dimapoo tenee bi ee medee belega poogooga, bi susuga dimapoo egee molo see padaga dalaiso.  
<sup>30</sup> Esiga tou too tokenee bali odoos ee peegoo neliga ma kulodu togobigi. Osoloso yo omapoo pisa sabolo badolone mei gisile sabolo badalaiso.”

### Goo meedilei beame

<sup>31</sup> “Odoos Holo ayo kitulugu sabolo osoloso Godeeyo momaiye susuga sabolo siboga, beame omapoo ayo toowa doloso badeli goo omaga gadeebugu sabolo sibilesos ayo wiligi doloso bili mapoo badalaiso. <sup>32</sup> Osoloso mi opusomo opusomo di mapoo debeli odoos susuga ee Godeeyo momaiye oso gilimados sibilesos mo mudugiyopoo mooloogoodalaiso. Osoloso be bali odoos oso o be domo pulosos sipi be dibusomos pi, osoloso gout be dibusomos pi deli, egesis masi seelone ayo mi odoos susuga domo pulosos mooloogoodoo bakadio moodoolaiso. <sup>33</sup> Egeeseelone ayo odoos mooloogoodoo hee sipi be masi ee mo dee deede dokolo mapoo sibilesos mooloogoode, osoloso odoos mooloogoodoo hee gout be masi ee mo dee dobusu dokolo mapoo sibilesos mooloogoode, dee takalaiso.

<sup>34</sup> Osoloso wiligi odoos taba ayo mo dee deede dokolo mooloogoodoo odoos mapoo egeese takalaiso, ‘Mo Maye goomegeli odoos niba sibadee, Godeeye mipoo bei mooloogeles mapoo Godeeye wiligi dolosos badeli mi niyo dabalame mopoodos dolosos egees molo mapoo gasibadee. <sup>35</sup> Bei, a hodume niyo amapoo nei teneliso. Osoloso a howo na poogoome niyo amapoo howo keneliso. Osoloso a odoos soo masi sibume niyo a nibada moso mapoo ido peliso. <sup>36</sup> Osoloso a boodos diwe badoboome, niyo amapoo dugo kalame teneliso. Osoloso a paiye badoboome, niyo a medee baliso. Osoloso a neliga moso ma kulodu badoboome, niyo a agalame sibiliso,’ dee takalaiso.

<sup>37</sup> Osoloso Godeeyo howo woola odoos tekepo debeli mo dee deede dokolo mooloogoodoo oso nei egeese takalaiso, ‘Lodee, kopolone no houda badoboome, iyo no ogoloso nei ka teneeyo? Osoloso kopolone no howo na paga badoboome, iyo no ogoloso howo ka keneeyo? <sup>38</sup> Osoloso kopolone no odoos soo masi sibume, iyo no ogoloso ibada moso ka ido palayo? Osoloso kopolone no boodos diwe badoboome, iyo no ogoloso dugo kalame ka teneeyo? <sup>39</sup> Osoloso kopolone no paiye badoboome, iyo no ogoloso medee ka bameleeyo? Osoloso kopolone no neliga moso ma kulodu badoboome, iyo no agalame ka simiyo?’ dee takalaiso.

<sup>40</sup> Osoloso wiligi odoos taba ayo nei egeese takalaiso, ‘Ayo nimapoo tei goo taka. Niyo tei telaga odoos abo wuluge pidimenee ee, niyo a pidi masi pidi,’ dee takalaiso.

<sup>41</sup> Osoloso wiligi odoos taba ayo mo dee dobusu dokolo mooloogoodoo odoos mapoo egeese takalaiso, ‘Niba amaga peegoo diyadee. Bei, niba Godeeyo kamana ma hemidu doso. Esiga Godeeye Saiten sabolo osoloso o momaiye sabolo dou koo

semili mopoodos dolosos magoo mapoo dabalame diyadee. <sup>42</sup> Bei, a hodume niyo amapoo nei tenele. Osoloso a howo na paga badoboome, niyo a howo kenele. <sup>43</sup> Osoloso a odoos soo masi sibume, niyo a nibada moso mapoo ido pele. Osoloso a boodos diwe badoboome, niyo amapoo dugo kalame tenele. Osoloso a paiye badoboome, niyo a medee bele. Osoloso a neliga moso ma kulodu badoboome, niyo a agalame sibile,’ dee takalaiso.

<sup>44</sup> Egeeseega diayo nei egeese takalaiso, ‘Lodee, kopolone no hodia sabolo osoloso howo na paga badoboome iyo no ka egeiyo? Osoloso kopolone no odoos soo masi sibume iyo no ka egeiyo? Osoloso kopolone no boodos diwe badoboome iyo no ka egeiyo? Osoloso kopolone no paiye badoboome iyo no ka egeiyo? Osoloso kopolone no neliga moso ma kulodu badoboome iyo no ka egeiyo? Osoloso iyo kopolone goo susuga hagee ogoloso no pidile ka poogowo?’ dee takalaiso.

<sup>45</sup> Osoloso wiligi odoos taba ayo nei dimapoo egeese takalaiso, ‘Ayo nimapoo tei goo taka. Niyo tei telaga odoos abo wuluge pidilega poogomenee ee a pidile poogoo,’ dee takalaiso.

<sup>46</sup> Esiga odoos hagee bia peegoo dileso kookaiyo molosos osee malai dala goo mapoo dabalaiso. Esino Godeeye tekepo deli odoos ee Godee sabolo gie badobos kookaiyo osee dabalaiso.”

### Yesu wooloomalame to mou

(Maka 14:1-2, Luka 22:1-2, Yonee 11:45-53)

**26** Yesuye goo susuga hagee taka koodobulosos see o hamamee dili odoos mapoo egeese takasos, <sup>2</sup> “Niba olo gooleedoosos, Godeeye Gababia wo nalai ee bei mooloogalai beame hoogoo bakadio moloso. Osoloso beame omapoo Odoos Holo a homo bulubo magoo ma dokodoo yogusos enigilame ha teli odoos mapoo tiasalaiso,” dee takaso.

<sup>3</sup> Osoloso beame omapoo Yu odoos wiligi odoos tebisa sabolo, osoloso tei moso eyo wiligi odoos tebisa, diayo dia wiligi odoos Kayapaseeyo moso mapoo mooloogoodolosos to mousos. <sup>4</sup> Diayo gamenee goo maga Yesu tolosos wooloomalame mada to mousos. <sup>5</sup> Osoloso diayo egeese takasos, “Iyo Gababia wo ne beame mapoo yo wooloomalaimes. Bei, odoos susuga oso dimapoo komonolone biligiyagas,” disos.

### Betani mi mapoo sobosos mopodosos medee tekepos osos Yesuwo wiligi mapoo soos

(Maka 14:3-9, Yonee 12:1-8)

<sup>6</sup> Yesu Betani mi mapoo badolone, odoos daga agagisa bia Yesuye tekepo pa Saimonowo moso mapoo palasos. <sup>7</sup> Yo omapoo nei nolone badoboome, sobo heesos kapu yosos moodos mapoo mopoodos soo medee tekepos keesolosos tosimisos. Yayo tosibilesos Yesuwo wiligi mapoo soosos. Mopodosos hagee molees toowasos teli.

<sup>8</sup> Esemes Yesu o hamamee dili odoos oso goo hagee ogoloso diya komonolone egeese takasos, “Bei

kasalame sobo hagooso mopoodoo soo medee tekepo ee wulo goo mauwe yimapoo soomeleso ka hosu-doowo? <sup>9</sup> Yayo mopoodoo soo medee tekepo hagee odoo mapoo neiso talame tenee diepi, molee toowa tolosa bi mauwe odoo mapoo tenelai tebiliyo," diso.

<sup>10</sup> Esino Yesuye diayo gowe goo ee ogoloso dimapoo egeesee takaso, "Sobo hagooso goo moodoo hagee ogoloso yimapoo to tokenee na takee. Bei, yayo amapoo goo tekepo moodoo. <sup>11</sup> Esiga bi mauwe odoo ee beame susuga nibolo hodobo dabalaiso. Esino a beame susuga nibolo hodobo badalaime. <sup>12</sup> Yayo mopoodoo soo egee mo wiligi mapoo soo oso mo suso bi ma kulodu malai ee mopoodoo doo. <sup>13</sup> Ayo nimapoo ka taka. Edebeeyo mi kamapoo Godeeyo to tekepo takooga, diayo sobo hagooso goo moodoo onosee takalaiso. Osoloso edebeeyo o goo onosee os-ee goolee malaiso."

#### Yudaseeye Yesu tiasalame goomoga magoo

(Maka 14:10-11, Luka 22:3-6)

<sup>14</sup> Osoloso Yesu o hamamee dili odoo 12 ee ma kulodu badeli odoo hee Yudas-Iskaliyoteeye tei moso wiligi odoo tebisa mapoo dileso egeesee takaso, <sup>15</sup> "Ayo Yesu nimapoo tiasoga, niyo amapoo nei ogoo bi tenelaiso-mo?" diso. Esemee diayo nei molee ko 30 yimapoo teneeso. <sup>16</sup> Esemee domo omaga bei mooloogoloso Yudaseeye Yesu dimapoo tiasalame eli esiamo sileeso.

#### Yesuye o hamamee dili odoo sabolo Godeeye Gababia wo ne

(Maka 14:12-21, Luka 22:7-13,21-23, Yonee 13:21-30)

<sup>17</sup> Isipi mi maga peegoo di ee gooleebugu wo ne bei mooloogoo beame mapoo, Yesu o hamamee dili odoo oso dileso Yesu mapoo egeesee takaso, "Iba mi kamapoo dileso Gababia wo nalai ka mopoodoo dalaiyo?" dee takaso.

<sup>18</sup> Esemee Yesuye nei egeesee takaso, "Niba Yolusalem mi mapoo dileso odoo hee ogoloso yimapoo egeesee takee, 'Eligili odoo oso egeesee taka: Mo beame Godeeye hesia ee olo koola tooboogona. Esiga ayo mo hamamee dili odoo gilimadoloso nee moso mapoo Gababia wo ka nalaigona,' dee takee."

<sup>19</sup> Yesuye egeesee taka duloso o to ee dodolone o hamamee dili odoo oso dileso Gababia wo nalame mopoodoo dooso.

<sup>20</sup> Osoloso habe Yesuye o hamamee dili odoo gilimadoloso wo nalame bulumaso. <sup>21</sup> Diba omapoo nei nolone dobolone Yesuye egeesee takaso, "Ayo nimapoo taka. Nimaga odoo heeso a ha teli odoo mapoo tiasalaiso," diso.

<sup>22</sup> Yesu o hamamee dili odoo oso to hagee duloso goohele sabolo dobolone Yesu mapoo egeesee takaso, "Lodee, ayowo?" dee takaga meleeso.

<sup>23</sup> Yesuye nei dimapoo egeesee takaso, "Odo agayo mo peleta mapoo abolo hodobo wo olugudoloso naga, a ha teli mapoo tiasalai odoo ogoso. <sup>24</sup> Esino Godeeyo to booka mapoo hogugu oso taka ee dodolone, Odo Holo a talaiso. Esino Odo Holo a ha

teli odoo mapoo tiaseli odoo yo dala toowa talaiso. Oweeye yo soomagelega poogoo diepi, yo dala tele pegeliyo."

<sup>25</sup> Esemee Yesu ha teli odoo mapoo tiaseli odoo Yudaseeye egeesee takaso, "Eligili odoo, ayowo?" diso. Esemee Yesuye nei yimapoo egeesee takaso, "O. No olo egee takooso," dee takaso.

#### Lodee gooleebugu wo ne

(Maka 14:22-26, Luka 22:19-20, 1 Kolin 11:23-25)

<sup>26</sup> Diba wo nolone doboome, Yesuye wo tolosa Godee mapoo goomoga to takoloso wo popeiso. Osoloso o hamamee dili odoo mapoo wo pulone egeesee takaso, "Wo hagee tolosa ne. Hagee mo suso," diso.

<sup>27</sup> Osoloso see Yesuye kapu wain i keesoo tolosa Godee mapoo goomoga to takoloso o hamamee dili odoo mapoo tenelone egeesee takaso, "Niba susuga wain i hagee ne. <sup>28</sup> Hagee mo sawo, odoo susuga dia tokenee hapalame ka sologobugu. Mo sawo oso Godeeye o odoo mapoo to kitulugu magoo goo oso tei peledabalame. <sup>29</sup> Esiga ayo nimapoo taka. Ayo epedee hamaga dulone wain i hagee see nalaima. Esino hamamee mo Maye wiligi doloso badeli mi mapoo ayo nibolo hodobo wain i dia see nalaiso."

<sup>30</sup> Osoloso diba goomoga kosaiya hedebe pouloso Olipi mubi mapoo diso.

#### Pitaye Yesu yo boobadobigilei goo ee taka

(Maka 14:27-31, Luka 22:31-34, Yonee 13:36-38)

<sup>31</sup> Yesuye see tobu o hamamee dili odoo mapoo egeesee takaso, "Epei gesi odoo susuga niyo a poogoo dileiso. Bei, Godeeyo to booka mapoo hogugu oso egeesee takooso,

'Godeeye sipi be bali odoo ee wooloomaga, sipi be susuga oso yimaga peegoo kukulo dileiso.'"

<sup>32</sup> Osoloso Yesuye see egeesee takaso, "Esino a ta maga hogado dileso, ayo daga malalo Gelili mi mapoo dileso niba bamalaiso."

<sup>33</sup> Esemee Pitaye nei Yesu mapoo egeesee takaso, "Odo susuga oso namaga peegoo kukulo duga, hedebe ayo no poogoo dileime," diso.

<sup>34</sup> Esemee Yesuye yimapoo egeesee takaso, "Ayo namapoo tei taka. Epei gesi kolokolo takelega mologa, nayo mo goo gagadilei bakadio hedebe dalaiso," dee takaso.

<sup>35</sup> Esemee Pitaye yimapoo egeesee takaso, "Ayo egeesee selaima. Edebeeyo no wooloomaga, a nobolo hodobo talaiso," diso. Esemee o hamamee dili odoo susuga oso to hedebe egeesee takaso.

#### Yesuye Getesemeni homolee mapoo Godee mapoo taka

(Maka 14:32-42, Luka 22:39-46)

<sup>36</sup> Yesuye o hamamee dili odoo sabolo Getesemeni homolee mapoo dileso dobolone dimapoo egeesee takaso, "Niba hamapoo debee. A koo dileso Godee mapoo takalaiya," diso. <sup>37</sup> Yayo egeesee takoloso



hedebe Pita osoloso Sebediyo owolo bakadio esee ido palaso. Yo peleso badoboome, goohele goo sabolo osoloso su hegi goo oso yimapoo simiso. <sup>38</sup> Osoloso yayo dimapoo egeesee takaso, "Mo su ma kulodu hegi goo toowa oso molone ayo talai olo koola tooboo. Esiga niba hamapoo dobolone, abolo hodobo koolone ka bamo," diso.

<sup>39</sup> Yesu egeesee takoloso dimaga pepooko hoogoo dilesos ebiso miyomoo tugusaloso balaboo tiamolone Godee mapoo takolone egeesee takaso, "Ma, no goomogoga, amapoo dala egee sibo nayo peegoo magee. Esino nayo goomoga goo ee moodee, ayo goomoga goonee," dee takaso.

<sup>40</sup> Osoloso yo Godee mapoo taka koodobuloso dilesos egeino, o hamamee dili odoo bakadio hedebe di tiesamolome egeiso. Esem Pita mapoo egeesee takaso, "Niba kaseega ka tiesamalala? Niba beeame deiyepo mapoo abolo hodobo koolone dabalai tebledoo.

<sup>41</sup> Niba bolone Godee mapoo takolone ka debee, kuku-ga homodobiyaga. Bei, niba goo tekepo talame goomogoso. Esino nibada su oso ki me ka poogooso," diso.

<sup>42</sup> Yo see tobu dilesos Godee mapoo takaso, "Ma, dala goo ayo talai oso a dagadilei tebile daga, a dala egee talaiso. Bei, ayo nayo goomoga goo ee talaiso."

<sup>43</sup> Yesu see tobu dilesos dokodoo takoloso sibilesos egeino, o hamamee dili odoo bakadio hedebe di diba tila poogoome tiesa molo egeiso. <sup>44</sup> Osoloso Yesu see tobu bakadio hedebe di mapoo dilesos goo hedebe eyo daga taka hedebe egeesee takaso.

<sup>45</sup> Osoloso yo see wedi sibilesos o hamamee dili odoo mapoo egeesee takaso, "Niba osee tiesa molosomo? Bei, Odoo Holo a tokenee odoo mapoo tiasalai beeame olo siboso. <sup>46</sup> Esiga koo ege, a tokenee odoo mapoo tiasalai odoo ee olo sibo. Esiga niba tebise, dimapoo dimo."

#### Edebeeyo Yesu wooloomalame ido di

(Maka 14:43-50, Luka 22:47-53, Yonee 18:3-12)

<sup>47</sup> Yesu to osee komolome, o hamamee dili odoo hee Yudaseeye Yesu talame odoo mooloogoodoo toowa gilimado simiso. Egeesee ma kulodu tei moso wiligi odoo tebisa sabolo, osoloso Yu odoowo wiligi odoo tebisa oso Yesu talame odoo hagee bia diye diso. Esem diayo sibulone kaiya sabolo kodolo sabolo tolosos sibadeeso. <sup>48</sup> Egeesee ma kulodu Yudas epedee sibilega badolone, yayo Yesu talai odoo mapoo egeesee takaso, "Ayo dilesos adaga, odoo ogoso. Eseega niyo yo tolosos ka ido di," diso. <sup>49</sup> Osoloso Yudaseeye odoo gilimado sibilesos Yesu mapoo dilesos egeesee takaso, "Emegei, eligili odoo," dee takoloso yo adaso.

<sup>50</sup> Esem Yesuye yimapoo egeesee takaso, "Emegei, nayo goo moodoolame simi egee moodee," diso. Esem odoo susuga oso sibilesos Yesu tooso. <sup>51</sup> Esino o hamamee dili odoo heeso kaiya tolosos tei moso eyo wiligi odoo taba eyo tou teli odoo eyo dulu koososo.

<sup>52</sup> Esem Yesuye yimapoo egeesee takaso, "Nee kaiya peegoo magee. Bei, emegei piligilame kaiya tolosos

silesibili odoo ee kaiyaso piligileiso. <sup>53</sup> Esiga niba gooledeleyo, ayo a pidilame mo Ma mapoo takooga, yayo o momaiye mooloogoodoo 12 † egesi sabolo osoloso abo epedee saga meiyee dalaiso. <sup>54</sup> Esino ayo egeesee seega, ayo dala tolosos talai goo ee Godeeyo toso booka maga taka sabolo kasee tebileisomo?" dee takaso.

<sup>55</sup> Esem Yesuye yo talame sibadee odoo omapoo egeesee takaso, "Niyo ogoga a mesiya daga, a talame kaiya sabolo osoloso kodolo sabolo misigaloso ka sibalala? Esino ayo beeame susuga tei moso ma kulodu eligimo sileeme, niyo a egeleso. Esiga bei kaseme ayo omapoo eligimo sileeme niyo a telega ka poo-goowo? <sup>56</sup> Esino niyo epei a talame simi hagooso Godee maga to tolosos kokodo takomo silesibili odoo oso taka to sabolo olo tobuoso." Esem beeame omapoo Yesu o hamamee dili odoo susuga oso yo poogoloso kukulo diyadeeso.

#### Yesu wiligi odoo tebisa mapoo ido di

(Maka 14:53-65, Luka 22:54-55,63-71, Yonee 18:13-14,19-24)

<sup>57</sup> Edebeeyo Yesu tolosos tei moso wiligi odoo taba Kayapaseeyo moso mapoo ido palaso. Esiga moso ee ma kulodu tei eligili odoo sabolo osoloso Yu odoowo wiligi odoo tebisa oso daga olo mooloogoodolosos debeiso. <sup>58</sup> Esem Pitaye hamameedee Yesu deedee dilesos tei moso eyo wiligi odoo taba eyo moso beelee ma kulodu gadiso. Yo tei moso gidebeli odoo sabolo omapoo badolone, Yesu mapoo ogoo goo mooda beleso bameleeso.

<sup>59</sup> Esem tei moso wiligi odoo tebisa sabolo osoloso Yu odoo dia goo meedili wiligi odoo tebisa oso Yesuwo goo maga gamenee takeli odoo ee esiaso, yimapoo goo tokenee hee mologa, Yesu ka wooloomalame.

<sup>60</sup> Egeeseelone edebeeyo wulo gamenee takolone Yesuwo goo maga goo opusomo opusomo di takaso. Esino diayo taka ee ma kulodu tei goo hee molo egele.

<sup>61</sup> Esem odoo bakadio oso see hamamee sibilesos egeesee takaso, "Iba Yesuye egeesee takeme duso, Godeeyo tei moso hagee guobugulosos beeame bakadio hedebe di ee ma kulodu see dia tagalai yimapoo kitulugu moloso, dee takeme duso."

<sup>62</sup> Esem tei moso wiligi odoo taba oso tobolosos Yesu mapoo egeesee takaso, "Odoo hagee biasos nee goo maga goo opusomo opusomo di egee takoo mapoo nayo to eyo nei takalaimoyo?" diso. <sup>63</sup> Esino Yesu to hee takele. Esem tei moso wiligi odoo taba oso see tobu yimapoo egeesee takaso, "Ayo gie badeli Godeeyo hu maga namapoo ka taka. No tei Godeeyo owolo Kelisos osomo? Imapoo takee," diso.

<sup>64</sup> Yesuye to nei yimapoo egeesee takaso, "O. Nayo olo egee takooso. Esino ayo nimapoo takooso. Hamamee niyo Odoo Holo a Kitulugu Godeeyo dee deedee dokolo mapoo badoga agalaisos. Osoloso ayo kei ma dokodooga kolobo maga siboga agalaisos," dee takaso.

† Momaiye mooloogoodoo hedebe ee ma kulodu momaiye 6000 egesi meliso.

<sup>65</sup> Esemе tei moso wiligi odoo taba oso to hagee dulosu diya gowoolone, o dugo tologobugulone egeesee takaso, "Odoo hagooso Godeeyo goo maga to tokenee takoo. Esiga iyo o goo see meedilame to abo taka dulei koo goomogo. Bei, yayo Godeeyo goo maga to tokenee taka niba olo duso. <sup>66</sup> Esiga niyo yimapoo ogoo goo moodoolai gooleedo?" diso

Esemе tei eligili odoo sabolo osoloso Yu odoo dia wiligi odoo tebisa oso nei egeesee takaso, "Yo tokenee olo tooso, esiga yo talai tekepo," dee takaso.

<sup>67</sup> Osoloso diayo yo manolone o mudu mapoo magawo paganiso. Osoloso diayo o howo dugoso gagaloso, yo woolone yimapoo egeesee takaso, <sup>68</sup> "Keliso, no tei Godee maga to tolosu kokodo takomo sili odoo daga, no odoo agayo woolo?" dee takaga meleeso.

### Pitaye Yesuwo goo gagadi

(Maka 14:66-72, Luka 22:56-62, Yonee 18:15-18,25-27)

<sup>69</sup> Pita epedee moso pee mapoo osee badoboome, tei moso wiligi odoo taba o tou teli sobo heeso sibilesu yimapoo egeesee takaso, "Nonosee Gelili odoo Yesu bolo silee odoo hee noso," dee takaso.

<sup>70</sup> Esemе Pitaye odoo susuga eyo howo woola egeesee takaso, "Nayo egee takoo goo ee a gooleedele," diso.

<sup>71</sup> Osoloso yo dilesu moso belee osulu miyopoo to budume, tou teli sobo heeso yo ogoloso odoo abo omapoo tebisamelee mapoo egeesee takaso, "Odoo hagee Nasalet odoo Yesu bolo sileeso," dee takaso.

<sup>72</sup> Esemе Pitaye see to kitulugu sabolo egeesee takaso, "A tei goo taka. Odoo egeeyo goo a gooleedele," diso.

<sup>73</sup> Beeame deiyepo poogoloso hamamee odoo susuga omapoo tebisamelee oso sibilesu Pita mapoo egeesee takaso, "No tei Yesubolo silee odoo hee noso. Bei, nayo to egee ko ee Gelili odoo oso to keli egeesee masi ko. Esiga nayo to kei oso nee goo ee yiligebuguso," diso.

<sup>74</sup> Esemе Pitaye to kitulugu sabolo dimapoo egeesee takaso, "Ayo Godeeyo hu hesilone tei taka. Odoo egee a gooleedele," diso. Pitaye egeesee takoloso bado-boome kolokolo takaso. <sup>75</sup> Esemе Pita kolokolo taka dulosu Yesuye taka to ee gooleebuguso. Bei, Yesuye yimapoo egeesee taka, "Kolokolo takelega mologa, nayo mo goo gagadi bakadio hedebe dalaiso," diso. Esemе yo to egee gooleebuguloso peegoo gadilesu diya gooholone pisaso.

### Yudas eyo nediliyo woolooma

**27** Gesikolodee mapoo tei moso wiligi odoo tebisa susuga sabolo, osoloso Yu odoo dia wiligi odoo tebisa susuga oso to moulosu, Yesu wooloomalame goomoga magooso. <sup>2</sup> Osoloso diayo Yesuwo dee tiso tiegisaloso gamalee wiligi odoo taba Pailteeye badebei mapoo ido dilesu yimapoo teneeso.

<sup>3</sup> Yesu tiaseli odoo Yudaseeye Yesu tei olo wooloomalame badebei goo ee dulosu, diya gooheselo. Esemе molee ko 30 yayo too ee see tei moso wiligi odoo

tebisa sabolo, osoloso Yu odoo dia wiligi odoo tebisa mapoo tenelame diso. <sup>4</sup> Yayo dilesu dimapoo egeesee takaso, "Ayo odoo goo tokenee mauwe nimapoo tiasoo maga, a goo tokenee olo tooso," diso. Esino wiligi odoo tebisa oso nei egeesee takaso, "Egee ibada goonee. Nee goo. Esiga no nobusomo tekepo mood-ee," dee takaso.

<sup>5</sup> Egeesee taka dulosu Yudaseeye molee ko egee tei moso ma kulodu kugobuguloso, see wedi dilesu eyo nediliyo tiso mu mapoo bagagoloso, homo dee ma dokodooga bagagoo sooloso taso.

<sup>6</sup> Esemе tei moso wiligi odoo tebisa oso molee ko misigelone egeesee takaso, "Ibada tei magoo oso egeesee takooso, 'Molee hagee see tosibilesu molee odoo aboso tenee sabolo hodobo magalai tei,' deliso. Bei, molee hagee odoo wooloomalai eyo nei tenee," dee takaso. <sup>7</sup> Osoloso diba molee oso goo talai to magoloso bogoso sesepeni moodoogali odoo eyo mi molee ogoso tooso, Yu odoonee wedioga omapoo boulame. <sup>8</sup> Bei egeeseega odoo susuga oso mi egee takolone sawo mi deliso. <sup>9</sup> Esemе beeamе omapoo goo hagooso Godee maga to tolosu kokodo takomo sili odoo Yelemayaye taka to sabolo tebiasu. Bei, yayo egeesee takaso,

"Isael odoo diayo o su eyo nei magoo molee ko 30 ee tolosu

see odoo bogoso sesepeni moodoogali eyo mi ee tooso, Lodeeye amapoo taka to ee dodolone."

### Pailteeye Yesuwo goo meedi

(Maka 15:2-15, Luka 23:3-5,13-25, Yonee 18:33; 19:16)

<sup>11</sup> Yesu Loum gamalee odoo Pailteeye badebei mapoo ido sibume, nei gamalee odoo oso yimapoo egeesee takaso, "No tei Yu odoo dia wiligi odoosomo?" diso. Esemе Yesuye yimapoo nei egeesee takaso, "O. No olo egee takooso," dee takaso.

<sup>12</sup> Esemе tei moso wiligi odoo tebisa sabolo, osoloso Yu odoo dia wiligi odoo tebisa oso Yesuwo goo maga goo opusomo opusomo di takeme, yayo nei dimapoo to hee takele. <sup>13</sup> Esemе Pailteeye yimapoo egeesee takaso, "Odoo susuga oso nee goo maga goo opusomo opusomo di egee takaga, no dusomo?" diso.

<sup>14</sup> Esino Yesuye to hee takelega poogoome, gamalee odoo yo goo egee ogoloso diya dio diso.

<sup>15</sup> Dugo susuga ma kulodu Pailteeye Yu odoo goomogalame, Godeeye Gababia wo ne beeamе mapoo odoo susuga oso goomoga odoo hee neliga moso ma kuloduga peegoo tamageeye deliso.

<sup>16</sup> Beeame omapoo mesiya hedebe odoo susuga oso gooleedoo neliga moso ma kulodu badebeiso, o hu ee Balabas. <sup>17</sup> Esiga odoo susuga olo mooloogoodeme, Pailteeye dimapoo egeesee takaso, "Ayo odoo ogu ee neliga moso ma kuloduga peegoo ka tamagalaiyo? Balabas o, Yesu, edebeeyo Keliso deli ee tamagalaiyo?"

<sup>18</sup> Egeesee ma kulodu Yu odoo dia wiligi tebisa oso Yesu mapoo koolone, diayo Yesu yimapoo ido simi goo ee, yo ogoloso olo gooleedooso.

<sup>19</sup> Paillet goo meedili odoo oso bili mapoo osee bado-boome, osoboye yimapoo to tenelone egeesee takaso, "Odoo goo tokenee mauwe omapoo nayo goo hee na moodeeye. Bei, eiyo gesi ayo o goo maga sapootia diya ku tiaga," dee takaso.

<sup>20</sup> Esino tei moso wiligi odoo tebisa sabolo, osoloso Yu odoo dia wiligi odoo tebisa oso odoo susuga mapoo toso pupulone egeesee takaso, "Paillet mapoo egeesee takee, 'Yesu ono wooloomolone Balabas ono peegoo tamageeye,' dee," diso.

<sup>21</sup> Esem Pailleteeye odoo susuga mapoo egeesee takaso, "Niba ayo odoo ogu ee neliga moso ma kulo-duga peegoo tamagalai ee ka goomogolo?" Esem odoo susuga oso nei egeesee takaso, "Balabas ono peegoo ka tamagee," dee takaga meleeso.

<sup>22</sup> Esem Pailleteeye egeesee takaso, "Ayo Balabas yo neliga moso ma kuloduga peegoo tamagooga, hee Yesu edebeeyo Keliso deli ee kasee moodoolaisomo?" diso.

Esem nei odoo susuga oso to neligidi takolone egeesee takaga meleeso, "Yo homo bulubo magoo ma dokodoo yoguso enige," dee takaso.

<sup>23</sup> Esino Pailleteeye dimapoo egeesee takaso, "Yayo ogoo goo tokenee too ee niyo egeiga yo wooloomalame ka sala?" diso. Esino odoo susuga oso to diya neligidi egeesee takaso, "Yo homo bulubo magoo ma dokodoo yoguso enige," demeleeso.

<sup>24</sup> Esem odoo susuga oso Paillet yayo goomoga goo ee telega poogoome, diba komonolone biligalame see ogoloso, yo howo keedoloso odoo susuga eyo howo woola o dee hapoolone † egeesee takaso, "Niyo odoo hagee wooloomaga, mo goonee, esino nibada goo," dee takaso.

<sup>25</sup> Esem odoo susuga oso egeesee takaso, "Yo wooloomaga eyo nei iyo ibada holaiso sabolo talaiso," diso.

<sup>26</sup> Esiga Pailleteeye Balabas neliga moso maga peegoo tamagooso. Esem yayo o ha teli odoo mapoo takolone, Yesu we tiso wooloso homo bulubo magoo ma dokodoo yoguso enige, dee takaso.

#### Ha teli odoo oso Yesu mane

(Maka 15:16-20, Yonee 19:2-3)

<sup>27</sup> Esem Paillet o ha teli odoo oso Yesu we tiso wooloso Loum gamalee eyo moso mapoo ido palaso. Esem ha teli odoo susuga sibilesu Yesu domo to-budume toboloso silodabaso. <sup>28</sup> Diba omapoo mooloo-goodoloso, Yesu manolone o dugo tigamagoloso see wiligi odoo tebisa oso kali dugo bige sage yimapoo kadiso. <sup>29</sup> Osoloso we ti sidoloso o wiligi mapoo kadiloso, o dee deede mapoo homo magooso. Osoloso Yesu mapoo manolone yimapoo gawuloso egeesee takaso, "Yu odoo dia wiligi odoo taba, iyo nee hu dokodoo poudoso," dee takaga meleeso. <sup>30</sup> Osoloso yimapoo magawo pogolone homo o dee mapoo magoo ee see peedee doloso o wiligi mapoo osee

† Pailleteeye o dee hapoo eyo bei ee, Yesu woolooma ee o goo tokenee nee dolone ka hapoo.

woomeleeso. <sup>31</sup> Egeesee soloso koodobuloso ha teli odoo oso dugo Yesuye ka ee tamagoloso see Yesu o dugo kadiso. Osoloso yo homo bulubo magoo ma dokodoo yoguso enigilame ido diso.

#### Yesu homo bulubo magoo ma dokodoo yoguso eniga

(Maka 15:21-32, Luka 23:26-43, Yonee 19:17-27)

<sup>32</sup> Ha teli odoo oso Yesu idoloso Yolusalem mi maga peegoo gadulone, Kulene odoo Saimon tugodooso. Yo tugodoloso homo bulubo magoo Yesuye imado di ee see yayo ime diso. <sup>33</sup> Diba abaga dino Gologota mi mapoo peledabaso. Mi hu eyo bei ee wiligi ki mi. <sup>34</sup> Diba omapoo sibilesu Yesu mapoo wain i sabolo habili bi gal deli sabolo wuluguloso teneeso. Esino Yesuye howo egee wulo pepooko pia naloso poogooso. <sup>35</sup> Osoloso ha teli odoo oso Yesu homo bulubo magoo mapoo yoguso enigaloso tuluguloso, Yesu o dugo pilame diayo yoso dasigeli hee dasigaso. <sup>36</sup> Diba Yesuwo dugo puloso omapoo dobolone yo gibadebeiso. <sup>37</sup> Osoloso edebeeyo Yesu wooloomalai goo eyo bei ee odoo susuga oso gooleedalame, odoo heeso Yesuwo wiligi oo poogoo dokodooga to egeesee hoguguloso kalamaso,

Hagee Yesu, Yu odoo dia wiligi odoo

<sup>38</sup> Osoloso mesiya bakadio sabolo homo bulubo magoo ma dokodoo yoguso enigaso. Odoo hee Yesu o dee deede dokolo tulugu, osoloso hee o dee dopusu dokolo tulugu diso.

<sup>39</sup> Osoloso odoo aboso eli omaga dulone, Yesu ogoloso manolone dia wiligi wabisaso. Osoloso diayo yimaga to tokenee yimapoo takaga meleeso.

<sup>40</sup> Egeeseelone diayo yimapoo egeesee takaso, "Nayo takolone, tei moso ee guobuguloso beeam bakadio hedebe di ee ma kulodu see dia ka tagalaigona, dee taka. Esiga no tei Godeeyo Owolo dago, no homo bulubo magoo ma dokodooga miyomoo meilesu no nediliyo pidi," dee takaga meleeso. <sup>41</sup> Osoloso tei moso wiligi odoo tebisa sabolo, osoloso tei eligili odoo sabolo, osoloso Yu odoo dia wiligi odoo tebisa dibolosee Yesu manolone egeesee takaso, <sup>42</sup> "Yayo odoo abono pidimo siliso. Esino yo epedee eyo nediliyo pidilei tebledoo. Yo tei Keliso, Isael odoo ibada wiligi odoo daga, yo homo bulubo magoo ma dokodooga miyomoo meilei tekepo. Egeeseega yayo mou ogoloso iyo yimapoo tei talaiso. <sup>43</sup> Yo Godee mapoo tei teliso. Osoloso eyo takolone, yo Godeeyo Owolo, dee takamo siliso. Esiga iyo epedee yimapoo bamo, Godeeye goomogolone yo pida beleso agalame."

<sup>44</sup> Goo hedebe gesi masi moodoolone, mesiya bakadio onosee homo bulubo magoo ma dokodoo yoguso enigaloso molone, Yesu mapoo to tokenee takaso.

#### Yesuye ta

(Maka 15:33-41, Luka 23:44-49, Yonee 19:28-30)

<sup>45</sup> Osoko oo domo toboome, mi toowa egee nolugo doloso melee osoko howo bakadio hedebe di poogooso. <sup>46</sup> Osoloso neliga melee oso mauwe poogoome, Yesuye to neligidi egeesee iso, "Ilai, Ilai, lama

sabakatani." To hageeyo bei egeesee moloso, "Mo Godee, mo Godee, bei kasee maga nayo a ka pagala?"

<sup>47</sup> Esemee odoo koola mapoo tebisa melee oso to hagee duloso egeesee takaso, "Niba dui. Yo Ilaya i," diso. <sup>48</sup> Osoloso odoo heeso hoguo sibilesa dugo toloso wain i mei nali mapoo olugu doloso homo sage su mapoo tialogoloso Yesuye nalame o maga mapoo heligiso. <sup>49</sup> Esemee odoo aboso egeesee takaso, "Ougo! Ilayaye sibilesa yo toloso miyomoo mouwa beleso bamo," diso.

<sup>50</sup> Esemee beame omapoo Yesu to neligidi idagoloso taso.

<sup>51</sup> Esemee Yesuye ta beame omapoo, tei moso tegei ma kulodu dugo kodia oso kisi melee ee, dokodooga eyo tologomo abaga mouno miyomoo sabuguso. Osoloso mi halabulone yo toowa gagabuguso. <sup>52</sup> Osoloso odoo bi goodogamo diso. Esemee Godee o odoo susuga wedia ee hogaduloso see gie badeli tooso. Osoloso odoo bi poogoloso diso. Osoloso Yesu ta maga hogaduloso hamamee, Yolusalem mapoo dilesa dieso nediliyo diba odoo abo mapoo eligiso.

<sup>54</sup> Esemee ha teli odoo gibadeli odoo sabolo, osoloso odoo yibolo Yesu gibadebei oso mibia simi sabolo, osoloso goo abo omapoo peledaba ogoloso diya obulone egeesee takaso, "Tei takoo, odoo hagee Godeeyo owolo doo," diso.

<sup>55</sup> Osoloso sobo abo Gelili abaga Yesubolo sibadee oso eli sage abaga Yesu homo bulubo magoo ma dokodoo molome balaga meleeso. Sobo hagee biaso Gelili abaga Yesubolo sibulone yo pidiso. <sup>56</sup> Sobo hagee bia dima kulodu Meli-Magadalin, osoloso Yemes dio Yosep dio dibada owee Meli, osoloso Sebediyo osobo sabolo omapoo dobolone balaga meleeso.

### Yesu bi ma kulodu magoo

(Maka 15:42-47, Luka 23:50-56, Yonee 19:38-42)

<sup>57</sup> Habedee bi bei odoo hee Alimatiya mi maga simiso. O hu Yosep. Yinosee Yesuwo hamamee dili odoo hee yoso. <sup>58</sup> Esiga yayo dilesa Paillet mapoo Yesuwo kou talame woosaso. Esemee Pailleteeye o odoo mapoo takolone, Yesuwo kou ee Yosep mapoo tenee, dee takaso. <sup>59</sup> Esemee Yosepeeye Yesuwo kou toloso dugo dia heliyeso tiadoloso o bi dia yo ou poogoo ee ma kulodu magooso. Osoloso wulu ou mapoo yo toowa bidigamo dilesa kisiloso diso. <sup>61</sup> Beame ompaoo Meli-Magadalin dio osoloso Meli hee dio wulu koola omapoo dobolone balaga meleeso.

### Yesuwo bi gidebei

<sup>62</sup> Osoloso beame hee mapoo Yu odoowo hasali beame omapoo, tei moso wiligi odoo tebisa sabolo, osoloso Pelisi odoo oso Pailleteeye badebei mapoo dilesa egeesee takaso, "Wiligi odoo, iba goo hagee gooleebuguso. Goo ee, gamenee takeli odoo Yesu hagooso gie badolone egeesee takeliso, 'Yo bi ma kulodu beame bakadio poogoloso see beame hee mapoo hogabileiso,' dee takeliso. <sup>64</sup> Esiga iba goomogo, nee odoo oso beame bakadio hedebe di ee ma kulodu bi

egee medee gidabalame. Bei, o hamamee dili odoo oso sibilesa o kou heli toloso see wulo gamenee takolone, Yesu olo hogaduloso dina, dee takeeyaga. Egeeseega hamamee gamenee taka goo hagooso daga yayo gamenee taka goo ee dagadileiso."

<sup>65</sup> Esemee Pailleteeye egeesee takaso, "Niba mo ha teli odoo abo gilimado dilesa bi egee medee gidebee," diso. <sup>66</sup> Esemee diba susuga dilesa bi omapoo dobolone yo ou yoso kisi mapoo eli peeso, odoo heeso mada sibilesa yo peegoo bidibugu beleso agalame. Osoloso gidebeli odoo mapoo takolone, medee gidebeeye, dee takaso.

### Yesu ta maga hogadi

(Maka 16:1-10, Luka 24:1-12, Yonee 20:1-10)

**28** Yu odoowo hasali beame oso dilesa koodobuloso beame hee mapoo gesikolodee Meli-Magadalin dio osoloso Meli hee dio Yesuwo bi agalame diso.

<sup>2</sup> Diba bi mapoo diyadaga molome, haga boloogelega mibia toowa sibume, Lodee o momaiye oso Kei mi ma dokodooga sibilesa yo peegoo bidigebuguloso dokodoo biaso. <sup>3</sup> Yo dugo diya heliye kaloso badolone o su diya gadee magoloso badebeiso. <sup>4</sup> Esemee bi gidebeli odoo oso diya obugulone kikiliga oso homodobuloso wulu wedia masi meleeso.

<sup>5</sup> Esino momaiye oso sobo bakadio mapoo egeesee takaso, "Niba haga na ebi. A gooleedooso, niba Yesu homo bulubo magoo ma dokodoo yoguso eniga ee esiamo silesibo. <sup>6</sup> Yo hamapoo koo moloso. Yo to eyo taka ee dodolone yo see hogado diso. Esiga niba sibilesa o kouso melee mi mapoo ege. <sup>7</sup> Osoloso niba see saga dilesa o hamamee dili odoo mapoo egeesee takee, 'Yesu ta maga see hogado dina. Osoloso yo malalo dilesa Gelili mapoo diba bamoloso. Diba omapoo dilesa yo agalaiso,' dee takee. Mo to ayo nimapoo taka ee na boobadobigi."

<sup>8</sup> Egeesee taka duloso sobo diba obulone see saga wedi dilesa o hamamee dili odoo mapoo takalame diya goomoga sabolo diyadeeso. <sup>9</sup> Diba diya goomoga sabolo diyadaga molome, haga boloogelega Yesuye eli domopoo diba tugodoloso egeesee takaso, "Emegei," diso. Esemee sobo bakadio hagooso yimapoo sibilesa gawuloso dobolone, o homo mapoo toloso o hu dokodoo poudooso. <sup>10</sup> Esemee Yesuye dimapoo egeesee takaso, "Niba haga na ebi. Niba dilesa mo hamamee dili odoo mapoo takee, diba Gelili mapoo dilesa omapoo a agalaiso," dee takaso.

### Odoo bi gidebeli odoo ee moleeso howo gaga

<sup>11</sup> Sobo bakadio hagooso Yesu o hamamee dili odoo mapoo takalame osee diyadaga molome, odoo bi gidebeli odoo aboso dilesa tei moso wiligi odoo tebisa mapoo goo susuga odoo bi omapoo peledaba ee takaso. <sup>12</sup> Egeesee taka duloso tei moso wiligi odoo tebisa oso Yu odoo dia wiligi odoo tebisa sabolo to mousu. Esiga diba dieso to magoo ee dodolone, molee toowa odoo bi gidebeli odoo mapoo tenelone egeesee taka-

so, <sup>13</sup>“Niyo odoo susuga mapoo egeesee takee, ‘Niba gesi tiesamolome, Yesu o hamamee dili odoo oso mada sibileso Yesuwo kou todina,’ dee takee. <sup>14</sup>Osoloso gamalee odoo Paileteeye goo hagee duloso kamana-ga, iyo yo hemisilame, nibada goo medee moodoolaiso,” dee takaso. <sup>15</sup>Eseme odoo bi gidebeli odoo oso molee toloso, goo diayo moodeeye dee taka goo ee moodooso. Goo egeesee maga gamenee taka goo hagee Yu odooso dima kulodu osee takomo silesiboso.

#### **Yesuye o hamamee dili odoo diye di**

(Maka 16:14-18, Luka 24:36-49, Yonee 20:19-23, Diye Di Odoo 1:6-8)

<sup>16</sup>Yesu o hamamee dili odoo 11 oso Gelili mapoo dilesi Yesuye taka to ee dodolone mubi hee mapoo palaso. <sup>17</sup>Diba omapoo peleso Yesu ogoloso yimapoo

goomoga poudooso. Esino dima kulodu odoo aboso yo tei Yesudoo doloso tei tele. <sup>18</sup>Eseme Yesuye dima hegi sibileso egeesee takaso, “Kei mi sabolo osoloso mipoo hamapoo goo susuga ee balai kitulugu amapoo olo teneeso. <sup>19</sup>Esiga niba mipoo susuga omapoo debeli odoo susuga mapoo dilesi, diayo amapoo tei toloso mo hamamee dili odoo dalame, Godeeyo to tekepo takomo di. Egeeseelone diba Mayo hu maga, osoloso Owolo mo hu maga, osoloso Dio Tei eyo hu maga diba howo olugi. <sup>20</sup>Osoloso ayo kokodo taka to susuga niyo dodomo silesibilame nimapoo tenee ee see dimapoo eligi, diayo to egee dodolone ka dabalame. Esiga niba goo hagee medee gooleede, epedee hamaga bei mooloogoloso mi hoo poogoo mapoo duga, ayo beame susuga nibolo hodobo badalaiso.”

# Maka

## Maka booka goo eyo bei

### Odoo howo sauwidili, Yoneeye to tekepo taka goo

(Matiyu 3:1-12, Luka 3:1-18, Yonee 1:19-28)

**1** To tekepo bei mimooloogoo hagoso, Godeeyo owolo Yesu Kelisowo goo. <sup>2</sup> Daga hoogoo Godeeyo to tosili odoos Aisaya yayo booka mapoo Godeeye Yesu mapoo to taka egeesee hoguguso: "Ayo mo to tosili odoos malalo diye dalaiso. Osoloso yayo dilesos nee eli moodoolame." <sup>3</sup> Miwe poogoo mi omaga edebeeyo egeesee idagoo, "Lodee yayo sibilei eli moodee. Osoloso medee hoodo magee." <sup>4</sup> Yonee odoos howo sauwidili miwe poogoo mi mapoo peledoboloso, yayo odoos howo sauwudulone to tekepo takolone egeesee takaso, "Niba goo su wudulosos nibada goo tokenee maga waki pialosos howo sauwige, egeeseega Godeeye nibada goo tokenee hapolosos boobados pigileiso." <sup>5</sup> Yudiya mi mapoo debeli mosobias sabolos, osolosos Yoluselem mi toowa mapoo debeli odoos susugas Yoneeye to taka dulame diadeesos, osolosos dibadas tokenee Yonee mapoo yiligimes, Yoneeye dibas Yoden howo mapoo sauwidisos. <sup>6</sup> Yonee yo kemol be hu too dugo masi dusa kalosos silone gala kolo gudu masi kalosos sili. Osolosos nei yayo nali tapala toowa sabolos koo sabolos nali. <sup>7</sup> Yayo odoos susugas mapoo egeesee takelisos, "Odoos hee ama hamamee sibileiso. Yayo kitulugus toowa ayo kitulugus yayo dagadi. A tekeponee o homos bei mapoo gawulosos o homos bi tikamakalais. <sup>8</sup> Ayo niba howodeesos sauwidisos, esinos niba hamamee yayo Dios Tei maga howo sauwidileiso."

### Yesu howo sauwe sabolos kuku sabolos

(Matiyu 3:13—4:11, Luka 3:21-22; 4:1-13)

<sup>9</sup> Haga bologolegas Yesu Gelilis mi toowa ma kulodus mi pepokos Naselet omagas sibumes, Yoneeye yo Yoden howomoo howo sauwidisos. <sup>10</sup> Yesu howomooga gasibilesos egeinos, kei mi yamagolosos Dios Tei molos masi yimapoo pubalogomes egeisos. <sup>11</sup> Osolosos keimis ma dokodooga to egeesee takas, "No ayo goomas mo holo nosos, a namapoo dias goomogos." <sup>12</sup> Osolosos beeames omapoo Dios Teisos Yesu miwe poogoo mi omapoo diyes disos. <sup>13</sup> Yesu beeames 40 omapoo galas seebees sabolos badoboomes, saitenso kuku demeleesos. Esinos Godeeyo momaiyes sibilesos yo pidisos.

### Yesuye di kebilis odoos bakadios bakadios gilimadoodoo

(Matiyu 4:12-22, Luka 4:14-15; 5:1-11)

<sup>14</sup> Yu odoos wiligis tobas Helodeeyes, Yonee neligas ma kulodus husulosos, hamamees Yesu yo Gelilis mi toowas mapoo dilesos, to medees tekepos Godee magas simi takomos silisos. <sup>15</sup> Yayo egeesee takasos, "Beeames tekepos olo simisos, osolosos Godeeye wiligis dolosos badelis osos sibileis koolas toopoosos. Esigas niba goo tokenee magas waki pialosos, to tekepos mapoo teis teis."

<sup>16</sup> Beeames heesos, Yesu Gelilis abeis palagas dimeleenos, di kebikelis odoos bakadios Saimon dios omolos Endulus dios peisos di giligamolomes yayo egeisos. <sup>17</sup> Esemes Yesuyes dimapoo egeesee takasos, "Niba amas hamamees sibadees, ayo niba odoos gilimelis eligileiyas." <sup>18</sup> Esemes dibas Yesuwos to dulosos, dibadas pei pogolosos, yimas hamamees diadeesos.

<sup>19</sup> Osolosos yo pepokos hoogoo dilesos, di kebikelis odoos abos Sebediyos owolos bakadios, Yemes dios omolos Yonee dios du ma kulodus dopolones pei moodoomolomes egeisos. <sup>20</sup> Osolosos Yesu dibas ogolosos, yayo dibas gilimadoodosos. Esemes diayos dulones o tous telagalis odoos sabolos oma Sebedi sabolos du ma kulodus gilimanes pogolosos, Yesu mas hamamees diadeesos.

### Odoos bo holo palas

(Luka 4:31-37)

<sup>21</sup> Yesu o hamamees dilis odoos sabolos Kapeniyum mi mapoo simisos. Osolosos Yus odoowos teis beeames hees mapoo, Yesu howo gisilis mosos omapoo pelesos, Godeeyo to eligilames mimooloogooos. <sup>22</sup> Odoos susugas yayo eligi dumes howoogasos, bei yayo kitulugus sabolos eligimes. Esemes odoos susugas disos nei woosas nei woosas demelesos egeesee takasos, "Odoos hagees ogumos? Ibas das teis goo eligilis odoos osos eligi goo egesinees. Bei diayos eligi mapoo kitulugus mauwes." <sup>23</sup> Epedees omapoo, odoos bo holo palas osos howo gisilis mosos kulodus gadileesos agadisos. <sup>24</sup> "Yesu Naselet odoos nayos amapoo osolosos bo holo abos mapoo ogoo goo moodoolameyos? No hamapoo ibas tokenees palames ka simiyos? A gooleedoodos, no Godeeyo teis odoos."

<sup>25</sup> Yesuyes bo holo odoos mapoo to kitulugus sabolos egeesee takasos, "To koodobies, no odoos ma kulodugas peegoo gadi!" <sup>26</sup> Esemes bo holo osos odoos ma kulodus

badolone neligidi kikiligameleso gwa sabolo peegoo gadiso.

<sup>27</sup> Esemé, odoo susuga dia howoogaso, osoloso disono nei woosa nei woosa diso, "Goo hagee ogoo goowo? Goo hagee dia eligi kitulugu sabolo eligi, bei edebeeyo bo holo mapoo to takooga, peegoo koo gadili. Esino Yesuye bo holo mapoo to takooga, mesiloso peegoo gadiliso." <sup>28</sup> Esemé Gelili mi toowa mapoo odoo susuga goo ee saga takomo diso.

### Yesuye odoo paigiga tekepo moodoo

(Matiyu 8:14-17, Luka 4:38-41)

<sup>29</sup> Howo gisili moso poogoo dilesó, Yesu Yonee sabolo Yemes sabolo, Saimon dio Endulu dio dibada moso mapoo diso. <sup>30</sup> Saimonwo nalobo paiye kolo dei moodoome debi mapoo tiameleeso. Diayo Yesu mapoo sobo paiye eyo goo takaso. <sup>31</sup> Osoloso Yesu sobo paiye mapoo dilesó, o dee mapoo tolosó, "Tee-bee," diso. Esemé paiye kolo dei saga yimaga koodo diso. Esemé yayo dimapoo nei teneeso.

<sup>32</sup> Habe osoko tolopume odoo abo oso Yesu mapoo odoo paigiga sabolo bo holo paladee odoo sabolo ido sibadeeso. <sup>33</sup> Osoloso Kapeniyum mi toowa mapoo debeli odoo susuga Yesuye odoo paigiga moodoo ee agalame osulu miyopoo mooloogoodooso. <sup>34</sup> Esemé Yesuye odoo paigiga mudu opusomo opusomodi yayo takeme tekepo poloso weido diso. Osoloso bo holo odoo ma kulodu debei peegoo hasisilone dimapoo egeesee takaso, "Mo goo na takee," diso, bei bo holo susuga diba Yesu Godeeyo owolo deli gooleedooso.

### Yesuye Gelili mi toowa mapoo to takomo di goo

(Luka 4:42-44)

<sup>35</sup> Gesikolodee mi hadopeelega, Yesu hogabuloso moso poogoo dilesó, obusomo odoo koola mauwe mapoo dokodoo toodalame diso. <sup>36</sup> Hamamee Saimonbolo debei odoo abo sabolo Yesu esiamo diso. <sup>37</sup> Diayo yo egeme yimapoo takaso, "Odoó susuga no esia moloso."

<sup>38</sup> Yesuye to nei takaso, "Iba mi abo mapoo dimo, omapoo dilesó Godeeyo to takalame. Bei kasee magayo a goo egee talame simi." <sup>39</sup> Osoloso yo Gelili mi toowa ma kulodu mi pepoko susuga mapoo dilesó, Yu odoowo howo gisili moso eyo kulodu Godeeyo to takomo sileeso. Osoloso bo holo odoo ma kulodu pala peegoo hasisopugu demeleso.

### Yesuye odoo kolo e bia masi moodoo

(Matiyu 8:1-4, Luka 5:12-16)

<sup>40</sup> Odoó kolo e bia masi Yesu mapoo sibilesó ebiso miyomoo tugusaloso egeesee takaso, "Nayo a tekepo moodolai goomogoga, a tekepo moodee."

<sup>41</sup> Yesuye yo dia sooloo dolome o kolo mapoo sigolone yimapoo egeesee takaso, "Ayo no tekepo palai goomogo, esiga no tekepo pe." <sup>42</sup> Esemé epedee omapoo o kolo mapoo e bia masi mauwe poogooso. <sup>43</sup> Yesuye yo di dolone to kitulugu sabolo egeesee takaso, <sup>44</sup> "Nayo dilesó no ayo tekepo pa goo ee odoo

abo mapoo na takee. Esino, nee su tekepo pa goo ee, goo tokenee hapalame gala hu weli wiligi odoo toba yimapoo dilesó eligi. Osoloso nee su tekepo pa amaga emegeidi bi tenee, Moseseeye tei magoo goo ee dodolone, odoo susuga oso ogoloso tekepo pa ee gooleedalame."

<sup>45</sup> Esino yo Yesuwo to mapoo tei telega pogoloso, odoo susuga mapoo o kolo e bia masi moodoo opo-sususo. Bei egeesee maga Yesuye mi kamapoo disomo, odoo susuga oso Yesu agalame dia mooloogoodo diso. Esemé Yesu mi abo mapoo odoo howo woola sile. Esino yo mi odoo mauwe mapoo bado neme edebeeyo mi opusomo opusomodi maga yayo badebei mi mapoo yo agalame sibadee demeleso.

### Odoó su kakawa poogoo moodoo

(Matiyu 9:1-8, Luka 5:17-26)

**2** Beeame abo pogoloso hamamee, Yesu see Kapeniyum mi mapoo wedi sibume, edebeeyo Yesuye simi ogoloso, mi omapoo saga takomo diso. <sup>2</sup> Osoloso odoo susuga sibilesó, o moso kulodu sabolo peegoo sabolo omapoo dia mooloogoodoome, Yesuye dimapoo Godeeyo to eligi meleeso. <sup>3</sup> Esemé mi omapoo odoo su kakawa poogoo badebei, odoo bakadio bakadiodi oso kida mapoo magoloso tosimiso. <sup>4</sup> Osoloso diayo yo Yesuye badebei omapoo todilame goomogaso. Esino odoo beiga Yesu mapoo dilei eli egele. Esemé diayo odoo su kakawa poogoo kida sabolo moso omu dokodoo imado palaso. Osoloso Yesuye to kemelee domo amaga seme ou toloko pogoloso tiso kida mapoo bagagoloso kida sabolo moso kulodu toosooso. <sup>5</sup> Diayo odoo su kakawa poogoo moso omu maga tooso egeme, Yesuye diayo odoo egee yayo moodoolame, yo tebia doloso tei too ogoloso, odoo su kakawa poogoo mapoo takaso, "Mo odoo, nee tokenee ayo boobado puguso."

<sup>6</sup> Tei eligili odoo disono dopolone diso nediliyo egeesee goolee meleeso, <sup>7</sup> "Odoó hagoso kaseme egeesee ka takayo? Yayo Godee daga dilame see, esino goo tokenee hapeeli hedepe Godeeso."

<sup>8</sup> Yesu o dio oso diayo dibada sooloo ma kulodu goolee melee goo ee gooleedoloso dimapoo egeesee takaso, "Niyo kasee maga nibada sooloo ma kulodu egeesee ka goolee malala?" <sup>9</sup> Ayo odoo su kakawa poogoo mapoo 'Nee tokenee ayo boobado puguso,' dee takooga, o tokenee boobado pugu niyo gooleedalame. Esino ayo yimapoo takoo 'No toposo nee kida tolosó di,' dee takoloso, yo tobooga, a odoo moodeli kitulugu molo doloso niyo gooleedalaiso.

<sup>10</sup> Esino niyo gooleedalame, Odoó Holo amapoo kitulugu olo teneeso mi toowa hamapoo tokenee goo hapoloso boobado pigilame," yayo odoo su kakawa poogoo yimapoo egeesee takaso, <sup>11</sup> "No hogabuloso nee kida tolosó mosopoo di," diso.

<sup>12</sup> Diayo balagamolome odoo su kakawa poogoo hogabuloso, o kida tolosó saga diso. Diayo odoo su kakawa poogoo oso toposo di egeme dia howoogaso. Osoloso Godee mapoo goomoga pouduso. Os-

oloso diayo egeesee takaso, "Iba daga goo hageesee koo egeli."

**Yesuye Libai idoo goo**  
(Matiyu 9:9-13, Luka 5:27-32)

<sup>13</sup> Yesu Gelili abei palaga maga see wedi dimeleeno odoo susuga sibilesa yimapoo mooloogoodoome, yayo Godeeyo to dimapoo eligi meleeso. <sup>14</sup> Yesu abei palaga dulone egeino odoo Alpies eyo owolo Libai tekisi molee misikeli moso kulodu badoboome egeiso. Esememe yayo yimapoo takaso, "Ama hamamee sibe." Esememe Libai topoloso Yesuye di hamamee diso.

<sup>15</sup> Habe Yesu Libaiyo mosopoo badebeeno, tekisi molee misikeli odoo bei sabolo, goo tokenee teli odoo abo sabolo, osoloso Yesuwo hamamee dili odoo sabolo, Yesubolo nei nameleeso. Odoo bei hageesee oso yimapoo hamamee dili odoo. <sup>16</sup> Osoloso Yesu tekisi molee misikeli odoo sabolo, osoloso goo tokenee teli odoo sabolo nei namolome, tei eligili Pelisi odoo oso ogoloso, o hamamee dili odoo mapoo egeesee woosaso, "Yesu bei kasimaga tekisi molee misikeli odoo sabolo goo tokenee teli odoo sabolo nei ka namolosomo?"

<sup>17</sup> Yesu diayo to taka duloso to nei dimapoo takaso, "Odoo paiye mauwe melesenee neli odoo mapoo dileime, esino odoo paiye melesenee neli odoo mapoo dileiso. Ayo simi hagee tekepo teli doloso wulo goo-gooloo oso gweli odoo ee gilimilame ka sibile, tokenee teli dee gweli odoo gilimadoloso Godee mapoo sibilame ka simi."

**Wo nelega tei doloso badalai goo**  
(Matiyu 9:14-17, Luka 5:33-39)

<sup>18</sup> Beeame aboso Yonee odoo howo sawwidili o hamamee dili odoo sabolo Pelisi odoo sabolo wo nelega tei doloso Godee mapoo toodagalame debeiso. Beeame hedepeso odoo aboso Yesu mapoo sibilesa woosaso, "Yonee o hamamee dili odoo sabolo, Pelisi odoo hamamee dili odoo sabolo, wo nelega tei doloso dopolone, bei kasimaga nee hamamee dili odoo wo nali tei delega ka debeliyo?"

<sup>19</sup> Yesuye to nei takaso, "Gisoso sobo hulei beeame omapoo odoo abo sabolo wo nelega tei doloso dabalaisomo? Haye, yo dibolo badebei omapoo, wo nelega tei doloso badalaime. <sup>20</sup> Beeame hedepeso giso sobo daga hu, tolosa peegoo dilei beeame siboga, diba beeame omapoo wo nelega tei doloso dabalaiso," diso. <sup>21</sup> (Yesuye Yu odoo oso dibada odooga dia tei mapoo dodolone kituluguloso debei egeiso. Esememe yayo diba o goo dia eligi ee dadalai tebile gooleedooso.) Esiga Yesuye dimapoo dio masi taka bakadio hagosu. "Odoo agayo dugo nape didediba omapoo dugo dia diadoloso dugo nape didediba mapoo opodoloso dusaga dugo dias kitulugu oso dugo nape hapoomolee hapoomologa didedibilone ou toowa tologo pigileiso. <sup>22</sup> Edebeeyo howo giedege ou sia mapoo keesoga, ou gadia maga howo solaiso. Esiga edebeeyo howo giedege ou dia mapoo keeselai tekepo,"

diso. (Yesuye dio masi bakadio taka eyo bei hagosu: Ayo mo goo dia eligi ee nibada odooga dia tei sabolo hedepe dalame ka sibile. Esino ayo simi hagee goo dia ayo tosimi omapoo niyo dadalame ka simi.)

**Yu odoowo tei beeame goo**  
(Matiyu 12:1-8, Luka 6:1-5)

<sup>23</sup> Yu odoowo tei beeame heeso, Yesu o hamamee dili odoo sabolo kakomee howo masi segei eli pee maga diso. Yesu o hamamee dili odoo oso kakomee masi gooloogaloso dulone nalagamo diso. <sup>24</sup> Esememe Pelisi odoo diayo ogoloso Yesu mapoo woosaso, "No ege, bei kasee maga nee hamamee dili odoo oso Yu odoowo tei beeame eyo tei magoo ka gabauwala? Diayo kakomee masi goolooga maga ibada tei magoo ee gababuo."

<sup>25</sup> Yesuye nei takaso, "Niba wiligi odoo toba Debidi-bolo odoo yibolo debei sabolo oso houdoome, Debidiye goo moodoo ee hogugu niyo hesigileyo?"

<sup>26</sup> Abayata yayo Godeeyo tei moso tegei wiligi toboloso badebei omapoo, Debidiye Godeeyo tei moso tegei mapoo gapeleso tei wo Godee mapoo tenee neso. Osoloso Debidiye wo naloso o odoo abo mapoo teneeso. Esino wo egee odoo abo koo nali, tokenee goo hapalame gala hu weli wiligi odoo tebisa oso nali.

<sup>27</sup> Godeeye edebeeyo tei beeame ee pidilame ka moodoo. Egeeseega niyo Debidiye o odoo sabolo houdoome, tei magoo gababulone tei wo ne takele. Esiga bei kasi maga niyo mo hamamee dili odoo oso houdoome goo moodoo ka takala? <sup>28</sup> Esiga Odoo Holo Yesu, a wiligi odoo tobaso, osoloso tei beeame mapoo ayo wiligi doloso ka badoso."

**Yesuye odoo dee hodio kakawa poogoo moodoo**  
(Matiyu 12:9-14, Luka 6:6-11)

**3** Yesu see Yu odoowo howo gisili moso omapoo kulodu gapeleso egeino, odoo dee hodio kakawa poogoo badoboome egeiso. <sup>2</sup> Pelisi odoo Yesu mapoo hegi sibilesa balagamo siliso, yayo Yu odoowo tei beeame omapoo odoo dee hodio kakawa poogoo tekepo modapeleso agalame. Yesuye odoo dee hodio kakawa poogoo tekepo moodooga, diayo ogoloso Yesu mapoo takalame. <sup>3</sup> Esememe Yesuye odoo dee hodio kakawa poogoo mapoo takaso, "No bia amaga tee-bee, odoo susuga oso agalame."

<sup>4</sup> Esememe Yesuye Pelisi odoo mapoo woosaso, "Iyo tei beeame omapoo ogoogo talai oso tei ka molosomo? Iyo tekepo goo talaiyo o iyo tokenee goo talaiyo, o giebadili pidileiyo, o giebadili wolomalaiyo?" Esino Pelisi odoo Yesu mapoo to nei takele.

<sup>5</sup> Yesu dibada sooloo ma kulodu sooloo dala goo mauwe pogoloso kalawoloso debeli ogoloso sooloo deleme kamana sabolo dimapoo egeino, odoo dee hodio kakawa poogoo ogoloso yimapoo takaso, "Nee dee hoodo." Esememe o dee hoodeme o dee tekepo passo. <sup>6</sup> Esememe Pelisi odoo, Yu odoowo howo gisili moso



maga peegoo dilesu, Helodeeyo mooloogoodoo odoo ogoloso, diayo Yesu wolomalame to mousu.

#### Odoo susuga Yesuye di hamamee di

<sup>7</sup> Yesu o hamamee dili odoo sabolo Gelili abei mapoo dime, odoo mooloogoodoo toowa Yesuye di hamamee diadeeso. Odoo susuga Yesuye goo moodoo dume yimapoo sibadeeso. Odoo susuga hagee mi opusomo opusomodi mi hamaga sibadee: Gelili mi toowa, Yudiya mi toowa, Yoluselem mosobia, Idumia mi toowa, Yoden howo hodio hoogoo debeli Taya mi toowa sabolo Saidon mi toowa amaga sibadeeso. <sup>9</sup> Esememe Yesuye odoo paigiga abo tekepo moodoome weido diso, osoloso odoo paigiga abo oso yimapoo sigilame hegi pupugamo sibume, yayo o hamamee dili odoo mapoo takaso, "Niba du hee tosibe, bei abei palaga omapoo odoo dia mooloogoo deeyaga," diso. <sup>11</sup> Odoo bo holo pala oso Yesu ogoga diba o homo beiyopoo gawuloso goolone egeesee takeliso, "No Godeeyo owoloso," diso. <sup>12</sup> Esememe Yesuye odoo bo holo pala omapoo to kitulugu sabolo takeliso, "Nayo odoo abo mapoo a Godeeyo owolo dee na takee," doloso takeliso.

#### Yesuye odoo 12 gilimadoo goo

(Matiyu 10:1-4, Luka 6:12-16)

<sup>13</sup> Yesu mubi ma dokodoo peleso yayo goomoga odoo hesigaloso yayo gilimademe diba yimapoo sibadeeso. <sup>14</sup> Yesuye 12 odoo hesigaloso dimapoo takaso, "Niba abolo sile sibileiso, osoloso niba diye dalaiso Godeeyo to takomo sile sibilame. <sup>15</sup> Osoloso, ayo nimapoo kitulugu tenelaiso odoo bo holo pala peegoo hasisilame." <sup>16</sup> Yesuye gilimadoo odoo 12 dia hu hagoso: Saimon (Yesuye hu hee hedi, Pita); <sup>17</sup> osoloso Sebediyo owolo bakadio Yemes dio omolo Yonee dio (Yesuye hu hee hedi Bouwaneges. Hu eyo bei to kei wei masi weli); <sup>18</sup> osoloso Endulu, Pilipi, Batolome, Metiu, Tomas, Alpiesyo owolo Yemes, Tadies, Saimon Selot (Saimon Selot: selot hu eyo bei Loum Gamali gowili odoo), <sup>19</sup> osoloso Yudas-Iskaliyot (Yesu ha teli odoo mapoo tiasili).

#### Yesu dio Bulsibapo dio

(Matiyu 12:22-32, Luka 11:14-23; 12:10)

<sup>20</sup> Esememe Yesu o odoowo moso mapoo wedi dilesu badoboome, odoo susuga see dia mooloogoodooso. Esememe Yesu sabolo o hamamee dili odoo sabolo diayo nei nalai beeam egele. <sup>21</sup> Esememe o soosooso goo egee duloso, yo halapomo sila pele dolone, yo dibada mosopoo ido dilame sibadeeso.

<sup>22</sup> Esino tei eligili odoo Yoluselem maga sibadee oso egeesee takaso, "Yesu yo bo wiligi toba Bulsibapo (Saiten o hu hee) o kulodu badoso. Esiga yo bo wiligi toba eyo kitulugu maga bo holo peegoo hasisilone ka badoso."

<sup>23</sup> Esememe Yesuye tei eligili odoo gilimadoloso dio masi takaso, "Saiten odoo ma kulodu badebei diso

nediliyo peegoo kasee hasisileiyo? Eli mauwe. <sup>24</sup> Mi toowa mapoo debeli odoo domo puloso diso nediliyo ha toga mi toowa egee malaime tokenee palaiso.

<sup>25</sup> Osoloso soosoo heeso domo puloso diso nediliyo ha toga soosoo egee debelaime tokenee palaiso. <sup>26</sup> Osoloso Saiten eyo nediliyo o odoo sabolo ha toga, yayo kitulugu sagelaime, omapoo mauwe pagalaiso."

<sup>27</sup> Yesuye dio masi hee takaso, "Esiga odoo heeso, kitulugu odoo eyo mosopoo bi heli talame gooleega, yo daga kitulugu odoo tiso tiamagoloso, hamamee o moso kulodu peleso, bi heli talaiso. <sup>28</sup> Esiga ayo nimapoo tei goo hee taka, tokenee goo susuga ede-beeyo teli sabolo, osoloso to tokenee Godee mapoo takeli ee Godeeye hapoloso boobado pigileiso. <sup>29</sup> Esino odoo agayo Dio Teiyo goo mapoo to tokenee takooga, yo o goo tokenee hapalaime, o goo tokenee moloso kookaiyo osee malaiso."

<sup>30</sup> Yayo goo hagee dimapoo takaso, bei diayo yo bo holo paladee dee takeme.

#### Yesuwo owee sabolo omolo dio sabolo

(Matiyu 12:46-50, Luka 8:19-21)

<sup>31</sup> Yesuwo owee sabolo omolo dio Yesuye eligimelee moso mapoo peledabaso. Diba Yesubolo to kalame hau mapoo tebisa molome, odoo heeso Yesu takalame moso kulodu gadiso. <sup>32</sup> Esememe odoo susuga Yesubolo debei odoo diayo ogoloso Yesu mapoo egeesee takaso, "Noowee sabolo no molo dio oso peegoo no esia molo."

<sup>33</sup> Yesuye dimapoo eligilame to nei woosaso, "Mo wee sabolo molo dio odoo ogumo?"

<sup>34</sup> Esememe Yesuye odoo buluma omapoo ogogolone egeesee takaso, "Hamapoo ege, hagee mo wee sabolo molo dioso. <sup>35</sup> Odoo agayo Godeeye goomoga goo tomo siloga, diba tei molo dio osoloso mo wee dioso."

#### Ko segili odoo eyo dio masi oposusu

(Matiyu 13:1-9, Luka 8:4-8)

**4** Yesuye Gelili abei palaga odoo susuga mapoo see tobu eligimeleeso. Esino odoo susuga yimapoo mooloogoodeme, yo du ma kulodu mele-doboloso buloso pepoko hoogoo dilesu amaga to takaso. <sup>2</sup> Yesuye dio masi susuga dimapoo eligiliso. Yayo eligilone dimapoo takaso, <sup>3</sup> "Niba dui! Odoo hee ko sakalame diso. <sup>4</sup> Yo omapoo ko kukopugumo silino, ko abo eli domopoo misikedibaso, eseme só aboso sibilesu neso. <sup>5</sup> Osoloso ko abo yukokisi mi mapoo misikedibaso, eseme mi sebege saga palaso. <sup>6</sup> Esino osoko pa oso dei moodoome silikaloso weidaso, bei too mi ma kulomoo gameilega. <sup>7</sup> Osoloso ko abo we ti bei kookoone poogoo omapoo misikedibaso, eseme we ti ko sabolo palaso. Esino we tiso ko eyo bou tia deme dadailoso ko pele poogooso. <sup>8</sup> Osoloso ko abo mi medee tekepo mapoo misikediba oso medee tekepo kauwa palaso. Osoloso ko paso, su aboso ko 30 egeesi paso, osoloso abo ko 60 egeesi paso, osoloso abo ko 100 egeesi paso."

<sup>9</sup> Yesuye egeesee takaso, “No dulu bolo daga, ayo hagee takoo nayo medee dui.”

### Yesuye dio masi taka goo eyo bei

(Matiyu 13:10-17, Luka 8:9-10)

<sup>10</sup> Hamamee Yesu obusomo badebeeno, o hamamee dili 12 odoo sabolo, osoloso odoo abo yimapoo mooloogoo doloso debei odoo oso yimapoo, yayo dio masi taka goo eyo bei woosaso. <sup>11</sup> Yayo dimapoo nei takaso, “Godeeye wiligi doloso badeli goo ee yayo mada magoloso meleeso, esino nimapoo woola yilige pigileiso. Esino peegoo debeli odoo mapoo dio masi takalaiso. <sup>12</sup> Esiga Aisayaye taka hagee peegoo debeli odoo maga taka,

‘Diayo medee hodu dilesa agalaiso,  
esino goo eyo bei diayo ogoloso gooleedalaime.  
Osoloso diba medee hodu dilesa to taka duleiso,  
esino goo eyo bei diayo medee gooleedalaime.  
Diayo gooleedoo diepi, dibada goo tokenee maga waki pialoso,  
Godeeye goo tokenee hapoloso boobado pigiliyo,’  
diso.”

### Yesuye ko segei eyo bei taka

(Matiyu 13:18-23, Luka 8:11-15)

<sup>13</sup> Yesuye o hamamee dili sabolo odoo abo dimapoo takaso, “Bei kasee maga niba dio masi hagee medee gooleedelega ka pagala? Niba dio masi hagee eyo bei niyo medee gooleedelega poogooga, dio masi abo nimapoo ayo takooga niyo kasee gooleedalaisomo? <sup>14</sup> Ko edebeeyo kukopigili ee Godeeyo to oso, osoloso yayo to egee odoo mapoo takeliso. <sup>15</sup> Esiga ko abo eli domopoo kukodipume soso sibilesa ne odoo abo egeesi masi doso. Diba Godeeyo to duliso, esino Saite-neeye dimapoo saga boobado pigili goo teneega, Godeeyo to diayo goolee melega boobado pigiliso. <sup>16</sup> Esiga odoo abo ko yukokisi mi mapoo misikediba egeesi masi doso, diba Godeeyo to taka duloso goomoga sabolo teliso. <sup>17</sup> Esino dibada sooloo ma kulodu too meilega, diba beeamede deiyepo mapoo do-boso, Godeeyo to du maga hegi goo sabolo dala goo sabolo siboga, opulone tei too saga pegeliso. <sup>18</sup> Esiga odoo abo ko we ti bei kookoone poogoo mi omapoo misikediba egeesi masi doso, diba Godeeyo to tekepo duliso. <sup>19</sup> Esino mi toowa hageeyo giebadili goolee sabolo, osoloso bi bei doloso badalai goolee sabolo, osoloso tokenee goo goolee sabolo oso dibada sooloo ma kulodu goo goolee tiadoga, Godeeyo to dibada sooloo ma kulodu pelega dadailoso ko pelega pegeliso. <sup>20</sup> Esino odoo abo ko mi medee tekepo mapoo misikediba egeesi masi doso, diba Godeeyo to duloso tei teliso. Osoloso diba Godeeyo to duloso dibada sooloo ma kulodu Godeeyo to oso ko masi peliso, su aboso ko pa 30 egeesi peliso, abo ko 60 egeesi peliso, osoloso abo ko 100 egeesi peliso.”

### Keme maga dio masi taka goo

(Luka 8:16-18)

<sup>21</sup> Esemee Yesuye dimapoo dio masi takolone woosaso, “Odoo heeso keme poulosa gadeepugu ee gooloogoolame, tolo ma hemidu o debi ma hemidu mada magalaisomo? Hagee, yo keme poulosa dokodoo woola magalaiso, keme gadeepigilame. <sup>22</sup> Bi susuga epedee hamapoo mada egee molo, see hamamee gooleedalame gadeepugu mapoo woola peledabalaiso. <sup>23</sup> No dulu bolo daga, ayo hagee takoo nayo medee dui.”

<sup>24</sup> Yesuye dimapoo egeesee takaso, “To niyo du medee goolee. Niba to hagee medee dia gooleedoga, goo abo niyo medee gooleedalaiso. <sup>25</sup> Odoo agayo to tekepo gooleedoga, Godeeye yimapoo goo goolee dia tekepo abo tenalaiso, esino odoo hee agayo to tekepo medee dulega poogooga, goo goolee tekepo yimapoo egee molo see Godeeye talaiso.”

### Yesuye kakomee ko masi, o hu witi, oso pala amaga dio masi taka

(Matiyu 13:31-34, Luka 13:18-19)

<sup>26</sup> Yesuye dio masi egeesee takaso, “Godeeye wiligi doloso badeli goo edebeeyo kakomee ko masi, o hu wit, segei egeesi masi moloso. <sup>27</sup> Osoloso yo beeamede susuga, gesi susuga tialo hogabuo tialo hogabuo dolone witi ko oso pala yo gooleedele. <sup>28</sup> Witi ko segei eyo mi naga obusomo peliso. Osoloso kawulone daga bou gasibiliso, osoloso du teliso, osoloso hamameedee ko peliso. <sup>29</sup> Witi ko segei poloso telegeega segeli odoo oso dilesa gwaliso.”

### Homokoko pepoko maga dio masi taka goo

<sup>30</sup> Yesuye egeesee takaso, “Godeeye wiligi doloso badeli eyo goo ayo dio hee maga nimapoo takalaiso. <sup>31</sup> Esiga Godeeye wiligi doloso badeli eyo goo edebeeyo homokoko dia pepoko tolosa segei egeesi masi moloso. <sup>32</sup> Esino homokoko dia pepoko segei oso kawudoga toowa poloso homolee ee ma kulodu homo su hagoso toowa malaiso. Osoloso homo dee diadee omapoo soso sibilesa hemiye omapoo ou takalaiso.”

<sup>33</sup> Yesuye odoo mapoo dio masi maga Godeeyo to takomo siliso, eseme dio masi taka oso dibada goo goolee sabolo tebiaso. <sup>34</sup> Yayo odoo susuga mapoo hedepe dio masi maga takemeliso. Esino Yesu o hamamee dili odoo sabolo disono dopolone dio masi oposusu eyo bei dimapoo takeliso.

### Yesuye i sabolo howo ki sabolo hamaga taka

(Matiyu 8:23-27, Luka 8:22-25)

<sup>35</sup> Beeamede hedepe oso osoko olo moume, Yesu o hamamee dili odoo dimapoo egeesee takaso, “Iba abei hodiokoo dalo soowomo.” <sup>36</sup> Esemee Yesu odoo abo pogoloso, hedepe o hamamee dili odoo sabolo du maga abei daso. Esino odoo abo du hee mapoo to-boloso hamamee daso. <sup>37</sup> Diba olo abei domopoo

damolome i toowa simi oso howo ki sabolo sibulone dibada du ma kulodu howo sasoso. Esino diba abei osee damolome howo sasoo oso dibada du howomoo oulame siso. <sup>38</sup> Esino Yesu yo du osio mapoo wolomai wolomaloso tiameleeso. Esem o hamamee dili odoo diayo yo tidipuguloso yimapoo egeese takaso, "Eligili odoo, iba howomoo meilame hagee see nayo iba sooloo dolosomo?"

<sup>39</sup> Yesu diayo to taka duloso toboloso i sabolo howo ki sabolo omapoo egeese takaso, "Epedee hamapoo koodobie!" Esem i sabolo howo ki sabolo o to duloso, saga koodobiaso.

<sup>40</sup> Osoloso see Yesuye dimapoo egeese takaso, "Niba kaseega ka ebiala? Niba amapoo tei too meyo?"

<sup>41</sup> Yesu o hamamee dili odoo diba dia obume disono nei woosa nei woosa dolone egeese takaso, "Hagee odoo ogumo? Yayo i sabolo howo ki sabolo omapoo takeme o to duloso koodobiaso."

### Yesue odoo bo holo pala moodoo

(Matiyu 8:28-34, Luka 8:26-39)

**5** Esiga Yesu o hamamee dili odoo sabolo Gelili abei daso. Osoloso dibada du Gelasa mosobia dibada mi su mapoo oluguso. <sup>2</sup> Osoloso diba du olo oluguloso, Yesu yo mubi dokodoo polomeleeno, odoo bo holo pala oso odoo bi maga Yesu mapoo simiso. <sup>3</sup> Odoo hagee beame susuga odoo bi mapoo badeli, yo kitulugu toowaga edebeeyo yo ki tiso koo tialekili. <sup>4</sup> Beame susuga o homo sabolo dee sabolo ki tiso tialokoloso magooga eyo kitulugu oso ki ti kokisa pigiliso. Esiga edebeeyo yo balai eli opupa meli. <sup>5</sup> Beame susuga osoloso gesi susuga odoo bi mapoo osoloso esia mapoo eyo nediliyo yoso kolo kookoome gwa sabolo siliso.

<sup>6</sup> Yesu eli sage hoogooga sibumolome, odoo yo Yesu ogoloso yo tugodalame hoguodiso. Osoloso o homo beiyopoo gawuaso. <sup>7</sup> Esem Yesuye yimapoo egeese takaso, "Bo holo, no odoo yimaga peegoo gadi." Esino bo holo pala odoo oso neligi agadolone egeese takaso, "Yesu dokodoo badeli Godeeyo owolo, no ogoo talame amapoo ka simiyo? Godeeyo goo maga amapoo dala toowa na tenee!"

<sup>9</sup> Osoloso Yesuye see egeese takaso, "Nee hu ogumo?"

Esem odoo oso to nei yimapoo egeese takaso, "Mo hu Bei, bei iba bei odoo hageeyo kulodu." <sup>10</sup> Osoloso bo holo oso Yesu mapoo see howa see howa diso, bo holo mi hee mapoo seese peegeeyaga.

<sup>11</sup> Esino koola mapoo esia dokodoo be hu bei mooloogoo doloso, mi nalagamo sile sibiso. <sup>12</sup> Esem bo holo oso Yesu mapoo see howaso, "Nayo iba be mapoo palame seese pagalai soowayo?" diso. <sup>13</sup> Esem Yesuye diba be ma kulodu gasoowadee neme, bo holo odoo ma kuloduga galagasibilesa see be ma kulodu soowadeeso. Esem be bei 2,000 egesi oso esia dokodoo abei mapoo kuko meilesa abei ma kulodu weidaso.

<sup>14</sup> Be gi debeli odoo oso goo hagee ogoloso kuko dulone mi toowa mapoo osoloso mi pepoko abo mapoo takomo diso. Esem odoo susuga to hagee duloso, diba agalame sibadeeso. <sup>15</sup> Odoo susuga Yesu mapoo sibilesa mooloogoodooso, esino odoo bo holo pala see tekepo poloso, goo tekepo gooleme dugo tekepo kaloso, Yesubolo badoboome ogoloso dia ebiaso. <sup>16</sup> Be gi debeli odoo diayo goo odoo mapoo peledapa sabolo be mapoo peledapa sabolo ogoloso odoo susuga mapoo takaso. <sup>17</sup> Osoloso odoo mooloogoodoo susuga oso to hagee duloso, Yesu mapoo see howa see howa diso, "No hamaga peegoo di!" diso.

<sup>18</sup> Yesu dilame du mapoo topome, odoo daga bo holo polome Yesuye moodoo oso Yesu mapoo egeese howaso, "A nobolo dilei goomogo." <sup>19</sup> Esino Yesuye yimapoo egeese takaso, "Haye, no mosopoo wedi dileso, Lodeeye sooloo dolone goo tekepo namapoo moodoo nemisi dimapoo takalame di," diso. <sup>20</sup> Esem odoo see abaga wedi dino Dekapolisi mi mapoo mosobia 10 mapoo takomo diso. Odoo susuga yayo taka duloso dia howoogaso.

### Yesu mapoo tei teme nei yayo odoo paiye moodoo

(Matiyu 9:18-26, Luka 8:40-56)

<sup>21</sup> Yesu o hamamee dili odoo sabolo abei dala soowaso, osoloso abei palaga mapoo odoo susuga yimapoo mooloogoodooso. <sup>22</sup> Mi omapoo Yu odoowo howo gisili moso mapoo wiligi odoo toba, o hu Yailas, yayo Yesu ogoloso o homo beiyopoo gawuaso. <sup>23</sup> Osoloso yayo see Yesu mapoo howaso, "Mo sobo holo paiye moodoolame, yo talai koola tapa, esiga nee deeso yo sigilame sibe, yo paiye wediloso, see gie badalame."

<sup>24</sup> Esem Yesu yibolo dime odoo mooloogoodoo susuga hamamee yo pupugamo diso. <sup>25</sup> Osoloso mooloogoodoo eyo kulodu sobo aso woloma oso sawo dimili osee dugo 12 poogooso. <sup>26</sup> Sobo yo melesene neli odoo bei mapoo diayo pidilame dugo susuga dimiliso, esino diayo yimapoo dala toowa tenemeleeso. Osoloso yayo dimapoo melesene talame, melesene eyo nei magolone o molee susuga hosudooso, esino yo sawo dimili koodobilega see toowa poloso, sawo osee dimiliso. <sup>27</sup> Esino sobo yo daga Yesuye odoo tekepo moodoomo sili duloso, yo odoo mooloogoodoo kuloduga Yesuwo miligiyo hamamee sibilesa o dugo sage yayo ka mapoo sigeso. <sup>28</sup> Sobo yayo goolee Yesuwo dugo sigoga yo wedilei gooleeso. <sup>29</sup> Yayo Yesuwo dugo sigime sawo dimili saga koodobiaso. Esem yo eyo egeese gooleeso, "Sawo dimili tekepo pa," gooleeso.

<sup>30</sup> Yesu eyo gooleeno odoo moodeli kitulugu yimaga peegoo di neme, yo odoo mooloogoodoo mapoo hodi bidi puguloso egeese takaso, "Edebeeyo mo dugo sigo. Ayo gooleedalaiya, mo dugo odoo agayo sigoba."

<sup>31</sup> Esem o hamamee dili odoo oso yimapoo egeese takaso, "Odoo mooloogoodoo susuga nama hodu kokosooso. Esiga nayo kasalame, 'Edebeeyo mo dugo sigo. Ayo gooleedalaiya, mo dugo odoo agayo sigoba' doloso ka takala? Bei odoo susuga oso nama sigoso."

<sup>32</sup> Yesu odoo mooloogoodoo kulodu osee esia meleeso, yo odoo agayo sigebeleeso. <sup>33</sup> Esino sobo Yesuwo dugo sige oso eyono moodoo goolee puguloso obulone kikilika sabolo sibilesi o homo beiyopoo badebeiso, osoloso eyo goo moodoo Yesu mapoo takaso. <sup>34</sup> Yesuye nei yimapoo egeesee takaso, "Mo holo, no amapoo tei too maga no tekepo moodooso, esiga no Godeeyo mesie goo sabolo di. No olo wei-dooso."

<sup>35</sup> Yesu to osee takomolome, odoo abo Yailas eyo moso abaga sibilesi Yailas mapoo egeesee takaso, "Nee sobo holo taso. Esiga eligili odoo yo ido sibilei goo hee mauwe, yo haga na goolee."

<sup>36</sup> Esino Yesu diayo taka to telega pogoloso Yailas mapoo egeesee takaso, "No haga na ebi, wulo amapoo tei te."

<sup>37</sup> Osoloso Yesuye egeesee takaso, "Odoosusuga, niba deebese," doloso hedepe Pita, Yemes, Yonee, osoloso Yailus esee Yesubolo diso. <sup>38</sup> Diba abaga dino Yailas eyo moso mapoo peledoboloso, odoo susuga to boowa sabolo pupusuga molome egeiso. <sup>39</sup> Yesu moso kulodu gadilesi odoo susuga dimapoo egeesee takaso, "Niba kaseega to boowa sabolo ka pupusuga malala? Sobo holo yo tele, yo wulo tia moloso."

<sup>40</sup> Odoosusuga Yesuye to taka duloso sisiyiligasio.

Eseme Yesuye odoo susuga dimapoo egeesee takaso, "Niba moso kuloduga peegoo galagadi," diso. Osoloso Yesu yo sobo holo oso tia melee debi mapoo dulone hedepe oma dio owee dio osoloso o hamamee dili odoo sabolo kulodu gadiso. <sup>41</sup> Yesuye sobo holo ta o dee mapoo tolosi yimapoo egeesee takaso, "Talita koum!" (To eyo bei sobo holo, no teebese.) <sup>42</sup> Eseme sobo holo yo epedee omapoo saga toboloso siliso (yo dugo 12). Eseme oma dio owee dio, osoloso Yesu o hamamee dili odoo sabolo dia howoogasio. <sup>43</sup> Yesuye dimapoo to kitulugu sabolo egeesee takaso, "Ayo sobo holo hagee wedilame moodoo niyo odoo hee mapoo na takee," diso. Osoloso oma dio owee dio mapoo Yesuye egeesee takaso, "Nibada sobo holo nei nali bi tenee," diso.

### Naselet odoo oso Yesu gowe

(Matiyu 13:53-58, Luka 4:16-30)

**6** Yesu o hamamee dili odoo sabolo mi toowa omaga see o midese Naselet mapoo diso. <sup>2</sup> Osoloso Yu odoowo tei beame hee mapoo howo gisili moso kulodu yayo odoo susuga eligisi. Osoloso odoo susuga o to duloso howoogasio.

Eseme diba disono nei woosa nei woosa doloso egeesee woosasio, "Yo goo susuga hagee kasee gooleedoowo? Yo goo goolee medee tekepo. Yo goo mudu opusomodi moodeli kitulugu kapoo toowo?" <sup>3</sup> Yo wulo moso tekeli odoo, osoloso Meliyo owolo, osoloso yo Yemes, Yoses, Yudas, osoloso Saimonbolo dibada emei, osoloso oboba ibolo doso," diso. Osoloso diayo egeesee goolee maga Yesuye eligi dulei goweso.

<sup>4</sup> Eseme Yesuye dimapoo takaso, "Odoosusuga oso Godeeyo to tosili odoo eyo hu poudiliso. Esino o moso-

bia odoo sabolo osoloso o soosoo sabolo o moso kulodu debeli odoo oso o hu koo poudili." <sup>5</sup> Esino bei diayo Yesu mapoo gowoolone tei too mauwe pogoloso debi egeme, goo mudu opusomodi toowa yayo moodoole poogooso. Esino odoo paigiga abo o deeso sigime weido diso. <sup>6</sup> Yesu diayo yimapoo tei too mauwe poogoo ogoloso dia hoowasio. Eseme Yesu Naselet mi amaga see pogoloso dilesi mi pepoko abo mapoo Godeeyo to eligimo siliso.

### Yesuye o hamamee dili odoo 12 diye di

(Matiyu 10:5-15, Luka 9:1-6)

<sup>7</sup> Yesu o hamamee dili odoo 12 gilimadoloso diso nediliyo puloso bakadio toopoo bakadio toopoo doloso mi opusomodi opusomodi mapoo diye diso. Yayo diba diye dolone bo holo pala peegoo hasisilame kitulugu dimapoo teneeso.

<sup>8</sup> Yesuye dimapoo egeesee takaso, "Niba dulone bi abo na te, esino niba wulo susu tolosi diadee. Osoloso nei sabolo, o sabolo osoloso molee sabolo tolosi na diadee. <sup>9</sup> Esino homo mapoo kali sabolo osoloso dugo niso ka hedepe egee moulosi dulone, dugo kali bi abo na te." <sup>10</sup> Yesuye dimapoo takaso, "Niyo mi omapoo dilesi peledobooga beame omapoo mosobia oso goomogolone moso teneega, moso hedepe omapoo dooso mi hee mapoo dulone ka poogoo di. <sup>11</sup> Esino mi kamapoo niyo dilesi peledaba beame omapoo mosobia oso goomogolega pogoloso nimapoo moso sabolo tenelega, osoloso nibada to mapoo tei telega poogooga, mi egee pogoloso diadee. Osoloso niyo mi egee pogoloso dulone, dibada howo woola omapoo nibada homo mi mapoo basago taloso peegee. Bei diayo nibada to mapoo tei telega poogooga, Godeeyo dimapoo dala tenelai goo ee eligilame," diso.

<sup>12</sup> Eseme Yesu o hamamee dili odoo diayo dilesi odoo susuga mapoo Godeeyo to takomo sile sibilone egeesee takaso, "Nibada goo goolee su wuduloso goo tokenee maga waki pie," diso.

<sup>13</sup> Osoloso bo holo odoo ma kulodu paladee diayo peegoo hasisi pugudolone debeiso. Osoloso odoo paigiga sabolo wolo iso dibada wiligi mapoo soome paigiga weido diso.

### Yonee Odoos Howo Sauwidili oso ta

<sup>14</sup> Mi susuga mapoo odoo susuga oso Yesuwo goo takamo dime wiligi toba Helodeeye duloso gooleedooso. Odoos aboso egeesee takaso, "Yo Yonee Odoos Howo Sauwidili ta maga see hogabia, esiga kitulugu goo toowa hagee yima kuloduga tou ka to," diso.

<sup>15</sup> Odoos aboso egeesee takaso, "Yo Ilaisa."

Osoloso odoo aboso egeesee takaso, "Yo Godeeyo to tosili odoo daga Godeeyo to medee tekepo tosili egesi masi bado," diso.

<sup>16</sup> Esino Helodee goo hagee duloso, gooleedeme yayo egeesee takaso, "Yonee Odoos Howo Sauwidili, o wiligi kopugume ta odoo, yo see ta maga hogabia doo," diso.

(Yonee telega badolone, daga goo peledaba hagosu.)<sup>17</sup> Helodeeyo omolo Pilipiyo sobo Helodies see Helodeeye peedeedoloso hume, Yoneeye Helodee mapoo egeesee takaso, "Nayo no molowo sobo see nayo peedeedoloso hulei tekeponee," diso. Osoloso Helodieseeye kemeneme Helodee mapoo dilesos egeesee takaso, "Nayo Yonee neliga ma kulodu magee," diso. Esemeyayo Yonee neliga ma kulodu magalame o ha teli odoo diye dee takeme, diayo dilesos yo neliga mapoo magooso. Esino Helodies Yonee mapoo hegilone, yayo yo wolomalame gooleeso. Esino yayo yo wolomele, bei Helodee Yonee wolomalal ebiaso. Yo gooleedooso Godeeyo howo woola Yonee goo tokenee mauwe, osoloso yo odoo medee tekepo. Esiga yayo Yonee medee bameleeso. Yo Yoneeyo to duloso goo dia tiadiliso, esino o to mapoo dulei goomogolone o sooloo ma kulodu goomogeliso.

<sup>21</sup> Esino hamamee Helodies mapoo Yonee wolomalame beame tekeposo yimapoo simiso. Helodee soomagoo beame mapoo wo toowa nalame gamalee wiligi tebisa sabolo osoloso o ha teli wiligi odoo tebisa sabolo osoloso Gelili mi toowa ma kulodu wiligi tebisa-laso debei odoo sabolo Helodeeye gilimadoloso mooloogoodooso.

<sup>22</sup> Diba wo nolone dobome Helodiesyo owolo sobo holoso diayo wo nolone debei moso ma kulodu gasibilesos goomoga teneelone habasos. Esemeyo Helodeeye sobo yimapoo takaso, "Nayo goomoga goo amapoo takee, ayo bi egee namapoo tenelaiya," diso.

<sup>23</sup> Helodeeye badolone tei goo see takaso, "Nayo goomoga goo amapoo takooga, ayo namapoo tenelaiso. Osoloso mi ayo hagee bamolo su sabolo nayo goomogoga, ayo namapoo tenelaiso."

<sup>24</sup> Esemeyo sobo yayo owee Helodies mapoo dilesos, yayo goomoga goo dulame diso.

Esemeyo sobo owee Helodiesye nei takaso, "Nayo goomoga Yonee Odoo Howo Sauwidili eyo wiligi goomogo dee takee."

<sup>25</sup> Esemeyo oweeyo to duloso, saga wedi dilesos Helodee mapoo egeesee takaso, "A epedee hamapoo Yonee Odoo Howo Sauwidili eyo wiligi koodolosos tolo mapoo magolosos tosi bogaa ee talai goomogo," diso.

<sup>26</sup> Helodeeye to hagee dume yo dia goo helesos. Esino yo odoo susugaa eyo howo woola mapoo eyo tei magoo ee gobabilee ebiasos. Esemeyo sobo o to mapoo gowoole.<sup>27</sup> Osoloso Helodeeye o ha teli odoo hee neliga moso gibali oso Yoneeyo wiligi kodolame diye diso. Esemeyo neliga moso tegei mapoo dilesos Yoneeyo wiligi koodolosos, odoo susugaa oso agalame tolo mapoo magolosos, odoo howo woola tosi bilesos sobo mapoo teneesos. Esemeyo sobo yayo tolosos owee mapoo teneesos.<sup>29</sup> Yonee o hamamee dili oso goo hagee dume, diayo sibilesos o su tolosos wulu odoo toga tooseli omapoo kulodu magooso.

### Yesuye sobo sabolo, holaiso sabolo, osoloso gisowe 5,000 mapoo nei pi

(Matiyu 14:13-21, Luka 9:10-17, Yonee 6:1-14)

<sup>30</sup> Yesuye diye di odoo see wedige sibilesos, diayo goo moodos sabolo diayo goo eligi susugaa sabolo Yesu mapoo opususos.<sup>31</sup> Odoo susugaa Yesuye badebei omapoo dile see sibo di oso, Yesu o hamamee dili odoo sabolo nei nalai beeametekepo egele. Esemeyo Yesuye o hamamee dili odoo mapoo egeesee takaso, "Iba ibusomos odoo mauwe poogoo mi mapoo dilesos hasalame dimo," diso.

<sup>32</sup> Esemeyo Yesu o hamamee dili odoo sabolo du ma kulodu bulumalosos, abei hodiokoo odoo koola mauwe mi mapoo dalo soowoolame moumeleenos, odoo abei palagaa debei oso ogolosos gooleedoosos. Esemeyo odoo susugaa oso mi opusomos opusomodis magaa Yesuye di mi mapoo malalo mili hogugaa diadeesos. Diba malalo dilesos balagaa meleenos, Yesu o hamamee dili odoo sabolo du magaa sibilesos gimagoosos.<sup>34</sup> Osoloso Yesu du magaa mi mapoo pubalogolosos, odoo susugaa mooloogoodolosos debei ogolosos, yayo diba dia sooloo dalasos, bei sipi be hu masi bali odoo mauwe pogolosos dobome. Esemeyo yayo goo susugaa dimapoo eligisos.

<sup>35</sup> Osoko olo todobume, Yesu o hamamee dili odoo oso yimapoo sibilesos egeesee takaso, "Osoko olo todobuo, osoloso mi hagee moso sabolo nei nalai sabolo mauwe."<sup>36</sup> Esiga nayo odoo susugaa hagee diye dee takee. Osoloso diba dilesos, mi koola mapoo diso moleesos nei tolosos nalame," diso.

<sup>37</sup> Esino Yesuye o hamamee dili odoo mapoo nei takaso, "Diayo nei nalai nisos tolosos tenee," diso.

Diayo Yesu mapoo takaso, "Iyo nei tolosos dimapoo teneega, 200 molee toowasos teli, esino iba molee mauwe."

<sup>38</sup> Esemeyo Yesuye dimapoo woosagos, "Diba wo kasolos molosomos? Niyo agalame di."

Esemeyo diayo dilesos egeme, diayo yimapoo takaso, "Wo dee tiadoo osolosos di bakadio molosos," diso.

<sup>39</sup> Esemeyo Yesuye o hamamee dili odoo mapoo egeesee takaso, "Odoo susugaa mapoo, 'Niba mi mapoo pepokos mooloogoodolosos bulumaa mooloogoodolosos bulumaa,' dee takee," diso.<sup>40</sup> Esemeyo dimapoo takeme, diba mooloogoodos opusomos opusomos dolosos mooloogoodos hee mapoo odoo 100 osolosos mooloogoodos hee mapoo odoo 50 dolosos bulumasos.<sup>41</sup> Esemeyo Yesuye wo dee tiadoo sabolos di bakadio sabolos tolosos, keimis ma dokodoo bolone, Godeeye nei pidilame goomoga goo todagagos. Osolosos yayo wo popeilosos di sabolos agisalosos o hamamee dili odoo mapoo piso, diayo odoo susugaa mapoo pilame. Esemeyo diayo wo sabolos di hwei sabolos odoo susugaa mapoo piso.<sup>42</sup> Esemeyo odoo susugaa nei tebia negaa dia edigasos.<sup>43</sup> Osoloso diayo nei nalalos abo poogoo, Yesu o hamamee dili odoo oso misigamos di bou tegei 12 metamagisagos.<sup>44</sup> Osoloso sobo sabolos holaisos sabolos nei nesos. Esino mooloogoodos eyo kulodu gisowes hesigaa 5,000 oso nei ka ne.

**Yesuye howo dokodooga di**

(Matiyu 14:22-33, Yonee 6:15-21)

<sup>45</sup> Diba nei nalaga koodobuloso, Yesu o hamamee dili odoo malalo du maga Betesaida mi mapoo diye doloso, diba abei damolome, Yesuye odoo susuga dibada mi mapoo diye diso. <sup>46</sup> Osoloso Yesuye odoo susuga diye doloso, yo obusomo Godee mapoo toodagalame mubi dokodoo palaso.

<sup>47</sup> Gesi domo o hamamee dili odoo dibada du maga abei domo damolome, Yesu yo obusomo mubi dokodoo badebeiso. <sup>48</sup> Yesu mubi dokodoo badolone egeino, poo sabolo howo ki sabolo simi oso, o hamamee dili odoo dia du mapoo woome, diba kwasu sabolo du sulugamo diadaga molome egeiso. Osoloso gesikolo kudi olo tadageme, yo howo dokodooga diba daga dilame dimeleeso. <sup>49</sup> Esino o hamamee dili odoo diayo Yesu howo dokodooga dimelee egeme, diayo goolee bo belee dolone diba yo ogoloso googaso. <sup>50</sup> Yesu o hamamee dili odoo oso yo ogoloso obugume dimapoo egeese takaso, "Haga na ebi. Aso." <sup>51</sup> Osoloso Yesu yo du mapoo dapogome, howo ki sabolo poo sabolo saga koodobiaso. Esem Yesu o hamamee dili odoo goo hagee ogoloso dia howoogaso. <sup>52</sup> Diba Yesuwo kitulugu gooleedoo diepi, diba howoogelegeliyo. Esino diba howoogaso, bei dibada sooloo kalawaga.

<sup>53</sup> Osoloso diba abei daloso abei hodiokoo Genesalet mi mapoo dibada du oluguso. <sup>54</sup> Diba du oluguloso mubiyodoo dalaga poogoome, odoo omapoo tebisa melee oso yo kibiya hoodo egeiso. <sup>55</sup> Odoo susuga mi opusomo opusomodi mapoo hogugo dilesa, odoo paigiga dibada kida mapoo tiedigaloso Yesu mapoo emigado sibadeeso. <sup>56</sup> Yesu mi opusomo opusomodi mapoo silime, edebeeyo odoo paigiga kida mapoo tieduloso, bi teli go mapoo emigado sibilesa magooso. Osoloso odoo paigiga oso Yesu o dugo sage ka pee mapoo sigilame howoogaso. Esem diayo o dugo sigeme wegiga dooso.

**Godeeye tei eligi goo sabolo edebeeyo tei eligi goo sabolo**

(Matiyu 15:1-9)

**7** Beeame hedepeso Pelisi odoo sabolo tei eligili odoo abo sabolo Yoluselem mi amaga sibilesa Yesu mapoo mooloogoodooso. <sup>2</sup> Osoloso diayo egeino, Yesu o hamamee dili odoo abo oso Yu odoowo tei dedelega pogoloso nei nalame dibada dee howo koo hapagali. <sup>3</sup> (Esino Yu odoo sabolo Pelisi odoo sabolo dibada odooga dia tei eligi goo dodolone daga nei nalame dee howo hapagaliso. <sup>4</sup> Diba bi teli go mapoo bi toloso nala pogolone daga dibada dee medee howo hapagaloso ka nali. Osoloso dibada odooga dia tei eligi goo dodolone dibada kapu sabolo sosepeni sabolo osoloso disi sabolo howo hapagaliso.)

<sup>5</sup> Esem Pelisi odoo sabolo tei eligili odoo oso Yesu mapoo woosaso, "Bei kasimaga nee hamamee dili

odoo ibada odooga dia tei eligi goo dedelega ka pagala? Diba dee howo hapegelega nei naliso," diso.

<sup>6</sup> Yesuye to nei dimapoo takaso, "Godeeyo to tosili odoo hee Aisayaye daga hoogoo tei goo olo takaso, googolee bakadio gweli odoo nimapoo. Osoloso Aisayaye see tobu takaso,

'Dibada magaso amapoo goomogolone mo hu dokodoo poudiliso, esino dibada sooloo ma kulodu mesili goo me.

<sup>7</sup> Diayo amapoo goomogolone mo hu dokodoo poudili eyo kulodu goo hee me, bei edebeeyo tei goo eligi, diayo Godeeyo tei masi odoo mapoo eligiliso.'

<sup>8</sup> Niba Godeeyo tei goo eligi pogoloso, see nibada odooga dia tei goo eligi deedeeso.

<sup>9</sup> Yesuye dimapoo see tobu egeese takaso, "Niba Godeeyo tei goo eligi goo peegoo magoona. Osoloso nibada odooga dia tei eligi goo talame. <sup>10</sup> Esiga daga hoogoo Moseeeye tei goo Godee maga simi nimapoo tenee hagos,

'Nama dio noowe dio oso to taka duloso dimapoo mesie. Esino odoo agayo oma dio owee dio mapoo to tokenee takooga, yo wolomalaiso.'

<sup>11</sup> Esino niyo egeese takiliso, 'Soowa, edebeeyo oma dio owee dio mapoo takoo, "Emegei, niba ayo pidileime, bei molee amapoo egee molo Godee mapoo tenelame siga. Molee egee ibada toso hedi koloban.'" <sup>12</sup> Niyo odoo owee dio oma dio ee pidilei tei magooso. <sup>13</sup> Niyo tei magoo ee dodolone Godeeyo tei magoo peegoo magolone ka doso. Osoloso niba goo abo susuga egeese masi tomo silesiboso."

**Odoo sooloo ma kulodu Godeeyo howo woola tokenee peli goo**

(Matiyu 15:10-20)

<sup>14</sup> Esem Yesu odoo mooloogoodoo see gili-madoloso, dimapoo egeese takaso, "Niba mo to medee dui, osoloso goo goolee medee te. <sup>15</sup> Esiga edebeeyo nei nali oso o sooloo ma kulodu Godeeyo howo woola tokenee koo peli. Esino odoo o sooloo ma kulodu goo gooleemeleso, to tokenee taka sabolo, osoloso yayo goo tokenee tomo sili oso, o sooloo ma kulodu Godeeyo howo woola tokenee peliso. <sup>16</sup> Niba dulu bolo daga, ayo hagee takoo niyo medee dui," diso. †

<sup>17</sup> Esem Yesuye odoo mooloogoodoo poogoo dileso, moso kulodu gadime, o hamamee dili odoo oso dileso egeese takaso, "Nayo dio masi taka goo eyo bei imapoo medee takee," diso. <sup>18</sup> Esem Yesuye dimapoo egeese takaso, "Niba goo eyo kulodu bei medee koo gooleedolo? Esiga niyo nei toloso nali oso nibada sooloo ma kulodu Godeeyo howo woola tokenee koo peli, bei nei nali bi egee sooloo ma kulodu koo gameli. Esino kakobo ma kulodu gameilesa see peegoo gasibiliso." (Yesuye goo hagee takolone, yayo kitulugu sabolo takaso, nei nali bi susuga nalai tekepo, diso.)

† 7:16 To hagee odoo abo oso taka Makaye hogugu dee take-liso, esino odoo bei oso taka Makaye hogugule dee takeliso.

<sup>20</sup> Esino Yesuye see egeese takaso, "Odo o sooloo ma kulodu goo gooleemeleso, to taka sabolo, osoloso yayo goo tokenee tomo sili oso, o sooloo ma kulodu Godeeyo howo woola tokenee peliso. <sup>21</sup> Esino odo sooloo ma kulodu tokenee goo susuga hagee talame goo goolee sibiliso. Tokenee goo gweli, osoloso ede-beeyo odo hee mapoo giba nalame gweli goo, osoloso adaba bi heli talai goo, osoloso odo wolomalai goo, osoloso gisoso adaba kooka sobo mapoo giba nalai goo, osoloso soboso adaba kooka giso mapoo giba nalai goo, <sup>22</sup> bi bei doloso badalai gweli goo, osoloso tokenee talai goo osoloso emegei dimapoo gamenee takalai goo, osoloso odo susuga eyo howo woola ebili goo talai, osoloso emegei dimapoo kweli goo, osoloso emegei dia hu maga takalai goo, osoloso suwa peli goo, osoloso goo tekepo goolee me o sili. <sup>23</sup> Esiga tokenee goo susuga hagee talame odo o sooloo ma kulodu goolee meleso toga, o sooloo ma kulodu Godeeyo howo woola tokenee peliso."

**Yu dele poogoo sobo oso tei too goo**  
(Matiyu 15:21-28)

<sup>24</sup> Yesu o hamamee dili odo sabolo mi egee pogoloso, Taya mi toowa koola mapoo diso. Osoloso yo dilesa, odo susuga oso yayo simi ogoloso gooleedeeyaga moso hee mapoo kulodu gapeleso mada badebeiso. Esino odo susuga oso yayo simi goo ee duloso odo abo mapoo saga takomo dime diba gooleedooso. <sup>25</sup> Esem Yu dele poogoo sobo hedepe Ponesiya Siliya mi mapoo badeli oso Yesuwo goo dume, yayo badebei mi omapoo simiso. Yo sibilesa Yesuwo homo beiyopoo gawuloso badolone egeese hoowaso, "Mo sobo holo bo holo pala badoso. Esiga nayo sibilesa o kulodu bo holo egee bado peegoo hailame sibe," diso.

<sup>27</sup> (Yu odo oso Yu dele poogoo odo mapoo so, dee takeliso. Osoloso Yu odo ee takolone odo holaiso, deliso. Esem sobo yayo goo egee moodolai kitulugu tebia doloso yimapoo tei too malabeleso agalame) Yesuye sobo mapoo egeese takaso, "Holaiso dia nei toloso so mapoo tenelai tekeponee. Esino daga holaiso dimapoo nei tenelai tekepo," diso.

<sup>28</sup> Esem soboso Yesu mapoo nei takaso, "O Lodee, nayo tei takoo. Esino so moso hemidu silesibilone holaisoso nei ne kokou mou nalagamo silesibiliso," diso.

<sup>29</sup> Esem Yesuye sobo mapoo takaso, "Nayo amapoo to nei tekepo takaso. Esiga no mosopoo dilesa nowolo sobo holo mapoo ege, yo tekepo badoso. Bo holo epedee o beliye ma kulodu mauwe," diso.

<sup>30</sup> Esem yo o mosopoo dilesa, o sobo holo egeino bo holo o kulodu pala mauwe pogoloso, tekepo poloso debi mapoo wulo tia molome egeiso.

**Yesuye odo dula taba ibaya tekepo moodoo goo**

<sup>31</sup> Yesu o hamamee dili odo sabolo Taya mi pogoloso Saidon mi mapoo peledabaso. Osoloso diba see abaga dino Dekapolisi mosobia mapoo peledoboloso, Gelili abei mapoo mouso. <sup>32</sup> Osoloso odo

aboso odo dula taba ibaya Yesu mapoo ido sibilesa howaso, yayo o deeso sigiloso tekepo palame.

<sup>33</sup> Yesuye odo dula taba ibaya odo mooloogoodoo amaga peegoo ido dilesa, Yesuwo dee woluguso dula taba ibaya eyo dula ou mapoo tuluguloso, makawo o dee mapoo paga magoloso, odo dula taba ibaya eyo i mapoo sigeso. <sup>34</sup> Osoloso Yesu keimi ma dokodoo bolone sooloo toowa polomeleso homodopuloso yimapoo o toso egeese takaso, "Epata!" (to eyo bei yiliga magee). <sup>35</sup> Esem epedee omapoo dula taba ibaya eyo dula tekepo poloso to taka o duloso medee duso, osoloso o iso to medee kalame mooloogooso.

<sup>36</sup> Osoloso Yesuye odo susuga mapoo yayo goo moodoo na oposisi doloso, dimapoo to kitulugu sabolo takeliso. Esino yayo takolone diayo odo abo mapoo na oposisi dee taka pogoloso, see odo abo mapoo oposiliso. <sup>37</sup> Esem odo susuga oso Yesuye goo moodoo dume dia howoogaso. Osoloso diayo see egeese takaso, "Yesu goo susuga tomo sili medee tekepo. Iyo goolee edebeeyo odo dula tobaga ibaya tekepo koo moodoogamo silabelee dee. Esino yayo odo dula tobaga osoloso to koo kalakali yayo tekepo moodoogamo siliso."

**Yesuye 4,000 odo mapoo nei pi goo**  
(Matiyu 15:32-39)

**8** Beeame heeso Yesuye goo eligi ee dulame see yimapoo odo susuga mooloogoodoloso debeiso. Esino nei mauwe poogoome, Yesuye o hamamee dili odo gilimadoloso dimapoo egeese takaso, "Ayo odo susuga hagee dia sooloo dolo, bei diba abolo dobolone beeame bakadio hedepedi poogooga. Esiga diayo nei nalai mauwe. <sup>3</sup> Osoloso ayo diba nei tenelega, dibada mosopoo diadee dee takooga, diba eli domopoo houdaso kitulugu me pogoloso howamadalaiso, bei odo abo dibada mi koola hapoonee," diso.

<sup>4</sup> Esem Yesu mapoo o hamamee dili odo oso woosaso, "Nei mauwe, osoloso moso mauwe miwe poogoo mi hamapoo, iyo nei kamapoo toloso odo susuga hamapoo ka tenelaiyo?" diso.

<sup>5</sup> Esem Yesuye o hamamee dili odo mapoo egeese woosaso, "Niba wo kasolo molosomo?" Diayo nei takaso, "Iba wo 7 moloso," diso.

<sup>6</sup> Esem Yesuye odo susuga mi mapoo bulume diso. Osoloso yayo wo 7 toloso Godee mapoo goomoga todagoloso, wo popeiloso odo susuga mapoo pilame o hamamee dili odo mapoo piso. Esem diayo odo mooloogoodoo susuga mapoo piso. <sup>7</sup> Osoloso odo mooloogoodoo ma kulodu di pepoko abo molo egeiso. Esem Yesuye di toloso Godee mapoo goomoga todagoloso, o hamamee dili odo mapoo teneme, diayo toloso odo mooloogoodoo mapoo piso. <sup>8</sup> Esem diba nei ne oso dia edigime, diayo nei naloso abo poogoo, Yesu o hamamee dili odo oso misigamo di, bou tegei 7 metamagisaso. <sup>9</sup> Esiga beeame omapoo 4,000 odo oso nei egee neso. Osoloso diba nei naloso, hamamee Yesuye dibada mi mapoo diadee,

diso. <sup>10</sup> Osoloso diba diye doloso, Yesu o hamamee dili odoo sabolo abei mapoo meilesa du ma kulodu bu-lumaloso, Dalmanuta mi mapoo dalo soowaso.

**Pelisi odoo oso goo mudu opusomodi ee agalame goomoga goo**  
(Matiyu 16:1-4)

<sup>11</sup> Diba Dalmanuta mi mapoo soowooleso peledobome, Pelisi odoo oso Yesu mapoo toso agadilame sibadeeso. Bei diba goomogaso Yesu kitulugu tei Godee maga simibeleso kukuloso agalame. Egeesee meleso, diayo Yesu mapoo goo mudu opusomodi moodee doloso takaso. <sup>12</sup> Esem Yesuye goo hagee dume, yo diba goohelime sooloo toowa polomeleso homodopuloso takaso, "Bei kasimaga epedee beame hamapoo odoo susuga hagee do oso goo mudu opusomodi moodoo ee agalame ka woosaliyo? Esiga ayo nimapoo tei goo taka, ayo goo mudu opusomodi odoo epedee beame hamapoo hagee do omapoo niyo agalame see moodoolaiame," diso. <sup>13</sup> Osoloso Yesuye goo mudu opusomodi eligi koodobuloso, see o hamamee dili odoo gilimadoloso du mapoo meilesa, abei hodiokoo dalo soowaso.

**Yesuye wo habili maga dio masi taka goo**  
(Matiyu 16:5-12)

<sup>14</sup> Diba abei hodiokoo dalo soowoolone wo talai boobadopugunabu. Esino du ma kulodu wo hedepe molome egeiso. <sup>15</sup> Esem Yesuye dimapoo kokodo takolone dio masi egeesee takaso, "Niba obeeamo, bei Pelisi odoo sabolo Helodee dibada goo wo habili masi moloso. Osoloso wo giedege sabolo wo habia sabolo hamaga, wo giedege habia oso tokenee palaiso," diso.

<sup>16</sup> Esem diayo Yesuye taka duloso disono to boowooga meleso takaso, "Bei yayo egee takoo, iba wo telega soowooga ka takoo," diso.

<sup>17</sup> Esino Yesu diayo to boowooga melee ogoloso, yayo dimapoo takaso, "Bei kasimaga niba nei mauwe poogoo ogoloso goo ka tiadowala? Niba ayo goo eligi omapoo ogoloso koo gooleedolo? Nibada sooloo ma kulodu goo ayo eligi ee gooleedoloso, nibada sooloo ma kulodu magal'ai dia kalawado?" <sup>18</sup> Niba howo mauwega, egele ka pagala? Niba dulu mauwega, dule ka pagala? Niba ayo wo dee tiadoo 5,000 giso mapoo pi goo ee boobadoolo? Diayo nei naloso, wo abo poogoome, niyo misigamo di bou tegei kasolo metamagisayo?" diso.

Diayo nei takaso, "Bou tegei 12."

<sup>20</sup> Esem Yesuye see takaso, "Ayo wo 7 4,000 odoo mapoo pi, wo abo poogoome, niyo misigamo di bou tegei kasolo metamagisayo?" diso.

Diayo nei takaso, "Bou tegei 7."

<sup>21</sup> Esem Yesuye takaso, "Ayo odoo susuga mapoo wo pi goo ee niyo egeiso. Esino bei kasimaga Pelisi odoo sabolo Helodee dibada goo wo habili masi maga ayo hagee takoo niyo gooleedelega osee ka dabala?"

**Yesuye Betesaida mi omapoo odoo howo bakadio si moodoo goo**

<sup>22</sup> Osoloso diba Betesaida mi omapoo peledoboloso, odoo abo oso odoo howo bakadio si Yesu mapoo ido sibadeeso. Esem diayo Yesu mapoo howoolone egeesee takaso, "Odo hagee nee deeso sigoloso yo tekepo pe," diso. <sup>23</sup> Esem Yesuye o hamamee dili odoo sabolo dulone, yayo odoo howo bakadio si eyo dee mapoo toloso mosobia amaga yo peegoo ido diso. Osoloso Yesuye o howo mapoo makawo pakanuloso, yayo odoo egeeyo howo mapoo sigoloso, Yesuye yimapoo egeesee takaso, "No epedee bi susuga ogolo?"

<sup>24</sup> Esem odoo yayo peegoo ogogolone egeesee takaso, "O olo ogoso, esino odoo silesibono medee koo ogo, diba homo masi silesibo," diso.

<sup>25</sup> Esem Yesuye o deeso see odoo howo bakadio si eyo howo mapoo sigeme, olo epedee omapoo o howo tekepo poloso bi ogogolone egeesee takaso, "Bi susuga medee ogo," diso. <sup>26</sup> Yesu odoo howo bakadio si tekepo moodooloso, Yesuye yo tekepo moodoo odoo abo mapoo takelega pagalame, yo mosopoo diye dolone yimapoo takaso, "No duga mosobia kulduga na di," diso.

**Pitaye Yesuwo goo yiligepugu**  
(Matiyu 16:13-20, Luka 9:18-21)

<sup>27</sup> Yesu o hamamee dili odoo sabolo abaga mosobia koola Kasaliya Pilipi mi mapoo polone, eli domo dulone, Yesuye o hamamee dili odoo dimapoo woosaso, "Edebeeyo a odoo ogu deliyo?"

<sup>28</sup> Esem diayo Yesu mapoo nei egeesee takaso, "Odo aboso taka no Yonee odoo howo sawwidili odoo toloso hogado simi deliso, aboso taka no Ilaisa deliso, osoloso odoo aboso taka no daga hoogoo Godeeyo to tosili odoo deliso."

<sup>29</sup> Yesuye dimapoo woosaso, "Niyo a odoo ogu deliyo?"

Esem Pitaye nei egeesee takaso, "No Keliso, Godeeye hudi magoo oso."

<sup>30</sup> Esem Yesuye dimapoo to kitulugu sabolo egeesee takaso, "Odo mapoo a Keliso Godeeye hudi magoo dee na takeeye!" diso.

**Yesu eyo talai taka**  
(Matiyu 16:21-23, Luka 9:22)

<sup>31</sup> Yesu o hamamee dili odoo eligi mimologolone egeesee takaso, "Odo Holo, a dala toowa bei talaiso, osoloso Yu odoowo wiligi tebisa sabolo, tei moso wiligi tebisa sabolo, tei eligili wiligi tebisa sabolo oso a gowoolaiso. Osoloso edebeeyo a teli mapoo magalaiso, esino beame bakadio hedepedi eyo kulodu hogabileiso." <sup>32</sup> Yesuye goo hagee o hamamee dili odoo dimapoo woola yilege pugume, Pitaye yo peegoo ido dilesa yimapoo takaso, "No egeesee na takee."



<sup>33</sup> Esemé Yesu o hamamee dili odoó dimapoo bidi puguloso bolone, Pita mapoo egeesee takaso, "Saiten masi, no amaga peegoo di! Nayo egee takoo ede-beeyo goolee takoo Godeeye goolee goo koo takoo."

<sup>34</sup> Yesu o hamamee dili odoó sabolo osoloso odoó mooloogoodoo gilimadoloso, dimapoo egeesee takaso, "Edebeeyo ama hamamee dadalai gooleega, diba daga eyo goomoga goo susuga peegee. Osoloso eyo talai sabolo dala toowa talai sabolo goo medee moodoloso ama hamamee ka sibe. <sup>35</sup> Odoó agayo o gie badeli goodogoloso medee tekepo badalame gooleega, yo gie badeli osugobalaiso. Esino yayo o su eyo goodegelega pogoloso, mo goo maga osoloso to tekepo eyo goo maga edebeeyo yo wolomaga, yo tei gie badeli agalaiso. <sup>36</sup> Esiga edebeeyo mi toowa hamapoo bi susuga egee molo o daga, osoloso o gie badeli osugobooga, bi susuga ogošo yo pidileisomo? Haye. <sup>37</sup> Esino mi toowa hamapoo o gie badeli osugobooga, ogošo biso gie badeli see ka talaiyo? Gie badeli see talame bi tenelai bi hee mauwe. <sup>38</sup> Esiga edebeeyo Godeebolo ebilega pogoloso, goo tokenee osee tomo silesibo epedee beame hamapoo, edebeeyo o tei too sabolo, osoloso mo to maga, edebeeyo yimapoo dala teneeyaga obulone, o tei too mada magooga, hamamee mo mayo kitulugu gadeepugu sabolo, osoloso o momaiye sabolo sibilesi, nei ayo yimapoo waki pileiso."

<sup>9</sup> Yesuye dimapoo egeesee takaso, "Ayo nimapoo tei taka, odoó abo hamapoo hagee do, niba epedee talame, esino daga malalo Godeeye wiligi doloso badalai beame goo kitulugu sabolo siboga agalaiso."

### Yesu o su mudu opusomodi

(Matiyu 17:1-8, Luka 9:28-36)

<sup>2</sup> Osoloso beame 6 olo pogoloso, hamamee Yesuye Pita, Yemes, osoloso Yonee esee mubi hoo dokodoo odoó mauwe mapoo ido paladeeso. Mubi hoo dokodoo o hamamee dili odoó oso balagamolome Yesu o su mudu opusomo paso. <sup>3</sup> Esemé egeino Yesu o dugo dia hohodi ka heliye amaga poni oso howo dooso. Esiga mi hamapoo odoó heeso dugo hapooga dugo heliye egesi molo agalaime. <sup>4</sup> Osoloso Ilaisa dio Mosesee dio galaga sibilesi Yesubolo to kemeleeso.

<sup>5</sup> Pitaye Yesu mapoo egeesee takaso, "Eligili odoó, iba hamapoo dabalai tekepo. Esiga iyo waseme bakadio hedepedi tegegalaiso, hee nee, hee Moseseyo, osoloso hee Ilaisayo." <sup>6</sup> Pitaye takalai kibiya gooleedele, diba obume.

<sup>7</sup> Esemé kolobo sibilesi, diba gidisooso. Osoloso kolobo maga toso egeesee takaso, "Hagee medee ayo gooma mo holo, esiga o to medee dui."

<sup>8</sup> Esemé Pita, Yonee, osoloso Yemes to taka duloso egegeino, Mosesee dio Ilaisa dio mena, esino hedepe Yesu dibolo badoboome egeiso.

<sup>9</sup> Osoloso diba mubi dokodooga see kumoo moulone, Yesuye dimapoo kitulugu sabolo takaso, "Epedee niyo egei goo odoó hee mapoo na takee.

Esino Odoó Holo, a tološo hogabia ogoloso, hamamee odoó hee mapoo ka takee," diso. <sup>10</sup> Esemé Yesuye to taka diayo wulo kookoodooso. Esino diayo Yesu tološo hogabia goo eyo bei disono nei woosa nei woosa demeleso.

<sup>11</sup> Osoloso diayo Yesu mapoo woosaso, "Bei kasimaga tei eligili odoó oso takolone, daga Ilaisa sibilesi, Keliso hamamee sibileigo dee ka takeliyo?"

<sup>12</sup> Esemé Yesuye to nei dimapoo egeesee takaso, "O, daga Ilaisa sibilesi eli medee moodolaiso. Godeeyo to booka mapoo hogugu moloso, 'Odoó Holo, a dala toowa talaiso, osoloso edebeeyo a gowoolaiso.' <sup>13</sup> Esiga ayo nimapoo taka, Ilaisa yo olo simiso. Osoloso edebeeyo yo dala teneeso, bei Godeeyo to booka maga taka ee dodolone."

### Yesuye giso holo bo holo pala moodoo

(Matiyu 17:14-21)

<sup>14</sup> Yesuye o hamamee dili odoó bakadio hedepedi mubi dokodoo paladee sabolo, see kumoo meilesi egeino, Yesu o hamamee dili odoó abo tei eligili odoó sabolo agadiga molome egeiso. Esemé odoó susuga sibilesi mooloogoodooso. <sup>15</sup> Diba disono mooloogoodoloso balagameleeno, Yesu dimapoo simi ogoloso, dia howoogaso. Esemé diba Yesu mapoo goomoga sabolo hogugu diadeeso.

<sup>16</sup> Esemé Yesuye dimapoo woosaso, "Niba ogošo goo maga agadiga malala?" diso.

<sup>17</sup> Osoloso mooloogoodoo ee ma kuloduga odoó heeso egeesee takaso, "Eligili odoó, mo holo bo holo pala oso ibaya paga, nayo moodolame ido simino, no hamapoo mena. <sup>18</sup> Esiga bo holo yimapoo poologa, yo miyomoo homodobuloso, kakawa molone o mei wulo tekelišo, osoloso maga maga makawo tiidiliso. Esino nee hamamee dili odoó dimapoo mo holo bo holo peegoo hasuso pigilame woosano, diayo bo holo peegoo hasuso pigile, bei diayo kitulugu tebilena."

<sup>19</sup> Esemé Yesuye dimapoo egeesee takaso, "Niba tei too mauwe odoó. A beame sage kasolo badoga niyo amapoo tei ka talaiyo? Osoloso niyo amapoo tei koo toga, a nimapoo dia gowoo. Esino giso holo amapoo ido sibe," diso.

<sup>20</sup> Esemé diayo giso holo Yesu mapoo ido simiso. Esino bo holo eyo Yesu egeme, giso holo yo bo holoso o kulodu degiga meleso miyomoo homodobiaso. Esemé maga mapoo makawo oudoo sabolo mi mapoo bidigamo siliso.

<sup>21</sup> Yesuye holopeyo oma mapoo egeesee woosaso, "Goo hagee kobolone holope yimapoo ka mimooloogoowo?"

Esemé holopeyo amameeye nei Yesu mapoo egeesee takaso, "Yo pepoko mapoo mimooloogoo.

<sup>22</sup> Beame susuga bo holoso holope wolomalame yo dou mapoo toodoo, osoloso howomoo huso demeleso. Esiga no kitulugu tebia mologa, nayo iba sooloo dele, osoloso iba pidi," diso.

<sup>23</sup> Esemé Yesúye yimapoo egeesee takaso, "Nayo taka, 'No kitulugu tebia daga iba pidi,' diso. Esino ede-beeyo amapoo tei toga, bi susuga haga kalawane."

<sup>24</sup> Osoloso holopeyo amameeye Yesu mapoo to neligi egeesee takaso, "A namapoo tei tooso, esino nayo a pidi, mo tei too pepoko see toowa dee," diso.

<sup>25</sup> Esemé odoo susuga Yesu mapoo saga mooloo-goodalame sibadee egeme, Yesúye bo holo mapoo neligi egeesee takaso, "No odoo mapoo dulu taba ibaya teneli. Esiga ayo namapoo to kitulugu sabolo ka taka, no epedee holope hageeyo kuloduga peegoo gasiboga, see holope hageeyo kulodu na gadi."

<sup>26</sup> Osoloso bo holo gwa sabolo dia degiga meleso holope miyomoo togobuloso, yo peegoo gadiso. Esemé holope mi mapoo degigilega kakawoloso meleeso. Esemé odoo aboso yo olo ta gooleeso. <sup>27</sup> Esino Yesúye holopeyo dee mapoo toloso, yo tabalame pidiso. Esemé holope yo tabaso.

<sup>28</sup> Osoloso Yesu o hamamee dili odoo sabolo dibusomo moso kulodu dopolone, diayo Yesu mapoo mada woosaso, "Bei kasimaga bo holo peegoo hasuso pigilei kitulugu imapoo mauwe ka molosomo?"

<sup>29</sup> Esemé Yesúye to nei egeesee takaso, "Niyo daga dokodoo toodagooga, bo holo egesi masi peegoo ka hasuso pigiya." diso.

#### Yesu eyo talai goo see taka

(Matiyu 17:22-23, Luka 9:44-45)

<sup>30</sup> Yesu o hamamee dili odoo sabolo mi hee egee pogoloso, see Gelili mi ee ma kuloduga diso. Osoloso Yesu yo goomogelee odoo heeso yo egeyaga, <sup>31</sup> bei, Yesu o hamamee dili odoo eligi meleeso. Yayo dimapoo egeesee takaso, "Odoo Holo, a amapoo ha teli odoo mapoo tenelame tiasalaso. Osoloso diayo a wolomalaso, esino beeame bakadio hedepedi eyo kulodu ta maga a see hogabileiso." <sup>32</sup> Esino diayo Yesúye taka to eyo bei medee kibiya gooleedelee. Esemé diba obume Yesu mapoo to eyo bei see wosele.

#### Odoo agayo wiligi doloso ka badalaiyo?

(Matiyu 18:1-5, Luka 9:46-48)

<sup>33</sup> Yesu o hamamee dili odoo sabolo Kapeniyum mi mapoo peledabaso. Osoloso diba moso diso dabalai mapoo debeiso. Osoloso Yesu o hamamee dili odoo mapoo woosaso, "Niba eli domo abaga sibulone ogoo goo boowomo simiyo?" <sup>34</sup> Esino diayo to nei wedi dile, bei, diayo dibada kulodu odoo agayo wiligi doloso badalai goo maga to boowaso.

<sup>35</sup> Yesu yo biamolone o hamamee dili odoo gili-madoloso, dimapoo egeesee takaso, "Edebeeyo malalo wiligi doloso badalai gooleega, yo eyo pepookodee, osoloso odoo susuga wulo wulayo pidi."

<sup>36</sup> Yesúye holope ido sibilesa, dibada mudugiyo tebidiso. Osoloso holope Yesúye maduloso dimapoo egeesee takaso, <sup>37</sup> "Edebeeyo mo hu maga holope hageesi pidiga, yo a pidi masi pidiso. Osoloso ede-beeyo a pidiga, yo moma a diye di pidi masi pidiso."

#### Odoo imapoo ha koo teli, diba ibada odoo

(Luka 9:49-50)

<sup>38</sup> Yoneeye Yesu mapoo egeesee takaso, "Eligili odoo, iyo odoo hee nee hu maga bo holo peegoo hasisamo silime egeiso. Esemé koodobilame iyo yimapoo takaso, bei yo ibolo hodobo mooloogoodoo hedepenee."

<sup>39</sup> Esemé Yesúye egeesee takaso, "Na hamaga takee. Odoo heeso mo hu maga goo mudu opusomodi moodooga, yayo mo hu mapoo tokenee goo saga takalaime. <sup>40</sup> Osoloso odoo imapoo ha koo teli, diba ibada odoo." <sup>41</sup> Yesúye egeesee takaso, "Ayo nimapoo tei goo hee taka, bei niba Kelisowo odooga, odoo heeso nimapoo howo keeneega, yo hamamee Godeeye nei tenelaiso."

#### Tokenee goo talame kukuli

(Matiyu 18:6-9, Luka 17:1-2)

<sup>42</sup> Esemé Yesúye o hamamee dili odoo dimapoo egeesee takaso, "Odoo heeso amapoo tei too odoo tokenee mapoo gido dilame gooleega, daga odoo aboso yimapoo sibilesa, diayo o mu mapoo yo toowa bagagoloso howo bou mapoo toosoga, odoo egee dala pepoko toloso talaiso. Esino odoo yayo amapoo tei too pepoko odoo ee tokenee mapoo gido dilesa, tokenee toga, edebeeyo tokenee mapoo gido dili odoo ee takelega poogooga, Godeeye yimapoo nei dala toowa tenelaiso. <sup>43</sup> Osoloso nee dee hodio oso no tokenee mapoo gido duga, dee hodio egee kobigi, dee hediliweso badoboso kookaiyo gie badeli talai soowa. Osoloso nee dee bakadio sabolo dou mapoo dilei tekeponee, bei dou egee koo semili. <sup>44</sup> <sup>45</sup> Osoloso nee homo hodio oso no tokenee mapoo gido duga, homo hodio egee kobigi, homo hediliweso badoboso kookaiyo gie badeli talai soowa. Osoloso nee homo bakadio sabolo dou mapoo dilei tekeponee. <sup>47</sup> Osoloso nee howo hodio oso no tokenee mapoo gido duga, nee howo hodio egee tapigi. Godeeye wiligi doloso badeli omapoo howo hediliwe gadilei soowa. Esino howo bakadio sabolo dou mapoo toodalai tekeponee. <sup>48</sup> Bei mi omapoo

'boobee egee molo koo wedili osoloso dou koo semili.'

<sup>49</sup> Esiga odoo susuga dala toga douso gawe masi gawoolaiso, bei Godeeye goomoga iba medee tekepo dabalame."

<sup>50</sup> "Solu hadali bi medee tekepo. Esino solu hadali mauwe poogooga, hadali see talaisomo? Haye, see talaimé. Esiga niba solu masi molone nemegei dimapoo mesie sabolo deebee."

#### Sobo huloso pegeli goo

(Matiyu 19:1-12, Luka 16:18)

**10** Yesu o hamamee dili odoo sabolo Kapeniyum mi pogoloso abaga dino Yudiya mi mapoo peledoboloso, see abaga dino Yoden howo daso. Osoloso

† 9:44 sabolo 9:46 sabolo Makaye hamapoo hogugule. Esino 48 maga taka to hedepe.

omapoo egeino, odoo mooloogoodoo yimapoo sibadeeme, Yesuye dimapoo Godeeyo goo eyo daga eligi egeesee eligiso.

<sup>2</sup> Osoloso Pelisi odoo aboso sibilesa Yesuye to toke-nee takabeleso, kukulo agalame yimapoo woosaso, "Esiga gisoso sobo huloso pagalai soowayo?"

<sup>3</sup> Esem Yesuye dimapoo to nei egeesee takaso, "Sobo huloso pegeli eyo goo Moseeseye nimapoo tei kasee eligiliyo?" diso.

<sup>4</sup> Esem diayo egeesee takaso, "Moseeseye imapoo tei egeesee eligiso, gisoso sobo poogooga, daga sobo pegeli peipa omapoo hoguloso sobo yo ka peegeena."

<sup>5</sup> Esino Yesuye dimapoo to nei egeesee takaso, "Moseeseye yayo nimapoo egeino nibada sooloo dia kalawa neme tei hagee ka magoo. <sup>6</sup> Godeeye mipoo toowa hagee daga moodoo mapoo, giso sabolo sobo sabolo moodooso. <sup>7</sup> Bei egeesi maga gisoso oma dio owee dio pogoloso, see osobo sabolo hedepe doloso dabalaiso. <sup>8</sup> Osoloso diba daga giso obusomo, sobo obusomo doloso badebeiso. Esino diba see olo hedepe doloso doso." <sup>9</sup> Yesuye egeesee takaso, "Godeeye giso dio sobo dio hedepedi, domo na pi," diso.

<sup>10</sup> Osoloso hamamee Yesu o hamamee dili odoo sabolo moso kulodu dopolone, sobo huloso pegeli eyo goo diayo Yesu mapoo see woosaso. <sup>11</sup> Esem Yesuye dimapoo egeesee takaso, "Edebeeyo osobo pogoloso, sobo hee huga, yo odoo heeyo sobo peedee huso. <sup>12</sup> Osoloso sobo yo omo pogoloso giso hee huga, yo odoo heeyo giso peedee huso."

### Yesu sabolo holaiso sabolo

(Matiyu 19:13-15, Luka 18:15-17)

<sup>13</sup> Beeame hedepeeso odoo aboso holaiso Yesu mapoo ido sibadeeso, o deeso sigoloso diba pidilame. Esino o hamamee dili odoo oso goo egee ogoloso hamaga takaso. <sup>14</sup> Osoloso Yesuye o hamamee dili odoo oso holaiso hamaga taka ogoloso, kamana sabolo dimapoo takaso, "Holaiso amapoo sibilei soowa. Niyo na hamaga takee, bei odoo holaiso hageesi masi oso Godeeye wiligi doloso badeli mapoo gasibileiso. <sup>15</sup> Ayo nimapoo tei goo hee taka, edebeeyo o goo holaiso masi omamo to mapoo mesimo sili, egeesi pele-ga pogoloso, Godee mapoo mesilega poogooga, yo Godeeye wiligi doloso badeli mapoo gasibilei mauwe." <sup>16</sup> Osoloso Yesuye holaiso gilimadoloso, yayo hedepe maduloso o deeso sigolone Godeeye no pidi dee takoo, hedepe maduloso o deeso sigolone Godeeye no pidi dee takoo, diso.

### Bi bei odoo

(Matiyu 19:16-30, Luka 18:18-30)

<sup>17</sup> Yesu o hamamee dili odoo sabolo mi hee mapoo dimeleeno, odoo hee hoguo sibilesa, o homo beiyopoo gauwoloso, yimapoo egeesee takaso, "Eligili odoo tekepo, ayo ogoo goo toga badoboso kookaiyo gie badeli ka talaiyo?"

<sup>18</sup> Esem Yesu yo Godeeye hudi magoo doloso gooleedalame, yayo nei egeesee takaso, "Bei

kasalame nayo a tekepo ka sisala? Hedepe Godeeno medee tekepo. <sup>19</sup> Esino nayo woosa to eyo nei, Godeeyo tei magoo no olo gooleedooso: odoo na wolome, adaba kooka sobo na peedee hui, heli na te, odoo hee mapoo gamenee na gigidi, odoo hee mapoo gamenee goo maga heli na te, osoloso nama dio noowee dio to taka mapoo mesie."

<sup>20</sup> Osoloso odoo yayo Yesu mapoo egeesee takaso, "Eligili odoo, a holope maga simi tei susuga hagee ayo tubuloso tomo simiso."

<sup>21</sup> Esem Yesu sooloo dala sabolo odoo omapoo bolone yimapoo egeesee takaso, "No goo hedepe doopoo dagadi moloso. No dileso, nee bi susuga odoo abo mapoo nei moleeso talame tadi. Osoloso bi too eyo nei molee bi mauwe odoo mapoo pi. Eseega no kei mi mapoo nei tenelaiso. Osoloso no ayo di hamamee sibe," diso.

<sup>22</sup> Osoloso bi bei odoo yo Yesuye to taka duloso, pupuda sabolo diso, bei bi bei mologa, o bi odoo abo mapoo tenelai goomoge.

<sup>23</sup> Esem bi bei odoo dime, Yesu o hamamee dili odoo mapoo bolone egeesee takaso, "Bi bei odoo oso Godeeye wiligi doloso badeli mapoo gasibilei kalawa toowa."

<sup>24</sup> Yesuye to taka duloso diba howoogaso. Esino Yesuye see dimapoo takaso, "Mo holo dio, Godeeye wiligi doloso badeli mapoo gasibilei kalawa toowa.

<sup>25</sup> Esiga dugo duseli midole ou maga be toowa, kemol oso gadilei kalawa. Esino bi bei odoo oso Godeeye wiligi doloso badeli mapoo gasibilei kalawa toowa."

<sup>26</sup> O hamamee dili odoo Yesuye to taka duloso dia howoogaso. Osoloso disono nei woosa nei woosa dolone egeesee takaso, "Odo agayo gie badeli ka talaisomo?"

<sup>27</sup> Esem Yesuye dimapoo bolone to nei takaso, "Edebeeyo eyo kitulugu maga Godeeye wiligi doloso badeli mapoo gasibileime, esino Godeeyo kitulugu sabolo bi susuga kalawane."

<sup>28</sup> Osoloso Pitaye Yesu mapoo egeesee takaso, "No ege, iba bi susuga poogooso, nayo di hamamee sibilame."

<sup>29</sup> Esino Yesuye egeesee takaso, "Ayo nimapoo goo hee toowa taka, edebeeyo ayo di hamamee sibilame, osoloso to tekepo eyo goo maga, o moso, o emei, o omoo, o omolo, o owee, o ama, o holaiso, osoloso mi poogooga, <sup>30</sup> odoo yayo o bi susuga poogoo eyo nei toowa daga dileso talaiso. Osoloso yo mi toowa hamapoo badolone, see moso, emei, omoo, omolo, owee, holaiso, osoloso mi bei malaiso. Osoloso edebeeyo yimapoo dala tenelaiso, bei yayo mo to mapoo mesiliga. Esino yo mo to tekepo eyo goo maga dala toloso, mi hoo poogoo mapoo see Godeeyo mi siboga, yo badoboso kookaiyo gie badeli talaiso. <sup>31</sup> Esiga epedee hamapoo odoo malalo egee do, see hamamee dabalaiso. Osoloso hamamee egee doso, see malalo dabalaiso."

**Yesu eyo talai see tobu taka**

(Matiyu 20:17-19, Luka 18:31-34)

<sup>32</sup> Yesu o hamamee dili odoos sabolo Yoluselem mi mapoo dulone, Yesuye malaso. Esino o hamamee dili odoos goo howoogamo dime, odoos abo hamamee sibadee dia ebigaso. Bei odoos susuga oso goolee Yoluselem mapoo goo tokenee peledabeeyaga. Osoloso Yesu o hamamee dili odoowe gilimadoloso peegoo dopolone, Yoluselem mapoo goo yimapoo peledabalai dimapoo takaso. <sup>33</sup> Yesuye dimapoo egeesee takaso, "Iba Yoluselem mapoo peledobooga, Odoos Holo, a edebeeyo tei moso wiligi tebisa sabolo, tei eligili odoos abo mapoo tenelaiso. Osoloso amapoo midileiso, osoloso a teli mapoo magalaiso, osoloso Yu odoonee mapoo tenelaiso. <sup>34</sup> Diayo a manalaiso, osoloso amapoo makawo pakalaiso, osoloso a tiso dapaalaiso, osoloso a wolomalaiso. Esino beeam bakadio hedepedi pogoloso hamamee ta maga see hogado sibileiso."

**Yemes dio Yonee dio goomoga goo Yesu mapoo ogo taka**

(Matiyu 20:20-28)

<sup>35</sup> Osoloso Sebediyo owolo Yemes dio Yonee dio Yesu mapoo sibileso egeesee takaso, "Eligili odoos, goo iyo goomoga namapoo taka," diso.

<sup>36</sup> Esem Yesuye nei takaso, "Ogoo goowo?"

<sup>37</sup> Esem diayo nei egeesee takaso, "Nama Godeeye wiligi doloso badeli mi toowa mapoo siboga, iba goomogo, odoos hee nee dee deede dokolo buo, osoloso dee dobusu dokolo buo doloso goo susuga nobolo wiligi dalame," diso.

<sup>38</sup> Esino Yesuye dimapoo nei egeesee takaso, "Niyo egee takoo goo eyo bei niba gooledele. Esiga niba dala toowa ayo talame egee molo, niba dala egeesee talai soowayo? Osoloso niba ayo talame egee molo niba egeesee talai soowado?"

<sup>39</sup> Esem diayo nei egeesee takaso, "O, iba dala egee talai goomogo."

Esem Yesuye see egeesee takaso, "Niba dala toowa ayo talame egee molo, niba dala egeesee talaiso. Osoloso ayo talame egee molo, niba egeesee talaiso.

<sup>40</sup> Esino odoos hee mo dee deede dokolo buo, mo dee dobusu dokolo buo dalai, ayo hudi magalaime, bei debi omapoo bilei Godeeye olo hudi magooso."

<sup>41</sup> Osoloso Yesu o hamamee dili odoos abo 10 diayo Yemes dio Yonee dio to taka duloso, dimapoo dia kamanaso. <sup>42</sup> Yesu o hamamee dili odoos gilimadoloso, dimapoo egeesee takaso, "Mipoo toowa hageeyo wiligi odoos tebisa diayo odoos abo dibada hemi egee do mapoo dala sabolo, hegi sabolo teniliso. <sup>43</sup> Esiga niba mipoo toowa hageeyo wiligi odoos tebisa dia goo na peede. Esino odoos agayo malalo badalai goomogoga, nibada kulodu odoos hee dia pidi. <sup>44</sup> Osoloso odoos agayo see malalo badalai dia goomogoga, no odoos susuga wulo nei mauwe wulayo dia pidi. <sup>45</sup> Esiga Odoos Holo, a mi hamapoo edebeeyo a pidilame ka

sibile, esino ayo mi odoos pidilame ka simi. Osoloso mipoo toowa hamapoo odoos bei Godee mapoo iyado sibilame a talame ka simi."

**Yesuye odoos howo bakadio si moodoo**

(Matiyu 20:29-34, Luka 18:35-43)

<sup>46</sup> Osoloso diba Yeliko mi mapoo peledoboloso, Yesu o hamamee dili odoos sabolo mi egee pogoloso dimeleeno, odoos mooloogoodoo susuga diayo di hamamee simiso. Esem odoos howo bakadio si o hu Batimeyes, Timayes eyo owolo, Yesuye sibilei eli pee mapoo badolone molee howameleeso. <sup>47</sup> Esiga Batimeyesye Yesu Nasalet odoos sibogodi dume, Yesu mapoo idagaso, "Yesu, Debidiyo amawe, nayo a sooloo dele, osoloso pidi!"

<sup>48</sup> Batimeyes Yesu mapoo idagame, odoos aboso yo hamaga takaso. Esino yo koodobilega, see dia neligidi idagaso, "Debidiyo amawe, nayo a sooloo dele, osoloso pidi!"

<sup>49</sup> Yesu Batimeyes yayo i duloso, kookoo tabaso, osoloso egeesee takaso, "Yo hapoo sibe dee takee." Esem diayo howo bakadio si odoos iso, osoloso yimapoo egeesee takaso, "Goomoge. No toboloso, di. Yesuye no i," diso. <sup>50</sup> Esem Batimeyes o gidei togobuloso, saga dokodoo pupeleso, Yesu mapoo simiso.

<sup>51</sup> Yesuye yimapoo egeesee takaso, "Ayo namapoo kasee moodoolameyo?"

Esem howo bakadio si odoos oso nei egeesee takaso, "Eligili odoos, a agalai goomogo."

<sup>52</sup> Esem Yesuye yimapoo egeesee takaso, "No wulo di. Nee tei too oso no tekepo paso." Esem howo bakadio si odoos yo epedee omapoo see medee egeiso, osoloso yo Yesubolo eli maga diso.

**Yesuye Yoluselem mi mapoo wiligi odoos masi toboloso gadi**

(Matiyu 21:1-11, Luka 19:28-40, Yonee 12:12-19)

**11** Yesu o hamamee dili odoos sabolo simi Yoluselem mi koola topome, Olipi mubi halege mapoo mosobia bakadio, Betepage osoloso Betani mapoo peledabaso. Osoloso Yesuye o hamamee dili odoos bakadio diye doloso dimapoo egeesee takaso, "Mosobia koogee mapoo dileso, omapoo ogoga be hu giekauwa, o hu donki, edebeeyo miligi mapoo buloso koo dili, mu mapoo ebigiso bagagoloso, homo mapoo bagagoo moloso. Esiga niyo ebigi pidi pogoloso, hapoo hado sibe. <sup>3</sup> Odoos heeso niba ogoos toowala dee takooga, niyo wulo egeesee takee, 'Donki be hagee epedee Lodeeye goomogogona, osoloso see hamamee odoos heeso ka hado sibileigo,' dee takeeye," diso.

<sup>4</sup> Yesu o hamamee dili odoos bakadio mosobia omapoo dileso, donki be moso peegoo ebigi bagagoloso eli palaga tobudume egeiso. <sup>5</sup> Esem diayo donki be ebigi bagagoo pidi meleeno, odoos abo omapoo debei oso dimapoo egeesee takaso, "Niyo ogoos talame donki be ebigi bagagoo egee ka pidala?" <sup>6</sup> Esem Yesu o hamamee dili odoos oso to nei Yesuye

dimapoo takee doloso taka tobuloso egeesee takaso. Eseme odoo abo oso donki be hado dilei soowa diso. <sup>7</sup> Eseme diayo donki be Yesu mapoo hado sibume, o miligi mapoo dugo pooloso, Yesu dokodoo buloso diso. <sup>8</sup> Osoloso odoo mooloogoodoo susuga Yesu mapoo goomogolone dia gidei oso eli Yesuye dilei mapoo malalo palagamo dime, odoo aboso woiyo dibada go mapoo segei kookooloso palagamo diso. <sup>9</sup> Yesu yo domo abaga sibume, odoo malalo debei sabolo osoloso Yesuwo miligiyo abaga sibadee odoo oso idegisilone, egeesee takaso, "Inolome! Iba Godee mapoo goomogo! Odoo Godeeyo hu maga kitulugu sabolo sibo yo Godeeye pidi! <sup>10</sup> Wiligi doloso badeli mi ee sibo Godeeye pidi. Hagee ibada amawe Debidiye wiligi doloso badebei mi egesi masi malaiso. Osoloso iba kei mi ma dokodoo Godee mapoo goomogo!" <sup>11</sup> Osoloso Yesu o hamamee dili odoo sabolo Yoluselem mapoo sibilesi, Yesu Godeeyo tei moso kulodu gadiso. Yo moso kulodu bi susuga mapoo egegemeleso diso, bei olo neligime, osoloso o hamamee dili odoo 12 sabolo Betani mi mapoo diadeeso.

#### Yesuye pigi homo mapoo to taka (Matiyu 21:18-19)

<sup>12</sup> Yesu Betani mapoo tialoso, gesikolo Yoluselem mapoo dimeleeno, eli domopoo yo dia hodiaso. <sup>13</sup> Esememe Yesu eli sage abaga sibulone, pigi homo du egeiso. Esememe ko pameleyaga hodu dileso, egeiso. Esino ko mauwe, hedepe duwenabu, bei pigi ko peli eyo beeamenee. <sup>14</sup> Yesuye pigi homo mapoo egeesee takaso, "No hamamee homokoko see palaime!" Yesuye egeesee taka, o hamamee dili odoo duso.

#### Yesuye Godeeyo tei moso kuloduga odoo peegoo hasusopugu (Matiyu 21:12-17, Luka 19:45-48, Yonee 2:13-22)

<sup>15</sup> Yesu o hamamee dili odoo sabolo Yoluselem mapoo peledoboloso, Yesu Godeeyo tei moso tegei kulodu gadilesi egeino, odoo bi abo nei moleeso talame si sabolo, osoloso odoo bi abo nei moleeso talaga molome egeiso. Osoloso molee mudu opusomodi piligeli debi poba sabolo molo talame poba sabolo bidige puguloso, diba susuga peegoo hasuso puguso. <sup>16</sup> Odoo susuga bi tolosi Godeeyo tei moso tegei eli pee kuloduga gadiyaga Yesuye hamaga takaso. <sup>17</sup> Yayo dimapoo eligilone egeesee takaso, "Godeeyo booka ma kulodu toso egeesee takoo, 'Mo tei moso odoo mosobia susuga maga oso Godee mapoo toodagili moso.' Esino niyo goo egesi tolone, adaba molee heli teliso. Esiga niyo mo moso hagee see heli teli moso paso." <sup>18</sup> Esememe tei moso wiligi tebisa sabolo tei eligili odoo susuga sabolo oso to hagee dume, diayo Yesu wolomalame eli esigamo silesibisi. Bei Yesu mapoo kooso, bei diayo eligi mapoo odoo susuga tei telega

peegeeyaga, osoloso odoo susuga Yesuye eligi dume howoogaso osoloso goomogaso. <sup>19</sup> Osoloso habe omapoo Yesu o hamamee dili odoo sabolo mi toowa egee pogoloso diadeeso.

#### Pigi homo oso sia goo (Matiyu 21:20-22)

<sup>20</sup> Gesikolodee mapoo diba eli domopoo diadeega meleeno, diayo pigi homo egeiso. Pigi homo o dee sabolo o kou sabolo, osoloso too susuga sio doloso molome egeiso. <sup>21</sup> Pita Yesuye daga homo mapoo to taka goolee puguloso Yesu mapoo egeesee takaso, "Eligili odoo, no ege. Nayo daga pigi homo mapoo to taka oso olo sio doloso molo," diso. <sup>22</sup> Esememe Yesuye o hamamee dili odoo dimapoo egeesee takaso, "Niba Godee mapoo tei te," diso. <sup>23</sup> "Ayo nimapoo goo hee toowa taka, edebeeyo mubi hamapoo egeesee takooga, 'No dileso, abei mapoo kulodu mei,' dee takooga, o sooloo ma kulodu googoolee bakadio delega, yayo taka goo oso tei peledabalai dee gooleega, Godeeye goo hagee tei peledabalame modolaiso. <sup>24</sup> Esiga ayo nimapoo taka, niyo toodaga goo oso ogoo bi talame ka toodagoosomo, bi egee talai doloso tei toga, bi egee niyo talaiso. <sup>25</sup> Esiga niyo howo gise goo toodagolone, odoo heeso nimapoo goo tokenee moodoo pepoko mologa, niyo odoo egeeyo goo tokenee daga malalo boobado pigi. Egeeseega nibada oma keimi ma dokodoo egee bado, Godeeye nibada goo tokenee hapoloso boobado pigi-ileiso. <sup>26</sup> Niyo odoo heeyo goo tokenee boobadelega poogooga, nibada oma keimi ma dokodoo egee bado Godeeye nibada goo tokenee hapoloso boobadalaime." †

#### Yesuye kitulugu maga woosa goo (Matiyu 21:23-27, Luka 20:1-8)

<sup>27</sup> Diba see Yoluselem mapoo sibadeeso, osoloso Yesu tei moso ma kulodu silino, tei moso wiligi tebisa odoo sabolo, tei eligili odoo sabolo, Yu odoowo wiligi tebisa odoo sabolo oso, yimapoo sibilesi woosaso, "No kitulugu kamaga tolosi goo susuga egee ka moodoomo silala? Nayo goo susuga hagee moodoolame kitulugu namapoo odoo agayo te-neeyo?" <sup>29</sup> Esememe Yesuye dimapoo nei takaso, "Ayo nimapoo wosolaiso. Osoloso niyo amapoo nei takooga, ayo goo susuga hagee moodoolame amapoo kitulugu tenee hagee odoo ee nimapoo takalaiso." <sup>30</sup> Esememe Yesuye dimapoo woosaso, "Yoneeye odoo susuga howo sawwidiga goo eyo bei kasiyo, kitulugu Godee maga simiyo, o odoo hee maga simiyo? Niyo amapoo to nei takee!" diso. <sup>31</sup> Esememe diso nediliyo to moumeleso takaso, "Iyo Godee maga simi dee takooga, yayo imapoo egeesee takalaiso, 'Bei kasimaga niyo Yonee mapoo tei telega ka poogoowo?' dee takalaiso. <sup>32</sup> Esino iyo yayo kitulugu

† 11:26 To hagee odoo abo oso taka Makaye hogugu dee takeliso, esino odoo bei oso taka Makaye hogugule dee takeliso.

egee odoo maga simi dee takooga, odoo susuga oso imapoo kamanagalaiso." Bei odoo susuga oso goolee Yonee yo tei Godeeyo to tosili odoo dee gweli.

<sup>33</sup> Esemé diayo Yesu mapoo to nei egeesee takaso, "Iba gooleedele," diso.

Esemé Yesuye dimapoo to nei takaso, "Ayo kitulugu too goo eyo bei nimapoo takalaime," diso.

### Geleipi ko segei homolee sabolo bali odoo sabolo

(Matiyu 21:33-46, Luka 20:9-19)

**12** Yesuye see dio masi takolone tei moso wiligi tebisa odoo sabolo, tei eligili odoo sabolo, Yu odoowo wiligi tebisa odoo dimapoo takaso, "Beeame hee mapoo odoo heeso geleipi ko sogoloso pee maga beeleeso. Osoloso geleipi ko i debisilame yo ou poo-gooso. Osoloso yo bi egee balame moso egi dogo yo ou poogoo mapoo tobuduga tegeiso. Osoloso yo eli sage peegoo dilame, geleipi ko segei ee balame odoo abo gilimadoloso dimapoo egeesee takaso, "Niba geleipi ko segei hagee niyo medee balaga melee. Osoloso geleipi ko peleso, ko poga, ko hodio abo niyo gooloogolone, ko hodio abo mo gooloogaloso, magoo dee melee," diso. Osoloso geleipi ko segeli odoo yo mi hee mapoo diso. <sup>2</sup> Osoloso yo omapoo dilesa bado-boome, geleipi ko oso peleso palagaloso bi moodoogaloso gooloogalai beeamé oso simiso. Esemé yayo o tou teli odoo hee diye dolone geleipi ko abo gooloogaloso tosibe diso. Esemé o tou teli odoo oso geleipi ko segei ee bali odoo dimapoo o wiligi odoo toba eyo geleipi ko abo gologaloso tosibilame diso. <sup>3</sup> Esino yo omapoo dilesa peledobome bali odoo oso yo woomele pogoloso geleipi ko telega mosoowe see wedi diye diso. <sup>4</sup> Esemé egeesee si ogoloso, geleipi ko segeli odoo yayo see o tou teli odoo hee diye diso. Esino odoo hee yibolo see geleipi ko segei bali odoo oso wiligi mapoo woloso, ebia goo teneloso diso. <sup>5</sup> Esemé geleipi ko segeli odoo yayo o tou teli odoo hee diye diso. Esino geleipi ko segei ee bali odoo oso yo wolomaso. Esemé geleipi ko segeli odoo yayo o tou teli odoo abo susuga diye diso. Esino geleipi ko segei ee bali odoo oso abo wulo wooloso poogooso, esino abo diayo piluguso.

<sup>6</sup> Esino yayo gooma owolo hedepe diye dolone egeesee gooleeso, "Geleipi ko segei ee bali odoo oso mo holowo to duloso, yimapoo mesileiso," diso.

<sup>7</sup> Esino geleipi ko segei ee bali odoo diayo geleipi ko segeli odoo eyo owoloye simi ogoloso diso nediliyo egeesee takaso, 'Holo hagosu amaye geleipi ko segei hagee oma toga yayo talaiso. Esiaga geleipi ko segei hagee see iyo talame yo wolomamo,' diso. <sup>8</sup> Esemé diayo geleipi ko segeli odoowo owolo tolosu wolomaso. Osoloso o su geleipi ko sogoloso beele peegoo tokopuguso."

<sup>9</sup> Yesuye dio masi hagee takoloso badolone egeesee takaso, "Esiga geleipi ko segeli odoo yayo see kaseelaisomo? Yayo sibilesu geleipi ko segei bali odoo piliguloso, see geleipi ko segei bali odoo abo mapoo 'gibe',

dee takalaiso. <sup>10</sup> Esiga niba Godeeyo to booka ma kulo-du hogugu to hagee see niyo hesigaso,

'Moso tegeli odoo diayo omou gowoome poogoo, omou oso epedee hamapoo moso omu domo pupodoo ka moloso. <sup>11</sup> Goo hagee Godeeyo moodoo. Esiga iba goo hagee ogoloso goomogoso."

<sup>12</sup> Esemé Yu odoo wiligi tebisa diayo Yesuye dio masi taka hagee dume egeesee gooloogaso, "Yesuye ibada goo takoo," diso. Esemé diayo Yesu talame eli esigamo silesibiso. Esino diba odoo susuga bolo obugume Yesu telega poogoo diadeeso.

### Sisa mapoo tekisi molee teneli goo

(Matiyu 22:15-22, Luka 20:20-26)

<sup>13</sup> Osoloso hamamee Yu odoowo wiligi tebisa oso Yesuye Loum gamalee mapoo goo tokenee abo takalame gooleeso. Esemé diayo Pelisi odoo abo sabolo Helodeeyo mooloogoodoo odoo abo sabolo Yesu mapoo gamenee takalame diye diso. <sup>14</sup> Diayo yimapoo sibilesu egeesee takaso, "Eligili odoo, iba gooleedooso, no tei goo takeli odoo. Osoloso no odoo bolo koo ebili, osoloso nayo odoo kolo mapoo koo egeli. Osoloso nayo Godeeyo eli odoo susuga mapoo tei eligi moloso. Esiga Loum gamalee wiligi odoo Sisa mapoo tekisi molee tenelai tekepowa o tokeneeyo?"

<sup>15</sup> Iyo tenelaisomo o tenelaimoyo?" diayo Yesu mapoo woosaso.

Esemé Yesu yo diayo gamenee takalame si gooleedoloso dimapoo egeesee takaso, "Bei kasimaga niyo a ka kukulo ogoowala? Niba molee ko hedepe a agalaiya tosibe," diso.

<sup>16</sup> Esemé diayo Yesu mapoo molee ko hedepe tosibilesu teneme, yayo dimapoo takaso, "Hagee odoo agamo mudu do osoloso agamo hu do?"

Esemé diayo yimapoo nei takaso, "Sisayo mudu sabolo hu sabolo molo," diso.

<sup>17</sup> Esemé Yesuye dimapoo takaso, "Sisayo bi Sisa mapoo tenee. Osoloso Godeeyo bi Godee mapoo tenee," diso.

Esemé diayo Yesuye taka dume dia howoogaso.

### Tolosu see hogabili eyo goo Yesu mapoo woosa

(Matiyu 22:23-33, Luka 20:27-40)

<sup>18</sup> Osoloso midoo ma kuloduga hogoogabili goo mauwe dee takeli, Sedisi odoo, diayo Yesu ma sibilesu gamenee takalame egeesee woosaso, <sup>19</sup> "Eligili odoo, Moseseeye imapoo tei eligilone egeesee eligiso, gisoso sobo huloso holo soomagelega toga, see omoloye emei ta eyo osobo bau huloso emeiyo hu maga holo sologamagalaiso. <sup>20</sup> Omolo dio 7 debeiso. Esino daga emeiye sobo huloso holo soomagelega taso. <sup>21</sup> Osoloso omoloye emei ta eyo osobo bau huso, esino holo soomagelega taso. Osoloso omolo hee domo oso bau see huloso, holo soomagelega taso.

<sup>22</sup> Egeesee seemelesu omolo dio susuga 7 holo soolooga magelega weidaso, osoloso sobo bau sabolo taso. <sup>23</sup> Bei sobo yo giso 7 oso huyaga, tolosu hogabilei beeamé omapoo, yo agamo sobo dalaisomo?"

<sup>24</sup> Yesuye dimapoo nei takaso, "Niba goo doopoo gweli odoo, bei niba Godeeyo to oso booka maga taka sabolo Godeeyo kitulugu sabolo niba gooleedele.

<sup>25</sup> Bei toloso hogabilei beeame omapoo giso sabolo sobo sabolo huleime. Esino diba keimi ma dokodoo Godeeyo momaiye masi dabalaiso. <sup>26</sup> Toloso hogabilei goo, niba Moseseeye booka mapoo hogugu niyo hesigileyo? Ebelehem, Aisek, osoloso Yekob olo taso. Esino homo douso nademe, paiya beeame omapoo Godeeye Mosese mapoo egeesee takaso, 'Epedee hamapoo a Ebelehemyo Godee, osoloso a Aisekeeyo Godee, osoloso a Yekoby Godee,' diso. Odoo hagee weidaso, esino dibada dio oso epedee hamapoo gie doso. <sup>27</sup> Esiga yo odoo weida eyo Godeenee, odoo gie hagee do eyo Godee. Esino niyo odoo toloso see gie badeli talaiame dee gooleega, niba goo doopoo gweli odooso."

### Tei magoo kaso toowa ka molosomo?

(Matiyu 22:34-40, Luka 10:25-28)

<sup>28</sup> Tei eligili odoo hee diayo toso agadigamelee omapoo sibilesa badolone dumeleeso. Osoloso Yesuye Sedisi odoo mapoo to nei tekepo taka dume, yayo Yesu mapoo egeesee woosaso, "Tei magoo kaso toowa ka molosomo?" diso.

<sup>29</sup> Esemee Yesuye nei takaso, "Tei magoo toowa hagoso, 'Isael (Yu) odoo niba dui! Ibada Lodee Godee hedepe. <sup>30</sup> Esiga nee Lodee nee Godee nee sooloo ma kulodu googoolee sabolo, nee su susuga sabolo, osoloso nee kitulugu sabolo oso dia sooloo dele.' <sup>31</sup> Osoloso tei magoo toowa hee hagoso: 'Nee su no nediliyo egee sooloo dolo egeesee masi, nemegei nayo dia sooloo dele.' Tei magoo toowa aboso, tei bakadio hagee dagadile," diso.

<sup>32</sup> Osoloso tei eligili odoo yayo see Yesu mapoo nei takaso, "Eligili odoo, nayo tei goo olo takaso. Esiga Godee hedepe badoso, Godee hee mauwe. <sup>33</sup> Esiga gala hu woloso siloso Godee mapoo teneli sabolo, bi abo teneli sabolo, tei oso taka hagee haga goo toowa-nee. Esino tei magoo bakadio hagoso goo toowa ka moloso: Nee sooloo ma kulodu googoolee sabolo, nee su susuga sabolo, osoloso nee kitulugu sabolo oso, dia sooloo dele. Osoloso nee su no nediliyo egee sooloo dolo egeesee masi nemegei nayo dia sooloo dele," diso.

<sup>34</sup> Esemee Yesu odoo yayo to nei tekepo taka dume yimapoo egeesee takaso, "No Godeeye wiligi doloso badeli mapoo gasibilei koola bado," diso. Esemee odoo aboso goo abo yimapoo woosalai obume poogooso.

### Keliso agamo owolowo?

(Matiyu 22:41-46, Luka 20:41-44)

<sup>35</sup> Hamamee Yesuye Yu odoowo tei moso tegei kulo-  
du odoo susuga mapoo eligilone yayo woosaso, "Bei kasimaga tei eligili odoo diayo Keliso Debidiyo amawe dee ka takeliyo? <sup>36</sup> Debidiye to kitulugu sabolo Dio Tei maga takaso,  
'Godeeye mo Lodee (wiligi odoo toba) mapoo takaso:

"No abolo wiligi doloso badalame mo dee deedeede dokolo bie.

Osoloso nee ha teli odoo nama hemi deebede dalaiso."

<sup>37</sup> Debidiye Keliso mapoo 'Mo Lodee' diso. Esino bei kasimaga tei eligili odoo diayo 'Keliso Debidiyo amawe dee ka takeliyo? Kelisoye Lodee osoloso Debidiyo amawe dalai tebiayo? O, Keliso yo Lodee osoloso yo Debidiyo amawe oso."

Odoo susuga goomogolone o to mapoo medee duso.

### Yesuye tei eligili odoo dia goo taka

(Matiyu 23:1-36, Luka 20:45-47)

<sup>38</sup> Yesuye odoo susuga mapoo eligilone egeesee takaso, "Niba tei eligili odoo mapoo medee ege. Diba dugo dia tekepo mekikaloso silesibiliso, osoloso bi neiso teli mi mapoo debeli odoo oso diba ogoloso homo beiyopoo gasuwuloso goomoga to takalame goomogeliso. <sup>39</sup> Diba howo gisili moso ma kulodu wili-gi odoo toba eyo debi mapoo bulumulame, osoloso wo toowa nologolone debei mi mapoo wiligi odoo toowa toba eyo debi mapoo bulumulame goomogeliso. <sup>40</sup> Esino diayo sobo bauwe ebilame kukunoloso dia moso sabolo bi sabolo dibada doloso toloso omapoo dopolone, dia goo gagaloso howo dia sage gisiliso, odoo aboso diba tekepo odoo dee gooleedalame. Esino bei egeesee maga diba dala toowa talaiso.

### Sobo bauso emegeidi bi teneli

(Luka 21:1-4)

<sup>41</sup> Yesu tei moso tegei kulodu edebeeyo molee ko bokosi mapoo sooloogamelee koola mapoo badolone odoo susuga bameleeso. Bi bei odoo molee ko toowa masi sooso. <sup>42</sup> Osoloso sobo bau bi mauwe oso sibilesa molee ko ta bakadio toosooso.

<sup>43</sup> Esemee Yesu o hamamee dili odoo gilimadoloso dimapoo egeesee takaso, "Ayo nimapoo goo hee toowa taka, odoo susuga molee ko sooso, esino sobo bau bi mauwe hagoso molee ko bakadio toosoo oso dagadiso. <sup>44</sup> Bei odoo diba bi bei, esino dia bi abo pepoko ka toosoo. Esino sobo bau yo bi mauwe yayo sibilesa, o wo talame magoo melee molee ko pepoko olo susuga toosooso.

### Yesuye Godeeyo tei moso tegei oso tokenee palai goo taka

(Matiyu 24:1-2, Luka 21:5-6)

**13** Beeame omapoo Yesu tei moso tegei pogoloso dimeleeno, o hamamee dili odoo heeso sibilesa yimapoo egeesee takaso, "Eligili odoo, ibada tei moso yoso tegei medee tekepo hagee, no ege, osoloso yo toowa medee tekepo, no ege," diso.

<sup>2</sup> Esemee Yesuye to nei yimapoo egeesee takaso, "Tei moso tekepo tegei epedee no hagee ogo, hamamee guobigileiso, eseega yo hedepeso yo hee ma topudoo malaime," diso.

<sup>3</sup> Osoloso Yesu Olipi mubi dokodoo tei moso tegei ma hodiokoo bolone badoboome, Pita, Yemes, Yonee, osoloso Endulu diayo dibusomo sibilesi yimapoo woosaso, <sup>4</sup> "Nayo imapoo takee, goo susuga hagoso kopolone ka peledobalaiyo? Osoloso goo susuga hagoso sibilei koola topooga iyo goo mudu opusomodi kasi ogoloso ka gooleedalaiyo?" diso.

<sup>5</sup> Esemé Yesuye dimapoo to nei egeesee takaso, "Niba obeeamo, odoo heeso nimapoo gamenee takeeyaga. <sup>6</sup> Odoo bei oso sibilesi 'A Kelisoso', dee takalaiso. Diayo egeesee takooga, odoo susuga peegoo gilimado dileiso. <sup>7</sup> Osoloso nee mosobia koola mapoo ha to osoloso, mosobia eli sage mapoo ha to dee taka duga, niba haga na ebige. Goo susuga peledobalaiso, esino hoo poogoo ogosonee. <sup>8</sup> Osoloso mosobia heeso mosobia hee mapoo nei ha to nei ha to dalaiso, osoloso mipoo toowa hamapoo mosobia opusomodi opusomodi mapoo mibia toowa sibileiso. Osoloso nei me pagalaiso. Esino goo susuga hagoso peledobooga, soboso holo soomagalame si dadala masi si dadalaiso, bei dala beeamé mimooloogoo oso.

<sup>9</sup> Esiga goo susuga hagoso peledobooga, niba obeeamo. Edebeeyo niba goo palabalai mapoo iyado dileso, howo gisili moso tegei ma kulodu niba wologolaiso. Osoloso amapoo tei too maga niba wiligi toowa tebisa odoo dibada mudu giyopoo gilimado peleso mo goo dimapoo takalaiso. <sup>10</sup> Mi hoo pagalai hoogoo mologa, mo tekepo hagee daga edebeeyo mi susuga mapoo takomo dileso, odoo susuga duloso tebia mapoo. <sup>11</sup> Osoloso edebeeyo niba goo palabalai mi mapoo ido duga, niyo takalai goo haga na koude. Bei niyo takalai googolee tekepo nimapoo Godeeye tenelaiso. Esino niba nibusomo to takalaime, Dio Tei oso nibulo toboloso to ka takalai.

<sup>12</sup> Omeiye omolo teli mapoo ido dilame tiasalaiso. Osoloso omaye owolo sabolo teli mapoo ido dilame tiasalaiso. Osoloso holaisoso mesilega pogoloso, oma dio owee dio teli mapoo gilimado dileiso. <sup>13</sup> Bei niyo amapoo tei too maga odoo susugaso niba hegileiso. Esino odoo agayo o tei too kalawoloso dalaso dileso hoo poogoo mapoo ka peledobooga, yo gie badeli talaiso.

<sup>14</sup> (Hesigeli odoo, no goo hageeyo bei medee gooleede.) Tei moso mapoo Godee hegili bi tokenee mudu opusomodi bi oso melega pagalai mi mapoo molo ogoga, Yudiya mi omapoo debeli odoo mubi dokodoo saga kukulo pele. (Bi tokenee hagoso Godeeyo howo woola tei moso tokenee palaiso, esiga Yu odoo oso tei moso kulodu gasibilesi Godeeyo hu dokodoo poudalame sibilame goomogalaime.) <sup>15</sup> Osoloso odoo moso hau mapoo badoga, bi talame moso kulodu na gadi. <sup>16</sup> Osoloso odoo homolee mapoo nei howo sogomo siloga, o mosopoo gidei na tadi. <sup>17</sup> Esiga sooloo dolo, sobo koowasi moodooga sabolo osoloso sobo holowee too neli sabolo beeamé omapoo kukulei beeamé tekepo agalaime. <sup>18</sup> Esiga Godee mapoo toodagee. Bei goo hagoso wau beeamé mapoo sibilei pagalame. <sup>19</sup> Bei beeamé omapoo dala goo toowa

sibileiso. Esiga mi toowa bei mimooloogoo omaga simi, dala toowa hageesi edebeeyo egele. Esiga dala hagoso dileso hoo poogoo, hamamee dala goo hageesi see agalaime. <sup>20</sup> Esiga Godeeye dala beeamé deiyepo moodolaiso. Esino yayo beeamé sage magoo diepi, odoo susuga gie badele pegeli. Esino dala ma kulodu Godeeye hesiga odoo abo gooleepugulone dala beeamé see deiyepo moodolaiso. <sup>21</sup> Beeamé omapoo edebeeyo nimapoo sibilesi, 'Ege! Keliso hagoso,' o 'Yo koo badoso,' dee takooga, niyo dimapoo tei na te. <sup>22</sup> Bei gamenee Keliso sabolo osoloso gameenee Godeeyo to tosili odoo oso sibilesi Godeeye hesiga odoo wulo gilimilame goo toowa mudu opusomodi moodolaiso." <sup>23</sup> Esiga Yesuye dimapoo egeesee takaso, "Niba obeeamo! Goo hagee sibilei molome, ayo goo susuga nimapoo takaso."

### Yesuye see sibilei goo

(Matiyu 24:29-44, Luka 21:25-33)

<sup>24</sup> "Beeamé omapoo dala goo toowa me pogoloso, hamamee, 'osoko neligidi pigileiso, osoloso a sabolo gadee pigileime. <sup>25</sup> Osoloso giwo keima dokodooga tikedibileiso, osoloso kitulugu bi toowa keima dokodoo egee molo Godeeye halabileiso.'

<sup>26</sup> Beeamé omapoo odoo susuga oso Odoo Holo, a kolobo ma kuloduga gadeepugu sabolo kitulugu sabolo siboga agalaiso. <sup>27</sup> Osoloso ayo sibilesi, mo mo-maiye susuga diye dalaiso, Godeeye hesiga odoo mi toowa mapoo egee do iyadalame.

<sup>28</sup> Esiga niba sokai (homo) maga goo goolee medee te. O du sisigaloso mouloso see pisigaga, mi kibilei koola tooboo dee goolee. <sup>29</sup> Egeesega ayo nimapoo taka goo oso peledaba ogoga, Odoo Holo, a sibilei dia koola tooboo dee goolee. <sup>30</sup> Ayo tei goo nimapoo taka, epedee beeamé hamapoo odoo hagee do wedilega dogo, goo susuga hagoso peledobalaiso. <sup>31</sup> Kei sabolo mi sabolo mauwe pagalaiso. Esino mo to kookaiyo moloso osee malaiso."

<sup>32</sup> Osoloso Yesuye egeesee takaso, "Odoo susuga goo hagoso sibilei beeamé sabolo osoko howo sabolo gooleede. Osoloso momaiye keimi ma dokodoo egee do sabolo, Godeeyo owolo abolo gooleede. Esino hedepe ma Godeeye gooleedoo. <sup>33</sup> Osoloso beeamé oso sibilei nibolo gooleede, esiga niba moodoo doloso bolone ka deebée. <sup>34</sup> Odoo Holo, ayo sibilei egesi moloso, edebeeyo mi hee mapoo dulone, o tou teli odoo mapoo moso hagee gibamelee, dee takoloso dileiso. Osoloso yo tou teli odoo mapoo moso egee gibalalai maga tou opusomodi opusomodi pileiso. Osoloso osulu gibalalai odoo mapoo yayo see wedi sibilei maga egeesee takalaiso, 'Medee be!'

<sup>35</sup> Esiga mosowo oma masi aso. Esiga niyo medee be! Bei ayo sibilei beeamé niba gooleede. Habe sibumobelee, o gesi domo sibumobelee, o kudi takooga sibumobelee, o gesikolodee sibumobelee. <sup>36</sup> Osoloso ayo saga sibilesi ogoga, niba tiesa molo agalai tekeponee. <sup>37</sup> Ayo nimapoo to taka see odoo susuga mapoo



takooso, niba moodoo doloso, bolone ka deebée," diso.

**Wiligi odoo tebisa oso Yesu wolomalame to mou goo**  
(Matiyu 26:1-5, Luka 22:1-2, Yonee 11:45-53)

**14** Osoloso Godeeye gababia goolee pugu wo nalai sabolo osoloso wo mosoowe nalai beame bakadio hoogoo meleeso. Esemé tei moso wiligi tebisa odoo sabolo osoloso tei eligili odoo sabolo diayo Yesu toloso mada wolomalame eli esiamo silesibiso. <sup>2</sup> Esino diayo diso nediliyo egeesee takaso, "Iyo wo ne hamapoo yo toloso wolomalaime, bei odoo susuga oso imapoo kamanaloso ibolo biligiyaga," diso.

**Betani mi mapoo soboso bo i sisigagili medee tekepo oso Yesuwo wiligi mapoo soo goo**  
(Matiyu 26:6-13, Yonee 12:1-8)

<sup>3</sup> Yesu Betani mi mapoo Saimon daga kolo e bia masi eyo mosopoo badolone nei nameleeso. Esemé sobo heeso bo i sisigagili medee tekepo mai masi pepoko, o hu alabasta, omapoo keedo simiso. Yo sibilesó bo i sisigagili medee tekepo keesoo, o hu nad, me gooboopuguloso, Yesuwo wiligi mapoo sooso.

<sup>4</sup> Esemé odoo abo omapoo debei oso ogoloso komonolone diso nediliyo egeesee wosogaso, "Bei kasimaga sobo yayo bo i sisigagili medee tekepo goo mauwe mapoo sologo pugulone ka mauwe paga pele?" diso. <sup>5</sup> "Yayo bo i sisigagili medee tekepo ee odoo mapoo neiso talame tenee diepi, molee toowa 300 ee toloso bi mauwe odoo mapoo teneli." Diayo dee takoloso, sobo yimapoo kamanaso.

<sup>6</sup> Esemé Yesuye dimapoo nei takaso, "Yimapoo egeesee na takee. Bei kasimaga niyo yimapoo kamanaloso ka takala? Yayo amapoo goo tekepo moodooso. <sup>7</sup> Esiga bi me odoo beame susuga nibolo dabalaiso. Esiga niyo diba gooleepuguga, diba biso pidilei tekepo. Esino beame susuga ma kulodu a nibolo badalaime, esiga niyo beame susuga omapoo a pidileime. <sup>8</sup> Esiga sobo hagoso yayo moodoolai dee goolee goo ee amapoo moodooso. Yayo mo suso hamamee midoo ma kulodu malai goo ee goolee pugulone, bo i sisigagili medee tekepo oso amapoo sooso. <sup>9</sup> Ayo nimapoo tei goo hee taka, edebeeyo mi toowa mapoo to medee tekepo takomo duga, sobo hagoso amapoo moodoo goo ee see takalaiso, osoloso diayo yo see goolee pigilame," diso.

**Yudaseeye Yesu toloso ha teli mapoo tenelame to tiasoo goo**  
(Matiyu 26:14-16, Luka 22:3-6)

<sup>10</sup> Osoloso Yesu o hamamee dili 12 ma kulodu odoo hee Yudasee Isakeliyot yayo tei moso wiligi tebisa mapoo dilesó Yesu dimapoo tiasalame diso. <sup>11</sup> Esemé diayo o goo dume, dia goomogolone yimapoo molee nei tenelame to takoloso tei magooso. Esemé Yudaseeye Yesu toloso dimapoo tenelame eli esiamo silone beame tekepo bameleeso.

**Yesuye o hamamee dili odoo sabolo Godeeye gababia wo ne goo**

(Matiyu 26:17-25, Luka 22:7-14,21-23, Yonee 13:21-30)

<sup>12</sup> Osoloso wo mosoowe nalai beame oso mi-mooloogooga, daga hoogoo Godeeye gababia omapoo Yu odoo dibada amawe piligilega poogoo ee goolee pigilame, diayo Godeeye gababia wo nali beame omapoo, diayo sipi be hu molubo gie kakauwa wologaliso. Esemé Yesuwo hamamee dili odoo oso Yesu mapoo egeesee woosaso, "Nayo iba kamapoo dilesó Godeeye gababia wo nalai moodoolai ka goomogolo?"

<sup>13</sup> Esemé Yesu o hamamee dili odoo bakadio diye dolone egeesee takaso, "Niba Yoluselem mi toowa mapoo diadee. Osoloso niba omapoo dilesó ogoga odoo howo keedoloso eli domopoo dumologa tugodalaiso, osoloso niyo yimapoo hamamee deede.

<sup>14</sup> Osoloso yo moso kulodu gaduga, moso eyo oma mapoo egeesee takee, "Eligili odoo oso egeesee taka, "Ayo mo hamamee dili odoo gilimadoloso, Godeeye gababia wo nalame debi poopa gooboogoo kasomo?" dee takee. <sup>15</sup> Osoloso yayo niba moso dokodoo ido peleso debi poopa gooboogoo toowa olo moodoo doloso melee eligileiso. Esiga ibada wo niyo omapoo moodee," diso.

<sup>16</sup> Esemé Yesu o hamamee dili odoo bakadio oso Yoluselem mi toowa mapoo diadeeso. Diba omapoo dileso egeino, goo Yesuye dimapoo taka goo susuga ee molome egeiso. Esemé diayo Godeeye gababia wo nalai omapoo moodooloso, diba see Yesuye o hamamee dili odoo abo sabolo debei mapoo wedi diso.

<sup>17</sup> Osoloso habedee mapoo Yesu o hamamee dili 12 sabolo sibilesó moso omapoo peledabaso. <sup>18</sup> Diba omapoo wo nolone dopome, Yesuye dimapoo egeesee takaso, "Ayo nimapoo tei taka, mooloogoodoo hagee ma kulodu odoo hee abolo wo hagee namolo oso a tiasalaiso."

<sup>19</sup> Esemé Yesu o hamamee dili odoo oso to hagee dume, dia gooheleme, diayo Yesu mapoo egeesee woosaso, "Ayonee, o ayowo?" diso.

<sup>20</sup> Esemé yayo dimapoo nei takaso, "12 odoo mooloogoodoo hagee ma kulodu, odoo agayo abolo wo podoloso homokoko si eyo i daga keedoloso bedi mapoo olugu doloso naga, odoo oso a tiasalaiso. <sup>21</sup> Esiga Godeeyo toso daga hoogoo booka mapoo taka Odoo Holo, a talaiso, diso. Esiga to ee dodolone a talaiso. Esino Odoo Holo, a wolomalame tiasili odoo yo dala toowa talaiso. Esiga oweeye yo soomagelega poogoo diepi, yo tekepo peliyo," diso.

**Lodee goolee pugu wo ne goo**  
(Matiyu 26:26-30, Luka 22:19-20)

<sup>22</sup> Osoloso diba wo nalaga molome, Yesuye wo toloso, Godee mapoo goomoga toodagoloso wo popeiso. Osoloso o hamamee dili odoo mapoo pulone egeesee takaso, "Ne, hagee mo suso," diso.

<sup>23</sup> Osoloso yo see geleipi ko i kapu mapoo keesoo toloso, Godee mapoo goomoga toodagoloso, dimapoo teneme, diayo susuga homokoko i neso.

<sup>24</sup> Osoloso Yesuye see egeesee takaso, "Hagee mo sawo. Godeeye olo takaso, 'A odoo bei sabolo hedepe dalaiso,' diso. Esiga goo hagoso peledabalame mo sawo peegoo sologo pigileiso. <sup>25</sup> Esiga ayo nimapoo tei goo hee taka, a epedee hamapoo geleipi ko i keesoo see nalaima. Esino hamamee Godeeye wiligi doloso badalai mi mapoo geleipi ko i keesoo dia nalaiso."

<sup>26</sup> Osoloso diba goomoga kosaiya pouloso, see Olipi mubi dokodoo paladeeso.

**Pitaye Yesu boobado pigilei maga Yesuye taka goo**  
(Matiyu 26:31-35, Luka 22:31-34, Yonee 13:36-38)

<sup>27</sup> Esemé Yesuye see dimapoo egeesee takaso, "Niyo susuga a pogoloso kukulo dileiso. Bei Godeeyo toso booka maga egeesee takooso,

'Godeeye sipi be hu bali odoo ee wolomalaiso, osoloso sipi be hu susuga oso yimaga peegoo kukulo dileiso.'"

<sup>28</sup> Osoloso Yesuye see egeesee takaso, "A ta maga see hogabuloso, malalo dileso, Gelili mi toowa mapoo niba tugodalaiso."

<sup>29</sup> Esemé Pitaye Yesuye to taka duloso Yesu mapoo egeesee takaso, "Haye! Odoo aboso no pogoloso diadeega, ayo no pogoloso dileime."

<sup>30</sup> Esino Yesuye yimapoo see egeesee takaso, "Ayo namapoo tei taka, gesi hamapoo kolokoloso taka bakadio delega, malalo hoogoo mologa, nayo bakadio hedepedi omapoo 'A yo gooleedele', dee takalaiso."

<sup>31</sup> Esino Pitaye Yesuwo to su mapoo to kitulugu sabolo nei egeesee takaso, "Ayo egeeseelaima! Edebeeyo no wolomaga, a nobolo talaiso." Esemé Yesuwo hamamee dili odoo susuga to hedepe egeesee takaso.

**Yesuye Getesemeni homolee mapoo Godee mapoo toodagemelee goo**

(Matiyu 26:36-46, Luka 22:39-46)

<sup>32</sup> Osoloso Yesu o hamamee dili odoo sabolo Getesemeni olipi homo segei homolee omapoo sibadeeso. Osoloso Yesuye o hamamee dili odoo dimapoo egeesee takaso, "A dileso Godee mapoo toodagalaiya, niba hamapoo deebée," diso. <sup>33</sup> Osoloso yayo dulone Pita, Yemes osoloso Yonee gilimadoloso diso. Yesu yo omapoo dileso badoboome, goohele goo sabolo su ma kulodu hegi goo oso yimapoo simiso. <sup>34</sup> Esemé Yesuye dimapoo egeesee takaso, "Mo su ma kulodu goohele goo oso sibilone, a teyaga. Esiga niba hamapoo dopolone toodagolone deebée," diso.

<sup>35</sup> Osoloso yo dimaga pepoko hoogoo dileso, ebiso miyomoo tugusaloso balaboo tialoso molone Godee mapoo toodagaso, yimapoo dala toowa egee sibo Godeeye yimaga peegoo tokopigilame. <sup>36</sup> Yayo toodagolone egeesee takaso, "Ma, mo ma! Goo susuga namapoo kalawanee. Esiga dala toowa oso amapoo hagee sibo, nayo peegoo magalai soowayo?"

Esino nayo goomoga goo moodee, ayo goomoga goonee," diso.

<sup>37</sup> Osoloso Yesu dokodoo toodagoloso wedi dileso egeino, o hamamee dili odoo bakadio hedepedi tiesa molome egeiso. Esemé yayo Pita tidipuguloso yimapoo egeesee takaso, "Saimon, no tiayo? No beame deiyepo hamapoo abolo bolone badalai tebiledo? <sup>38</sup> Esiga niba bolone Godee mapoo toodagolone deebée, niba kukuli goo mapoo homodobiaga. Bei nibada googooloo oso goo tekepo talame goomogoso, esino nibada su oso goo tokenee talame goomogoso," diso.

<sup>39</sup> Osoloso yo see wedi dileso, Godee mapoo toodagolone goo hedepe onosee toodagaso. <sup>40</sup> Osoloso yo see dimapoo wedi sibilesa egeino, diba tiesa molome egeiso, bei diba tila paga oso howo seme. Osoloso diayo Yesu mapoo to nei takalai gooleedele poo-gooso.

<sup>41</sup> Yesu yo see bakadio hedepedi mapoo toodagoloso, o hamamee dili odoo mapoo wedi sibilesa, diba tidipuguloso egeesee takaso, "Niba hosolone wulo tiesa malala? Tia olo oso! Odoo Holo, a tokenee odoo mapoo toloso tenelai beame olo epedee hamapoo sibo. <sup>42</sup> Ege, a tiasili odoo sibo. Teebée, iba diba tugodalame dimo!" diso.

**Edebeeyo Yesu too goo**

(Matiyu 26:47-56, Luka 22:47-53, Yonee 18:3-12)

<sup>43</sup> Yesu yo to takomolome, o hamamee dili odoo hedepe, Yudasee, omapoo peledabaso. Odoo bei Yudaseebolo sibilone Yesu talame wei sabolo kaiya sabolo toloso tosibadeeso. Odoo sibadee hagee, tei moso wiligi odoo tebisa sabolo, tei eligili odoo tebisa sabolo, Yu wiligi odoo tebisa oso, diba diye diso.

<sup>44</sup> Yudasee yo sibilame badolone, Yesu talai odoo mapoo egeesee takaso, "Ayo dileso odoo toloso adaga, odoo oso. Esiga niyo dileso yo toloso medee bolone ido di," diso. <sup>45</sup> Osoloso Yudasee yo odoo mooloogoodoo pogoloso dileso, Yesuye tebidi mapoo hoogoo dileso, yayo egeesee takaso, "Eligili odoo!" dee takoloso, Yesu adaso. <sup>46</sup> Esemé odoo abo oso sibilesa Yesu tooso. <sup>47</sup> Esino Yesu o hamamee dili odoo hee koola omapoo tebidi oso o kaiya tadoloso, tei moso wiligi toba eyo tou teli odoo kaiyaso woomeleso eyo doopoo poogoome, dulu asooso.

<sup>48</sup> Esemé odoo Yesu talame sibadee dimapoo Yesuye egeesee woosaso, "Niyo goolee a heli teli odoo oso badoboome a talame kaiya sabolo wei sabolo toloso ka sibadeeyo? <sup>49</sup> Osoloso ayo beame susuga tei moso tegei ma kulodu eligimili niyo egeiso. Esino bei kasimaga niyo a omapoo telega ka poogoowo? Esino Godeeyo to booka oso taka ee dodolone, niyo epedee sibilesa a ka toso," diso. <sup>50</sup> Esemé Yesu o hamamee dili odoo susuga oso yo pogoloso kukulo diadeeso.

<sup>51</sup> Osoloso odoo gie kauwa dugo booloso, Yesu diayo toloso dime hamamee deedeé diso. Esemé diayo yo ogoloso, yibolo talame o dugo mapoo temeleso, o

dugo puo puguso. <sup>52</sup> Esino o dugo dimapoo yane pogoloso, yo bododiwe piaso.

### Yesu wiligi odoo tebisa mapoo goo palabalame ido di goo

(Matiyu 26:57-68, Luka 22:54-55,63-71, Yonee 18:13-14,19-24)

<sup>53</sup> Osoloso diayo Yesu idoloso tei moso tegei wiligi toba eyo mosopoo, tei moso wiligi odoo tebisa sabolo, Yu odoo wiligi tebisa sabolo, tei eligili wiligi tebisa sabolo oso mooloogoodoloso debei omapoo ido diso. <sup>54</sup> Esem Pitaye hamameedee Yesu deede dilesi, tei moso wiligi eyo moso belee ma kulodu badebeiso. Yo omapoo badolone tei moso gibali odoo sabolo kekeiseme dou hameleeso.

<sup>55</sup> Esem tei moso wiligi tebisa sabolo osoloso Yu wiligi tebisa sabolo oso Yesu wolomalame goo tokenee esiaso. Osoloso odoo susuga oso Yesuwo hu maga gamenee takolone goo mudu opusomo opusomodi takaso. Esino diayo to mudu opusomo opusomodi taka ma kulodu, tei goo egele.

<sup>57</sup> Esino odoo aboso tebisaloso, Yesuwo hu maga gamenee egeesee takaso, <sup>58</sup> "Iba odoo hagoso egeesee takeme duso, 'Edebeeyo tei moso tegei hagee ayo guopuguloso, see beame bakadio hedepedi ma kulodu tei moso dia takalaiso. Esino edebeeyo takalaime,' yayo dee takeme duso," diso. <sup>59</sup> Esino diayo to mudu opusomo opusomodi taka ma kulodu tei goo egele.

<sup>60</sup> Esem tei moso wiligi odoo toba oso odoo susuga mooloogoodoo ma kuloduga taba molone Yesu mapoo egeesee woosaso, "Edebeeyo nee hu maga goo mudu opusomo opusomodi egee takoo maga nayo to nei dimapoo takalaisomo?" <sup>61</sup> Esino Yesuye to nei takele poogooso.

Esem tei moso wiligi odoo toba oso to see Yesu mapoo egeesee woosaso, "No Godeeyo owolo, Keliso somo?" diso.

<sup>62</sup> Esem Yesuye to nei egeesee takaso, "O, aso. Esiga hamamee Odo Holo, a ma Godee kitulugu eyo dee deede dokolo buloso yibolo wiligi doloso badoga niyo agalaiso, osoloso keimi ma dokodooga, kolobo ma kuloduga see wedi siboga niyo agalaiso," diso.

<sup>63</sup> Esem tei moso wiligi odoo toba oso to hagee dume, dia komolone o dugo tologo puguloso egeesee takaso, "Bei kasimaga iyo yimapoo goo abo ka esileiyo? <sup>64</sup> Bei yayo 'a Godeeyo owolo oso' dee taka maga, yayo Godee mapoo mesilega osoloso ebilega to tokenee taka, niyo olo duso. Esiga niyo goolee yimapoo ogoo goo moodoolaiyo?" diso.

Esem Yu wiligi tebisa susuga oso egeesee takaso, "Yesu dia tokenee odoo, esiga yo wolomalai tekepo," diso. <sup>65</sup> Esem odoo aboso Yesu mapoo makawo pagaso. Osoloso diayo Yesuwo howo mapoo dugoso tialoogooso, dibada dee tiadoo oso mudu mapoo woolone egeesee takaso, "Nayo takeliso no Godeeso, osoloso goo susuga gooleedooso, diso. Esiga no odoo agayo woolo? Imapoo takee," diso. Osoloso tei moso gibali odoo oso yo ido dulone woomodiso.

### Pitaye Yesu yo gooleedele, dee taka

(Matiyu 26:69-75, Luka 22:56-62, Yonee 18:15-18,25-27)

<sup>66</sup> Osoloso Pita yo tei moso wiligi toba eyo moso belee ma kulodu kekeiseme dou holone badebeiso. Esem tei moso wiligi toba eyo tou teli sobo hedepe oso yayo badebei omapoo sibilesi yimapoo medee bameleso, egeesee takaso,

"No Naselet odoo, Yesubolo silime egei odoo hee noso," diso.

<sup>68</sup> Esem Pitaye sobo yimapoo gamenee egeesee takaso, "Nayo odoo egee takoo eyo goo, a gooleedele," diso. Osoloso Pita yayo egeesee takoloso, moso belee osulu gasibili pee mapoo diso. Esem kolokolo takaso.

<sup>69</sup> Osoloso tei moso wiligi toba eyo tou teli sobo yayo Pita see omapoo tebidi egeme, yayo odoo abo yibolo tebidi omapoo egeesee takaso, "Odo hagee tei Yesubolo sili hee yoso," diso. <sup>70</sup> Esem Pitaye see takaso, "Haye! Asonee," diso.

Esem diba pepoko dooso hamamee, odoo abo koola hamapoo tebidi oso Pita mapoo see egeesee takaso, "Bei no Gelili odoo osoloso Yesu sabolo Gellili odoo, esiga no Yesubolo sili odoo hee noso," diso.

<sup>71</sup> Esem Pitaye to kitulugu sabolo egeesee takaso, "Ayo tei goo takelega poogooga, Godeeye amapoo dala toowa tenelai goomogo! Niyo odoo egee takoo a gooleedele!" diso.

<sup>72</sup> Osoloso Pita yo egeesee takoloso epedee omapoo, kolokoloso taka bakadio diso. Esem Pita Yesuye yimapoo to taka hagee goolee puguso, "No kolokoloso taka bakadio delega, malalo hoogoo mologa, nayo bakadio hedepedi omapoo 'A yo gooleedele' dee takalaiso." Esem Pitaye to hagee goolee pugume, gohele toowa sibume, dia pisaso.

### Yesu Paillet mapoo ido di goo

(Matiyu 27:1-2,11-14, Luka 23:1-5, Yonee 18:28-38)

**15** Osoloso gesikolodee mapoo tei moso wiligi odoo tebisa sabolo, osoloso tei eligili odoo sabolo, osoloso Yu wiligi tebisa sabolo, osoloso wiligi odoo tebisa abo susuga oso goo hee moodoolai to mouso. Osoloso diayo to mouloso, Yesuwo dee mapoo tiso tialogoloso, Loum gamalee mi toowa wiligi odoo toba, Paillet mapoo ido dilesi teneeso.

<sup>2</sup> Esem Paillet yayo Yesu mapoo egeesee woosaso, "Yu odoowo wiligi toba nosomo?"

Esem Yesuye nei egeesee takaso, "O, no egee takooso," diso.

<sup>3</sup> Esem tei moso wiligi odoo tebisa oso Yesu tokenee goo bei tooso doloso, dia gigidiso. <sup>4</sup> Esem Pailletee see Yesu mapoo egeesee woosaso, "No odoo susuga oso nee goo maga mudu opusomo opusomodi egee takoo omapoo nayo to nei takalaimeyo?" diso.

<sup>5</sup> Esino Yesuye to nei takele. Esem Paillet yayo goo hagee ogoloso hoowaso.

**Pailteeye Yesu wolomalame woosa goo**

(Matiyu 27:15-26, Luka 23:13-25, Yonee 18:39—19:16)

<sup>6</sup> Osoloso dugo susuga ma kulodu, Godeeye gababia wo ne beeamo omapoo, odoos susuga goomogalame, Pailteeye odoos hee neliga moso ma kulodu badeli, odoos yo tolosos peegoo di, dee takeliso. Esino yo daga odoos susuga oso goomoga odoos hu hesiaga, odoos ee tolosos neliga moso tegei maga peegoo di, dee takeliso. <sup>7</sup> Beeamo omapoo odoos hu Balabas yayo daga o odoos sabolo Loum gamalee odoos sabolo biligameleso, diayo odoos hee wolomaso. Esiga yo neliga moso tegei ma kulodu badebeiso. <sup>8</sup> Osoloso odoos mooloogoodoo oso sibilesos, Paillet mapoo egeesee takaso, "Nayo neliga moso ma kulodu badeli odoos hee peegoo di, dee takeliso. Esiga nayo dugo hamapoo odoos hee neliga moso maga peegoo di, dee takee," diso.

<sup>9</sup> Esino tei moso wiligi odoos tebisa oso Yesu mapoo koolone yo tolosos Paillet mapoo sibilesos tenee yayo ogolosos, gooleedoos. Esemes Paillet yayo odoos susuga mapoo woosaso, "Ayo Yu odoos wiligi toba ee peegoo di, dee takalaiyo?" diso. <sup>11</sup> Esino tei moso wiligi odoos tebisa diayo odoos susuga mapoo to pupulone, Paillet mapoo egeesee takee diso, "Iba Yesu gowoo, esino Balabas neliga moso maga peegoo di, dee takee," diso.

<sup>12</sup> Esemes Paillet yayo dimapoo woosaso, "Ayo Balabas neliga maga peegoo di, dee takooga, niyo odoos hee hagee, Yu odoos wiligi toba, dee takeliso. Esiga ayo yimapoo ogoo goo moodolaiyo?" diso.

<sup>13</sup> Esemes diayo agadilone Paillet mapoo takaso, "Yo homo bulubos magoo mapoo yogusos enige!" diso.

<sup>14</sup> Esemes Pailteeye woosaso, "Bei kasimagayo? Yayo ogoo tokenee toowo?" diso.

Esino odoos susuga oso dia agadilone egeesee takaso, "Yo homo bulubos magoo mapoo yogusos enige!" diso.

<sup>15</sup> Esemes odoos susuga goomogalame, Paillet yayo Balabas yo neliga moso maga peegoo di, diso. Esemes Loum ha teli odoos oso Yesu tisos wolosos homo bulubos magoo mapoo yogusos enigilames dimapoo teneeso.

**Ha teli odoos oso Yesu mane goo**

(Matiyu 27:27-31, Yonee 19:2-3)

<sup>16</sup> Osoloso ha teli odoos diayo Yesu tolosos Pailteeyos moso toowa medees tekepo ma kulodu ido diso. Osolosos omapoo ha teli odoos susuga gilimadolosos mooloogoodoos. <sup>17</sup> Osolosos diayo Yesu manolones gamenees yo wiligi odoos toba masi palames, yimapoo dugo sage biges masi medilosos, we ti sidolosos o wiligi mapoo mediso. <sup>18</sup> Osolosos diayo Yesu mapoo manolones egeesee takaso, "Yu odoos wiligi toba mapoo gawulosos goomoge," diso. <sup>19</sup> Osolosos Yesuwos wiligi mapoo diayo weisos see woos see woos dolones, yimapoo makawos pagas demeleeso. Osolosos diayo Yesu mapoo manolones o mudu giyopoo dibada ebisos miyomoo tugusalosos wiligi gawulosos gamenees yimapoo tei to demeleeso. <sup>20</sup> Osolosos diayo Yesu

mapoo mane koodobulosos, diayo Yesu mapoo dugos biges masi medis peegoo tamagolosos, see o dugos kadisos. Osolosos diayo Yesu homos bulubos magoo mapoo dokodoo yogusos enigilames peegoo ido diso.

**Yesu homo bulubos magoo mapoo yogusos eniga goo**

(Matiyu 27:32-44, Luka 23:26-43, Yonee 19:17-27)

<sup>21</sup> Osolosos ha teli odoos oso Yesu idolosos diadagas meleenos, diayo Saimon eli domopoo Yoluselem mapoo sibumolomes tugodoos. Esemes diayo yo idolosos Yesuwos homo bulubos magoo imados di, diso, bei Yesu kitulugos mauwes nemes. (Saimon hagees Alesanda dios Lupus dios dibada oma. Yo Sailini mi mapoo badeli odoos.) <sup>22</sup> Osolosos diayo Yesu tolosos Gologotas mi mapoo ido simisos. (Mi hu eyos bei wiligi kis mubis.) <sup>23</sup> Osolosos mi omapoo ido dilesos, odoos hee oso Yesu mapoo sibilesos geleipi kos i sabolos dala mauwes pegelis melesenees sabolos wulugulosos dala mauwes pagalames Yesu mapoo tenelames sisos. Esino Yesuyes howos egees nele poogoosos.

<sup>24</sup> Esemes gesikolos osokos howos bakadios hedepedis pogolosos osokos pounomes, diayo Yesu homos bulubos magoo ma dokodoo yogusos enigalosos tulugusos. Osolosos diayo Yesuwos dugos disos dimapoo topulosos pulosos ma ee kasolos tomobelees dolosos dasigelis pepokos dasigisos. <sup>26</sup> Osolosos odoos heesos Yesu wolomas gos eyos bei odoos susuga oso agalames Yesuwos wiligi ma dokodoo homos boodos pepokos mapoo egeesee hogugulosos opoogoosos, YU ODOOWO WILIGI TOBA. <sup>27</sup> Osolosos heli teli odoos bakadios sabolos homos bulubos magoo ma dokodoo yogusos enigasos. Odoos hee Yesuwos dees deedes dokolos homos bulubos magoo mapoo yogusos enigalosos tulugus, odoos hee dees dopusos dokolos homos bulubos magoo mapoo yogusos enigalosos tulugus disos. <sup>28</sup> Esiga Godeeyos to bookas mapoo egeesee takoosos,

"Yo heli teli odoos masi talaisos." Esiga Yesuyes heli teli odoos masi talames homos bulubos magoo mapoo dokodoo molones, to hagees tei disos. <sup>29</sup> Osolosos odoos abos eli magas dulones, Yesu ogolosos manolones dibada wiligi wapisilones yimapoo egeesee takaso, "Nayo egeesee takaso, 'Ayo tei mosos guos pugulosos, see beeames bakadios hedepedis ma kulodu dia takalaisos.' disos. <sup>30</sup> Esiga nos telegas pagalames homos bulubos magoo ma dokodooga miyomoo meis!" disos.

<sup>31</sup> Osolosos tei mosos wiligi odoos tebisa sabolos tei eligilios odoos sabolos diayo Yesubolos hemeeseelones disos dimapoo egeesee takaso, "Yayo odoos abos telegas pagalames pidimos silisos, esino epedees hamapoo yo telagas pagalames eyos nediliyos pidileis tebledoo!" <sup>32</sup> Kelisos, Isalaels odoos wiligi toba, yo homos bulubos magoo ma dokodooga miyomoo mougas, iyo ogolosos yimapoo tei ka talais," disos. Esemes heli teli odoos bakadios oso, homos bulubos magoo ma dokodoo diayo yogusos enigalosos molones, Yesu mapoo manesos.

† 15:28 To hagees odoos abos oso taka Makayes hogugus dees takelisos, esino odoos bei oso taka Makayes hogugules dees takelisos.

**Yesuye ta goo**

(Matiyu 27:45-56, Luka 23:44-49, Yonee 19:28-30)

<sup>33</sup> Osoloso osoko olo oo domopoo topoome, neliga oso mi toowa toloso melee, osoko howo bakadio hedepedi poogooso. <sup>34</sup> Osoloso neliga olo mauwe pogoloso hamamee epedee omapoo, Yesuye o to oso neligidi idagolone egeesee takaso, "Eloi, Eloi, lama sabakatani?" To eyo bei egeesee moloso, "Mo Godee, mo Godee, bei kasimaga nayo a ka poogoowo?" diso.

<sup>35</sup> Esemee odoo koola omapoo tebisamelee oso Yesuye to taka hagee dume, diayo egeesee takaso, "Dui! Yo Ilaisa ee i," diso.

<sup>36</sup> Esemee odoo heeso hoguo dilesos, homo sage toloso su mapoo dugo seme masi tialogoloso, geleipi ko i mei nali keesoo mapoo olugu doloso, Yesuye nalame o maga mapoo heligiso. Osoloso yayo egeesee takaso, "Yo epedee peegee. Ilaisaye sibilesos yo toloso miyomoo sibabelesos bamos," diso.

<sup>37</sup> Esemee epedee omapoo Yesuye neligi ilosos taso.

<sup>38</sup> Esemee Yesuye ta beeamee omapoo, tei moso tegei ma kulodu dugo kodia oso kisimelee, Godeeye dokodooga tologo pugumos abaga mouno miyomoo sa pugusos. <sup>39</sup> Esemee ha teli wiligi odoo toba yo Yesuwos homo bulubos magooma koola omapoo topudulone, Yesuye tolone goos moodos ogolosos, yayo egeesee takasos, "Tei takos, odoo hagee tei Godeeyos owolodoo," diso.

<sup>40</sup> Esemee sobos abos Yesubolos Gelilis abaga Yoluselem mapos sibadee osos, eli sage abaga Yesu homos bulubos magos ma dokodoo molome balaga meleesos. Sobos mooloogoodos egees ma kulodu debei, dibada hu Meli Magadalinbolos, osolosos Meli hee (Yemes pepokos dios Yoses dios dibada owee) sabolos, osolosos Salomebolos, diayos Yesu mapos bameleesos. Sobos bakadio hedepedi hagosos dagos Yesubolos Gelilis mapos silones, Yesu pidimos silisos.

**Yesu midoo ma kulodu toosoo goo**

(Matiyu 27:57-61, Luka 23:50-56, Yonee 19:38-42)

<sup>42</sup> Yu odoowos tei beeamee malalos hoogos molomes, diayos tei dolosos dabalame bis mopododoo beeamee habes omapos, Yosep Alimatiyas odos yayos Paileteeyes badebeis omapos disos. Yo Yu odoowos wiligis topolosos badolones, Godeeyes wiligis dolosos badelis osos sibileis omapos bamelis, yayos ebilegas Yesuwos su talame Pailet mapos woosasos. <sup>44</sup> Esemee Yosepyes Yesu taso dees takemes, Pailet dias hoowasos. Bei Paileteeyes goolees Yesu teles gooleesos, esinos Yesu olos sagas taso. Esemee yayos o ha teli wiligis odos tobas Yesuyes ta egeis mapos egeesee woosasos, "Yesu taso dees takemenees teiyos?" disos. <sup>45</sup> Esemee o ha teli wiligis odos toba yayos Yesu tei taso dees takemes, Paileteeyes Yosep mapos egeesee takasos, "Yesuwos su todis," disos. <sup>46</sup> Esemee Yosepyes dugos sage medees tekepotes moleesos tolosos, Yesuwos su homos bulubos magos ma dokodooga miyomoo tomeileesos, dugosos tiadoosos. Osolosos yayos Yesuwos su tolosos wulos ou sages yosos moodos ma kulodus magosos. Osolosos

yayos odos abos sabolos yos toowas bidigamos sibilesos, wulos ou miyopos kisisos. <sup>47</sup> Osolosos Meli Magadalin dios Yosesyos owees Meli dios Yesuwos su magos mi diayos egeisos.

**Yesuye toloso hogabia goo**

(Matiyu 28:1-8, Luka 24:1-12, Yonee 20:1-10)

**16** Osolosos Yu odoowos tei beeamee olo dagos dilesos, hamamees Meli Magadalin, Yemesyos owees Meli, osolosos Salomes, diayos melesenees medees tekepotes sisi-gagilis Yesuwos su mapos hedilame moleesos misigasos. <sup>2</sup> Osolosos sadees toowas beeamee gesikolodees osokos gies pounumes, dibas Yesuwos midos agalames diadeesos. <sup>3</sup> Dibas elis domopos diadolones, disos dimapos egeesee takasos, "Yos toowas wulos ou miyopos kisis, odos agayos bidigis pigileisomos?" disos.

<sup>4</sup> Esinos dibas dilesos egeinos, yos toowas wulos ou miyopos kisis peegos bidigis pugulosos molomes egeisos. Yos toowas hagees dias toowas. <sup>5</sup> Esemee sobos diayos wulos ou mas kulodus galagas dilesos egeinos, odos gies kauwas dugos sage heliyes moulosos dees deedees dokolos badoboomes egeisos. Esemee sobos diayos ogolosos, dibas dias ebigasos.

<sup>6</sup> Esinos yayos dimapos egeesee takasos, "Nibas na ebis. A gooleedooos, nibas Yesu Nasalet odos homos bulubos magos ma dokodoo yogusos enigas odos ee esias molos. Esinos yos hamapos mauwes. Yos ta maga hogabiasos. Yos magos mi mapos nisos eges. <sup>7</sup> Esigas niyos dilesos, Yesu o hamamees dili Pita dimapos takees, 'Nibas Gelilis mapos diadees. Bei Yesu yos daga malalos Gelilis mapos duso. Esigas nibas dilesos Gelilis mapos Yesu agalaisos. Bei Yesu yayos to hagees dagos nimapos takasos,'" disos.

<sup>8</sup> Esemee diayos goos tiadotes sabolos obulones kikilikilones wulos ou magas hoguos diadeesos. Esinos diayos elis domopagas diadolones, odos hees mapos to takeles pogoosos, bei dibas obumes.

**Yesuye dagos odos abos mapos dilesos peledabas**

(Matiyu 28:9-10, Yonee 20:11-18)

[ <sup>9</sup> Yesuyes sadees toowas gesikolodees mapos ta magas hogabulosos, yos dagas Meli Magadalin mapos dilesos peledabasos. Meli hagees Yesuyes dagas telegas silones bo holos <sup>7</sup> o kulodus dobomes yayos peegos hasisos pugus sobos yosos. <sup>10</sup> Esemee Meli yayos Yesu ta magas hogabulosos silis ogolosos Yesuwos hamamees dili odos diayos goohelies sabolos pupusugulones debeis mapos dilesos egeesee takasos, "Yesu ta magas hogabulosos silimes, ayos egeisos," disos. Esinos diayos to hagees dumes, o to mapos tei teles pogoosos.

<sup>12</sup> Osolosos see hamamees Yesubolos siles sibilis odos bakadio Yoluselem abaga sibadagas molomes, Yesu yos mudos opusomos dolosos dimapos peledabasos. <sup>13</sup> Esemee diayos Yesu ogolosos, dibas sees wedis dilesos, Yesuwos hamamees dili odos dimapos diayos Yesu egeis takemes, diayos dibadas to mapos tei teles pogoosos.

### Yesuye o hamamee dili odoos 11 dimapoo dileso peledaba

(Matiyu 28:16-20, Luka 24:36-49, Yonee 20:19-23, Diye Di Odoos 1:6-8)

<sup>14</sup> Osoloso hamamee, Yesuwo hamamee dili odoos 11 wo nalaga molome Yesu omapoo dileso peledabaso. Osoloso Yesuye to kitulugu sabolo egeesee takaso, "Niba tei too mauwe odoos! Bei kasimaga odoos abo oso a ogoloso, sibilesa nimapoo takeme, dimapoo tei tel-ega ka poogoowo?" diso.

<sup>15</sup> Esemee Yesuye dimapoo egeesee takaso, "Niba mi toowa mapoo dileso, to tekepo odoos susuga mapoo takomo di. <sup>16</sup> Esiga odoos agayo to tekepo mapoo tei tolosa howo sauwuga, yo badoboso, kookaiyo gie badeli talaiso. Esino odoos agayo to tekepo mapoo tei telega poogooga, yo goo palabalai beame omapoo dou koo semili mapoo toodalaiso. <sup>17</sup> Osoloso ede-

beeyo to tekepo mapoo tei toga, diayo mo kitulugu sabolo goo mudu opusomo opusomodi moodoogamo sile sibileiso. Esiga odoos bo holo oso paladee mo hu maga peegoo hasisileiso. Osoloso diayo to mudu opusomo opusomodi kalagalaiso. <sup>18</sup> Osoloso dibada deeso sa talaiso, osoloso pei i nalagaga, diba wedileime. Osoloso odoos paigiga mapoo dibada deeso sigodaga, susuga weido dalaiso," diso.

<sup>19</sup> Osoloso Lodee Yesuye dimapoo to taka koodobuloso, Godeeyo kitulugu oso yo keimi mapoo ido peleso, Godeebolo wiligi doloso badalame, Godeeyo dee deede dokolo peleso, biaso. <sup>20</sup> Esemee Yesu o hamamee dili odoos oso Yesuwo to ee mesilone, mi toowa mapoo to tekepo takomo diadeeso. Esemee diayo goo mudu opusomo opusomodi moodoogaso, bei Lodeeye dimapoo kitulugu teneme. Bei edebeeyo to tekepo mapoo tei doloso ogoloso gooleedalame.]

# Luka

## Luka booka goo eyo bei

Odoo Luka hagee Yu dele poogoo odoo osoloso Yesuwo hamamee dili odoonee. Esino yo melesenee neli odoo badolone o odoo Poloye Godeeyo to takomo sileeme yibolosee silee. Lukaye goo toowa booka hamapoo hogugu ee egeesee moloso. Goo ee, Yesu Kelisoye hedebe Yu odoono pidilame ka sibile. Esino yayo Yu odoo sabolo osoloso mipoo toowa hamapoo debeli odoo susuga sabolo pidilame ka simi. Osoloso dala ma kulodu egee do sabolo osoloso goohela ma kulodu egee do sabolo pidilame ka simi. Osoloso Yesuye odoo susuga mapoo eligimo silee goo ee o booka hamapoo hoguguso.

**1** Godeeye ima kulodu tou temelee odoo aboso bei mooloogoo maga goo egee ogoloso diba see Godeeyo tou talame, odoo ma kulodu goo egee takomo silesibilame bei mooloogooso. Diayo egee takomo silesibo goo ee iba olo duso. Esemee goo tei duluga odoo sabolo osoloso goo tei egei odoo sabolo oso taka duloso, diayo goo ee hoguguso. <sup>3</sup> Esino goo susuga bei mooloogoo maga ayo medee gooleedooga, ayo to hagee see medee ka hoguga. Esiga Tiypoles wiligi odoo hu toowa too, nayo du goo ee medee tei goodoo dalame, ayo namapoo to hogugu hagee ka teneeso.

### Yonee odoo howo sawwidili soomagalai goo ee yebugu

<sup>5</sup> Helodeeye Yudiya mi mapoo wiligi toboloso badebei beeame omapoo, Godee ogo odoo ogo doloso domo badeli odoo hee badebeiso, o hu Sekalaya. Yo Godee ogo odoo ogo doloso domo badeli odoo mooloogoodoo hee Abiyayo mooloogoodoo ma kulodu badebeiso. Osoloso osobowo hu Elisabet, obakadio Elonowo soosoo. <sup>6</sup> Sekalaya dio Elisabet dio Godeeyo howo woola mapoo tekepo doloso dobolone, Godeeye kokodo taka to sabolo osoloso yayo tei magoo goo ee medee dodolone debeiso. <sup>7</sup> Esino diba holo soomagelaga debeiso. Bei, Elisabet yo sobo deme toba, osoloso sobo adaga poloso badebei. Osoloso Sekalaya onosee olo adaga poloso badebei.

<sup>8</sup> Beeame heeso Sekalaya o mooloogoodoo oso tou talai beeame simiso. Esemee Sekalayaye Yu odoo dia tei moso mapoo peleso Godeeyo howo woola tobodulone tou temelee. <sup>9</sup> Osoloso Godee ogo odoo ogo doloso domo badeli odoo oso dima kulodu odoo hee hesilame diayo yo odoo hu ma ee kobumeleso Sekalaya hesiaso. Esemee diayo Sekalaya yo Godeeyo tei moso ma kulodu sisigagili medee tekepo Godee mapoo gicalagalame hesiaso. Esemee Sekalayaye Yu odoowo tei moso mapoo peleso sisigagili medee tekepo gicalagemeleeso. <sup>10</sup> Esemee yayo sisigagili medee tekepo

gicalogomolome, odoo susuga oso tei moso pee mapoo dobolone dokodoo takemeleeso.

<sup>11</sup> Sekalaya yo tei moso ma kulodu osee badoboome, Godeeyo momaiye oso sisigagili medee tekepo gicaligili dosulu deede dokolo mapoo peledoboloso tebidiso. <sup>12</sup> Esemee Sekalayaye momaiye ogoloso dio dulone diya ebiaso. <sup>13</sup> Esino Godeeyo momaiye oso yimapoo egeesee takaso, "Sekalaya, no haga na ebi! Nayo dokodoo taka Godeeye olo duso. Nosobo Elisabet koowasi moodooloso giso holo soomagalaiso. Esee nayo holope o hu Yonee hedi. <sup>14</sup> Yayo namapoo goomoga tosilaiso. Osoloso yo soomagooga, odoo susuga oso goomogalaiso. <sup>15</sup> Bei, yayo Godeeyo howo woola hu toowa toloso badalaiso. Osoloso yo yugune nalaimo. Esino oweeye yo soomagoo maga bei mooloogoloso Dio Tei oso kitulugu sabolo badalaiso. <sup>16</sup> Osoloso yayo Isalael odoo see tobu dibada wiligi odoo Godee mapoo gilimado sibileiso. <sup>17</sup> Yo Ilayaye kitulugu sabolo badebei egeesi masi badolone, Lodeeye sibilei mologa daga malalo yayo sibileiso. Osoloso yayo odoo susuga Lodeeye egee sibo goo omapoo mopoodoo dolone dobolone, ma dio sabolo owolo dio sabolo mesie goo mapoo gilimado sibileiso. Osoloso yayo Godeeyo to mapoo koo mesimo silesibili odoo dia goo goolee ee see Godeeyo howo woola tekepo goo talame dia goo goolee su wudileiso."

<sup>18</sup> Esino Sekalayaye Godeeyo momaiye mapoo egeesee takaso, "Ayo ogooo goo ogoloso nayo egee takoo goo mapoo tei doloso ka gooleedalaiyo? Bei, a olo giso adaga osoloso mo sobo onosee sobo adaga," diso.

<sup>19</sup> Godeeyo momaiye oso yimapoo nei egeesee takaso, "Mo hu ee Geibulu. A Godeeyo mudugiyopoo badeli. Ayo namapoo to tekepo hagee takalame, Godeeye a sibeye diso. <sup>20</sup> Esino no dui! No to kelega poogoloso badalaiso. Bei, nayo mo to mapoo koo tei to. Esiga no to kelega badoga, ayo namapoo taka goo hagooso peledabalai beeame tugodoo omapoo ogoloso see to kalaiso," diso.

<sup>21</sup> Sekalayaye tei moso ma kulodu badebei diya koodoowoome, odoo aboso pegoo yo bolone

dobolone egeesee takaga meleeso, “Yo ogooo goo tamalabele?” diso. <sup>22</sup> Sekalaya tei moso maga gasibileso, to kelega tobudulone, wulo deeso edidi takaso. Esememe odoosusuga oso goo ee ogoloso gooleedooso, yo tei moso tegei ma kulodu badolone o howo opusomo deme, goo hee egeidoo, diso.

<sup>23</sup> Sekalayaye tei moso ma kulodu tou temelee beeame ee koodobuloso, yo see o mi mapoo wedi diso. <sup>24</sup> Osoloso hamamee Sekalayayo osobo Elisabet koowasi moodooloso badolone, a dee tiadoo ma kulodu Elisabeteeye o moso kuloduga peegoo gadile. <sup>25</sup> Osoloso Elisabet eyo nediliyo egeesee gweliso, “Godeeye a pidiso, osoloso ayo deme toboloso badolone odoosusuga howo woola simili goo ee yayo amaga peegoo togobuguso,” deliso.

### Yesu soomagalai goo ee yebugu

<sup>26</sup> Elisabet koowasi moodooloso badebei a 6 poogoloso badoboome, Godeeye o momaiye Geibulu sobo obuo Meli mapoo meiyee, diso. Meli yo Gelili mi toowa ma kulodu Nasalet mi pepooko mapoo badeli. Esino odoosusuga hee Meli hulame badebeiso, o hu Yosep, yo Deibidi dio bala hedebe. <sup>28</sup> Osoloso Godeeyo momaiye oso meilesos Meli mapoo egeesee takaso, “Emegei, Godeeye sobo no olo hesiaso. Osoloso Godeeye nobolo hodobo badoso,” diso.

<sup>29</sup> Meli to hagee duloso goo tiademe, to hageeyo bei diya gooleeso. <sup>30</sup> Esino Godeeyo momaiye oso Meli mapoo to nei egeesee takaso, “Meli, no haga na ebi. Bei, Godeeye namapoo diya goomogoso. <sup>31</sup> No koowasi moodooloso giso holo soomagalaiso. Osoloso nayo o hu Yesu hedi. <sup>32</sup> Yo hu toowa tolosobadalaiso. Osoloso Godeeyo owolo dalaiso. Osoloso amawe Deibidiye wiligi toboloso badebei goo ee see wiligi odoosusuga Godeeye yimapoo tenelaiso. <sup>33</sup> Esiga yayo Yekobowo bala ma kulodu wiligi toboloso badalaiso. Osoloso yayo wiligi toboloso badoga hoo pagalai mauwe,” diso.

<sup>34</sup> Esememe Meliye Godeeyo momaiye mapoo to nei egeesee takaso, “Goo hagee amapoo egeesee kasee peledabalaiyo? A sobo obuo, esiga giso dia goo a gooleedele,” diso.

<sup>35</sup> Esino Godeeyo momaiye oso yimapoo egeesee takaso, “Dio Tei oso namapoo sibileiso, osoloso Godeeye kitulugu oso no gagalaiso. Esiga nayo holope soomagalame egee see tei holo, osoloso yo Godeeyo owolo dalaiso. <sup>36</sup> Esiga no dui! No nemisi Elisabet goolee. Yo sobo adaga polosobadolone deme toboloso badoso diso. Esino yo epedee koowasi badebei a 6 poogooso. <sup>37</sup> Bei, Godeeye goo susuga ee moodoolai yo tebia,” diso.

<sup>38</sup> Meliye egeesee takaso, “A Godeeyo tou teli sobo. Esiga nayo amapoo taka goo ee amapoo moodoolai a goomogo,” diso. Esememe Godeeyo momaiye oso Meli poogoo diso.

### Meliye Elisabet agalame di

<sup>39</sup> Osoloso beeame omapoo Meli yo mopoodoo doloso Elisabet agalame saga diso. Yo Yudiya esia mapoo peleso, Sekalayaye badebei mi pepooko mapoo peledoboloso, see Sekalayayo mosopoo diso. Yo Sekalayayo mosopoo dileso Elisabet ogoloso emegei di to takaso. <sup>41</sup> Elisabet Meliye emegei di to taka du domo mapoo holope oso o beliyee ma kuloduga dabaso. Osoloso Dio Tei oso Elisabet mapoo sibume, yo kitulugu tooso. <sup>42</sup> Esememe yayo to neligidi egeesee takaso, “Sobo susuga ma kulodu Godeeye namapoo diya goomogolone, nama kulodu holope egee bado sabolo yimapoo diya goomogoso. <sup>43</sup> A hu toowa too sobonee. Esino mo Lodeeyo oweeye a agalame simiso. Goo omapoo a diya goomogo. <sup>44</sup> Esememe nayo amapoo emegei di to takeme, holope mo beliyee ma kulodu badebei oso goomogolone dabaso. <sup>45</sup> Godeeye namapoo peledabalai goo ee takeme duloso tei too maga, Godeeye namapoo goomoga tenelaiso,” diso.

### Meliye Godeeyo hu dokodoo poudoolone goomoga tenee

<sup>46</sup> Osoloso Meliye egeesee takaso, “Mo sooloo ma kuloduga Godee mapoo goomoga to taka.

<sup>47</sup> Osoloso mo dio oso mo Godee mo gie badeli pidili mapoo goomogo.

<sup>48</sup> Bei, yayo o tou teli wuluge sobo a toowa doloso gooleeso.

Esiga epedee hamaga dulone odoosusuga oso a Godeeye pidi sobo dalaiso.

<sup>49</sup> Bei, Kitulugu Godeeye amapoo goo toowa abo olo moodooso.

Yo tei.

<sup>50</sup> Edebeeyo Godee mapoo mesilone doga,

Godeeye sooloo deli goo oso dimapoo kookaiyo osee malaiso.

<sup>51</sup> Osoloso yayo kitulugu oso goo toowa abo olo moodoogaso.

Osoloso yayo odoosusuga dieso nediliyo tekepo doloso si howeli odoosusuga ee peegoo hasisobuguso.

<sup>52</sup> Osoloso yayo wiligi odoosusuga tebisa diayo wiligi dalame kitulugu too hu ee peegoo tabuguso.

Esino odoosusuga dieso pepooko doloso debeli odoosusuga ee pidilone, diba dokodoo poudooso.

<sup>53</sup> Osoloso yayo nei mauwe odoosusuga ee bi tekepo oso pidiso.

Esino bi bei odoosusuga ee mosoowe peegoo hasisobuguso.

<sup>54</sup> Osoloso yayo ibada amawe dio sabolo to kitulugu magoo ee dodolone

o to mapoo mesimo silesibili Isalael odoosusuga pidiso.

Esiga yayo sooloo deli goo oso Eibalaham sabolo osoloso amawe dimapoo kookaiyo moloso osee malaiso,” diso.



<sup>56</sup> Meliye Elisabet dio badebei a bakadio hedebe di poogoloso see o mi mapoo wedi diso.

### Yonee odoo howo sauwidili soomagoo

<sup>57</sup> Elisabet damamee ti beeamo omapoo, yayo giso holo soomagooso. <sup>58</sup> Godeeye Elisabet mapoo goo tekepo moodoo maga o soosoo sabolo, osoloso yima koola mapoo debeli odoo sabolo oso goo hagee duloso, goomoga hodobo Elisabet bolo poudooso.

<sup>59</sup> Osoloso giso holo soomagoloso abaga dino beeamo 8 mapoo diayo holope o kolo koolame mooloogoodooso. Osoloso diayo holope o hu amamo hu Sekalaya hedilame goomogaso. <sup>60</sup> Esino owee Elisa beteeye egeesee takaso, "Haye, o hu Yonee hedilei," diso. <sup>61</sup> Esino diayo yimapoo egeesee takaso, "Yonee egee namawe dio eyo hunee," diso. <sup>62</sup> Osoloso diayo see holope eyo ama mapoo o hu odoo ogu hedileiyo doloso deeso edidi takaso. <sup>63</sup> Esem Sekalayaye holope eyo hu magalame odoo susuga mapoo dasogo sabolo homo kolo sabolo yimapoo tenee doloso deeso edidi takaso. Esem yayo holope eyo hu egeesee magooso, o hu Yonee. Esem odoo susuga oso goo hagee ogoloso dio diso. <sup>64</sup> Esem epedee omapoo Sekalaya to kelega poogoloso badebei see to kolone Godeeyo hu dokodoo poudoomo sileeso.

<sup>65</sup> Osoloso mi omapoo debeli odoo oso goo hagee ogoloso ebigaso. Osoloso Yudiya esia mapoo debeli odoo susuga oso goo hagee duloso to kesameleeso. <sup>66</sup> Osoloso goo hagee duli odoo oso goolone egeesee woosaso, "Holope hagee odoo kasi masi badobombelee," diso. Bei, diba egeiso, Godeeye kitulugu oso yibolo molome.

### Sekalayaye Godeeyo hu dokodoo poudoolone goomoga tenee

<sup>67</sup> Yoneeyo ama Sekalayaye Dio Tei oso kitulugu toloso badolone malalo hoogoo peledabalai Godeeyo to ee yayo malalo egeesee takaso,

<sup>68</sup> "Isalael odoo dia wiligi odoo Godeeyo hu dokodoo poude!

Bei, yayo sibilesi o odoo see eyo gilimadalame neiso tooso.

<sup>69</sup> Osoloso Godeeyo tou teli odoo Deibidiyo bala ee ma kuloduga gie badeli pidili odoo kitulugu toowa imapoo olo teneeso.

<sup>70</sup> Daga hoogoo Godeeye goo hagee o howo woola todoloso dobolone Godee maga to toloso kokodo takomo sili odoo oso imapoo olo takaso.

<sup>71</sup> Esiga imapoo ha teli odoo osoloso imapoo hegili odoo oso kitulugu ee ma kuloduga Godeeye iba peegoo gilimado dileiso.

<sup>72</sup> Osoloso Godeeye ibada amawe dio sooloo dolone pidileiso diso.

Osoloso yayo Eibalaham dio to kitulugu magoo ee osee goolee malaiso diso.

<sup>74</sup> Esiga Godeeye imapoo ha teli odoo ma kuloduga gilimadoloso peegoo dileiso,

iyu Godeeyo tou tolone dobolone ebia goo mauwe poogoloso dabalame.

<sup>75</sup> Esiga iyo debei ma kulodu Godeeyo howo woola tekepo dobolone todolone dabalai tekepo.

<sup>76</sup> Esino mo holo, no odoo susuga oso dokodoo badeli Godee maga to toloso kokodo takamo sili odoo dalaiso.

Bei, Lodee sibilega badoga, daga malalo nayo dileso yayo sibilei goo mapoo odoo mopoodoo dalame gu takala dileiso.

<sup>77</sup> Nayo o odoo gie badeli pidilei goo ee eligileiso.

Goo ee dibada goo tokenee hapooga, gie badeli talaiso.

<sup>78</sup> Godeeye iba sooloo dolone diya goolee moloso.

Esiga Kei mi ma dokodooga yayo hudi magoo odoo oso mi gie hadobuoga osokoso egee pouno egeesee masi imapoo sibileiso.

<sup>79</sup> Godeeye hudi magoo odoo hagooso teli mapoo dili eli omapoo egee do sabolo

osoloso neliga ma kulodu egee do odoo dimapoo pounileiso.

Osoloso yayo iba gilimado dileiso, Godee sabolo mesie dabalame," diso.

<sup>80</sup> Yonee kawulone o dio oso kitulugu sabolo badebeiso. Yo miwe poogoo mi mapoo badoboso beeamo oso sibume, Isalael odoo dimapoo to tekepo takalame simiso.

### Yesu soomagoo

(Matiyu 1:18-25)

**2** Beeamo omapoo Sisa-Ogastas yayo Loum odoo dia wiligi toboloso badolone, odoo susuga eyo hu booka mapoo magalame tei magooso. <sup>2</sup> Hu tomo di hagee hu telega moloso Kuliniyos yayo Siliya mi mapoo wiligi toboloso badolone daga bei ka mooloogoo. <sup>3</sup> Esem odoo susuga dibada midee mapoo dia hu magalame diadeeso.

<sup>4</sup> Yosep hagee Deibidiyo amawe. Esiga yo Gelili mi ee ma kulodu mi hee Nasalet maga see Yudiya mi mapoo mi hee Betilihem mapoo o hu magalame palaso. Bei, Betilihem mi egee Deibidi o soosoo dibada midee. <sup>5</sup> Yo Meli hulame dadagoloso dia hu magalame palaso. Esino Meli yo olo koowasi moodooloso badebeiso. <sup>6</sup> Diba Betilihem mi mapoo dileso peledoboloso omapoo doboome, Meli damamee tiso. <sup>7</sup> Osoloso yayo holope daga malalo giso holo soomagooso. Holope soomagoloso dugoso tiadoloso gala hu nei nedili moso tegei eyo kulodu howogi masi mapoo tiediso. Bei, odoo soo oso sibilesi tieli moso ee ma kulodu debi mauwe neme.

### Sipi be bali odoo oso Yesu soomagoo goo ee du

<sup>8</sup> Yesu soomagoo gesi omapoo sipi be bali oso Betilihem mi koola mapoo dibada sipi be balagameleeso.

<sup>9</sup> Esem Godeeyo momaiye oso saga epedee omapoo dimapoo sibilesi peledabaso. Osoloso Godee yayo toowa doloso badeli goo omaga o gadeebugu oso diba teme, diya ebigaso. <sup>10</sup> Esino momaiye oso dimapoo

egeesee takaso, "Niba haga na ebi. Bei, odoosusuga oso goomogalame ayo nimapoo to tekepo ka tosimi. <sup>11</sup> Epei Deibidiyo mi mapoo odoosusuga eyo gie badeli pidilei holope ee soomagooso. Yo Keliso Lodee. <sup>12</sup> Yo dugoso tiadoloso gala hu nei nedili howogi masi mapoo tiamologa ogoloso gooleedalaiso," diso.

<sup>13</sup> Osoloso epedee saga omapoo momaiye mooloo-goodoo toowa oso Kei mi maga sibilesi, momaiye daga malalo simi sabolo hodobo mooloogoodooso. Osoloso momaiye susuga oso Godeeyo hu dokodoo poudoolone egeesee takaso,

<sup>14</sup> "Kei mi ma dokodoo badeli Godee mapoo goomoga poude!

Osoloso mipoo hamapoo Godeeye goomoga odoos dimapoo mesie goo oso mele," diso.

<sup>15</sup> Osoloso momaiye susuga oso diba poogoloso Kei mi ma dokodoo see wedi paladeeso. Esemesipi be bali odoos oso dieso nediliyo egeesee takaso, "Iba Betilihem mi mapoo Godeeye imapoo taka goo ee peledaba beleso agalame dimo," diso.

<sup>16</sup> Esemesipi diba saga dileso egeino, Meli dio Yosep dio holope gala hu nei nedili howogi masi mapoo tiedi molome egeiso. <sup>17</sup> Osoloso diba dileso holope ogoloso odoos abo omapoo debei dimapoo holope eyo goo taka ee takaso. <sup>18</sup> Esemesipi be bali odoos oso holope eyo goo takeme duloso odoos susuga diya howoogadooso. <sup>19</sup> Esino Meli yo goo hagee duloso beeame susuga ma kulodu boobado bigilega osee goolee meleeso. <sup>20</sup> Esemesipi be bali odoos diba see wedi dulone, diayo du goo sabolo osoloso diayo egei goo sabolo omaga Godee mapoo goomoga toowa poudooso. Bei, diayo egei goo susuga ee momaiyeso taka goo sabolo tebiademe.

### Yesu yo tei moso mapoo ido pala

<sup>21</sup> Osoloso holope soomagoloso abaga dino beeame 8 mapoo o kolo kooso. Osoloso yo Yesu hediso. Bei, daga yo Meliyo beliye ma kulodu mauwe mapoo momaiyeso hu hagee olo hediso.

<sup>22</sup> Meli dio Yosep dio Moseseeye tei magoo ee dodolone Godeeyo howo woola tokenee mauwe dabalame, mopoodo doo beeame koodobuloso, diayo Yesu idolosolo Yolusalem mi mapoo diso. Osoloso diba Yu odoowo tei moso mapoo peleso, diba see Godeeyo howo woola tokenee mauwe dabalame, só bakadio wooloso Godee mapoo teneeso. Bei, Godee o tei magoo oso egeesee takooso, "Niba molo bakadio o, wi pepooko bakadio wooloso amapoo tenee," deeso. Osoloso diba tei moso tegei mapoo peleso, Yesu see Godee mapoo teneeso. Bei, Godee o tei magoo oso egeesee takooso, "Malalo soologamagoo giso holo susuga Godee mapoo tenee," deeso. †

† Yu soboso Moseseeye tei magoo ee dodolone giso holo soomagooga, yo beeame 40 ee ma kulodu kee koododilega, o moso mapoo obusomo badeliso. Osoloso beeame oso koodobuoga, see kee koododilame, Yu odoos dia tei moso mapoo dileso Godee mapoo emegei di bi teneliso.

<sup>25</sup> Beeame omapoo Yolusalem mi mapoo adaga hee badebeiso, o hu Simiyono. Yo Godeeyo howo woola tekepo doloso badolone, hedebe Godeeno diya goolee sabolo badeliso. Esino yayo Godeeye Isalael odoos mapoo hegi goo melee ee togobigilame beeame oso sibilei ee bolone bameleeso. Osoloso Dio Tei oso yibolo badebeiso. <sup>26</sup> Esino yo adaga poloso telega badolone, Godeeye hesia Keliso yo agalai goo ee Dio Tei oso yimapoo olo takaso. <sup>27</sup> Osoloso Dio Tei oso Simiyono yo tei moso tegei mapoo ido diso. Osoloso Meli dio Yosep dio oso tei magoo ee dadalame holope Yesu yo tei moso mapoo ido palaso. <sup>28</sup> Esemesipi adaga Simiyonoye Yesu ogoloso maduloso Godee mapoo goomogolone to egeesee takaso,

<sup>29</sup> "Godee nayo takolone a Keliso ogoloso ka talai diso.

Esiga epei nee tou teli odoos ayo mesie sabolo talai tekepo.

<sup>30</sup> Bei, mo howoso gie badeli pidili odoos ee nayo odoos susuga mapoo tenee a egeiso.

<sup>32</sup> Yo gadeebugu, Yu dele poogoo odoos dimapoo Godeeyo goo ee yiligebigilame.

Osoloso yimaga nee Isalael odoos diba dokodoo poudileiso," diso.

<sup>33</sup> Yesuwo ama dio owee dio Simiyonoye taka to duloso diya howoogadooso. <sup>34</sup> Osoloso Simiyonoye Godeeye diba pidilame takoloso Meli mapoo egeesee takaso, "Godeeye holope hagee hesiaso, Isalael odoos aboso holope hagee gowooga, Godeeye diba pepooko dalame. Osoloso odoos aboso holope hamapoo tei toga, Godeeye diba dokodoo poudileiso. Esiga odoos aboso o goo talai gowoolone yimapoo ha talaiso.

<sup>35</sup> Goo egeesee maga dibada sooloo ma kulodu egee molo goo ee woola yiligebigileiso. Osoloso goohele goo oso nee sooloo mapoo kaiyaso heleegee masi halagalaiso," diso.

<sup>36</sup> Osoloso domo omapoo Godee maga to tolosoko kodo takomo sili sobo hee tei moso tegei ma kulodu badebeiso, o hu Ana. Sobo yo o bala Asa. Osoloso amamo hu Panuwel. Yo sobo adaga poloso badebeiso. Yo daga gisoso huloso dugo 7 ma kulodu omobolo badoboso, omo taso. <sup>37</sup> Esemesipi yayo badebei dugo 84 poogoloso, omapoo yo bau osee badebeiso. Yo beeame susuga tei moso tegei mapoo howo gisimo silone, beeame sabolo osoloso gesi sabolo Godeeyo hu dokodoo poudoolone nei tei yuloso badolone dokodoo takemeleeso. <sup>38</sup> Osoloso Simiyonoye Meli dio Yosep dio to kesamolome, yo domo omapoo simiso. Yo sibilesi Godee mapoo goomoga to takaso. Osoloso Yolusalem mi eyo hegi goo ee ma kuloduga gili-madoloso pegoo dilame balagamelee odoos dimapoo Yesuwo goo takaso.

<sup>39</sup> Yosep dio Meli dio Godeeye taka tei goo susuga tolosoko koodobuloso, see Gelili mi ee ma kulodu dia middee Nasalet mapoo wedi diso. <sup>40</sup> Osoloso holope oso kitulugu sabolo kawuloso goo goolee medee tekepo yimapoo meleeso. Osoloso Godeeye yo sooloo dolone pidimeleeso.

### Yesu yo pepooko mapoo tei moso mapoo peleso badebei

<sup>41</sup> Dugo susuga ma kulodu beeame hedebe mapoo Yesuwo owee dio ama dio Yolusalem mapoo Godeeye gababia wo nalame diliso. <sup>42</sup> Osoloso dugo hee mapoo diba see gababia wo nalame dime, Yesu yo dibolo diso. Beeame domo omaga Yesu o dugo 12. <sup>43</sup> Gababia wo ne beeame koodobume, diba see wedi diso. Esino Yesu yo dibolo dilega, Yolusalem mapoo badebeiso. Yesuye Yolusalem mapoo badebei owee dio ama dio gooleede. <sup>44</sup> Esino ama dio owee dio goolee, Yesu odoo abo sabolo malalo di bele dolone, diba nose diso. Diba dilesos eli domopoo tilame dobolone, diayo dia soosoo ma kulodu osoloso dia odoo ma kulodu Yesu esiaso. <sup>45</sup> Diba omapoo Yesu esiamaleso koo egeme, see Yolusalem mapoo Yesu esilame wedi diso. <sup>46</sup> Osoloso beeame bakadio hedebe di poogoloso hamamee diayo Yesu Yu odoo dia tei moso mapoo Yu odoowo tei eligili odoo abo sabolo to kolone doboome egeiso. Ee ma kulodu Yesuye tei eligili odoo oso eligi goo ee dulone badolone, yayo nei dimapoo woosa demeleeso. <sup>47</sup> Osoloso nei tei eligili odoo oso woosa to eyo nei dimapoo medee tekepo wedi di duloso, osoloso o goo goolee tekepo ogoloso odoo susuga oso diya howoogadooso. <sup>48</sup> Yesuwo owee dio ama dio oso Yesuye tei eligili odoo sabolo to kolone badoboome ogoloso dio diso. Esemee oweeye egeesee takaso, "Mo holo, nayo kasalame goo egeesee imapoo ka moodoowo? Nama asalo no esiamo silone diya kuku-da sabolo sileeso," diso.

<sup>49</sup> Esino Yesuye nei dimapoo egeesee takaso, "Niyo kasalame a ka esiamo sileeyo? Ayo mo mayo moso mapoo badalai goo ee niba gooleedeleyo?" diso.

<sup>50</sup> Esino Yesuye taka to eyo bei diba medee kibiya gooleede.

<sup>51</sup> Osoloso Yesu see dibolo hodobo Nasalet mapoo wedi diso. Osoloso omapoo badolone, dibada to mapoo mesimo sileeso. Esino Meliye goo susuga hagee beeame susuga osee goolee sabolo badebeiso.

<sup>52</sup> Yesu yo kauwulone goo goolee tekepo sabolo kauwaso. Esemee Godee sabolo osoloso odoo sabolo oso yimapoo diya goomegeliso.

### Yonee odoo howo sauwidili oso to taka

(Matiyu 3:1-12, Maka 1:1-8, Yonee 1:19-28)

**3** Taibiliyes-Sisaye Loum wiligi toboloso badebei dugo 15 poogoloso, odoo abo hagee bia oso yima hemi wiligi tebisaloso debeiso. Ponetas-Paileteeye Yudiya mi bameleeso, osoloso Helodeeye Gelili mi bameleeso, osoloso omolo Pilipiye Ituliya mi sabolo Talakonitis mi sabolo bameleeso. Osoloso Lisaniyase-eye Abilene mi bameleeso. <sup>2</sup> Osoloso Anas dio Kayapas dio Yu odoo dia tei moso wiligi toboloso debeiso. Beeame omapoo Sekalayayo owolo Yonee miwe poogoo mi mapoo badoboome, Godeeye o to yimapoo teneeso. <sup>3</sup> Esemee yayo dilesos Yoden howo koola ogolone debeli mi mapoo Godeeyo to takomo silone, odoo

susuga mapoo egeesee takomo sileeso, "Nibada tokenee mapoo miligi pialoso howo sauwidige. Eseega Godeeye nibada tokenee hapoloso boobado bigileiso," dee takameleeso. <sup>4</sup> Goo hagee Godee maga to tolosos kokodo takomo sili odoo Aisayaye o booka mapoo hogugu to sabolo tobuoso. Bei, yayo o booka mapoo hageesee hoguguso,

"Miwe poogoo mi omaga edebeeyo egeesee idagoo, 'Lodee yayo sibilei eli moodee, osoloso medee hoodo magee.

<sup>5</sup> Osoloso mi godobia mologa, omapoo mi abo kuge. Osoloso eli mapoo esia mologa, esia egee gebese. Osoloso eli halaga medee hoodo magee. Osoloso eli tokenee medee moodee.

<sup>6</sup> Eseega odoo susuga oso gie badeli pidili Godee maga simi agalaiso,' diso."

<sup>7</sup> Odoo mooloogoodoo Yoneeye diba howo sauwidigilame sibademe, yayo dimapoo egeesee takaso, "Niba hebise, nimapoo odoo agayo takolone howo sauwidige goo oso Godeeye kamana egee sibo maga mada piadabalaiso dee ka takana? <sup>8</sup> Esiga niyo debei goo maga nibada goo tokenee mapoo tei miligi pia goo ee eligi. Osoloso niba niso nediliyo iba Eibalahameeyo amawe dioga, Godeeye kamana maga mada piadabalaiso dee na goolee. Bei, ayo nimapoo taka. Godee yimapoo kitulugu moloso, yo hagooso see Eibalahameeyo amawe dio palai. <sup>9</sup> Esiga kabee homo bei mapoo olo magoo moloso. Esiga homo kaso ko tekepo pelega mologa, homo egee holoso dou mapoo toodalaiso," diso.

<sup>10</sup> Esemee odoo susuga Yoneeye taka to ee duloso nei egeesee takaso, "Egeeseeega iba ogoo goo moodoolaisomo?" diso.

<sup>11</sup> Esemee Yoneeye nei dimapoo egeesee takaso, "Namapoo sedi bakadio mologa, nee odoo sedi me daga, hee yimapoo tenee. Osoloso namapoo nei mologa, nee odoo hee nei me daga, abo yimapoo tenee."

<sup>12</sup> Osoloso tekisi molee misigeli odoo abo diba nosee howo sauwidigilame sibilesos Yonee mapoo egeesee takaso, "Eligili odoo, iba ogoo goo moodoolaisomo?" diso.

<sup>13</sup> Esemee Yoneeye nei egeesee takaso, "Niyo odoo mapoo tekisi molee misigaga, hodio niyo talai ee goolone tekisi molee magalame tobuloso magoo ee na dagapele. Esino hedebe tebia ono odoo mapoo ka misige," diso.

<sup>14</sup> Osoloso ha teli odoo aboso Yonee mapoo egeesee takaso, "Iba nosee ogoo goo moodoolaisomo?" diso.

Esemee Yoneeye nei dimapoo egeesee takaso, "Niyo emegei dia molee heli talame na seesee. Osoloso emegei dia molee heli talame dimaga gamenee goo na takee. Esino hedebe niso tou too eyo nei molee ee tolone goomoga sabolo ka debee," diso.

<sup>15</sup> Odoo susuga oso Keliso bolone debei mapoo Yoneeye simi ogoloso, diayo goolee yo Keliso bele dee gooleeso. <sup>16</sup> Esemee nei Yoneeye dimapoo egeesee takaso, "Ayo niba howodeeso sauwidiliso. Esino odoo hee ama hamamee egee sibo yayo kitulugu oso ayo

kitulugu dagadi. Esiga ayo o homo beiyopoo gawuloso o homo bi ee pidigilei a tebile. Osoloso yayo Dio Tei ni-ma kulodu tenelaiso. Esino yayo yimapoo tei tele poo-goo odoe ee dou mapoo toodalaiso. <sup>17</sup> Yayo witi wo ko sabolo gelesi sabolo pilame o tou teli bi sabolo mopoodoo doloso badoso. Osoloso witi wo ko ee moso mapoo kukuleiso. Osoloso gelesi dou koo semeli mapoo toodalaiso," diso. <sup>18</sup> Yoneeye to tekepo ee eli opusomo opusomo di maga odoe Godee mapoo gilimado sibilame, Godeeye to tekepo takomo siliso.

<sup>19</sup> Esino Gellili mi eyo wiligi odoe taba Helodeeye goo tokenee tooso. Goo ee omolo osee badoboome, yayo omolowo osobo Helodiyes peedee huso. Esemeye Yoneeye goo hagee ogoloso yimapoo diya takolone o toke-nee goo abo sabolo yiligebuguso. <sup>20</sup> Esemeye hamamee Helodee komonolone yo tokenee hee toowa tooso. Goo ee yayo Yonee neliga moso ma kulodu husooso.

### Yesu howo sauwidi

(Matiyu 3:13-17, Maka 1:9-11)

<sup>21</sup> Beeame Yoneeye odoe howo sauwidigamelee domo mapoo, Yesu yinosee howo sauwidiso. Yesu howo sauwuduloso gasibilesa tobudulone dokodoo takomolome Kei mi osulu yamagooso. <sup>22</sup> Esemeye Dio Tei oso molo masi pusibilesa yimapoo pubalagaso. Osoloso Kei mi ma dokodooga toso egeesee takaso, "No ayo gooma mo holo noso, a namapoo diya goomogo," diso.

### Yesuwo amawe diowo hu

(Matiyu 1:1-17)

<sup>23</sup> Yesu yo dugo 30 domo mapoo badolone, o tou bei mooloogooso. Odoe susuga oso Yosepeeyo owolo gweliso.

Yosep yo Heliyo owolo.

<sup>24</sup> Heli yo Matateeyo owolo.

Matat yo Libaiyo owolo.

Libai yo Melkiyo owolo.

Melki yo Yanaiyo owolo.

Yanai yo Yosepeeyo owolo.

<sup>25</sup> Yosep yo Matatiyaseeyo owolo.

Matatiyas yo Amoseeyo owolo.

Amos yo Nahumeeyo owolo.

Nahum yo Esliyo owolo.

Esli yo Nagaiyo owolo.

<sup>26</sup> Nagai yo Mateeyo owolo.

Matiyu yo Matatiyaseeyo owolo.

Matatiyas yo Semeineeyo owolo.

Semein yo Yosekeeyo owolo.

Yosek yo Yodayo owolo.

<sup>27</sup> Yoda yo Yohanayo owolo.

Yohana yo Lesayo owolo.

Lesay yo Selubabeleeyo owolo.

Selubabel yo Selatiyeleeyo owolo.

Selatiel yo Neliyo owolo.

<sup>28</sup> Neli yo Melkiyo owolo.

Melki yo Adiyoy owolo.

Adi yo Kosameeyo owolo.

Kosam yo Elamadameeyo owolo.

Elamadam yo Eleeyo owolo.

<sup>29</sup> El yo Yosuwayo owolo.

Yosuwa yo Eliyeseleeyo owolo.

Eliyesel yo Yolimeeyo owolo.

Yolim yo Matateeyo owolo.

Matat yo Libaiyo owolo.

<sup>30</sup> Libai yo Simioneeyo owolo.

Simion yo Yudayo owolo.

Yuda yo Yosepeeyo owolo.

Yosep yo Yonameeyo owolo.

Yonam yo Eliyakimeeyo owolo.

<sup>31</sup> Eliyakim yo Meleyayo owolo.

Meleya yo Menayo owolo.

Mena yo Matatayo owolo.

Matata yo Neiteneeyo owolo.

Neiten yo Deibidiyo owolo.

<sup>32</sup> Deibidi yo Yesiyo owolo.

Yesi yo Obedeeyo owolo.

Obed yo Bowaseeyo owolo.

Bowas yo Salmoneeyo owolo.

Salmon yo Nasoneeyo owolo.

<sup>33</sup> Nason yo Aminadabeeyo owolo.

Aminadab yo Adimineeyo owolo.

Adimin yo Aliniyo owolo.

Alini yo Hesloneeyo owolo.

Heslon yo Peleseeyo owolo.

Peles yo Yudayo owolo.

<sup>34</sup> Yuda yo Yekobeeyo owolo.

Yekob yo Aisekeeyo owolo.

Aisek yo Eibalahameeyo owolo.

Eibalaham yo Telayo owolo.

Tela yo Naholeeyo owolo.

<sup>35</sup> Nahol yo Selugeeyo owolo.

Selug yo Lewuyo owolo.

Lewu yo Pelegeeyo owolo.

Peleg yo Ebeleeyo owolo.

Ebel yo Selayo owolo.

<sup>36</sup> Sela yo Keinaneeyo owolo.

Keinan yo Alapakasadeeyo owolo.

Alapakasad yo Semeeyo owolo.

Sem yo Nowayo owolo.

Nowa yo Lamekeeyo owolo.

<sup>37</sup> Lamek yo Metuselayo owolo.

Metusela yo Inokeeyo owolo.

Inok yo Yeledeeyo owolo.

Yeled yo Mahalaleleeyo owolo.

Mahalalel yo Kenaneeyo owolo.

<sup>38</sup> Kenan yo Enoseeyo owolo.

Enos yo Seteeyo owolo.

Set yo Adameeyo owolo.

Adam yo Godeeyo owolo.

### Saitenso Yesu kukulo egei

(Matiyu 4:1-11, Maka 1:12-13)

**4** Yesu yo Yoden howo mapoo Yoneeye howo sauwuduloso, Yesu Dio Tei oso kitulugu tolosa yo miwe poogoo mi mapoo Dio Tei oso ido diso. <sup>2</sup> Yesu

miwe poogoo mi mapoo beame 40 ee ma kulodu nei nelega badoboome, Saitenso yo kukulo ogo demeleeso. Osoloso beame 40 poogoloso hamamee Yesu yo diya hodiaseo.

<sup>3</sup> Esem Saitenso ogoloso yimapoo egeese takaso, "No tei Godeeyo owolo daga, yo hagooso see wo pe dee takee," diso.

<sup>4</sup> Esem Yesuye nei egeese takaso, "Godeeyo to booka mapoo hogugu oso egeese takoso, 'Edebeeyo hedebe nei nolone badoga oso gie badeli talaimo,'" diso.

<sup>5</sup> Esem see Saitenso Yesu idoloso mubi dokodoo ido palaso. Esem saga omapoo Saitenso mi edebeeyo bia susuga yimapoo eligiso. <sup>6</sup> Osoloso Yesu mapoo egeese takaso, "Daga Godeeye bi susuga hagee amapoo teneme, ayo bamo simiso. Esiga nayo amapoo gasuwoloso a dokodoo poudoga, mi susuga hagee sabolo osoloso bi susuga ee ma kulodu egee molo sabolo namapoo tenelaiso. Bei, amapoo kitulugu moloso, odoo hee mapoo tenelai," diso.

<sup>8</sup> Esem Yesuye Saiten mapoo nei egeese takaso, "Godeeyo to booka mapoo hogugu oso egeese takoso,

'Nayo hedebe nee wiligi odoo Godee mapoo gasuwoloso yo dokodoo poude. Osoloso hedebe o to mapoo mesie,'" diso.

<sup>9</sup> Osoloso see tobu Saitenso Yesu idoloso Yolusalem mapoo diso. Osoloso tei moso tegei omu ma dokodoo ido peleso tobudume yimapoo egeese takaso, "No tei Godeeyo owolo daga, no moso omu ma dokodoo miyomoo bologobigi. <sup>10</sup> Bei, Godeeyo to booka mapoo hogugu oso egeese takoso,

'Godeeye o momaiye mapoo no medee bamelee dee takaso.

<sup>11</sup> Esiga diayo no dia deeso douguleiso, no yo mapoo homodobiyaga,'" diso.

<sup>12</sup> Esino Yesuye egeese takaso, "Godeeyo to booka mapoo hogugu oso egeese takoso,

'Nee wiligi odoo Godee oso kitulugu ee hoodo agalame yimapoo na kukulo ege,'" diso.

<sup>13</sup> Saitenso Yesu kukulo ogomo silee koodobuloso yo see tobu kukulo agalame beame tekepo ee bolone Yesu epedee poogoloso diso.

### Yesuye Gelili mapoo o tou bei mooloogoo

(Matiyu 13:53-58, Maka 6:1-6)

<sup>14</sup> Yesu Dio Tei oso kitulugu sabolo Gelili mapoo wedi diso. Osoloso Gelili mi toowa ee ma kulodu odoo susuga oso Yesuwo goo dudobuguso. <sup>15</sup> Yayo Yu odoowo howo gisili moso susuga mapoo eligimo sileeme, odoo susuga oso yimapoo goomegeliso.

<sup>16</sup> Beame heeso Yesu eyo yo kauwa o middee Nasalet mapoo diso. Osoloso Yu odoo oso hasali beame mapoo Yesu eyo seli egeese solone, yo howo gisili moso mapoo palaso. Osoloso yo Godeeyo to booka mapoo hogugu ee hesigilame tabaso. <sup>17</sup> Osoloso Godee maga to toloso kokodo takomo sili odoo Aisayaye hogugu booka ee yimapoo teneeso. Yo

booka toloso piligamo abaga dino to hogugu domo ee ogoloso, to hagee hesigaso,

<sup>18</sup> "Godeeyo dio abolo hodobo badoso.

Bei, yayo a hesiaso, to tekepo bi mauwe odoo mapoo takalame.

Osoloso Godeeye a diye diso,

neliga moso ma kulodu debeli odoo mapoo yayo diba peegoo gilimado dileiso dee takalame.

Osoloso howo siliga odoo see agalaiso dee takalame.

Osoloso Godeeye a diye diso,

edebeyo hegili odoo hegi goo ma kuloduga ayo peegoo gilimado dilame.

<sup>19</sup> Osoloso Godeeye a diye diso, ayo Lodeeye o odoo mapoo goo tekepo moodoolai beame oso egee sibo goo ee odoo mapoo eligilame."

<sup>20</sup> Yesu booka hesigamelee koodobuloso, see booka bali odoo omapoo teneloso biaso. Esem odoo susuga moso ee ma kulodu debei oso howoso medee kitulugu sabolo yimapoo bologolone debeiso. <sup>21</sup> Osoloso yayo dimapoo egeese takaso, "Niyo Godeeyo to hogugu booka maga takeme du goo oso nimapoo epei olo simiso," diso.

<sup>22</sup> Esem o to du odoo susuga oso yo tekepo odoo doloso, yayo to taka susuga ee tekepo diso. Diayo egeese takoloso, see egeese takagameleeso, "Iba gooleedooso yo Yosepeeyo owoloso. Egesino yayo kaseeme to tekepo egeese ka takayo?" dee takagameleeso.

<sup>23</sup> Yesuye see dimapoo egeese takaso, "A gooleedooso, niyo goo hamaga amapoo takalaiso, 'Melese-nee neli odoo, no no nediliyo tekepo moodee. Osoloso nayo Kapeniyum mi mapoo goo mudu opusomo di moodoogamelee see nee middee hamapoo moodee,' dee takalai malaiso," diso.

<sup>24</sup> Esino Yesuye see dimapoo egeese takaso, "Ayo nimapoo taka, Godee maga to toloso kokodo takomo sili odoo yo o mosobia oso gowoolaiso. <sup>25</sup> Esiga niba susuga dui. Ilayaye badebei beame omapoo mi toowa kibaso. Osoloso dugo bakadio hedebe osoloso a 6 ma kulodu howo sibilega nei mauwe badebeiso. Ee ma kulodu Isalael mi mapoo sobo bauwe debeiso.

<sup>26</sup> Esino ee ma kulodu Godeeye Ilayaye diba pidiye doloso yimapoo takele. Esino yo Ilayaye wulo Yu dele poogoo sobo Saidon mi ma kulodu mi hee Salipat mi mapoo badeli sobo bau ono pidilame diye diso. <sup>27</sup> Osoloso Ilaisaye badebei beame omapoo, Isalael mi omapoo kolo tokenee odoo bei debeiso. Esino Ilaisaye odoo egee bia yayo pidile. Esino yayo Yu dele poogoo odoo o hu Naman, Siliya mi mapoo badeli odoo ono tekepo moodooso," diso.

<sup>28</sup> Esem odoo howo gisili moso mapoo debei oso to hagee duloso diya kamanagaso. <sup>29</sup> Esem diba tebisaloso Yesu toloso mosobia pee mapoo esia goosoo mapoo halagasalame ido diso. <sup>30</sup> Esino Yesu odoo mooloogoodoo ee ma kuloduga peegoo diso.

**Odoo bo holo pala**

(Maka 1:21-28)

<sup>31</sup> Osoloso Yesu Gelili mi toowa ma kulodu mi hee Kapenyum mapoo diso. Yo omapoo dilesa badolone Yu odoo oso hasali beeame heeso yayo howo gisili moso ma kulodu Godeeyo to eligimeleeso. <sup>32</sup> Esem e odoo susuga oso yayo eligi duloso diya howoogadooso. Bei, yayo diya kitulugu sabolo eligime.

<sup>33</sup> Howo gisili moso ma kulodu odoo bo holo pala hee omapoo badebeiso. Yayo to neligidi Yesu mapoo egeesee takaso, <sup>34</sup> "Hei, Yesu Nasalet odoo, nayo imapoo ogoo goo moodoolame ka simiyo? Nayo iba tokenee palame ka simiyo? Esiga no iba poogoloso di. Bei, a gooleedoo no Godeeye hesia odoo oso," diso.

<sup>35</sup> Esem e Yesuye to kitulugu sabolo bo holo mapoo egeesee takaso, "No to koodobuloso odoo ma kulduga peegoo di," diso. Yesuye egeesee takeme, bo holo oso peegoo poogolone odoo egee odoo howo woola miyomoo homodobuloso molone yimaga peegoo diadeeso. Esino bo holo oso yimaga peegoo dulone yimapoo dala hee tenele.

<sup>36</sup> Esem e odoo susuga oso goo hagee ogoloso howoogadolone egeesee takagameleeso, "Yayo taka goo ee kasiyo? Bei, yayo to kitulugu sabolo bo holo mapoo takooga diba o to mapoo mesiloso peegoo diledoo," dee takagameleeso. <sup>37</sup> Esem e odoo susuga oso goo hagee ogoloso mosobia susuga koola mapoo debeli mapoo takomo diadeeso.

**Yesuye odoo paigiga tekepo moodoo**

(Matiyu 8:14-17, Maka 1:29-34)

<sup>38</sup> Yesu howo gisili moso maga see Saimonowo mosopoo diso. Moso ee ma kulodu sobo Saimonowo nalobo pailone kolo diya dei moodoome tiameleeso. Esem e odoo susuga oso yo Yesuye tekepo moodoolame Yesu mapoo o goo takaso. <sup>39</sup> Esem e Yesuye sibilesa yayo tiamelee koola mapoo gawuloso badolone paiye mapoo egeesee takaso, "Yo poogoloso di," diso. Esem e paiye saga weidooso. Esem e yayo toboloso nei toloso dimapoo piso.

<sup>40</sup> Esem e osoko todobume odoo susuga oso odoo paigiga susuga Yesu mapoo gilimado sibadeeso. Esem e yayo o deeso odoo paigiga susuga sigime wegigadooso. <sup>41</sup> Esem e Yesuye odoo bo holo paladee tekepo moodoogoomo bo holo oso peegoo dulone to neligidi takolone egeesee takaso, "No Godeeyo owoloso," dee takagameleeso. Esino Yesuye to kitulugu sabolo dimapoo egeesee takaso, "Niba to na ke," diso. Bei, bo holo oso Yesu yo Godeeye hesia Keliso doloso diba gooleedooso.

<sup>42</sup> Gesikolodee mi hadopeelega, Yesu tia maga hogabuloso odoo koola mauwe mi mapoo diso. Esino odoo susuga oso egeino yo me neme yima hamamee yo esiamo silesibiso. Diba Yesu esiamo silesiboso yo ogoloso yimapoo egeesee takaso, "No iba na poogoo di," diso. <sup>43</sup> Esino Yesuye dimapoo egeesee takaso, "A

mi abo mapoo Godeeye wiligi doloso badeli goo ee takomo dilei tekepo. Bei, Godeeye goo hamaga a diye diso," diso. <sup>44</sup> Osoloso Yesuye Yudiya mi toowa mapoo diayo howo gisili moso susuga mapoo Godeeyo to eligimo sileeso.

**Yesuye o hamamee dili odoo daga malalo abo gili-madoo**

(Matiyu 4:18-22, Maka 1:16-20)

**5** Beeame hee mapoo Yesuye Gelili abei palaga mapoo Godeeyo to takomolome odoo susuga oso o to dulame diya mooloogodooso. <sup>2</sup> Yesu osee to budulone di kebigeli odoo oso dia pei howo hapagalame dia du bakadio mubi dokodoo gisibado peleso ma molome egeiso. <sup>3</sup> Yesu du bakadio ee ma kulodu Saimonowo du mapoo meilesa badolone Saimon mapoo takaso, "Du abei pee maga pepooko hoogoo pupubigi," diso. Esem e yo du ma kulodu badolone odoo susuga mubiyodoo doboome, yayo Godeeyo to dimapoo eligiso.

<sup>4</sup> Yesuye odoo susuga mapoo Godeeyo to taka koodobuloso Saimon mapoo egeesee takaso, "Nee du howo bou mapoo sudo dilesa di talame nibada pei howomoo oguse," diso.

<sup>5</sup> Esino Saimonoye egeesee takaso, "Wiligi odoo, iba eiyo gesi pei ogusulone tou toowa tooso, esino iba di giligile. Esino nayo amapoo takaga, mo pei howomoo ogusuleiso," diso.

<sup>6</sup> Osoloso diba dia pei howomoo ogusume di susuga oso dia pei mapoo tulone, dibada pei tologobugulame seeso. <sup>7</sup> Esem e diayo dia odoo abo du hee mapoo debi deeso iso, diba pidilame. Esem e diba sibadeeme dibada du bakadio ee diso metamagisilone howomoo owulame seeno poogooso.

<sup>8</sup> Saimon-Pitaye goo hagee ogoloso, Yesuwo homo beiyopoo gawuloso egeesee takaso, "Lodee, amaga peegoo di, a tokenee odoo," diso. <sup>9</sup> Bei, yibolo osoloso o odoo sabolo diayo di bei giliga ogoloso diya howoogadooso. <sup>10</sup> Osoloso Saimonobolo tou teli odoo Yemes dio Yonee dio diba nosee goo hagee ogoloso diya howoogadooso. Odoo bakadio Yemes dio Yonee dio hagee Sebediyo owolo.

Osoloso Yesuye Saimon mapoo egeesee takaso, "No haga na ebi! No daga di giligeli odoo badebeiso. Esino epei hamaga no see odoo Godee mapoo gilimado sibili doloso badalaise," diso. <sup>11</sup> Osoloso diba dilesa dia du oluguloso bi susuga omapoo poogoloso, see Yesu sabolo diadeeso.

**Yesuye odoo kolo e bia moodoo**

(Matiyu 8:1-4, Maka 1:40-45)

<sup>12</sup> Beeame heeso Yesu see mi hee mapoo diso. Mi omapoo odoo kolo e bia badebeiso. Odoo ogoso Yesu ogoloso o homo beiyopoo ebiso miyomoo tugusaloso egeesee howaso, "Lodee, nayo a tekepo moodoolai goomogoga, a tekepo moodee," diso.

<sup>13</sup> Esem e Yesuye o deeso odoo egee sigilone egeesee takaso, "Ayo no tekepo palai goomogo, esiga no teke-

po pe," diso. Esem e omapoo o kolo mapoo e bia saga mauwe poogooso.

<sup>14</sup> Esem e Yesuye yo diye dolone to kitulugu sabolo egeesee takaso, "Nayo dilesa no ayo tekepo pa goo ee odoo abo mapoo na takee. Esino, nee su tekepo pa goo ee, Godee ogo odoo ogo doloso domo badeli odoo yimapoo dilesa eligi. Osoloso nee su tekepo pa omaga emegei di bi tenee, Moseseeye tei magoo goo ee dodolone, odoo susuga oso ogoloso tekepo pa ee gooleedalame," diso.

<sup>15</sup> Esino odoo susuga oso Yesuwo goo ee mi susuga mapoo oposusumo dime, odoo susuga oso dulugaso. Esem e odoo susuga oso Yesuye Godeeyo to taka ee dulame sibadeeso. Osoloso Yesuye dimapoo paigiga egee molo tekepo palame. <sup>16</sup> Esino Yesu beeame susuga dimaga peegoo dilesa, odoo koola mauwe mi mapoo dokodoo takalame diliso.

### Yesuye odoo su kakawa poogoo tekepo moodoo

(Matiyu 9:1-8, Maka 2:1-12)

<sup>17</sup> Beeame heeso Yesuye odoo susuga eligimolome, Pelisi odoo sabolo tei eligili odoo sabolo diba onosee omapoo debeiso. Odoo hagee bia Gelili mi susuga maga, osoloso abo oso Yudiya mi maga, osoloso odoo abo oso Yolusalem mi maga sibadeeso. Esem e Yesuye odoo paigiga susuga tekepo moodoogalame Godeeye kitulugu oso yibolo meleeso. <sup>18</sup> Esem e mi omapoo odoo aboso odoo su kakawa poogoo kida mapoo magoloso tosimiso. Osoloso diayo yo Yesuye badebei mapoo todilame goomogaso. <sup>19</sup> Esino odoo beiga Yesu mapoo dilei eli egele. Esem e diayo odoo su kakawa poogoo kida sabolo moso omu ma dokodoo imado palaso. Osoloso Yesuye to kemelee domo amaga seme ou toloko poogoloso tiso kida mapoo bagagoloso kida sabolo moso kulodu toosooso.

<sup>20</sup> Diayo odoo su kakawa poogoo moso omu maga toosooloso goolee, odoo egee yayo moodolai tebia doloso, Yesuye dia tei too ogoloso, odoo su kakawa poogoo mapoo egeesee takaso, "Mo odoo, nee toke-nee olo boobado buguso," diso.

<sup>21</sup> Esem e omapoo debei tei eligili odoo sabolo Pelisi odoo sabolo oso o to duloso, dieso nediliyo egeesee gooleemeleeso, "Odoo hagooso kaseme egeesee ka takayo? Yayo Godee daga dilame see, esino goo toke-nee hapeeli hedebe Godeeso," diso.

<sup>22</sup> Esem e Yesuye diayo dibada sooloo ma kulodu gooleemelee goo ee goleedoloso dimapoo egeesee takaso, "Niyo kasee maga nibada sooloo ma kulodu egeesee ka goolee malala?" <sup>23</sup> Niba odoo su kakawa poogoo hagee ege. Yimapoo goo kasee takalai oso sebe ka mololo? Ayo odoo su kakawa poogoo mapoo 'Nee tokenee ayo boobado buguso,' dee takooga, o tokenee boobado bugu niyo gooleedalame. Esino ayo yimapoo takoo, 'No toboloso nee kida toloso di,' dee takoloso, yo tobooga, amapoo odoo moodeli kitulugu molo doloso niyo gooleedalaiso. <sup>24</sup> Esino Odoo Holo amapoo kitulugu olo teneeso, mi toowa hamapoo tokenee goo hapoloso boobado bigilei goo ee niyo

ogoloso gooleedalame, ayo nimapoo eligileiso," doloso yayo odoo su kakawa poogoo mapoo egeesee takaso, "No hogabuloso nee kida toloso mosopoo di," diso. <sup>25</sup> Diayo balaga molome odoo su kakawa poogoo hogabuloso, o kida toloso o mosopoo dulone Godee mapoo goomoga poudomo diso. <sup>26</sup> Diayo odoo su kakawa poogoo toboloso di ogoloso diya howoogadooso, osoloso Godee mapoo goomoga poudooso. Osoloso diayo obulone egeesee takaso, "Iba epei goo toowa mudu opusomo di egeiso," diso.

### Yesuye Libai idoo goo

(Matiyu 9:9-13, Maka 2:13-17)

<sup>27</sup> Goo hagee koodobuloso hamamee, Yesu moso kuloduga peegoo gadiso. Esem e yayo dulone egeino, tekisi molee misigeli odoo Libai tekisi molee misigeli moso kulodu badoboome egeiso. Esem e yimapoo egeesee takaso, "Ama hamamee sibe," diso. <sup>28</sup> Esem e Libaiye bi susuga omapoo poogoloso Yesuye di hamamee diso.

<sup>29</sup> Esem e Yesuye Libai yo idoo goo omaga Libaiye o mosopoo nei toowa siso. Esem e tekisi molee misigeli odoo bei sabolo osoloso odoo abo sabolo Yesubolo nei nameleeso. <sup>30</sup> Esino Pelisi odoo sabolo osoloso tei eligili odoo sabolo oso goo hagee ogoloso gowoolone Yesu o hamamee dili odoo mapoo egeesee woosaso, "Niyo kaseega tekisi molee misigeli odoo sabolo osoloso goo tokenee teli odoo sabolo nei nologolone ka dabala?" diso.

<sup>31</sup> Esem e Yesuye nei dimapoo egeesee takaso, "Odoo paiye mauwe melesenee neli odoo mapoo dileime. Esino odoo paiye ee melesenee neli odoo mapoo dileiso. <sup>32</sup> Ayo simi hagee, Godeeyo howo woola tekepo teli odoo doloso gweli odoo ee gilimalame ka sibile. Esino tokenee teli odoo doloso gooleedoo odoo ee gilimadoloso Godee mapoo sibilame ka simi," diso.

### Nei tei doloso badalai goo

(Matiyu 9:14-17, Maka 2:18-22)

<sup>33</sup> Esem e odoo aboso Yesu mapoo egeesee takaso, "Yoneeyo hamamee dili odoo oso howo gisilone nei tei doloso debeliso. Osoloso Pelisi dia hamamee dili odoo sabolo egeseliso. Esino bei kasee maga nee hamamee dili odoo oso beeame susuga nei sabolo howo sabolo ka nalagamalala?" diso.

<sup>34</sup> Esem e Yesuye dimapoo egeesee takaso, "Edebeeyo sobo hulei beeame omapoo yo o odoo abo sabolo osee doga, diba nei nelega dabalaisomo? Haye! Diayo sobo hulei odoo sabolo hodobo dobolone goomoga sabolo nei nalaiso. <sup>35</sup> Esino beeame heeso odoo hagee dimaga peegoo ido duga, nei nelega tei doloso dabalaiso," diso.

<sup>36</sup> Esem e Yesuye dimapoo dio masi hee hagee takaso, "Edebeeyo o sedi dia koodoloso sedi nabe mapoo opodoloso koo duseli. Egeesee o sedi dia tokenee palaiso. Osoloso sedi dia koodoloso sedi nape mapoo opodoloso dusa ee sedi nabe sabolo tebileime. <sup>37</sup> Osoloso see edebeeyo wain i dia ka tolo gout be koloso

moodoo nape mapoo koo salama seli. Bei, wain i dia oso kitulugu oso ka tolo be gout koloso moodoo nape ee gabuguga, wain i ee peegoo sologo bigileiso. Osoloso ka tolo gout be koloso moodoo ee tokenee palaiso. <sup>38</sup> Esiga wain i dia ee medee ka tolo gout be koloso moodoo dia mapoo salama salai tekepo. <sup>39</sup> Esiga edebeeyo wain i nape naga, yo see wain i dia nalai koo goomegeli. Bei, yayo egeesee takalaiso, 'Wain i nape ono diya hadali,' dalaiso."

### Yu odooso hasali beeame

(Matiyu 12:1-8, Maka 2:23-28)

**6** Yu odooso hasali beeame heeso, Yesu o hamamee dili odo sabolo witi wo segei ma kulduga diadagameleeso. Osoloso o hamamee dili odo oso witi wo ko ee gooloogaloso kolo soosoo poloso ko kulodu melee ono nalagamo diadeeso. <sup>2</sup> Esem Pelisi odo abo oso goo hagee ogoloso dimapoo egeesee takaso, "Niba bei kasee maga ibada hasali beeame mapoo witi wo ka gwayo? Niyo ibada tei gababuo," diso.

<sup>3</sup> Yesuye dimapoo to nei egeesee takaso, "Deibidiye o odo sabolo houdume diayo moodoo goo ee Godeeyo toso booka mapoo hogugu niyo hesigeleyo? <sup>4</sup> Bei, Deibidiye Godeeyo tei moso ma kulodu gadileso tei wo toloso o odo sabolo neso. Esino tei wo hagee Godee ogo odo ogo doloso domo badeli odo hedebe oso nali. Esino Deibidiye o odo sabolo wo ne oso tei magoo ee gababiaso," diso. <sup>5</sup> Yesuye dimapoo see egeesee takaso, "Odo Holo ayo nibada hasali beeame ee ayo wiligi doloso badoso," diso.

### Yesuye odo dee deede seeseegedoo poogoo tekepo moodoo

<sup>6</sup> See Yu odooso hasali beeame hee mapoo, Yesu Yu odoowo howo gisili moso ma kulodu gapeleso odo mapoo eligimeleeso. Moso ee ma kulodu odo dee deede seeseegedoo poogoo badebeiso. <sup>7</sup> Esino tei eligili odo sabolo Pelisi odo sabolo oso Yesu tokenee odo dalame, Yesuwo goo ee medee balagamo silesibiso. Egeeseelone Yesuye dia hasali beeame mapoo odo dee deede seeseegedoo poogoo tekepo moodabeleso bologolone debeiso. <sup>8</sup> Esino diayo goo goolee melee Yesuye ogoloso gooleedoloso, dee seeseegedoo poogoo odo mapoo egeesee takaso, "No toboloso woola hamapoo sibilesi tebee," diso. Esem dee seeseegedoo poogoo odo oso woola dilesi tabaso.

<sup>9</sup> Osoloso Yesuye Pelisi odo sabolo osoloso tei eligili odo sabolo mapoo egeesee takaso, "Ibada tei goo oso ibada hasali beeame mapoo ogo goo takoosomo? Beeame omapoo goo tekepo talai ee tekepowa? O, goo tokenee talai ee tekepowa? Osoloso tei goo oso imapoo ibada hasali beeame omapoo odo gie badeli pidilei goo ee takoosomo? O, odo gie badeli wooloomalai goo ee takoosomo?" diso.

<sup>10</sup> Yesuye dimapoo egeesee takoloso, see dimapoo bolone odo dee seeseegedoo poogoo mapoo

egeesee takaso, "Nee dee seeseegedoo poogoo egee see hoodode," diso. Esem odo dee seeseegedoo poogoo oso o dee hoodo deme o dee see tekepo paso. <sup>11</sup> Esem Pelisi odo sabolo tei eligili odo sabolo oso goo hagee ogoloso diya komonogolone dieso nediliyo dima kulodu Yesu toloso kasee woolaisomo, doloso to mouso.

### Yesuye diye di odo 12 gilimadoo goo

(Matiyu 10:1-4, Maka 3:13-19)

<sup>12</sup> Beeame domo mapoo Yesu mubi ma dokodoo peleso gesi hedebe omapoo Godee mapoo takemeleeso.

<sup>13</sup> Esem mi hadobume Yesu yima hamamee deedeemo silesibili odo susuga gilimadoo. Osoloso dima kulodu odo 12 ono toloso, dimapoo diye di hu teneeso. Yesuye gilimadoo 12 odo dia hu hagooso.

<sup>14</sup> Saimon (odo hagee Yesuye o hu hee Pita hediso), osoloso Saimonowo omolo Endulu sabolo, osoloso Yemes, osoloso Yonee, osoloso Batolome, <sup>15</sup> osoloso Metiyu, osoloso Tomas, osoloso Alpiyeseeyo owolo Yemes, osoloso Loum gamalee odo mapoo ha teli odo Saimon, <sup>16</sup> osoloso Yemeseyo owolo Yudas, osoloso Yudas-Iskaliyot (yayo hamamee Yesu ha teli odo dimapoo tiasooso).

### Yesuye odo eligilone odo susuga tekepo moodoo

(Matiyu 4:23-25)

<sup>17</sup> Yesuye o hamamee dili odo 12 sabolo mubi dokodooga meilesi kubo mapoo debeiso. Diba omapoo meilesi dobolone egeino, Yesu o hamamee dili odo susuga sabolo, osoloso odo abo susuga Yudiya maga osoloso Yolusalem maga osoloso abei toowa palaga debeli Taya mi sabolo Saidon mi sabolo amaga sibilesi doboome egeiso. <sup>18</sup> Diayo Godeeyo to Yesuye taka ee dulame sibadeeso. Osoloso paiye dimapoo melee tekepo palame sibadeeso. Egeesee ma kulodu Yesuye odo ma kulodu bo holoso dala teneemelee ee dimaga peegoo hasisobuguso. <sup>19</sup> Odo susuga oso Yesuwo kolo sigilame goomogaso. Bei, diayo egeino kitulugu Yesu maga simi oso odo susuga tekepo moodooga neme.

### Niba goomege

(Matiyu 5:1-12)

<sup>20</sup> Yesuye o hamamee dili odo mapoo bolone egeesee takaso,

"Bi mauwe odo niba goomege.

Bei, Godeeye wiligi doloso badeli ee ma kulodu niba gasibileiso.

<sup>21</sup> Odo epedee hodia hagee do, niba goomege.

Bei, hamamee niba nei nameleso diya edigileiso.

Osoloso goohale sabolo egee pupusuga molo, niba goomege.

Bei, niyo goomogalai beeame ee nimapoo tenelaiso.

<sup>22</sup> Odo Holo mo goo maga edebeeyo niba heigoga, niba goomege, osoloso diayo niba tokenee odo doloso gooolone managa niba goomege.



<sup>23</sup> Esiga domo omapoo goomoga toowa sabolo de-bee. Bei, Kei mi ma dokodoo niyo talai nei ee nibada hu sabolo olo mopoodoo doloso moloso. Esiga niyo medee goolee, nimapoo dala teneli odoo egee bia dia amawe dio oso daga hoogoo Godee maga to tolosoko kokodo takomo sili odoo mapoo dala hedebe hageesee masi tenemeleeso."

#### Niba obeeyamo!

<sup>24</sup> "Eeye-ee! Bi bei odoo niba obeeyamo!

Bei, niso goomoga goo olo tooso.

<sup>25</sup> Eeye-ee! Niba epedee nei naloso oduguloso egee do odoo, niba obeeyamo!

Bei, hamamee nimapoo hodia goo toowa oso sibileiso.

Eeye-ee! Yiligeli odoo niba obeeyamo!

Bei, hamamee niba goohele goo sabolo dobolone pupusiga malaiso.

<sup>26</sup> Eeye-ee! Odoo susuga oso niba tekepona deli odoo niba obeeyamo!

Bei, nimapoo tekepona deli odoo egee bia dia amawe dio oso gamenee godee maga to tolosoko kokodo takomo sili odoo onosee diba tekepo odoo dee takaga meleeso."

#### Nimapoo ha teli odoo mapoo sooloo dele

(Matiyu 5:38-48; 7:12)

<sup>27</sup> "Mo to duli odoo, ayo nimapoo ka taka, odoo nimapoo ha teli mapoo sooloo dele osoloso niba hegili odoo mapoo goo tekepo moodee. <sup>28</sup> Nimapoo duwa takeli odoo dimapoo goo tekepo tolone dimapoo goomoga tenee. Osoloso nimapoo dala teneli odoo diba halo dokodoo takee. <sup>29</sup> Osoloso odoo heeso nee haleegi mapoo kobuguga, see nee haleegi hodio mapoo kobugulame heligimagalai tekepo. Osoloso odoo heeso nee kekeisoo sedi tadoduga, see yimapoo nee sedidee tenee. <sup>30</sup> Osoloso odoo heeso namapoo bi howaga yimapoo wulo tenee. Osoloso odoo heeso nee bi tolosoko toduga nayo nei yimaga see peedee dalame na takee. <sup>31</sup> Esiga edebeeyo nimapoo ogoo goo moodoolame ka gooleesomo, nei niyo dimapoo goo hedebe egesi masi moodoolai tekepo.

<sup>32</sup> Niyo hedebe niba sooloo deli odoo mapoo sooloo dolone daga, odoo aboso niba tekepo odoo dalaisomo? Haya. Bei, tokenee teli odoo oso diba sooloo deli odoo mapoo nei diayo sooloo deliso. <sup>33</sup> Osoloso niyo hedebe nimapoo goo tekepo moodeli odoo mapoo tekepo moodooga, edebeeyo niba tekepo odoo dalaisomo? Haya. Bei, tokenee teli odoo diba nosee egeesee seliso. <sup>34</sup> Niyo teneega nei tobuloso teneli odoo hedebe mapoo bi ka tenee domologa, edebeeyo niba tekepo odoo dalaisomo? Haya. Bei, tokenee teli odoo diba nosee egeesee seliso. Diayo nei talai ee goolone dia bi odoo abo mapoo tenee deliso. <sup>35</sup> Esino niba nimapoo ha teli odoo mapoo sooloo dolone ka debee. Osoloso dimapoo goo tekepo moodee. Osoloso dimapoo bi wulo wulayo tonoloso see nei talai doloso na goolee. Niyo goo hageesi tolone daga, niba

nei toowa talaiso. Osoloso niba dokodoo badeli Godeeyo owolo dalaiso. Bei, Godeeye yimapoo goomoga to koo takeli odoo sabolo osoloso tokenee teli odoo sabolo mapoo goo tekepo tonolone ka badoso. <sup>36</sup> Nibada ama Godee yo emegei sooloo dolone badoso. Esiga niba nosee emegei sooloo dolone ka debee."

#### Odoo heeyo goo tokenee haga na goolee mele

(Matiyu 7:1-5)

<sup>37</sup> "Nayo nee odoo heeyo goo ee goo mauwe na meedi, eseega nei nee goo meedileime. Osoloso nee odoo ee tokenee odoo dee na takee, eseega nei no tokenee odoo dalaimo. Osoloso nee odoo oso namapoo goo tokenee toga, nayo o tokenee goo ee boobado bigi. Nayo egeesee seega nei nee goo tokenee onosee boobado bigileiso. <sup>38</sup> Esiga nayo wulo tenemologa, no nei talaiso. Nayo odoo abo mapoo tenemologa, nei Godeeye namapoo toowa tenelaiso. Esiga Godeeye namapoo tenee goo hagooso bei molone abo peegoo misigedibileiso. Nayo bi kasee nee odoo mapoo ka teneesomo, nei Godeeye nei tebia egesi namapoo tenelaiso," diso.

<sup>39</sup> Osoloso Yesuye see dio masi egeesee takaso, "Odoo howo si oso o odoo hee howo si ido dilei tekepowa? Haya. Bei, o bakadio wulo mapoo tigidibigileiso. <sup>40</sup> Esiga holaiso goo goolee gie tomolo oso o eligili odoo oso gooleedoo ee dagadileime. Haya. Esino yo o eligili odoo oso holaiso medee kibiya eligiga, holaiso yayo gooleedoo goo ee o eligili odoo oso gooleedoo goo sabolo tebileiso.

<sup>41</sup> Nayo kasee maga nee odoowo howo mapoo gelesi pepooko egee molo medee ogolone, hee nee howo mapoo homo toowa egee molo egelega ka pagala?

<sup>42</sup> Osoloso nee howo mapoo homo toowa egee molo egele poogoloso, see nayo nee odoo mapoo takolone, 'No nee howo mapoo gelesi egee molo ayo tabigileiso,' dee takooga, no goo goolee bakadio gweli odoo. Bei, daga nee howo mapoo homo toowa egee molo tabigilei tekepo. Osoloso nayo nee odoowo howo mapoo gelesi pepooko egee molo medee ogoloso ka tabigi."

#### Homokoko maga homo o su ee goolee deliso

(Matiyu 7:16-20; 12:33-35)

<sup>43</sup> "Esiga homo ko tekepo peli oso ko tokenee koo peli. Osoloso homo ko tokenee peli oso ko tekepo koo peli. Haya. <sup>44</sup> Bei, homo susuga ee ko oso pa maga goolee deliso. Esiga pigi ko sabolo geleipi ko sabolo oso wulo homo hee mapoo ko koo peli. Haya. <sup>45</sup> Esiga odoo tekepo oso o sooloo ma kulodu goo tekepo egee molo ee o maga maga woola yiligebigiliso. Osoloso odoo tokenee oso o sooloo ma kuloduga goo tokenee ee woola yiligebigiliso. Esiga ogoo goo oso odoo sooloo ma kulodu bei mologa, o maga maga goo egeesee takamalaiso."

### Odoo bakadio oso moso tegei

(Matiyu 7:24-27)

<sup>46</sup> “Niyo kasee maga amapoo ‘Lodee, Lodee,’ dolone dobolone hee nei ayo taka goo ee telega ka poogoo-somo? <sup>47</sup> Odoo agayo amapoo sibilesa mo to duloso mesimo siloga, yo egeesee badalaiso. <sup>48</sup> Yo edebeeyo moso togolone mi nelegedi dooloso omou sooloso moso tegei egesi masi badoso. Bei, howo duwolone howo ki simi oso moso omapoo weiso. Esino moso egee dabisile. Bei, moso medee kalawa tegeiga. <sup>49</sup> Esino odoo agayo mo to duloso mesilega siloga, yo odoo heeso moso togolone omou mi nelegedi doolega, moso tegei egesi masi badoso. Bei, howo duwolone howo ki simi oso moso omapoo woome kibilega saga goboloso guobuguso.”

### Loum ha teli odoo gibadeli odoo oso tei too

(Matiyu 8:5-13)

**7** Yesu goo susuga odoo mapoo eligimelee koodobuloso see Kapenyum mi mapoo diso. <sup>2</sup> Kapenyum mi mapoo Loum ha teli odoo gibadeli badebeiso. Esino domo omapoo yo o tou teli odoo hee paiye oso talai koola taba molome egeiso. Osoloso yayo o tou teli odoo egee bia diya gweliso. <sup>3</sup> Esiga yayo Yesuye simi duloso Yu odoowo wiligi odoo tebisa abo mapoo Yesu idilame diye diso, Yesuye sibilesa o tou teli odoo ee tekepo palame. <sup>4</sup> Osoloso Yu odoowo wili-gi odoo tebisa egee bia oso sibilesa Yesu mapoo howolone egeesee takaso, “Iba diya goomogo, nayo dilesa ha teli odoo gibadeli ee pidilei. <sup>5</sup> Bei, yayo ibada odoo halo ibada howo gisili moso tegeiso.” <sup>6</sup> Esem Yesu to hagee duloso dibolo diso.

Yesu moso koola mapoo dimeleeno, ha teli gabadeli odoo oso o odoo abo diye neme, diayo sibilesa Yesu mapoo egeesee takaso, “Ha teli odoo gibadeli odoo oso namapoo to egeesee taka, nayo o moso mapoo dilei yo koo goomogogona. Bei, yo tokenee odooga, no o moso mapoo na sibiyena. <sup>7</sup> Esiga yo see nayo bado mapoo sibilei koo goomogogona. Esino yo goomogogona nayo wulo no egee bado maga toso takeyena o tou teli odoo ee tekepo palame. <sup>8</sup> Osoloso yayo see egeesee taka, yo odoo abo ma hemiduga tou tolone dia to mapoo mesiloso siliso. Osoloso yima hemi tou teli odoo abo dosogona. Esiga yayo dimapoo koo diye daga diliso. Osoloso yayo odoo hee mapoo no hamapoo sibeye daga sibiliso. Osoloso goo egee teye daga, yo see goo egee tobuloso teliso. Esiga yo goo egeesee teliga nayo see wulo hamaga badolone toso takeyena, o tou teli odoo ee weidilame.”

<sup>9</sup> Esem Yesuye ha teli odoo gibadeli odoo oso to taka duloso diya howoodooso. Osoloso odoo mooloo-goodoo yima hamamee simi omapoo bidaditoboloso dimapoo bolone egeesee takaso, “Ayo nimapoo taka, ayo Isalael mi mapoo silee ee ma kulodu odoo kibiya tei too odoo hee egesi egele,” diso. <sup>10</sup> Osoloso ha teli gibadeli odoo oso diye di odoo diayo see wedi dilesa

egeino, ha teli gibadeli odoo eyo tou teli odoo ee weidiloso badoboome egeiso.

### Yesuye sobo bauwo owolo giso holo ta maga see hogabidi

<sup>11</sup> Osoloso beeame abo olo poogoloso hamamee Yesu mi hee Nein mapoo diso. Esem o hamamee dili odoo sabolo osoloso odoo abo susuga oso yo dodomo diso. <sup>12</sup> Yesu dilesa belee osulu miyopoo dumolome odoo aboso edebeeyo bia mi maga giso holo gie kauwa ta eyo su imadoloso sibadeeso. Giso holo ta hagee sobo bau heeyo owolo hedepe oso. Osoloso odoo susuga oso sobo bau sabolo sibadeeso. <sup>13</sup> Lode-eye sobo bau hagee ogoloso yo diya sooloo dolone yimapoo egeesee takaso, “Haga na pise,” diso.

<sup>14</sup> Esem Yesuye dilesa giso holo ta eyo su magoo sa tegei homo su mapoo sigime, odoo ta imadoloso diadee diba omapoo kookoodabaso. Esem Yesuye giso holo ta yimapoo egeesee takaso, “Mo holo, ayo namapoo takooso, no tebee!” diso. <sup>15</sup> Esem giso holo yo hogabuloso badolone to kemeleeso. Esem Yesuye giso holo yo owee mapoo ido diso.

<sup>16</sup> Odoo susuga oso goo hagee ogoloso diya dio dulone Godee mapoo goomoga goo poudo demeleso. Egeesee lone diayo egeesee takaga meleeso, “Godee maga to toloso kokodo takomo sili kitulugu odoo oso imapoo peledabadoo. Osoloso Godeeye o odoo pidilame olo simidoo,” dee takaga meleeso. <sup>17</sup> Edebeeyo Yesuye goo moodoo ogoloso Yu odoowo mi Yudiya mi susuga mapoo osoloso mi abo koola omapoo opo-susumo diadeeso.

### Yonee odoo howo sauwidili oso Yesuwo goo duloso

**WOOSA**

(Matiyu 11:2-6)

<sup>18</sup> Yonee o hamamee dili odoo oso Yesuye goo tomo silee ee Yonee mapoo takaso. Esem Yoneeye goo hagee duloso o hamamee dili odoo bakadio oso dileso, Yesu mapoo hageesee woosalo egeye diso, <sup>19</sup> “No tei Keliso iyo hagee bamolo osomo? O, iyo odoo hee bamalaiyo?” diso.

<sup>20</sup> Esem Yoneeye hamamee dili odoo oso dilesa, Yesu mapoo egeesee takaso, “Yonee odoo howo sauwidili oso iba namapoo sibeye dolone egeesee taka, ‘No tei Keliso iyo bamelee osomo? O, iyo see odoo hee bamalaiyo?’ dee taka,” diso.

<sup>21</sup> Esino beeame domo omapoo Yesuye odoo paigiga sabolo osoloso odoo bo holo paladee sabolo osoloso odoo howo siliga sabolo tekepo moodoomo sileeso. <sup>22</sup> Yayo egeeseemo silone Yonee o hamamee dili odoo mapoo egeesee takaso, “Niba see wedi dilesa Yonee mapoo niyo egei goo sabolo osoloso niyo du goo sabolo takee. Bei, odoo howo siliga oso see medee ogowa. Osoloso odoo kido tigidiba sabolo see tekepo poloso silesiboso. Osoloso odoo kolo e bia sabolo tekepo poloso silesiboso. Osoloso odoo dulu tabaga nosee tekepo poloso to taka dulugamo silesiboso. Osoloso odoo wedia sabolo hogooga buloso see silesi-

boso. Osoloso to tekepo hagee bi mauwe odoo oso duluga moloso. <sup>23</sup> Esiga odoo agayo ayo goo moodoo ee ogoloso diayo amapoo tei too goo ee pegelega poogooga, Godeeye dimapoo goomoga goo tenelaiso," diso.

**Yesuye Yonee odoo sauwidili eyo goo taka**  
(Matiyu 11:7-19)

<sup>24</sup> Yonee o hamamee dili odoo oso see wedi dime Yesuye odoo mapoo Yoneeyo goo ee takalame bei mooloogooso. Osoloso yayo egeesee takaso, "Niba miwe poogoo mi mapoo ogoogo agalame ka diyo? Pooso siboga obuso dabisa ee agalame ka diyo? <sup>25</sup> Niba edebeeyo dugo tekepo kaloso badoboome ee agalame ka diyo? Haye. Bei, dugo tekepo kalakali odoo ee wiligi odoo oso debeli moso tekepo mapoo debeli. <sup>26</sup> Esino niba wulo Godee maga to toloso kokodo takomo sili odoo ee agalame ka diyo? O. Niyo dileso egei odoo Yoneeye Godee maga to toloso kokodo takomo sili odoo daga hoogoo debei yayo dagadiso. <sup>27</sup> Bei, Godeeyo to booka mapoo hogugu oso egeesee egee takoo, o goo ee takooso, 'Ayo mo to tosili odoo yo daga malalo diye dalaiso. Yayo nee eli hoodo magalame.'

<sup>28</sup> Esiga ayo nimapoo taka, odoo daga hoogoo debei susuga ee Yoneeye daga dileso badoso. Esino Godeeye wiligi doloso badeli mapoo odoo wuluge oso Yonee daga dileso ka badoso," diso.

<sup>29</sup> Odoo susuga sabolo osoloso tekisi molee misigeli odoo abo sabolo to hagee duloso Godeeyo goo ee tekepo diso. Bei, diba nose Yoneeye howo sauwidigaso. <sup>30</sup> Esino Pelisi odoo sabolo osoloso tei eligili odoo sabolo oso Godeeye goomoga goo diayo ee talai gowoolone diba howo sauwidigelega poogooso.

<sup>31</sup> Osoloso Yesuye see egeesee takaso, "Epedee domo hamapoo egee do odoo ee odoo kasi masiyo?

<sup>32</sup> Diba holaiso masi go domo mapoo dobolone emegei dimapoo nei takoo nei takoo dolone dobolone egeesee takagameliso,

'Iyo goomoga kosaiya poume niba hebele, osoloso iyo gohele kosaiya poume niba pupusigele.'

<sup>33</sup> Niba odoo egesi masi doso. Bei, Yonee odoo howo sauwidili oso simi ee yo wo sabolo wain i sabolo namo sile. Esino niyo yo bo holo paladoo dee takeliso. <sup>34</sup> Osoloso hamamee Odoo Holo anosee olo simiso. Ayo sibilesi wo sabolo wain i sabolo namo siloga, niyo a wo sabolo yugune sabolo dooboo nali odoo deliso. Osoloso niyo a tekisi molee misigeli odoo sabolo osoloso tokenee teli odoo sabolo hedebe doloso ka badeli deliso. <sup>35</sup> Esino odoo agayo Godeeye goo goolee tekepo gooledoloso tomo suloga, yayo Godeeye goo goolee ee tekepo dolone ka eligiso," diso.

**Tokenee teli sobo oso Yesuwo homo hapoo**

<sup>36</sup> Beeame heeso Pelisi odoo Saimonye Yesu idoloso o moso mapoo nei nalame diso. Esemee Yesu Saimonowo moso mapoo nei nalame biaso. <sup>37</sup> Mi omapoo goo tokenee teli sobo hee badebeiso. Esino yayo

Yesuye Pelisi odoowo moso mapoo nei namelee goo ee duloso sisigageli i medee tekepo yoso moodoo howogi mapoo salamasoloso tosimiso. <sup>38</sup> Osoloso Yesuwo miligi maga gauwuloso pusulone o didawoso Yesuwo homo balagieso. Osoloso yayo see Yesuwo homo mapoo o wudu oso tolone adameleeso. Osoloso sisigageli i medee tekepo oso Yesuwo homo mapoo soomeleeso.

<sup>39</sup> Osoloso Pelisi odoo Saimonye goo hagee ogoloso egeesee goolee meleeso, "Odo hagee tei Godee maga to toloso kokodo takomo sili odoo oso diepi, sobo yo sige medee hoodo egeliyo. Bei, sobo hagee goo tokenee teli sobo," diso.

<sup>40</sup> Esemee Yesuye Pelisi odoo mapoo egeesee takaso, "Saimon, ayo namapoo goo takalai, a goomogo," diso. Esemee Saimonye egeesee takaso, "Eligili odoo, takee," diso.

<sup>41</sup> Esemee Yesuye yimapoo egeesee takaso, "Odo heeso odoo bakadio mapoo molee teneeso. Egeeseelone yayo odoo hee mapoo molee ko 50 tenelone, odoo hee mapoo hedebe molee ko 50 teneeso. <sup>42</sup> Esino hamamee odoo bakadio hagee bia dimapoo molee mauwe poogoome, nei o hedebe egesi yimapoo tenelega poogooso. Esemee bi eyo amameeye goo hagee ogoloso dimapoo egeesee takaso, 'Bige boobadobigi,' diso. Esiga odoo bakadio hagee ma kulodu odoo hee kaso bi eyo ama diya ka gooleebuguba?" diso.

<sup>43</sup> Esemee Saimonye nei yimapoo egeesee takaso, "A goolee, molee toowa too odoo oso ama diya goolee malaiso," diso.

Esemee nei Yesuye Saimon mapoo egeesee takaso, "Nayo tei goo takoo," diso.

<sup>44</sup> Yesuye sobo mapoo bolone Saimon mapoo egeesee takaso, "No sobo hagee ege! Ayo nee moso mapoo sibume, nayo mo homo hapalame howo amapoo tenele. Esino sobo hagooso o didawoso mo homo hapoloso see o wuduso mo homo taso. <sup>45</sup> Osoloso ayo nee moso sibume nayo goomogolone a edele. Esino ayo nee moso mapoo simi domo omaga sobo hagooso mo homo mapoo adamelee koodobile.

<sup>46</sup> Osoloso nayo olipi i oso mo wiligi mapoo soole. Esino sobo hagooso sisigageli i medee tekepo oso mo homo mapoo sooso.

<sup>47</sup> Esiga ayo namapoo taka. Sobo hagee o goo tokenee susuga olo hapoloso boobado buguso. Esiga sobo hagooso a diya goolee goo ee weliga yiligebuguso. Esino odoo agayo ayo o goo tokenee pepooko hedebe hapoloso boobado buguga, yayo a goolee goo ee hagee toowanee," diso.

<sup>48</sup> Osoloso Yesuye sobo omapoo egeesee takaso, "No nee goo tokenee susuga ee olo hapoloso boobado buguso," diso.

<sup>49</sup> Esemee odoo abo yibolo hodobo dobolone nei nalaga melee odoo oso goo hagee ogoloso dieso nediliyo dima kulodu egeesee takaga meleeso, "Odo hagee odoo ogumo? Yayo goo tokenee hapoloso kasee boobadobugudo domo ka silosomo?" diso

<sup>50</sup> Diayo egeesee takomolome Yesuye sobo yimapoo egeesee takaso, "Nayo tei too goo maga badoboso kookaiyo gie badeli nayo olo tooso. Esiga no goomoga sabolo di," diso.

### Sobo aboso Yesubolo di

**8** Goo hagooso dilesa koodobume, Yesuye to tekepo Godeeye wiligi doloso badeli goo ee eligimo silone, mi hee maga mi hee mapoo du domo silesibiso. Osoloso o hamamee dili odoos 12 yibolo hodobo sileeso. <sup>2</sup> Osoloso sobo paigiga Yesuye tekepo moodoo sabolo osoloso sobo bo holo paladee Yesuye tekepo moodoo oso Yesubolo sileeso. Sobo egee bia hagooso: Meli, o hu hee Magadalin. Yesuye sobo hageeyo kuloduga bo holo 7 peegoo hasisobuguso. <sup>3</sup> Osoloso sobo hee Helodeeyo moso bali odoos hee Kusayo osobo Yowana, osoloso Susana, osoloso sobo abo dibolo silesibiso. Sobo hagee bia oso Yesu sabolo osoloso o hamamee dili odoos sabolo dimapoo diayo dia molee oso diba pidimo silesibiso.

### Witi wo ko segei maga dio masi taka

(Matiyu 13:1-9, Maka 4:1-9)

<sup>4</sup> Odoos susuga mi opusomo opusomo di maga sibilesa mooloogoodeme Yesuye dio masi hamaga opo-sususo, <sup>5</sup> "Beeame heeso odoos hee witi wo ko segalame diso. Yo witi wo ko sogomo sileeme, ko abo eli domo mapoo misigedibaso. Esemee edebeeyo eli amaga silesibulone witi wo ko dia homosoo topoomo dime sóso sibilesa neso. <sup>6</sup> Esemee witi wo ko abo ee yugogisi mi mapoo misigedibaso. Osoloso bou gasibileso palame seeno haga booloogelega wediaso. Bei, yugogisi mi ee ma kulodu howo mauwega. <sup>7</sup> Osoloso witi wo ko abo obu ma kulodu misigedibaso. Esino haga booloogelega saga paladeeso. Esino oso polone obu sabolo palaga tiso tiadolone witi wo susuga wediaso. <sup>8</sup> Osoloso witi wo ko abo mi tekepo mapoo misigedibaso. Osoloso bou pisoloso kauwuloso ko diya palagaso. Esemee witi wo ko susuga oso ko pa homokoko 100 egesi oso palagaso."

Yesuye to hagee takoloso tobudulone toso neligidi egeesee takaso, "Odoos niba dulubolo, esiga ayo hagee takoo medee hoodo dui!" diso.

### Dio masi taka goo eyo bei

(Matiyu 13:10-23, Maka 4:10-20)

<sup>9</sup> Yesuwo hamamee dili odoos oso Yesu mapoo egeesee takaso, "Dio masi taka goo hageeyo bei kasiyo?" diso. <sup>10</sup> Esemee Yesuye nei dimapoo egeesee takaso, "Niyo Godeeye wiligi doloso badeli goo ee ogoloso gooleedaiso. Bei, daga Godeeye wiligi doloso badeli goo ee mada meleeso. Esino epei nimapoo woola ka yiligebuguso. Esino odoos abo mapoo ayo beeame susuga dio masi takeliso. Bei, 'diayo ogoloso medee kibiya egelega pagalame. Osoloso diayo duloso goo eyo bei medee kibiya gooleedelega pagalame.'

<sup>11</sup> Esiga dio masi goo eyo bei hagooso: Witi wo ko ee Godeeyo to oso. <sup>12</sup> Esiga odoos abo witi wo ko eli domopoo misigediba egesi masi doso. Diba to tekepo duliso. Esino Godeeyo to hagee dibada sooloo ma kulodu egee molo ee boobado bigilame Saitenso dimapoo boobado bigili goo teneliso. Bei, diayo to omapoo tei tolosa gie badeli teyaga. <sup>13</sup> Esiga odoos abo witi wo ko yugogisi mi mapoo misigediba egesi masi doso. Esiga diba Godeeyo to taka duloso goomoga sabolo medee teliso. Esino witi wo ko oso yugogisi mi mapoo polone o too medee meilega poogoo egee, diba onosee egeesee seliso. Godeeyo to oso dibada sooloo ma kulodu too medee koo meili. Osoloso diayo Godeeyo to duloso beeame deiyepo mapoo wulo tei teliso. Esino diayo Godeeyo to mapoo tei too maga, hegi goo sabolo dala goo sabolo oso dimapoo siboga, diayo Godeeyo to mapoo tei too goo ee saga pegeliso. <sup>14</sup> Osoloso odoos abo witi wo ko oso weti kawe kadee ma kulodu misigediba egesi masi doso. Diba Godeeyo to duloso to ee teliso. Esino mi toowayo gie badeli goolee sabolo, osoloso bi bei doloso dabalai goo gweli sabolo, osoloso dibada su oso goomooga goo ee goolee sabolo diadolone dibada tei too tokenee peliso. Goo egeesee maga diayo tei too goo oso homokoko masi koo peli. <sup>15</sup> Osoloso odoos abo witi wo ko mi tekepo mapoo misigediba egesi masi doso. Diayo dibada sooloo ma kuloduga tekepo goo gweli sabolo osoloso goomooga sabolo Godeeyo to duloso dibada sooloo ma kulodu medee tei teliso. Osoloso diayo o to kibiya kookoodoloso, dobolone homokoko masi diya peliso."

### Mo to medee dui

(Maka 4:21-25)

<sup>16</sup> "Edebeeyo keme poulosa tolo oso koo gagali, osoloso mada koo mageli. Yo keme poulosa woola mapoo pou mageliso, edebeeyo moso kulodu gasibileso gadeebugu ee agalame. <sup>17</sup> Bei, goo susuga epedee mada egee molo, see hamamee odoos susuga oso agalame woola peledabalaiso. Osoloso odoos susuga oso koo duli goo ee see odoos susuga oso dulame woola yiligebigileiso. <sup>18</sup> Mo to hagee niyo medee dui. Bei, to taka medee duli odoos mapoo Godeeye goo goolee tekepo tenelaiso. Esino edebeeyo eyo nediliyo yo Godeeye wiligi doloso badeli goo ee yo gooleedoo doloso mo to dulega poogooga, Godeeye yimapoo goo goolee pepooko egee molo see eyo peedee dalaiso," diso.

### Yesuwo owee sabolo omolo dio sabolo

(Matiyu 12:46-50, Maka 3:31-35)

<sup>19</sup> Beeame heeso Yesuwo owee sabolo omolo dio oso Yesu agalame sibadeeso. Esino odoos bei diya mooloogoodoloso ka doboome, diba Yesuye badebei mapoo hodu dilei tebile. <sup>20</sup> Esemee odoos heeso diba ogoloso, Yesu mapoo egeesee takaso, "Noowee sabolo osoloso nomolo dio sabolo oso peegoo no agalame balagamoloso," diso. <sup>21</sup> Esemee Yesuye odoos mooloogoodoo mapoo nei egeesee takaso, "Edebeeyo Godeeye eligi

goo ee duloso mesimo silesiboga, diba mo wee dio os-  
oloso molo dio oso," diso.

**Yesuye i sabolo howo ki sabolo hamaga taka**

(Matiyu 8:23-27, Maka 4:35-41)

<sup>22</sup> Beeame heeso Yesuye o hamamee dili odoo dimapoo egeesee takaso, "Iba abei hodiokoo dalo soowoomo," diso. Esemе diba du mapoo bulumaloso soowadeeso. <sup>23</sup> Diba abei domopooga damolome, Yesu tila poogoome tiaso. Esemе haga booloogelega i toowa sibume, abei omapoo howo ki toowa simiso. Esemе howo ki toowa oso sibulone dibada du ma kulodu howo sasoo oso diba dia du sabolo howomoo owulame siso.

<sup>24</sup> Esemе Yesu o hamamee dili odoo oso dilesio, Yesu tidilone egeesee takaso, "Wiligi odoo, iba howomoo owuloso wedilame see!" diso.

Esemе Yesu tia hogabuloso tobudulone i sabolo howo ki sabolo koodobilame to kitulugu sabolo takaso. Esemе i sabolo howo ki sabolo simi saga omapoo koodobiaso. <sup>25</sup> Esemе Yesuye o hamamee dili odoo dimapoo egeesee takaso, "Niyo tei too kasomo?" diso.

Esemе Yesuwo hamamee dili odoo oso goo hagee ogoloso howoogadoloso obugulone diesono egeesee takaga meleeso, "Odoо hagee odoo ogumo? I sabolo howo ki sabolo o to duloso koodobiaso," dee takaga meleeso.

**Yesuye odoo bo holo pala ee tekepo moodoo**

(Matiyu 8:28-34, Maka 5:1-20)

<sup>26</sup> Osoloso Yesu o hamamee dili odoo sabolo Gelili mi maga abei daloso Gelasa mi mapoo peledabaso.

<sup>27</sup> Yesu du maga widi pee mapoo pubalogolone egeino, odoo bo holo pala oso yo tugodalame sibume egeiso. Odoо hagee daga hoogoo doбуdu bododiwe silone beeame susuga odoo bi mapoo badeli. <sup>28</sup> Bei, bo holo oso kitulugu oso yimapoo toga edebeeyo ki tiso yo tialogoloso mageliso. Esino bo holoso kitulugu oso ki tiso tialogoloso magoo ee kookoobuguloso odoo ee idoloso doбуdu diliso. Esino odoo hagooso Yesu ogoloso miyomoo gasuwoloso gwa sabolo tiamolone toso neligidi yimapoo egeesee takaso, "Dokodoo badeli Godeeyo owolo Yesu, nayo amapoo ogoo goo moodoolame ka simiyo?" diso. Osoloso yayo Yesu mapoo howoolone see egeesee takaso, "Nayo amapoo dala na tenee," diso. Odoо bo holo pala oso to hageesee taka. Bei, daga Yesuye bo holo odoo ma kulodu egee bado mapoo takolone peegoo gasibeye, dee takeme ka taka.

<sup>30</sup> Esemе Yesuye yimapoo egeesee takaso, "Nee hu ogumo?" diso.

Esemе yayo to nei egeesee takaso, "Ibada hu ee Bei," diso. Bei, bo holo susuga oso yima kulodu doso. <sup>31</sup> Esemе bo holo odoo ma kulodu debei oso egeesee takaga meleeso, "Nayo iba Dou mi mapoo na seesee peegee," dee takaso.

<sup>32</sup> Esemе beeame omapoo, esia ma dokodoo be hu susuga oso mooloogoo doloso, mi nalagamo silesi-

biso. Esemе bo holo odoo ma kulodu debei oso Yesu mapoo howoolone egeesee takaso, "Iba be ma kulodu galaga di dee takee," diso. Esemе Yesuye dimapoo egeesee takaso, "Niba be ma kulodu galaga dilei soowa!" diso. <sup>33</sup> Esemе bo holo susuga oso odoo ma kuloduga peegoo galaga dilesio see be ma kulodu galaga diso. Esemе be susuga oso godobia maga kukolo meilesio, howomoo wediaso.

<sup>34</sup> Esemе be bali odoo oso goo hagee ogoloso kukulo dilesio dia mi mapoo osoloso mi pepooko abo mapoo goo egee takomo diso. <sup>35</sup> Esemе odoo susuga oso goo hagee duloso ee agalame sibadeeso. Diba sibilesio egeino, bo holo pala odoo ee tekepo poloso Yesuwo homo beiyopoo badolone goo goolee tekepo tolosio dugo kaloso badoboome egeiso. Esemе diba diya ebigaso. <sup>36</sup> Esemе Yesuye odoo bo holo pala ee tekepo moodoome egei odoo oso diayo egei goo ee agalame sibadee odoo dimapoo oposususo. <sup>37</sup> Esemе Gelasa mosobia odoo susuga sabolo osoloso koola omapoo debeli odoo susuga sabolo oso Yesu mapoo egeesee takaso, "No mi hamaga saga peegoo di," diso. Bei, diba Yesuye goo moodoo mapoo ogoloso diya obugume. Esemе Yesu dilame yo du mapoo dapagaso.

<sup>38</sup> Esemе odoo bo holo pala Yesuye tekepo moodoo oso Yesubolo dilame goomogaso. Esino Yesuye yimapoo egeesee takaso, <sup>39</sup> "Haye. No abolo na sibe. No nee mi mapoo see wedi dilesio Godeeye namapoo goo toowa moodoo goo ee oposisi," diso. Esemе odoo yo o mi mapoo see wedi dilesio, Yesuye yo tekepo moodoo goo ee oposusumo sileeso.

**Yesuye Yailaseeyo owolo ta ee see hogabilame tekepo moodoo sabolo osoloso sobo paiye tekepo moodoo goo**

(Matiyu 9:18-26, Maka 5:21-43)

<sup>40</sup> Yesu see abei hodiokoo dalo sibume, yo bolone debei odoo susuga oso yayo simi ogoloso diya goomogaso. <sup>41</sup> Esemе omapoo haga booloogelega odoo hee, Yu odoo dia howo gisili moso gibadeli odoo taba, Yailaseeye, sibilesio Yesuwo homo beiyopoo gawusoloso badolone Yesu mapoo howoolone egeesee takaso, "No mo mosopoo sibe! <sup>42</sup> Bei, mo sobo holo hedebe, o dugo 12, paiye oso olo talame soomoloso," diso.

Esemе Yesuye Yailaseeyo mosopoo dumolome eli domopoo odoo susuga oso yima hodу diya mooloogoo doloso dulone nei halagabugu nei halagabugu domo diadeeso. <sup>43</sup> Osoloso odoo mooloogoo doloso diadee ee ma kulodu sobo hee aso wooloomaloso badebei sabolo diso. Yo aso wooloomaloso badebei ososee dugo 12 poogooso. Esino odoo heeso yo tekepo moodolai tebile. <sup>44</sup> Esino sobo hagooso Yesu dumolome, mada miligiyopooga sibilesio Yesuwo dugo su mapoo sigeme, aso woolooma oso sawo soomelee omapoo saga koodobiaso.

<sup>45</sup> Esemе Yesuye egeesee takaso, "Odoо agayo a ka sigoba?" diso.

Esino odoo susuga oso Yesu sigile doloso diya pulugume, Pitaye Yesu mapoo egeesee takaso, "Wiligi odoo, odoo susuga oso nobolo hodobo dulone no ka sigo domo du," diso.

<sup>46</sup> Esemé Yesuye nei egeesee takaso, "Haye. Egeesee sele. Odoo heeso a ka sigiwa. Esemé odoo weidilame moodeli kitulugu ama melee oso peegoo di mawo gooleedoso," diso.

<sup>47</sup> Sobo hagooso goo moodoo ee mada magalai tebile doloso gooleedoloso kikiliga sabolo dilesa, Yesu-wo homo beiyopoo gasuwuloso badebeiso. Osoloso Yesuye sobo yo weidilame moodoo goo sabolo, osoloso yayo Yesu sige goo ee oposusume odoo susuga oso duso. <sup>48</sup> Esemé Yesuye sobo yimapoo egeesee takaso, "Mo sobo holo, no tei too maga no olo tekepo paso, esiga no mesie sabolo di," diso.

<sup>49</sup> Osoloso Yesuye sobo yimapoo to takomolome, odoo heeso Yailaseeyo moso abaga sibilesa, Yailas mapoo egeesee takaso, "Nee sobo holo olo ta moloso. Esiga nayo eligili odoo hamapoo wulo goo mauwe na ido sibe," diso.

<sup>50</sup> Esino Yesuye goo hagee duloso Yailas mapoo egeesee takaso, "No haga na ebi, wulo amapoo tei te. Egeeseega nee sobo holo ta egee molo see weidileiso," diso.

<sup>51</sup> Diba dilesa mosopoo doboome, Yesuye dulone hedebe Pita, Yonee, Yemes, osoloso sobo holo eyo owee dio ama dio ono gilimadoloso, moso kulodu galagadiso. <sup>52</sup> Diba moso kulodu galagadilesa egeino, odoo susuga oso sobo holo ta ee halo pupusuga molome egeiso. Esemé Yesuye dimapoo egeesee takaso, "Niba egee pupusuga molo epedee omapoo koodobie. Bei, sobo holo yo koo ta moloso. Esino yo wulo tia moloso," diso.

<sup>53</sup> Esemé Yesuye egeesee taka duloso diba yiligaso. Bei, sobo holo oso ta diba olo egeiga. <sup>54</sup> Esino Yesuye sobo holo ta eyo dee mapoo toloso yimapoo egeesee takaso, "Sobo holo, no tebee," diso. <sup>55</sup> Esemé sobo holo ta ee o gie badeli see wedi sibume, yo hogabuloso tabaso. Esemé Yesuye dimapoo egeesee takaso, "Sobo holo mapoo nei tenee," diso. <sup>56</sup> Esino sobo holo eyo ama dio owee dio goo hagee ogoloso diya howoogadooso. Esemé Yesuye dimapoo egeesee takaso, "Niso egei goo hagee odoo abo mapoo na takee," diso.

### Yesuye o hamamee dili odoo 12 diye di

(Matiyu 10:5-15, Maka 6:7-13)

**9** Yesuye o hamamee dili odoo 12 gilimadoloso dimapoo kitulugu teneeso, diayo bo holo odoo ma kuloduga peegoo hasisobugu domo silesibulone odoo paigiga sabolo tekepo moodoo dalame. <sup>2</sup> Osoloso yayo diba diye diso, diayo dilesa Godeeye wiligi doloso badeli goo ee odoo mapoo eligimo silesibulone, odoo paigiga sabolo tekepo moodoo dalame. <sup>3</sup> Osoloso yayo dimapoo egeesee takaso, "Niyo dulone, susu, osoloso o, osoloso wo, osoloso molee, osoloso kali bi bakadio na todi, wulo hedebe todi. <sup>4</sup> Niba mi

omapoo dilesa peledobooga, omapoo edebeeyo niba o moso mapoo ido pologa, moso hedebe omapoo tia melee. Osoloso niyo mi omaga mi hee mapoo dulone, mi egee wulo poogoo du domo silesibe. <sup>5</sup> Osoloso niyo mi hee mapoo dilesa edebeeyo niba o moso mapoo ido pelega poogooga, niba mi egee poogoo dulone, nee homo mapoo basago mologa omapoo tegene peegee, Godeeye komonolone dimapoo dia goo toke-nee eyo nei tenelai goo ee gooleedalame," diso. <sup>6</sup> Osoloso diba see diadeeso. Diba mi hee maga mi hee mapoo du domo silesibulone, Godeeyo to tekepo takomo silesibiso. Osoloso odoo paigiga susuga see tekepo moodoo domo silesibiso.

### Helodeeye goo tiadoo

(Matiyu 14:1-12, Maka 6:14-29)

<sup>7</sup> Yesuye moodoomo sili goo susuga ee Gelili mi ee bali odoo Helodee duso. Esemé goo hagee duloso yo diya goo tiadooso. Bei, odoo aboso Yesuwo goo mapoo egeesee takaso, "Yo Yonee odoo howo sawidili ta maga see ka hogabiadoo," diso. <sup>8</sup> Osoloso odoo aboso egeesee takaso, "Yo Ilayadoo." Osoloso odoo aboso egeesee takaso, "Yo Godee maga to toloso kokodo takomo sili odoo hee daga badebei oso ta maga hogabuloso see ka simidoo," diso. <sup>9</sup> Esemé Helodeeye goo hagee duloso egeesee takaso, "Yonee ayo wooloomeye neme olo wooloomaso. Esino ayo goo toowa hagee dumolo ee agamo goo ee dumoloso?" diso. Yo diya goo tiademe, yayo Yesu agalame diya goomogaso.

### Yesuye odoo 5000 mapoo nei pi

(Matiyu 14:13-21, Maka 6:30-44, Yonee 6:1-14)

<sup>10</sup> Yesuye diye di odoo 12 diba see wedige sibilesa, goo diayo moodoo sabolo osoloso goo diayo eligi susuga ee Yesu mapoo oposususo. Osoloso Yesuye diba gilimadoloso Betesaida mi mapoo dibosomo dabalame diadeeso. <sup>11</sup> Esino odoo susuga oso goo hagee duloso diba nosee hamamee diadeeso. Esemé diayo simi Yesuye ogoloso diba gilimadoloso dimapoo Godeeye wiligi doloso badeli goo ee eligilone odoo paigiga sabolo weidilame tekepo moodoo demeleeso.

<sup>12</sup> Yesu yo egeeseemo sileeme, o hamamee dili odoo oso habe sibilesa yimapoo egeesee takaso, "Odoo susuga hagee epedee diye dee, diba mosobia koola omapoo dilesa dieso nei nalai sabolo moso tilei sabolo ee esilame. Bei, mi iyo hagee do mapoo nei iyo nalai sabolo moso iyo tilei sabolo mauwedoo," diso.

<sup>13</sup> Esemé Yesuye dimapoo nei egeesee takaso, "Niyo dimapoo nei tenee," diso.

Esemé diayo nei egeesee takaso, "Odoo hagee diya bei. Esino imapoo wo si hedebe dee tiadoo sabolo di bakadio sabolo moloso. Esino nayo imapoo nei abo talame diye doloso ka takala?" diso. <sup>14</sup> Bei, beame omapoo mooloogoodoo ee ma kulodu gisowe hesiga ee 5000.

Esemé Yesuye o hamamee dili odoo dimapoo egeesee takaso, "Odoo susuga nei nalame odoo 50

egesiso mooloogoodolo ka buluma, odoo 50 egesiso mooloogoodolo ka buluma dee takee," diso. <sup>15</sup> Esemee odoo susuga olo nei nalame egeesee bulumamo diso. <sup>16</sup> Osoloso wo si dee tiadoo sabolo di bakadio Yesuye toloso, Kei mi ma dokodoo bolone nei pidilame goomoga goo dokodoo takaso. Osoloso yayo wo popeiloso di bakadio agisaloso, o hamamee dili odoo mapoo piso, see diayo odoo susuga mapoo pilame. Esemee diayo wo si popei sabolo di hwei sabolo odoo susuga mapoo piso. <sup>17</sup> Esemee odoo susuga nei ne oso diya edigime nei hosudelega abo poogooso. Osoloso diayo nei naloso abo poogoo ee Yesu o hamamee dili odoo oso misigamo dilesa bou tegei mapoo soo 12 egesi metamagisaso.

### Pitaye Yesuwo goo yiligebugu

(Matiyu 16:13-19, Maka 8:27-29)

<sup>18</sup> Beeame heeso Yesu obusomo dokodoo takolone badoboome, o hamamee dili odoo oso yimapoo sibadeeso. Esemee Yesuye dimapoo egeesee takaso, "Edebeeyo a odoo ogu deliyo?" diso.

<sup>19</sup> Esemee diayo nei Yesu mapoo egeesee takaso, "Odoo aboso taka no Yonee odoo howo sauwidili dee takeliso. Aboso taka no Ilaya deliso, osoloso odoo aboso taka no Godee maga to toloso kokodo takomo sili odoo hee daga badebei oso ta maga hogabuloso see ka simidoo, dee takeliso."

<sup>20</sup> Esemee Yesuye nei dimapoo egeesee takaso, "Esino nei niyo a odoo ogu deliyo?" diso.

Esemee Pitaye nei egeesee takaso, "No Godeeye hudi magoo Kelisoso," diso.

<sup>21</sup> Esemee see Yesuye nei o hamamee dili odoo dimapoo egeesee takaso, "Niyo odoo abo mapoo takolone a Keliso dee na takee," diso.

### Yesuye eyo talai goo ee taka

(Matiyu 16:21, Maka 8:31)

<sup>22</sup> Osoloso see tobu Yesuye o hamamee dili odoo dimapoo egeesee takaso, "Odoo Holo, a dala toowa bei talaiso. Osoloso Yu odoowo wiligi odoo tebisa sabolo, tei moso wiligi odoo tebisa sabolo, tei eligili odoo sabolo oso a diya gowoolone pagalaiso. Osoloso edebeeyo a teli mapoo magalaiso. Esino beeame bakadio midoo ma kulodu ta moloso beeame hee mapoo see hogabileiso."

### Yesuye yayo di hamamee dilei goo ee eligi

(Matiyu 16:24-28, Maka 8:34-38)

<sup>23</sup> Yesuye see odoo susuga mapoo egeesee takaso, "Edebeeyo ayo di hamamee sibilei goomogoga, yo daga eyo goomoga goo tomo sili ee poogoloso, beeame susuga ma kulodu eyo talai sabolo dala toowa talai goo sabolo medee mopoodoo doloso ama hamamee ka sibe. <sup>24</sup> Osoloso odoo agayo o gie badeli eyo nediliyo pidilame seega, yo o gie badeli ee osugobal-aiso. Esino odoo agayo mo goo maga o gie badeli pee-goo magooga, yo badoboso kookaiyo gie badeli talaiso. <sup>25</sup> Esino odoo agayo mipoo toowa hamapoo

badolone, eyo goomoga goo susuga tomo siloso, hedebe gie badeli goo ee telega dagaduga, yo see ogoo goo talaisomo? Mauwe. <sup>26</sup> Osoloso odoo agayo abolo osoloso mo to mapoo gowooga, Odoo Holo ayo toowa doloso badeli goo omaga mo gadeebugu sabolo, osoloso mo Maye toowa doloso badeli goo omaga o gadeebugu sabolo, osoloso Godeeyo momaiye oso toowa doloso debei omaga gadeebugu sabolo sibilesa nei diba gowoolaiso. <sup>27</sup> Esiga ayo nimapoo ka taka. Ni-ma kulodu odoo abo olo doso, diba Godeeye wiligi doloso badalai beeame oso simi ogoloso, hamamee wedileiso," diso.

### Yesu o su opusomo di

(Matiyu 17:1-8, Maka 9:2-8)

<sup>28</sup> Osoloso beeame 8 egesi poogoloso, hamamee Yesuye dulone, Pita, Yonee, osoloso Yemes esee gili-madoloso mubi dokodoo dokodoo takalame palaso.

<sup>29</sup> Yesuye Godee mapoo dokodoo takomolome, o mudu opusomo doloso o dugo diya heliye poloso omaga poniso. <sup>30</sup> Esemee haga booloogelega, Ilaya dio Moses dio galaga sibilesa Yesubolo to kemeleeso.

<sup>31</sup> Diayo Kei mi diya gadeebugu sabolo peledoboloso Yesuye Godeeyo to dodolone Yolusalem mapoo dilesa talai goo ee oposususo. <sup>32</sup> Pita o odoo abo sabolo tiesaloso hogoogabuloso keesee egeino, Yesu yayo toowa doloso badeli goo omaga o gadeebugu sabolo tobudulone odoo bakadio sabolo to kesamolome egeiso. <sup>33</sup> Odoo bakadio oso Yesubolo to kesameleso dilame doboome, Pitaye medee goo goolega Yesu mapoo egeesee takaso, "Wiligi odoo, iba hamapoo dabalai tekepo. Esiga iyo waseme bakadio hedebe di tegegelaio. Hee nee, hee Moseseyo, osoloso hee Ilayayo," diso.

<sup>34</sup> Pita to osee komolome, koloboso sibilesa diba gidiseme, diya ebigaso. <sup>35</sup> Osoloso kolobo maga toso egeesee taka, "Hagee mowolo, ayo hesia oso. Esiga o to medee dui!" diso. <sup>36</sup> Kolobo ma kuloduga to taka koodobuloso, diayo Yesu obusomo tobudume egeiso. Pita diayo mubi ma dokodoo egei goo ee odoo abo mapoo saga takele.

### Yesuye giso holo bo holo pala tekepo moodoo

(Matiyu 17:14-18, Maka 9:14-27)

<sup>37</sup> Diba beeame hee mapoo mubi maga kumoo meilesa doboome, odoo susuga oso Yesuye badebei mapoo saga sibadeeso. <sup>38</sup> Esemee odoo mooloogoodoo ma kuloduga odoo hedebeeso toso neligidi Yesu mapoo egeesee takaso, "Eligili odoo, ayo namapoo howaso, nayo mo giso holo agalame sibe. Bei, yo mo holo hedebeega. <sup>39</sup> Bei, bo holo oso yimapoo pologa, yo kikiliga sabolo homodobuloso gwa sabolo molone maga maga makawo tiodiliso. Bo holo oso yimapoo dala tenamolome yo beeame susuga ma kulodu haga medee koo sili. <sup>40</sup> Esino ayo nee hamamee dili odoo mapoo bo holo hagee peegoo hasisobigi deme, diayo peegoo hasisobigilei tebilena," diso.

<sup>41</sup> Esemé Yesúye egeesee takaso, "Niba tei too mauwe tokenee odoó. Niyo amapoo tei talame a beeame kasolo nibolo hodobo ka badalaiyo? Esino nowolo amapoo ido sibe," diso.

<sup>42</sup> Giso holo Yesu mapoo ido sibumolome, bo holo yimapoo pala oso kilikolone mi mapoo homodobiaso. Esemé Yesúye bo holo peegoo hasisobuguloso, yo tekepo poloso oma mapoo ido diso. <sup>43</sup> Esemé odoó susuga oso Godeeye kitulugu goo ogoloso diya woologadooso.

Odoó susuga oso Yesúye goo moodoo susuga ee os- ee goolone doboome, Yesúye o hamamee dili odoó mapoo egeesee takaso, <sup>44</sup> "Odoó Holo, a ha teli odoó mapoo tiasalaiso. Esiga niba ayo epedee goo hagee takoo na boobadee," diso. <sup>45</sup> Esino o hamamee dili odoó oso Yesúye taka goo eyo bei medee kibiya gooleedele poogooso. Bei, goo eyo bei ee dimaga mada magoloso meleeso. Esemé diayo see Yesu mapoo woosalai ebigaso.

### Odoó agayo toowa doloso ka badalaiyo?

(Matiyu 18:1-5, Maka 9:33-37)

<sup>46</sup> Yesu o hamamee dili odoó oso dima kulodu odoó agayo toowa doloso ka badalaisomo, doloso dieso nediliyo toso agadigaso. <sup>47</sup> Esino Yesúye dibada goo goolee ogoloso holope idoloso yima koola mapoo sibilesó tobudume, o hamamee dili odoó mapoo egeesee takaso, <sup>48</sup> "Odoó agayo holope hageesi masi mo hu maga yibolo badalame idoga, yayo a idoso. Osoloso odoó agayo a idoga, yayo mo Ma a diye di ee idoso. Esiga nima kulodu odoó agayo eyo nediliyo pepooko daga, yo see toowa doloso badalaiso," diso.

### Edebeeyo namapoo ha telega badoga, yo nee odooso

(Maka 9:38-40)

<sup>49</sup> Esemé Yoneeye egeesee takaso, "Wiligi odoó, iba odoó heeso bo holo ee nee hu sabolo odoó ma kulduga peegoo hasisobugume egeiso. Esemé iyo yo hamaga takaso. Bei, yo ibada mooloogoodoo ma kuldudu koo badeli," diso.

<sup>50</sup> Esino Yesúye yimapoo egeesee takaso, "Yo na hamaga takee. Bei, edebeeyo nimapoo ha telega badoga, yo nibada odoó oso," diso.

### Samaliya odooso Yesu gowe

<sup>51</sup> Yesu yo Kei mi ma dokodoo ido palai beeame ee olo koola tooboome, yo Yolusalem mapoo dilame goomogaso. <sup>52</sup> Esemé yayo odoó abo Samaliya mi ee ma kulodu mi pepooko hee mapoo malalo diye diso, diayo dileso omapoo yayo tilei moso ee mopoodoo dalame. <sup>53</sup> Esino mosobia oso Yesúye Yolusalem mapoo dileigo di goo ee duloso, diayo yo gowoolone yimapoo moso tenele. <sup>54</sup> Esemé Yesu o hamamee dili odoó Yonee dio Yemes dio goo hagee duloso yimapoo egeesee takaso, "Lodee, douso mosobia odoó hagee piligilame, iyo Kei mi ma dokodooga dou toose dee takalai, no goomogosomo?" diso. <sup>55</sup> Esino Yesúye

dimapoo bidadoboloso tobudulone dimapoo diya takaso. <sup>56</sup> Osoloso diba see mi hee mapoo diadeeso.

### Yesu dadalai doloso to taka odoó

(Matiyu 8:19-22)

<sup>57</sup> Yesu o hamamee dili odoó sabolo eli maga diadaga molome, odoó hedebe oso sibilesó Yesu mapoo egeesee takaso, "Nayo mi hee kamapoo dusomo, ayo no deedee sileiso," diso.

<sup>58</sup> Yesúye yimapoo nei egeesee takaso, "Dobu so oso debeli mi ee moloso. Osoloso sóso tieseli ou moloso. Esino Odoó Holo, ayo tieli moso mauwe," diso.

<sup>59</sup> Esemé Yesúye see odoó hee mapoo egeesee takaso, "Nayo a deedee sibe," diso.

Esino odoó ogoso nei egeesee takaso, "Lodee, nayo epedee amapoo beeame tenee, ayo mo ma toga midoosoolaiya," diso.

<sup>60</sup> Esemé Yesúye yimapoo nei egeesee takaso, "Dio maga odoó wedia oso dieso nediliyo odoó wedia ee midoosodolone dabalai tekepo. Esino no sibilesó Godeeye wiligi doloso badeli goo ee odoó mapoo takamo sile," diso.

<sup>61</sup> Esemé odoó heeso see egeesee takaso, "Lodee, a nama hamamee dadalai goomogo. Esino a epedee hamapoo mo soosoo dimapoo emegei di to takalame dia," diso.

<sup>62</sup> Esemé Yesúye see yimapoo nei egeesee takaso, "Odoó agayo ama hamamee dodolone see wedi dilame hamamee bidi ogo domo duga, odoó egesi masi oso Godeeye wiligi doloso badeli goo ee halo tou talai tebile," diso.

### Yesúye odoó 72 diye di

**10** Goo hagooso dileso koodobume, Lodeeye odoó 72 hesigaso. Osoloso dima kulodu odoó bakadio tooboo bakadio tooboo doloso yayo dilei mosobia pepooko mapoo diba malalo diye diso. <sup>2</sup> Egeeseelone yayo dimapoo egeesee takaso, "Homolee ma kulodu bi susuga ee olo teeleegeeloso goolai ee moloso. Esino bi ee gooloogalai odoó ee haga beinee. Esiga homolee gibadeli odoó mapoo woose, yayo o homolee ma kulodu bi susuga teeleegee ee gooloogali odoó diye dalame. <sup>3</sup> Esiga niba di! Esino niba goolee sabolo di. Bei, ayo niba sipi be hu pe masi dobu so kamanali oso egee do mi ma kulodu diye deeso. <sup>4</sup> Niba dulone molee sabolo, o sabolo, osoloso homo mapoo kali bi sabolo na todi. Osoloso niba eli domopoo dulone, odoó abo tugudoloso dibolo to na ke.

<sup>5</sup> Niyo mi hee mapoo dileso peledobooga, moso kamapoo gilimado polosomo, niyo daga moso mapoo egee do odoó mapoo emegei di to takolone, 'Godeeyo mesie goo nibolo mele,' dee takee. <sup>6</sup> Esiga mesie odoó oso moso ee ma kulodu daga, niyo emegei di to taka oso dibolo osee malaiso. Esino moso ee ma kulodu debeli odoó koo mesili daga, niyo emegei di to taka oso dibolo malaime. <sup>7</sup> Osoloso moso kasee nimapoo ka teneesomo, niba moso hedebe omapoo debée. Osoloso niba moso hedebe omapoo dobolone, diayo nimapoo



nei teneega, nei ee nolone ka debee. Bei, tou teli odoe ee dia nei talai tebiliso. Esiga niba moso hee mapoo dobolone, moso hee mapoo na du dee.

<sup>8</sup> Niba mi hee mapoo duga, mosobia odoe oso emegei dolone nei teneega, hedebe ee namelee. <sup>9</sup> Osoloso mi omapoo odoe paigiga tekepo moodoogolone dimapoo 'Godeeye wiligi doloso badeli goo ee nima koola mapoo moloso,' dee takee. <sup>10</sup> Esino niba mi hee mapoo dileso peledobooga, mosobia oso niba gowoolone moso tenelega poogooga, niba diayo bia eli domopoo dileso, to kitulugu sabolo dia mi basago oso nibada homo mapoo obooga ee dia howo woola mapoo te, Godeeye komonolone dimapoo dia goo tokenee eyo nei tenelai goo ee gooleedalame. Osoloso niyo dimapoo egeesee takee, 'Niba medee goolee, Godeeye wiligi doloso badeli goo ee koola hamapoo moloso.' <sup>12</sup> Esiga ayo nimapoo taka, mosobia kaso niba sibadeega, ogoloso goomoga sabolo niba iyadelega poogooga, nei Godeeye meedilei beame omapoo dala toowa diayo talai oso Sodom mosobia oso dala talai ee dagadileiso."

**Yesuye tei tele poogoo mosobia odoe mapoo taka**  
(Matiyu 11:20-24)

<sup>13</sup> "Eeye-ee! Kolasin mosobia odoe osoloso Betesaida mosobia odoe sabolo. Dala toowa oso niba bamoloso. Bei, ayo nibada mi mapoo goo toowa mudu opusomo opusomo di ee moodoogamo silee egesi masi Yu dele poogoo odoe mosobia Taya mapoo osoloso Saidon sabolo mapoo moodoogamo silee diepi, diba haga booloogelega, dibada goo tokenee maga miligi pialoso debeli. Osoloso diayo dibada goo tokenee maga miligi pia goo ee eligilone dugo tokenee megigaloso dosou holugaloso silesibili. <sup>14</sup> Goo egeesee maga Godeeye goo meedilei beame mapoo dala toowa Kolasin mosobia sabolo osoloso Betesaida mosobia oso talai oso Taya mosobia sabolo osoloso Saidon mosobia oso dala talai ee dagadileiso. <sup>15</sup> Esino Kapeniyum mosobia odoe niba beame omapoo Kei mi ma dokodoo ido palaiso, doloso goolee sabolo dosomo? Haye, niba tolosa Dou mi mapoo toodalaiso.

<sup>16</sup> Esiga odoe agayo nibada to duloso toga, yo mo to tolone ka seeso. Esino odoe agayo nibada to duloso niba diya gowooga, yo a gowoolone ka seeso. Esino odoe agayo a gowooga, yayo mo Ma a diye di ee gowoolone ka seeso," diso.

**Odoe 72 oso see wedi simi**

<sup>17</sup> Yesuye odoe 72 diye di oso goomoga sabolo see wedi sibilesa egeesee takaso, "Lodee, iyo nee hu sabolo takomo sileeme, bo holo odoe ma kulodu debei oso ibada to duloso mesiloso peegoo galagadiso," diso.

<sup>18</sup> Yesuye dimapoo nei egeesee takaso, "Keiso saga egee ebedigebugu egesi masi Kei mi ma dokodooga Saiten miyomoo homodobume ayo egeiso. <sup>19</sup> Esiga niba dui, niyo hebise sabolo homolobe sabolo mapoo dokodoo nibada homosu hamadabalame ayo nimapoo kitulugu olo teneeso. Esiga kitulugu oso Sait-

enso kitulugu ee dagadilesa moloso. Esiga bi heeso nimapoo dala tenelai mauwe. <sup>20</sup> Esino bo holo oso nibada to duloso mesiloso peegoo kukulo di goo mapoo haga na goomege. Esino nibada hu ee tei gie badeli booka mapoo egee molo omaga goomege," diso.

**Yesuye Ama Godee mapoo goomoga tenee**  
(Matiyu 11:25-27; 13:16-17)

<sup>21</sup> Yesu yo Dio Tei oso kitulugu maga goomoga sabolo badolone egeesee takaso, "Ma, Kei mi sabolo osoloso mipoo sabolo nayo wiligi doloso badoso. Esiga a namapoo goomogo. Bei, nayo wiligi doloso badeli goo mada egee molo, goo goolee toowa odoe mapoo yiligebigile poogooso. Esino nayo goo goolee dele poogoo odoe mapoo yiligebuguso. O. Tei takoo, Ma. Goo hagee nayo goomoga goo oso.

<sup>22</sup> Mo Maye goo susuga amapoo olo teneeso. Esiga odoe heeso Owolo a gooleede. Esino hedebe Maye Owolo, a ka gooleedoo. Osoloso odoe heeso Ma gooleede. Esino hedebe Owolo ayo Ma ka gooleedoo. Esiga odoe ugu bia mapoo Owolo ayo Mayo goo ee yiligebigilame gooleega, odoe egee bia oso Mayo goo ee diba gooleedalaiso," diso

<sup>23</sup> Osoloso o hamamee dili odoe mapoo bidooboloso omapoo tobudulone dimapoo egeesee takaso, "Niyo egeli goo susuga mapoo goomege. <sup>24</sup> Bei, ayo nimapoo taka, Godee maga to tolosa kokodo takomo sili odoe daga hoogoo debei sabolo osoloso Yu odoowo wiligi odoe tebisa daga debei oso niyo epedee hagee ogo goo ee agalai doloso bal-agameleeso. Esino diayo egele. Osoloso diayo goo niyo epedee egee dumolo goo sabolo dulei doloso bal-agameleeso. Esino diba dule," diso.

**Samaliya odooso emegei di goo**

<sup>25</sup> Beame hee mapoo tei eligili odoe heeso sibilesa Yesu tei ma susuga ee gooleedoloso badaba beleso egeesee takaso, "Eligili odoe, a gie badeli talame ogoe goo talaiyo?" diso.

<sup>26</sup> Yesuye to nei egeesee takaso, "Godeeye to booka mapoo hogugu oso kasee takoolo? Nayo hesigaloso kasee gweliyo?" diso.

<sup>27</sup> Odoe oso to nei egeesee takaso, "Nee sooloo ma kuloduga goolee sabolo, osoloso nee dio maga, osoloso nayo kitulugu sabolo, osoloso nayo goo goolee sabolo oso nee wiligi odoe Godee diya goolee. Osoloso no nediliyo diya gweli egesi masi nee odoe onosee diya egeesee goolone ka badebee," diso.

<sup>28</sup> Yesuye yimapoo nei egeesee takaso, "Nayo tei goo takoo. Esiga no goo egesi tolone badoga, goo oso no badoboso kookaiyo gie badeli talaiso," diso.

<sup>29</sup> Esino odoe yayo eyo nediliyo yo tekepo dolone egeesee takaso, "Esino mo odoe ogumo?" diso.

<sup>30</sup> Esemu Yesuye yimapoo oposusu hee hagee oposusu, "Odoe hee Yolusalem maga Yeliko mapoo moumeleeso. Yo eli domopoo moumolome, mesia aboso yo woomele poogoloso eli domopoo magoloso o dugo yayo ka sabolo osoloso o bi susuga sabolo heli

toloso diadeeso. <sup>31</sup> Yo eli domopoo talame seemolome, Godee ogo odoo ogo doloso domo badeli odoo oso eli hedebe omaga sibulone egeiso. Osoloso yayo sibulone egeino, odoo egee olo talame seemelee ogoloso peegooga boloodabaso. <sup>32</sup> Osoloso yima hamamee abaga tei moso tegei mapoo tou teli odoo, o bala Libai, yinosee sibulone egeino, odoo eli domopoo mi mapoo homodobuloso tiamolome, pee-googa boloodabaso. <sup>33</sup> Esino Samaliya odoo yinosee eli hedebe omaga sibulone egeino, odoo eli domopoo talame seemolome egeiso. Yayo odoo egee ogoloso yo diya sooloo dalaso. <sup>34</sup> Esemé yo odoo oso tiamelee mapoo dileso o kolo kookoo mapoo olipi i sabolo wain i sabolo oso hoduloso dugoso tialoogooso. Osoloso yayo yo o be donki ma dokodoo tiedoloso, odoo soowo moso mapoo ido dileso yo bameleeso. <sup>35</sup> Osoloso see beame hee mapoo Samaliya odoo oso odoo soowo moso gibadeli odoo mapoo molee ko bakadio yimapoo tenelone egeesee takaso, 'Odo hagee nayo medee bamelee. Esino nayo odoo hagee bolone molee hagee hosudoloso, see nee molee oso pidimologa, ayo see wedi simi beame omapoo, nei o egesi ayo namapoo tenelaiso,' diso.

<sup>36</sup> Osoloso Yesuye see egeesee takaso, "Odo baka-dio hedebe di hageeyo kulodu mesiaso wei eyo odoo tei ogumo?" diso.

<sup>37</sup> Esemé tei eligili odoo oso nei egeesee takaso, "Edebeeyo yo sooloo dolone yo pidi odoo ono tei o odoo oso," diso.

Esemé Yesuye yimapoo egeesee takaso, "O. Tei takoo. Esiga no dileso goo egesi tomo sile," diso.

### Meli dio Mata dio

<sup>38</sup> Yesu o hamamee dili odoo sabolo dulone, mi hee mapoo dileso peledabaso. Esemé mi omapoo badeli sobo hedebe Mataye o moso mapoo Yesu ido palaso. <sup>39</sup> Esemé Matayo omolo Meliye sibilesa Yesuwo homo beiyopoo badolone o to dulone badebeiso. <sup>40</sup> Beame omapoo Mataye moso kulodu Yesuwo mooloogoodoo odoo eyo wo silone, tou bei neme Yesu mapoo sibilesa egeesee takaso, "Lodee, moloye nobolo badoga, ayo mobusomo tou ka toga, diya kwasio. Esiga yayo a pidilame nayo yo sibeye dee takee." diso.

<sup>41</sup> Esino Lodeeye egeesee takaso, "Mata emegei, no tou susuga tomo silone goolone goo diya kodio.

<sup>42</sup> Esino tou susuga ee ma kulodu tou hedebe ha-goono toowa ka moloso. Esino Meliye goo tekepo toowa olo tooso. Esiga odoo heeso goo egee yimaga peedee dalaime," diso.

### Yesuye dokodoo takeli goo ee eligi

(Matiyu 6:9-13; 7:7-11)

**11** Beame heeso Yesu mi hee mapoo dileso dokodoo takamelee koodobume, o hamamee dili odoo heeso egeesee takaso, "Lodee, Yoneeye o hamamee dili odoo mapoo dokodoo takeli goo eligi-mo silee egesi masi nayo iba nose dokodoo takeli goo ee eligi," diso.

<sup>2</sup> Esemé Yesuye dimapoo egeesee takaso, "Niyi dokodoo takolone egeesee takee:

'Ma, beame susuga ma kulodu hedebe nee hu toowa doloso mele dee, odoo susuga oso dokodoo poudalame.

Esiga nayo wiligi doloso badeli goo oso sibilei iba goomogo.

<sup>3</sup> Osoloso beame susuga ma kulodu iyo nali bi ee imapoo tenemelee.

<sup>4</sup> Osoloso ibada tokene hapoloso boobado bigi.

Bei, iba nose odoo susuga oso goo tokene susuga imapoo moodeli ee boobado bigiliso.

Osoloso iba goo tokene mapoo na gidodi dee," diso.

<sup>5</sup> Yesu dokodoo takeli goo hagee eligimeleso koodobuloso dimapoo see egeesee takaso, "Niba to hee hagee goolee. Odo soo heeso gesi domo mapoo nee mosopoo sibileiso. Esino nayo yimapoo nei siloso tenelai nei mauwe daga, mosobia ma kulodu nee odoo mapoo nei talame dileiso. No nee odoowo mosopoo dileso osulu mapoo kalamadilone egeesee takalaiso, 'Mo odoo, odoo soo hee mo mosopoo simiga. Esino ayo yo pidilei nei mauwe. Esiga ayo namapoo nei talame ka siba,' dee.

<sup>7</sup> Eseega nee odoo moso kulodu badebei oso egeesee takalaiso, 'No see wedi di. Bei, a mo holo dio sabolo osulu kisiloso tiesamoloso. Esiga a toboloso namapoo nei tenelaime,' dee." <sup>8</sup> Esemé Yesuye see dimapoo egeesee takaso, "Esino ayo nimapoo taka, yayo no wulo emegei doloso bi tenelaime. Esino nayo kalamadilone osee howamologa, yayo toboloso namapoo bi tenelaiso.

<sup>9</sup> Esiga ayo nimapoo taka, niba woose. Egeeseega nimapoo tenelaiso. Osoloso niba esie. Egeeseega niba agalaiso. Osoloso niba osulu mapoo kalamadi. Egeeseega osulu ee nimapoo yamagalaiso. <sup>10</sup> Bei, woosali odoo oso goo talaiso. Osoloso esieli odoo oso goo agalaiso. Osoloso osulu mapoo kalamadili odoo mapoo osulu yamagalaiso.

<sup>11</sup> Esiga ma dio niba dui! Odo agayo owoloye di nala poogoo daga, yimapoo daba teneliso? Haye. <sup>12</sup> Osoloso yayo só ho nala poogoo daga, nayo yimapoo homolobe teneliso? Haye. <sup>13</sup> Niba tokene odoo. Esino niba gooleedooso, nibada owolo dimapoo bi tekepo tenelai. Esiga iba gooleedooso, Ma Godee Kei mi ma dokodoo egee bado oso yimapoo woosali odoo mapoo Dio Tei wulo tenemoloso," diso.

### Yesu dio Belsebul dio

(Matiyu 12:22-30, Maka 3:20-27)

<sup>14</sup> Beame heeso odoo hee badebeiso. Daga bo holo oso odoo eyo su ma kulodu palademe, to kelega poogoloso badebeiso. Esemé Yesuye odoo eyo su ma kulodu bo holo paladee peegoo habuguso. Osoloso bo holo oso odoo ma kuloduga peegoo gadime, to koo keli odoo yo see to keiso. Esemé odoo susuga oso goo hagee ogoloso diya howoogadooso. <sup>15</sup> Esino odoo aboso egeesee takagameleeso, "Yesu yo Belsebuleeye kitulugu maga bo holo peegoo ka hasisobigili

molodoo. Bei, Belsebul yo bo holo dia wiligi odoo taba oso," dee takagameleeso. <sup>16</sup> Esemé odoo aboso Yesuye kitulugu egee tomolo tei Godee maga simibeleso agalame yimapoo egeese takaso, "Nayo Kei mi ma dokodooga goo mudu opusomo di ee imapoo eligi," diso.

<sup>17</sup> Esino Yesuye diayo goo goolee olo gooleedoloso dimapoo egeese takaso, "Mi toowa mapoo debeli odoo oso domo puloso dieso nediliyo ha toga mi toowa egee malaime, tokenee palaiso. Osoloso soosoo heeso domo puloso dieso nediliyo ha toga soosoo egee pododalaiso. <sup>18</sup> Esiga Saitenso o mooloo-goodoo ma kulodu domo puloso dieso nediliyo ha toga, kaseega yayo wiligi doloso badeli goo oso osee ka malaiyo? Tokenee palaiso. Bei, niyo a Belsebul oso kitulugu maga bo holo peegoo ka hasisobugu deligo daga, ayo goo hagee nimapoo ka taka. <sup>19</sup> Esino ayo bo holo peegoo hasisobigili kitulugu hagee tei Belsebul oso kitulugu maga ka hasisimo silo daga, nibada hamamee dili odoo oso bo holo peegoo egee hasisimo silesibo kitulugu ee kamapoo toowo? Esiga diayo takooga, niyo amapoo egee takoo goo ee tei goonee, dee takalaiso. <sup>20</sup> Esino ayo Godeeye kitulugu maga bo holo peegoo ka hasisimo silo daga, Godeeye wiligi doloso badeli goo ee nimapoo olo simiso.

<sup>21</sup> Esiga kitulugili odoo oso tai sabolo tio sabolo toloso o moso gibadoga, o bi moso kulodu meli ee edebeeyo heli talaimé. <sup>22</sup> Esino see diya kitulugu odoo oso siboga, yayo moso gibadeli odoo wooloso o tai sabolo tio sabolo peedee dalaiso. Osoloso moso kulodu peleso o bi susuga toloso odoo abo mapoo pileiso.

<sup>23</sup> Esiga odoo agayo a dogolo tebelega poogooga, yo amapoo ha tomoloso. Osoloso odoo agayo abolo odoo Godee mapoo gilimado sibilega poogooga, yayo odoo ee Godee maga peegoo hasisobugu domoloso."

#### **Bo holo oso see wedi sibili goo**

(Matiyu 12:43-45)

<sup>24</sup> Esemé Yesuye egeese takaso, "Esiga bo holo oso odoo maga peegoo gaduga, yo dileso miwe poogoo mi mapoo eyo badalai mi esiamo sileiso. Yo mi esiamo siloso koo ogoga, eyo nediliyo egeese takalaiso, 'A mawo daga badebei mapoo see wedi dia,' dalaiso.

<sup>25</sup> Yo sibilesi ogoga, moso gelesi kadoloso bi medee mopoodoo ma molo agalaiso. <sup>26</sup> Osoloso yo see wedi dileso bo holo diya kitulugu abo 7 gilimadoloso moso omapoo dabalaiso. Egeeseega odoo hagee eyo daga badeli poogoloso see diya tokenee badalaiso."

#### **Odoo agayo goomoga sabolo ka dosomo?**

<sup>27</sup> Yesuye goo hagee odoo mapoo takomolome, odoo mooloogoodoo ma kuloduga sobo heeso toso neligidi egeese takaso, "No soomagoloso too nedimo silee sobo omapoo Godeeye goomoga tenelai tekepo," diso.

<sup>28</sup> Esino Yesuye yimapoo egeese takaso, "Haye, emegei. Goo egeesi koo moloso. Odoo agayo

Godeeyo to duloso omapoo mesie sabolo siloga, odoo yimapoo Godeeye goomoga teneliso," diso.

#### **Edebeeyo goo opusomo di ee agalame goomoga**

(Matiyu 12:38-42)

<sup>29</sup> Edebeeyo Yesu mapoo sibilesi mooloogoodeme, Yesuye dimapoo egeese takaso, "Epedee hamapoo egee do odoo ee diya tokenee. Osoloso diba wulo goo opusomo di agalame amapoo takeliso. Esino ayo dimapoo goo opusomo di hee eligileime. Esino hedebe Yonayo goo ono dimapoo ka eligilei. <sup>30</sup> Bei, Godeeye Yona mapoo moodoo goo oso Niniba odoo mapoo yayo tei Yona diye di goo ee eligiso. Esiga Odoo Holo amapoo goo peledabalai ee odoo epedee hagee do mapoo Godeeye tei a diye di goo ee eligileiso. <sup>31</sup> Osoloso goo meedilei beeamé mapoo Siba mi eyo wiligi taba sobo onosee nibolo goo meedi mapoo badolone nibada goo meedoloso, niba tokenee odoo dalaiso. Bei, yayo eli sage abaga sibilesi odoo toowa Solomonoye eligi goo ee dulame simiso. Esino ayo Solomonoo dagadilesi ka badoso. Esino niyo mo to dulei ka gowooso. <sup>32</sup> Esiga Niniba odoo oso goo meedi mapoo nibolo dobolone, nibada goo meedoloso, niba tokenee odoo dalaiso. Bei, Yonaye Godeeyo to dimapoo tosibume, diba dia goo tokenee mapoo mili-gi piase. Esino Yona ayo dagadilesi badoso. Esino ayo Godeeyo to nimapoo takomo sibume, niyo duloso nibada goo tokenee mapoo miligi pile."

#### **Ibada su mapoo howo oso gadeebugu ka moloso**

(Matiyu 5:15; 6:22-23)

<sup>33</sup> "Edebeeyo keme pouloso mada koo mageeya. Osoloso toloso koo geegeeya. Haye, keme pouloso woola mageeya edebeeyo moso kulodu gasiboga gadeebugu ee agalame. <sup>34</sup> Esiga nee su mapoo nee howo oso keme masi ka moloso. Osoloso nee howo oso tekepo mologa, nee su susuga gadeebugu malaiso. Esino nee howo oso tokenee poga nee su susuga neliga malaiso. <sup>35</sup> Esiga obeeyamo. Nee su mapoo gadeebugu egee molo medee hoodo ege. Bei, gadeebugu ee neliga molo malaiso. <sup>36</sup> Esiga nee su ma kulodu gadeebugu toowa oso molone neliga hee me daga, nee su mapoo kemeso pouni masi gadeebugu malaiso."

#### **Yesuye Pelisi odoo sabolo osoloso tei eligili odoo dimapoo taka**

(Matiyu 23:1-36, Maka 12:38-40)

<sup>37</sup> Yesu to takameleso koodobume, Pelisi odoo heeso o mosopoo nei nalame ido diso. Esemé Yesu yibolo dileso nei nalame biaso. <sup>38</sup> Pelisi odoo oso Yesuye Yu odoo dia tei magoo ee dedelega poogoloso dee howo sawilega nei ne ogoloso dio dulone diya gooleeso.

<sup>39</sup> Esemé Lodeeye yimapoo egeese takaso, "Pelisi odoo niba wulo nibada kapu sabolo peleta sabolo hedebe kolo ee hapoolone hee kulodu hapelega pegeli niba egeesi masi doso. Bei, niyo nibada kolo ono hapeliso. Esino sooloo ma kulodu tokenee goo

sabolo osoloso bi goomegeli goo oso ka moloso. <sup>40</sup> Niba boobada odo! Bei, Godeeye kolo sabolo osoloso kulodu sabolo moodooso. <sup>41</sup> Esiga nimapoo bi tebia mologa bi mauwe odo pidi. Niyo egeesee seega niba tokenee goo mauwe malaiso.

<sup>42</sup> Eeye-ee Pelisi odo! Bei, niyo Godee mapoo emegei di bi koku sabolo bi pepuso abo sabolo medee molone 10 ma kulodu hedebe Godee mapoo tenee dolone nei tei ma hogugu ee ma kulodu goo toowa magoo ee telega pegeliso. Goo ee odo mapoo goo tekepo moodeli sabolo osoloso Godee gweli goo sabolo oso. Esiga niyo Godee mapoo emegei di bi tenelone goo toowa bakadio hagee tobuloso moodee.

<sup>43</sup> Eeye-ee Pelisi odo! Bei, edebeeyo niba agalame howo gisili moso kulodu peleso odo hu toowa too oso bili mapoo bilame goomegeliso. Osoloso eli domopoo edebeeyo nimapoo gasuwoloso emegei di to takooga, niba diya goomegeliso.

<sup>44</sup> Eeye-ee Pelisi odo! Niba odo bi mada magoo masi moloso. Edebeeyo odo bi egelega, dokodooga diliso. Niba egeesi masi moloso."

<sup>45</sup> Osoloso tei eligili odo heeso Yesu mapoo egeesee takaso, "Eligili odo, nayo Pelisi odo mapoo tokenee sisi oso ibolo hodobo tokenee ka susu," diso.

<sup>46</sup> Osoloso Yesuye see tei eligili odo mapoo egeesee takaso, "Eeye-ee, tei eligili odo! Bei, niyo tei eligi goo oso odo mapoo hegi goo teneliso. Esino niyo diba pidilone hegi goo ee see niso koo teli.

<sup>47</sup> Eeye-ee tei eligili odo! Bei, niyo Godee maga to toloso kokodo takomo sili odo ta eyo bi mapoo moso pepooko medee tekepo tegeliso. Esino niba gooledeleyo, odo egee bia namawe diayo pilugu oso? <sup>48</sup> Niyo namawe diayo goo moodoo tekepona doloso odo dieso pilugu eyo bi ma dokodoo moso pepooko tegeliso. <sup>49</sup> Esiga Godeeye niyo goo moodoo olo hoodo ogoloso egeesee takaso, 'Ayo Godee maga to toloso kokodo takomo sili odo sabolo diye di odo sabolo Isalael odo mapoo diye dalaiso. Esino diayo abo piligilone abono wulo dala tenelaiso,' diso. <sup>50</sup> Osoloso mi bei mooloogoo omaga sibulone namawe diayo Godee maga to toloso kokodo takomo sili odo piligimo simiso. Egeesee diayo Eibolo maga wooloomalai bei mooloogooloso abaga simino Sekalaya wooloomaloso omapoo koodobiaso. Bei, diayo Sekalaya yo tei moso tegei ogo osoloso Godee mapoo gala wooloso sili dousulu ogo doloso domo omapoo wooloomaso. Esiga epedee hagee do odo niyo namawe diayo Godee maga to toloso kokodo takomo sili odo pilugu eyo nei tokenee niyo talaiso. Esiga ayo nimapoo tei goo taka. Bei, niyo namawe diowo tokenee eyo nei talaiso.

<sup>52</sup> Eeye-ee tei eligili odo! Bei, Godee gooleedalai osulu yeli ki bi niyo mada magoloso ka doso. Osoloso niyo edebeeyo osulu omaga gadiyaga, kisiloso see niso koo gadu domoloso."

<sup>53</sup> Yesuye Pelisi odo sabolo tei eligili odo mapoo to takemeleso koodoboloso diba poogoloso diso. Esem diayo diya komonolone hamamee beame abo mapoo

Yesu mapoo woosali goo opusomo opusomo di woosameleeso. Bei, diayo goomoga Yesuye to nei taka ee ma kulodu Moseseeye tei magoo gababuoga, yo toloso goo meedilame.

**Yesuye goo bakadio gweli odo mapoo kokodo taka**  
(Matiyu 10:26-27)

**12** Osoloso beame domo omapoo odo susuga oso Yesu mapoo mooloogoodolone diya kumugulone nei halagabugu nei halagabugu diso. Esem Yesuye daga o hamamee dili odo mapoo egeesee takaso, "Niba obeeyamo! Pelisi odo oso goo bakadio gweli goo ee wo habia egeesi masi moloso. Bei, wo giedege wo habia sabolo hamaga, wo giedege tokenee palaiso. <sup>2</sup> Esiga goo susuga mada egee molo see woola peledabalaiso. Osoloso edebeeyo koo duli goo ee see woola takooga duleiso. <sup>3</sup> Osoloso niyo mada taka to ee see woola takooga duleiso. Osoloso niyo moso kulodu dulu mapoo mada taka see hamamee odo susuga dulame moso omu ma dokodooga neligidi woola takalaiso.

**Godeebolo ebi**  
(Matiyu 10:28-31)

<sup>4</sup> Esiga emegei, ayo nimapoo taka. Odo wulo su hagee wooloomali yobolo na ebi. Bei, yo hedebe su wooloomali ee gooleedo, esino dio wooloomali yo tebile. <sup>5</sup> Esino ayo nimapoo taka. Niba hedebe Godeebolo obulone ka debee. Bei, odo wooloomaloso dio Dou mi mapoo toodalai kitulugu yimapoo moloso. Esiga niba hedebe Godeebolo obulone ka debee. <sup>6</sup> Esiga niyo só pepuso dee tiadoo molee ko ta oso teliso. Esino ee ma kulodu Godeeye só pepuso hedebe koo boobado bigili. <sup>7</sup> Osoloso Godeeye nibada wudu susuga yo gooleedooso. Bei, wudu susuga egee yayo olo hesigaso. Esiga niba haga na ebi. Bei, Godeeyo howo woola só ee goo toowa koo moloso. Hagee. Niyo goo toowa ka moloso."

**Odo howo woola Kelisowo goo yiligebigi**  
(Matiyu 10:32-33; 12:32; 10:19-20)

<sup>8</sup> "Esiga ayo nimapoo taka. Odo agayo odo howo woola tobudulone yayo amapoo tei too goo ee woola yiligebuguga, nei Odo Holo ayo Godeeyo momaiye eyo mudugiyo abaga tobudulone yo mo odo dalaiso. <sup>9</sup> Esino odo agayo odo howo woola tobudulone amapoo tei tele poogoo goo ee woola yiligebuguga, nei ayo Godeeyo momaiye dia mudugiyo abaga tobudulone yo mo odoonee dalaiso. <sup>10</sup> Osoloso odo agayo Odo Holo amaga to tokenee takooga, Godeeye o tokenee hapoloso boobado bigileiso. Esino odo agayo Dio Tei eyo goo maga to tokenee takooga, o tokenee ee Godeeye hapalaime.

<sup>11</sup> Esiga edebeeyo niba howo gisili moso mapoo osoloso wiligi odo taba eyo moso mapoo nibada goo meedilame ido pologa, niyo nei takalai ee haga na goolee. <sup>12</sup> Bei, niyo omapoo peleso tobudulone, to takalai ee Dio Tei oso nimapoo eligileiso."

### Yesuye bi bei odoowo goo oposusu

<sup>13</sup> Odo moologoodoo ma kuloduga odoo heeso Yesu mapoo egeesee takaso, "Eligili odoo, nayo mo ei mapoo takee, yayo ibada ama ta eyo bi gilibo toloso badolone bi susuga yayo egee bamolo puloso abo hodio amapoo tenelame," diso.

<sup>14</sup> Esemee Yesuye yimapoo nei egeesee takaso, "Emegei, amapoo kitulugu mauwe, nee bakadio nimapoo nibada nama ta eyo bi domo puloso pilei," diso. <sup>15</sup> Yesuye see odoo omapoo debei mapoo egeesee takaso, "Niba obeeyamo! Niba bi bei doloso badalai goo omapoo haga na goomege. Bei, bi bei doloso badalai goo oso tei gie badeli koo teneli," diso.

<sup>16</sup> Osoloso Yesu to hagee takoloso see dio masi hagee oposususo, "Bi bei odoo o mi mapoo yayo nei howo segei oso nali bi diya palagaso. <sup>17</sup> Osoloso eyo nediliyo egeesee takaso, 'Nei nali bi hagee malai amapoo moso hee mauwe. Esiga ayo ogoo goo talaiyo?' diso.

<sup>18</sup> Esemee yayo egeesee takaso, 'A mo nei nali bi mageli moso guobuguloso see moso toowa abo tege-laiso. Osoloso ayo nei nali bi sabolo bi abo sabolo moso ee ma kulodu malaiso. <sup>19</sup> Egeeseega amapoo bi tekepo bei oso dugo susuga ee ma kulodu osee ma malaiso. Esiga a tou hee talai mauwe. Esino a goomoga sabolo wulo badolone, wo sabolo osoloso howo sabolo namalaiso,' diso.

<sup>20</sup> Esemee Godeeye yimapoo egeesee takaso, 'No boobada odoodo! Esiga epei gesi nee gie badeli ayo namaga peedee dalaiso. Osoloso nayo nee su pidilame bi malososo meli see odoo agayo ka talaiyo?' diso."

<sup>21</sup> Osoloso Yesuye see egeesee takaso, "Odo agayo mipoo hamapoo bi bei moologoo malososo badolone, nei Godeeyo howo woola goo toowa telega poogooga, goo hageesi oso yimapoo peledabalaiso," diso.

### Tei toloso dobolone haga na goolee

(Matiyu 6:25-34)

<sup>22</sup> Yesuye see o hamamee dili odoo mapoo egeesee takaso, "Ayo nimapoo taka. Niyo dobolone nei nalai sabolo osoloso dugo kalai sabolo omapoo haga na goolee. <sup>23</sup> Bei, nei nali bi oso goo toowa koo moloso. Haye. Esino nibada gie badeli goo oso goo toowa ka moloso. Osoloso kali bi oso goo toowa koo moloso. Haye. Esino nibada su oso goo toowa ka moloso. <sup>24</sup> Esiga niba só ogoloso goolee. Diba nei nali bi dieso sogoloso koo gooloogali. Osoloso diba nei nali bi magalaimo mauwe. Esino Godeeye dimapoo nei nali bi ka tenemoso. Esino Godeeyo howo woola só oso goo toowa koo moloso. Esino niyo goo toowa ka moloso. <sup>25</sup> Esiga edebeeyo kali bi sabolo osoloso nei nali bi sabolo omapoo diya gooleega, o gie badeli see hoogoo sagilisomo? Haye. <sup>26</sup> Goo pepooko hageesi moodoolai nimapoo kitulugu medaga, niba see goo abo mapoo haga na goolee.

<sup>27</sup> Osoloso niba see doobudu meli palapalawa tekepo ogoloso goolee. Bei, diayo dieso nediliyo pidilei tou

koo teli. Osoloso dugo dieso kalai koo duseli. Esiga ayo nimapoo ka taka, daga Solomonoye wiligi odoo to-bolososo badebei mapoo yayo kali bi medee tekepo kalaga meleeso. Esino doobudu meli palapalawa oso tekepo oso Solomonoye dugo kali tekepo ee dagadi.

<sup>28</sup> Esiga doobudu meli palapalawa tekepo oso epei gasibilesoso moloso, see beame hee mapoo woseliso. Esino Godeeye palapalawa omapoo dugo masi tekepo ka kadili daga, a tei toso, Godeeye nimapoo dugo tekepo tenelaiso. Niba tei too kibile odoo oso debei masi na debee. <sup>29</sup> Esiga niba nei sabolo howo sabolo namalai mapoo haga na goolee. <sup>30</sup> Bei, mi odoo oso bi egee talame diya gweliso. Esino nama Godeeye bi niyo talame goomegeli ee yayo malalo olo gooleedooso. <sup>31</sup> Esino niba daga malalo diya esie, Godeeye wiligi doloso badeli goo ee talame. Niyo egeesee seega nei yayo bi niyo goomoga ee nimapoo tenelaiso.

<sup>32</sup> Esiga niba haga na ebi. Bei, sipi be bali odoo oso o be medee bali egeesi masi, Godeeye niba medee egeesee bamoloso. Osoloso niba ebia sabolo na debee. Bei, Godeeye niba yibolo wiligi doloso badalame yayo goomoga sabolo niba olo hesiaso. <sup>33</sup> Nibada bi odoo mapoo teneloso nei molee toloso bi mauwe odoo mapoo pi. Niyo egeesee seega, nei Kei mi ma dokodoo bi bei nibada hu sabolo malaiso. Bi bei ogoso Kei mi ma dokodoo mologa mauwe pagalaimo. Bei, mi omapoo heli teli odoo oso sibilesoso bi ee heli koo teli. Osoloso siso bi koo nali. <sup>34</sup> Nimapoo bi bei toowa ma mologa, nibada goo goolee oso omapoo meliso.

### Odo Holo oso sibilei goo mapoo mopoodoo doloso debee

(Matiyu 24:45-51)

<sup>35</sup> Esiga niba bi mopoodoo doloso goo mapoo dulone dobolone keme peyigaloso debee. <sup>36</sup> Bei, tou teli odoo oso dia wiligi odoo ee sobo hu wo nalame di siboga, agalame bameli egeesi masi debee. Bei, yayo see wedi sibilesoso osulu mapoo kalamadiga osulu saga yadalaiso. <sup>37</sup> Tou teli odoo oso sibilei mapoo dulone dobolone osee bamologa, yayo simi ogoloso dimapoo goomogalaiso. Esiga ayo nimapoo taka, wiligi odoo yayo o tou teli odoo ogoloso goomogolone, diba bulume doloso dimapoo nei nali tenelaiso. <sup>38</sup> Esiga wiligi odoo oso sibilei, yo gesi domo sibumobelee o, kudi daga takooga sibumobelee, beame diba gooleedelee. Esino o tou teli odoo oso yayo egee sibo mapoo dulone dobolone osee bamologa, yayo sibilesoso diba ogoloso dimapoo goomogalaiso. <sup>39</sup> Esino niba goo hagee medee goolee. Edebeeyo heli teli odoo oso o mosopoo sibilei beame ee duloso badebei diepi, yo olo mopoodoo doloso bolone badolone, heli teli odoo oso simi ogoloso yayo habigili. <sup>40</sup> Esiga niba olo mopoodoo doloso dulone bolone ka debee. Bei, Odo Holo ayo sibilei beame niba gooleedelee."

<sup>41</sup> Esemee Pitaye egeesee takaso, "Lodee, no dio masi hagee takoo wulo hedebe iyo dulame ka takala o, odoo susuga oso dulame ka takala?" diso.

<sup>42</sup> Esemé Lodeeye nei egeesee takaso, "Goo mapoo mesimo silone tou tekepo teli bali odoo ogumo? Wiligi odoo oso odoo egeesi masi mapoo kitulugu tenelaiso, yayo o tou teli odoo susuga gibolone yayo dimapoo wo tenemalame. <sup>43</sup> Osoloso wiligi odoo oso peegoo dileso badoboso see wedi sibilesa ogoga o tou teli odoo oso o tou ee medee tekepo tolone badebei ogoloso yimapoo goomogalaiso. <sup>44</sup> Esiga ayo nimapoo taka, wiligi odoo oso o tou teli odoo oso tou medee tekepo tolone badebei ogoga, yayo see yimapoo o bi susuga ee bamelee dalaiso. <sup>45</sup> Esino tou tokenee teli odoo oso o wiligi odoo saga sibilega poogooga eyo nediliyo egeesee takalai malaiso, 'Mo wiligi odoo saga koo sibo,' doloso, emegei sobo sabolo giso sabolo tou teli odoo abo woomele poogoloso, wo sabolo yugune sabolo ee nolone halabolone badalaiso. <sup>46</sup> Yo egeesee badolone mopoodoo delega badebei mapoo, o wiligi odoo oso sibilesa peledabalaiso. Egeeseega o wiligi odoo oso sibilesa yo Godee mapoo odoo koo mesili sabolo badalame, yo diya woomeleso peegoo togobigileiso.

<sup>47</sup> Esiga tou teli odoo oso o wiligi odoo oso goomoga goo ee gooleedoloso tou ee telega poogoloso mopoodoo delega badoga, yo diya woolaiso. <sup>48</sup> Esino tou teli odoo oso o wiligi odoo oso goomoga goo ee gooleedelega badolone goo ee telega badoga yo haga woolaime. Esiga Godeeye edebeeyo yo tou toowa talame goo goolee tekepo teneeso. Esiga yo goomogoso, goo goolee tekepo sabolo tou ee toowa tolone badalame. Osoloso Godeeye edebeeyo tou pepooko talame goo goolee tekepo teneeso. Esiga yo goomogoso, goo goolee tekepo sabolo tou pepooko ee tolone badalame.

**Mesie goo mauwe, esino domo pilei moloso**  
(Matiyu 10:34-36)

<sup>49</sup> Ayo odoo susuga domo puloso dou gicalagalame mi toowa mapoo ka simi. Esino dou oso paiya ee agalai a goomogo. <sup>50</sup> Esino ayo dala talai beame olo siboso. Esiga amapoo goohele toowa oso moloso. Esino ayo dala ma kuloduga gaduga, goohele amapoo egee molo amapoo mauwe pagalaiso. <sup>51</sup> Esiga niyo goo goolee oso a mipoo hamapoo mesie goo tosimidoo dee gweliyo? Haye, domo pilei goo ee tosimi. <sup>52</sup> Esiga epedee domo hamaga dulone soosoo ma kulodu domo pimalaiso. <sup>53</sup> Egeeseelone ama dio owolo giso holo dio domo pileiso. Osoloso owee dio owolo sobo holo dio domo pileiso. Osoloso gisowo owee dio osobo dio domo pileiso."

**Gooso peledabalai beame ee medee ogoloso gooleedalai**  
(Matiyu 16:2-3)

<sup>54</sup> Yesuye see odoo susuga mapoo egeesee takaso, "Niba kei ma dokodoo ogoga hemiye mologa, niyo egeesee takeliso, 'Epedee howo sibolodoo,' deliso. Egeeseega howo tei sibiliso. <sup>55</sup> Osoloso niba kei ma dokodoo ogoga kolobo me poogoloso kei dasege

mologa, niyo egeesee takeliso, "Epei mi kibolodoo,' deliso. Egeeseega mi kibiliso. <sup>56</sup> Niba goo bakadio gweli odoo! Howo sibilei goo sabolo osoloso mi kibilei goo sabolo niba olo gooleedooso. Esino bei kasee maga niba epedee hamapoo goo egee peledoboo ogoloso gooleedelega ka dabala?"

**Namapoo goweli odoo sabolo mesie**  
(Matiyu 5:25-26)

<sup>57</sup> "Niba kasee maga nisono goo tekepo talai goo ee gooleedelega ka dabala? <sup>58</sup> Esiga namapoo goweli odoo oso no goo meedilei mapoo ido duga, no saga eli domopoo yibolo dulone yayo namapoo gowe egee molo pagalame yibolo emegei dee. Esino nayo goo egeesee moodolega poogooga, yayo no goo meedili odoo mapoo ido peleso nee goo meedileiso. Egeeseega see goo meedili odoo oso no neliga moso gibadeli odoo mapoo tenelaiso. Egeeseega see yayo no neliga moso ma kulodu toosoolaiso. <sup>59</sup> Esiga ayo namapoo taka, no neliga moso ee ma kulodu badolone, nayo peegoo dilei eli agalaime. Esino yayo molee hesia sabolo tobuloso nayo teneega, no peegoo dileiso."

**Niba nibada goo tokenee maga miligi pilega poogooga, niba wedileiso**

**13** Beame omapoo odoo abo oso sibilesa Yesu mapoo Gelili odoo aboso Godee mapoo gala hu wooloso tenelone doboome, Paileteeye diba pilugu goo ee oposususo. <sup>2</sup> Esemé Yesuye nei dimapoo egeesee takaso, "Niyo goo hagee ogoloso kasee gooleesomo? Gelili odoo abo pilugu odoo hagee biaso Gelili odoo susuga ma kulodu hedebe diayo goo tokenee toowa tomo silesibume ka seeyo? <sup>3</sup> Haye, egeeseenee. Esino niyo nibada goo tokenee maga miligi pialoso Godee mapoo bidiga debelega poogooga, goo hedebe egeesee nose nimapoo peledabalaiso. <sup>4</sup> Osoloso niba goo hee hagee goolee. Silowam mi mapoo moso egi doko tegei oso goboolone odoo 18 piluguso. Odoo 18 pilugu hagee biaso Yolusalem odoo ma kulodu hedebe diayo goo tokenee toowa tomo silesibume ka seeyo? <sup>5</sup> Haye, egeeseenee. Esino niyo nibada goo tokenee maga miligi pialoso Godee mapoo bidiga debelega poogooga, goo hedebe egeesee nose nimapoo peledabalaiso."

<sup>6</sup> Osoloso Yesuye dimapoo dio masi hee hagee takaso, "Odo heeso geleipi ko segei ma kulodu pigi homo tabameleeso. Esino beame heeso segili odoo oso pigi ko goolame agalame simiso. Esino sibilesa egeino, pigi ko pelega molome egeiso. <sup>7</sup> Esemé yayo o homolee bali tou teli odoo mapoo egeesee takaso, 'Dugo bakadio hedebe di ma kulodu a goomogaso, pigi homo ha-gooso ko poga nalame. Esino yo ko pele. Esiga heemagee. Yayo mo homolee ma kulodu molone mi tekepo ee namalai tekeponee,' diso.

<sup>8</sup> Esemé o tou teli odoo oso yimapoo egeesee takaso, 'Iba epedee dugo hedebe ma kulodu bolone, ayo medee mi nemalaiso. <sup>9</sup> Egeesee ma kulodu yayo ko

poga, tekepo. Esino yayo ko pelega poogooga, omapoo iba homo su egee heemagalaiso,' diso."

### Yesuye sobo gauwuloso sili tekepo moodoo

<sup>10</sup> Yu odoowo hasali beeame hee mapoo Yesuye dia howo gisili moso mapoo peleso eligimeleeso.

<sup>11</sup> Beeame omapoo sobo hee dugo 18 ee ma kulodu badolone bo holoso o kulodu badoboome, yayo beeame susuga ma kulodu gauwuloso siliso. <sup>12</sup> Esino Yesuye yo ogoloso yo malalo hapoo sibe doloso yimapoo egeese takaso, "Sobo no beeame susuga ma kulodu gauwuloso egee silo epedee hamapoo olo mauwe poogooso," diso. <sup>13</sup> Egeese takoloso Yesuye o deeso sobo ee sigeso. Esemee beeame omapoo sobo gauwuloso sili ee see hoododoloso tekepo silame bei mooloogooloso Godee mapoo goomoga poudooso.

<sup>14</sup> Esemee howo gisili moso wiligi odoos taba oso Yesuye diayo hasali beeame mapoo sobo tekepo moodoo ogoloso diya komonolone odoos susuga mapoo egeese takaso, "Sadee hedebe ma kulodu beeame 7 moloso. Esiga odoos susuga oso beeame 6 ma kulodu tou talai tekepo. Esiga niyo beeame 6 hama kulodu odoos paiye susuga gilimado sibilesos tekepo moodoolai tekepo. Esino niyo iyo hasali beeame mapoo sibilesos goo egeesi moodoolai tekeponee," diso.

<sup>15</sup> Esemee Lodeeye nei yimapoo egeese takaso, "Niba goo bakadio gweli odoos. Bei, niba susuga oso hasali beeame mapoo bulumakau ebigi pidiga buguloso howo nalame hado diliso. <sup>16</sup> Esiga niyo iyo hasali beeame mapoo nibada be hu pidiliso. Esino iyo hasali beeame mapoo Eibalahameeyo eiye hagee tiso tia masi tiamolome pidibugu egee tekeponeeyo? Bei, Saitenso kitulugu oso sobo hagee dugo 18 ee ma kulodu tiso tialoso melee masi meleeso."

<sup>17</sup> Yesuye to hagee taka goo oso yimapoo kamanali odoos mapoo simili goo teneeso. Esino odoos abo oso Yesuye goo medee tekepo moodoogamo sili ogoloso diya goomogaso.

### Godeeye wiligi doloso badeli goo ee Yesuye dio masi eligi

(Matiyu 13:31-33, Maka 4:30-32)

<sup>18</sup> Osoloso Yesuye see dimapoo egeese takaso, "Godeeye wiligi doloso badeli goo ee kaseeyo? Ayo ogoo goo maga Godeeye wiligi doloso badeli goo ee nimapoo ka eligileiyo? <sup>19</sup> Esiga Godeeye wiligi doloso badeli eyo goo edebeeyo homokoko diya pepooko tolosos o homolee mapoo segei egeesi masi moloso. Esiga homokoko pepooko oso peleso homo toowa poloso, dee bo moodooga, sóso sibilesos omapoo ou tagagaliso.

<sup>20</sup> Ayo ogoo goo maga Godeeye wiligi doloso badeli goo ee nimapoo ka eligileiyo? <sup>21</sup> Ee egeesi masi. Sobos palawa wo silame, daga homolone palawa wo toowa ma kulodu yist pepooko kuko siliso. Egeeseega yist pepooko oso palawa wo ee diya kodiliso."

### Osulu pepooko

(Matiyu 7:13-14,21-23)

<sup>22</sup> Yesuye Yolusalem mapoo dulone, mosobia pepooko abo eli domopooga dagamo dulone, Godeeyo to eligimo diso. <sup>23</sup> Egeeseemo dumolome odoos heeso Yesu mapoo egeese woosaso, "Lodee, odoos wulo hedebe bakadio oso gie badeli ka talaiyo?" diso.

Esemee yayo nei yimapoo egeese takaso, <sup>24</sup> "Niba osulu pepooko maga gadilame diya kitulugi. Bei, ayo nimapoo taka, odoos susuga oso osulu pepooko omaga gadilame diya kituluguleiso, esino diba omapoo gadilei tebileime. <sup>25</sup> Bei, moso eyo amaye toboloso osulu kisileiso. Egeeseega niyo peegooga silesibulone osulu yamagalame osulu mapoo kalamadileiso. Egeeseelone egeese takalaiso, 'Wiligi odoos, iba gasi-bileiya osulu yamagee,' dalaiso.

Esino yayo egeese takalaiso, 'A niba gooleedelee. Niba mi kamaga sibadeeyo?'

<sup>26</sup> Egeeseega niyo nei egeese takalaiso, 'Iba nobolo hodobo silesibulone wo sabolo howo sabolo namo siliso. Osoloso ibada mi mapoo nayo imapoo to tekepo eligimo siliso,' dalaiso.

<sup>27</sup> Esino yayo nimapoo see egeese takalaiso, 'A niba gooleedelee. Niba mi kamaga sibadeeyo? Niba ayo hagee bado mapoo na sibadee. Amaga peegoo diadee, niba goo tokenee tomos silesibili odoos,' dalaiso.

<sup>28</sup> Esiga niba Godeeye wiligi doloso badeli mi maga peegoo poogooga, peegooga dobolone, Eibalaham dio Yekob dio osoloso Aisek dio osoloso Godee maga to tolosos kokodos takomos sili odoos susuga oso Godeeye wiligi doloso badeli mi mapoo do ogoloso gooholone mei kumudoo sabolo dobolone pupusiga malaiso. <sup>29</sup> Osoloso mipoo toowa hamapoo debeli mi susuga maga odoos susuga oso Godeeye wiligi doloso badeli mi mapoo wo nalame sibilesos dabalaiso. <sup>30</sup> Esiga odoos susuga eyo howo woola odoos hu toowa tolosos epedee hagee do, ee see hamamee Godeeyo howo woola odoos wuluge masi dabalaiso. Esino odoos susuga eyo howo woola odoos wuluge epedee hagee do, ee see hamamee Godeeyo howo woola diba hu toowa tolosos dabalaiso."

### Yesuye Yolusalem goolee goo

(Matiyu 23:37-39)

<sup>31</sup> Beeame omapoo Pelisi odoos abosos sibilesos Yesu mapoo egeese takaso, "No mi hagee poogoloso see mi hee mapoo di. Bei, Helodeeye no wooloomalame ina," diso.

<sup>32</sup> Esemee nei Yesuye dimapoo egeese takaso, "Niba dileso dobu so masi Helodee mapoo takee, 'A epei osoloso godigi mapoo bo holo paladee odoos sabolos osoloso odoos paigiga sabolos ee tekepo moodoolone badalaiso. Osoloso see beeame bakadio hedebe di mapoo a mo tou hosudalaiso,' dee takee. <sup>33</sup> Tei taka, epei sabolos osoloso godigi sabolos osoloso beeame hee sabolos mapoo mo tou ee osee tomos dileiso. Bei, edebeeyo Godee maga to tolosos kokodos takomos sili

odoo ee Yolusalem mi peegoo wooloomalai teke-ponee.

<sup>34</sup> Yolusalem, Yolusalem, nayo kasee maga Godee maga to toloso kokodo takomo sili odoo piliguloso see Godeeye diye di odoo ee piligilame yoso ka enigeliyo? A beame kasolo mapoo kolokoloso o pe medee gilimadoloso wili egeesee selame ayo nee holo gilimado sibilame goomegeliso. Esino no koo goomegeli. <sup>35</sup> Esiga Yolusalem odoo, niba dui. Nibada tei moso ee mosoowe malaiso. Esiga ayo nimapoo taka. Niyo a see agalaime. Esino beame oso siboga, niyo egeesee takalaiso, 'Odoo Godeeyo hu maga kitulugu sabolo egee sibo Godeeye yimapoo goomogoso,' dalaiso. Beame omapoo niyo a see agalaiso."

#### Yesuye Pelisi odoowo mosopoo di

**14** Yu odoo diayo hasali beame heeso Yesu Pelisi odoowo wiligi odoo taba eyo mosopoo peleso nei nalame badebeiso. Esem e odoo susuga oso Yesu mapoo medee hodu dilesa yimapoo balagameleeso. <sup>2</sup> Bei, moso ee ma kulodu odoo hee paiye toowa oso toloso o su susuga tidodoloso molome egeiso. <sup>3</sup> Egeesee ogoloso Yesuye Pelisi odoo sabolo osoloso tei eligili odoo dimapoo egeesee takaso, "Iyo hasali beame mapoo odoo tekepo moodoolai ee ibada teiyo?" diso. <sup>4</sup> Esino diba to hee takele. Esem e Yesuye odoo ee o deeso sigime tekepo paso. Osoloso yo diye diso.

<sup>5</sup> Osoloso yayo see Pelisi odoo sabolo osoloso tei eligili odoo sabolo mapoo egeesee takaso, "Nima kulo-du nibada holo hee, o, bulumakau egesi oso iyo hasali beame mapoo midoo ma kulodu todobuoga, yo peegoo tamagelega pagalaisomo? Haye. Niyo yo midoo ma kuloduga peegoo tamagalaiso," diso. <sup>6</sup> Esem e di-ayo Yesu mapoo nei takalai me poogooso.

#### Eyo nediliyo toowa dalai sabolo osoloso pepooko dalai goo sabolo

<sup>7</sup> Yesu moso ee ma kulodu badolone egeino, odoo susuga oso wo ne mapoo sibulone odoo hu toowa too oso bili mapoo bulumalame diya goolee sabolo sibume egeiso. Esem e Yesuye dio masi hagee dimapoo egeesee takaso, <sup>8</sup> "Odoo heeso namapoo takolone sobo hu wo ne mapoo sibeye daga, no sibile-so wo nalame saga dilesa odoo hu toowa too oso bili mapoo na bie. Bei, odoo hu toowa too hee nama hamamee sibilei malaiso. <sup>9</sup> Egeeseega mosowo amaye namapoo egeesee takalaiso, 'Nayo egee bado mapoo odoo toowa oso bie dee. Esiga no toboloso hamamee koo bilame di,' dalaiso. Egeeseega no hamameedee mapoo bilame diya simiye sabolo dilesa bileiso.

<sup>10</sup> Esino sobo hu wo nalame no sibeye daga, no sibile-so hamameedee bie. Egeeseega mosowo amaye no hamameedee mapoo badebei ogoloso no see malalo koodoo peleso bie dalaiso. Osoloso wo ne mapoo buluma odoo oso goo hagee ogoloso no odoo toowa dalaiso. <sup>11</sup> Esiga odoo agayo eyo nediliyo yo toowa da-

ga, nei yo Godeeye pepooko dalaiso. Esino odoo agayo eyo nediliyo yo pepooko daga, nei yo Godeeye toowa dalaiso."

<sup>12</sup> Osoloso Yesuye see yo sibeye dee taka Pelisi odoo mapoo egeesee takaso, "No wo toowa nalame nee odoo sabolo osoloso nemei dio sabolo osoloso nee soosoo sabolo osoloso nee bi bei odoo sabolo na gilime. Bei, nayo diba gilimaga, nei diayo dibolo hodobo wo nalame no idileiso. Egeeseega no nei hee talaime. <sup>13</sup> Esino no wo toowa nalame mopoodoo doloso wulo bi mauwe odoo sabolo, osoloso kido todobia odoo sabolo, osoloso su kakawa poogoo odoo sabolo, osoloso howo si odoo sabolo ee gilime. <sup>14</sup> Bei, nayo goo hageesi moodooga, Godeeye namapoo nei tenelaiso. Bei, diayo nei namapoo egeesi pidilei tebile. Esiga Godeeyo howo woola tekepo debeli odoo oso wedia maga hogadilei beame omapoo Godeeye namapoo nei tenelaiso."

#### Wo ne toowa eyo goo maga dio masi taka

(Matiyu 22:1-10)

<sup>15</sup> Yesubolo hodobo wo nolone debei odoo heeso to hagee duloso Yesu mapoo egeesee takaso, "Godeeye wiligi doloso badeli mi mapoo peleso hodobo wo nalai odoo diba diya goomogalaiso," diso.

<sup>16</sup> Esem e Yesuye yimapoo egeesee takaso, "Odoo heeso wo toowa nalame mopoodoo doloso odoo susuga gilimaso. <sup>17</sup> Osoloso wo olo nalame o tou teli odoo hee mapoo dilesa yayo gilimadoo odoo ee iyado sibe diso.

<sup>18</sup> Esem e o tou teli odoo oso diba gilimalame simi ogoloso diayo wo ne mapoo sibilei gowoolone goo abo maga gamenee goo takaso. Egeeseelone odoo heeso yimapoo egeesee takaso, 'A mi neiso epedee too. Esiga a dilesa mi egee agalaiso. Esiga nayo dilesa nee wiligi odoo mapoo takee, a wo ne mapoo sibileimego dee takee,' diso.

<sup>19</sup> Esem e see odoo heeso egeesee takaso, 'A bulumakau 10 neiso epedee too. Esiga bulumakau egee sabolo tou talai tebia beleso dibolo tou talame dileiso. Esiga nayo dilesa nee wiligi odoo mapoo takee, a wo ne mapoo sibileimego dee takee,' diso.

<sup>20</sup> Osoloso see odoo heeso egeesee takaso, 'A sobo epedee hu. Esiga a wo ne mapoo sibileime,' diso.

<sup>21</sup> Odoo susuga oso egeesee takageme, to todili odoo oso see wedi dilesa o wiligi odoo mapoo odoo susuga oso taka goo susuga ee yimapoo takaso. Esem e wo ne eyo wiligi odoo taba oso diya komonolone see o tou teli odoo mapoo egeesee takaso, 'No saga dilesa mosobia domopoo bi mauwe odoo sabolo, osoloso kido todobia odoo sabolo, osoloso su kakawa poogoo odoo sabolo, osoloso howo si odoo sabolo iyado sibe,' diso.

<sup>22</sup> Esem e o tou teli odoo oso saga dilesa odoo iyado sibilesa o wiligi odoo mapoo egeesee takaso, 'Wiligi odoo, ayo odoo abo olo iyado simiso. Esino debi poo-ba abo odoo mauwe moloso,' diso.



<sup>23</sup> Esemé wiligi odoo oso see o tou teli odoo mapoo egeesee takaso, 'No see dileso odoo eli domopoo egee silesibo sabolo osoloso wadou moso mapoo debeli odoo ee hapoo sibilame to kitulugu sabolo takee, mo moso kulodu debi pooba ee edebeeyo tolo tebilame. <sup>24</sup> Esiga ayo namapoo taka, wo ne hagee ma kulodu odoo daga ayo gilimome sibilei gowe odoo oso wo ayo mopoodoo doo nalaime,' diso."

### Yesu dadalai goo ee kaseeyo?

(Matiyu 10:37-38)

<sup>25</sup> Odoo susuga oso Yesu dedeme, Yesuye dimapoo bidi toboloso tobudulone egeesee takaso, <sup>26</sup> "Odoo agayo ama sabolo, osoloso o wee sabolo, osoloso o obo sabolo, osoloso owolo sabolo, osoloso o soosoo sabolo, osoloso o gie badeli sabolo mapoo diya goolone, nei a goolee pepooko daga, yo ayo di hamamee deedee sibilei tebile. <sup>27</sup> Osoloso odoo agayo talai sabolo dala toowa talai sabolo goo medee mood-elega poogoloso ayo di hamamee dedelega poogooga, yo ayo di hamamee deedee sibilei tebile.

<sup>28</sup> Edebeeyo kulo moso tagalame gooleega, yo daga badolone yayo kulo moso tagalai molee tebia beleso agalame hesigileiso. <sup>29</sup> Bei, yo daga molee hesigilega tou bei mooloogooga, molee hosudoga, tou hoo malaime. Egeeseega odoo susuga oso moso ee to-godelega poogoo ogoloso manolone yiligilone egeesee takalaiso, 'Odoo hagee moso tagalame bei mooloogooso. Esino hosudalai tebile,' dalaiso.

<sup>31</sup> Dio masi hee hagooso. Mi bakadio oso ha talaiso. Egeesee ma kulodu mosodei heeso odoo 10,000 gilimado sibileiso. Osoloso mosodei heeso odoo 20,000 gilimado sibileiso. Esino odoo 10,000 gilimado ha teli wiligi odoo taba oso daga medee badolone, odoo 20,000 mapoo ha talai tebia beleso goo ee goolone badalaiso. <sup>32</sup> Osoloso yayo o odoo sabolo odoo 20,000 mapoo ha talai ee koo tobuoga, yayo o odoo hee odoo 20,000 gilimado simi dia wiligi odoo taba mapoo to to-di dalaiso, yibolo see mesilame. <sup>33</sup> Esiga odoo agayo ama hamamee dadalame gooleega, yayo o bi susuga poogoloso a ka deedee sibe.

<sup>34</sup> Solu ee bi tekepo. Esino solu hadali medaga, nayo solu ee see hadalame kasee moodoolaiyo? <sup>35</sup> Esiga solu eegee goo mauwe mologa, odoo susuga oso solu eegee togobigileiso.

Odoo niba dulubolo, esiga ayo hagee takoo medee hoodo dui."

### Yesuye sipi be osugoba maga dio masi taka

(Matiyu 18:12-24)

**15** Tekisi molee misigeli odoo sabolo osoloso goo tokenee teli odoo sabolo Yesuwo to dulame sibilesi debeiso. <sup>2</sup> Esino Pelisi odoo sabolo osoloso tei eligili odoo sabolo oso goo hagee ogoloso gowoolone egeesee takagameleeso, "Odoo hagooso tokenee teli odoo ee gilimadoloso dibolo hodobo wo namo siliso," diso.

<sup>3</sup> Esemé Yesuye dio masi hagee dimapoo takaso, <sup>4</sup> "Sipi be hu bali odoo oso o sipi 100 bameleeso. Egeesee ma kulodu hedebe osugobooga, yayo ogoo goo moodoolaisomo? Yayo go woolalowe poogoo mapoo o sipi be abo 99 omapoo hologooloso, see hedebe osugoba ee esiamo dileiso. <sup>5</sup> Yayo esiameloso ogoga, yo goomogolone sipi be ee mosopoo imado sibileiso. Osoloso o odoo abo ee gilimadoloso egeesee takalaiso, 'Mo sipi be osugoba epedee olo egeiso. Esiga niba sibilesi abolo goomoga poude,' dalaiso. <sup>7</sup> Esiga ayo nimapoo taka, Kei mi mapoo odoo 99 Godeeyo howo woola tekepo debeli dia goo mapoo goomoga goo oso osee moloso. Esino goo tokenee teli odoo hedebe o goo tokenee maga miligi pialoso see Godee mapoo bididoobooga, Kei mi mapoo goomoga toowa oso malaiso."

### Yesuye molee ko oso osugoba maga dio masi taka

<sup>8</sup> "Beeame hee mapoo sobo hee o molee ko 10 ma kulodu hedebe osugobalaiso. Eseege yo ogoo goo moodoolaisomo? Yayo keme pudoloso esiamo silone, o moso kulodu goko oso kakabalaiso. <sup>9</sup> Osoloso yayo o molee ko osugoba ee ogoga, yayo o odoo ee iyadoloso egeesee takalaiso, 'Mo molee ko osugoba epedee olo egeiso. Esiga niba sibilesi abolo hodobo goomoga poude,' dalaiso. <sup>10</sup> Esiga ayo nimapoo taka. Goo tokenee teli odoo hedebe o goo tokenee maga miligi pialoso see Godee mapoo bididoobooga, Godeeyo momaiye susuga Kei mi ma dokodoo eegee do oso goomoga toowa poudileiso."

### Yesuye holaisoso peegoo dobudo di maga dio masi taka

<sup>11</sup> Yesuye see dio masi hee hagee odoo mapoo egeesee oposususo, "Odoo hee owolo giso holo bakadio debeiso. <sup>12</sup> Esino beeame heeso omoloye ama mapoo egeesee takaso, 'No toga nee bi ayo talai malalo epedee amapoo tenee,' diso. Esemé amaye owolo bakadio ee ma kulodu o bi abo puloso dimapoo piso.

<sup>13</sup> Esemé omoloye beeame abo poogoloso hamamee amameeye yimapoo bi pi ee toloso see odoo abo mapoo neiso toloso see mi hee eli sage mapoo diso. Yo omapoo dileso tokenee goo ma kulodu badolone, o molee toowa hosudooso. <sup>14</sup> Yayo o molee toowa hosudooloso melee beeame omapoo mi kibiya oso mi omapoo hodia goo meleeso. Esemé yayo see gilibo holo masi badolone, hodia goo toowa egeliso. <sup>15</sup> Esiga yayo molee tou talame mosobia odoo hee mapoo dileso peledabaso. Esemé mosodei odoo ogoso yo o go mapoo dileso o be bamelee diso. <sup>16</sup> Esemé yo dileso be hu nei nolone beso nali nei ee ogoloso nalame gweliso. Esino odoo heeso beyo nei sabolo osoloso nei abo sabolo yayo nalame koo tosibili.

<sup>17</sup> Yayo egeesee badebei ma kulodu, beeame heeso yimapoo goo goolee tekepo oso sibume, yayo egeesee gooleeso, 'Mo mamó tou toloso nei teli odoo susuga ee hodia sabolo koo debeli. Esino a hamapoo

hodia sabolo badolone talame ka seeso. <sup>18</sup> Esiga a see wedi dileso mo ma mapoo egeesee takalaiso: Ma, ayo Godee mapoo osoloso namapoo goo tokenee olo tooso. <sup>19</sup> A tokenee odo. Esiga nayo see epedee amapoo mo holo dalai tekeponee. Esino tekepo, nayo a nee tou toloso nei teli odo hee dee takee,' diso.

<sup>20</sup> Osoloso yo amameeye badebei mi mapoo diso.

Esino yo eli sage abaga osee sibumolome, amaye ogoloso owolo diya sooloo dolone, yayo saga hoguo dileso owolo mapoo boolumaloso adaso.

<sup>21</sup> Esem e owoloye yimapoo egeesee takaso, 'Ma, a Godee mapoo osoloso namapoo goo tokenee olo tooso. A tokenee odo. Esiga nayo amapoo mo holo dalai tekeponee,' diso.

<sup>22</sup> Esino amaye o tou teli odo mapoo egeesee takaso, 'Dugo tekepo sabolo osoloso homo bi sabolo osoloso dee sesa mapoo kali ki bi sabolo saga tosibileso yimapoo kadige. <sup>23</sup> Osoloso mo gala hu ma kulodu bulumakau be hu kauwa wooloso si. Osoloso hodobo wo nolone goomogalaiso. <sup>24</sup> Bei, mo holo hagee olo tano, see epedee gie badoso. Osoloso olo dobudo diso, esino epedee ogoso,' diso. Esiga diayo hodobo wo nolone goomoga poudoso.

<sup>25</sup> Diba egeeseelone doboome, emei o homolee ma kulodu tou temeleso sibulone, amayo moso kulodu odo susuga goomogolone hopolone kosaiya pegigamolome duso. <sup>26</sup> Esem e yayo o tou teli odo hee idolo yimapoo woosaso, 'Mo mamomo moso ma kulodu ogoo goo tolo?' diso. <sup>27</sup> Esem e o tou teli odo oso yimapoo egeesee takaso, 'Nomolo epei simiso. Esiga namaye owolo yo medee tekepo wedi simi ogoloso, goomogolone bulumakau be hu kauwa wooloso siloso wo toowa ka nalagamoloso,' diso.

<sup>28</sup> Esem e emei goo hagee duloso komonolone wo ne mapoo dile. Esem e amaye sibileso o daga holo yo wo ne mapoo gadilame giso. <sup>29</sup> Esino yayo ama mapoo egeesee takaso, 'Ayo dugo susuga ma kulodu nee tou teli odo masi silone nee to mapoo mesimo silone tou toowa temeleso. Esino nayo gout be hu pepooko wooloso amapoo takolone, nee odo sabolo neye, dee takele. <sup>30</sup> Esino nowolo hagooso nee bi sabolo nee molee sabolo toloso domo sili sobo sabolo badolone hosudoloso sibume, nei nayo yimapoo goomogolone be kauwa wooloso wo toowa nolone ka dabala?' diso.

<sup>31</sup> Esino amaye owolo mapoo egeesee takaso, 'Mo holo, nayo beame susuga abolo badebeiso. Esiga mo bi susuga ee nee. <sup>32</sup> Esino epei iba goomogalalai tekepo. Bei, nomolo hagee olo tano, epedee yo see gie ka badoso. Osoloso yo osugobano, see epei yo ogoso,' diso."

### Molee gibadeli odo maga dio masi taka

**16** Yesuye o hamamee dili odo mapoo egeesee takaso, "Beame heeso bi bei odooso o molee gibadeli idoloso badebeiso. Egeesee ma kulodu bi bei odo o molee gibadeli odo oso o molee mada namelee goo ee yo duso. <sup>2</sup> Osoloso yayo o molee gibadeli odo ee idoloso yimapoo egeesee takaso,

'Nayo mo molee tokenee bameleena. Esiga no tekepo, nayo tou temelee goo susuga ee booka mapoo hoguguloso amapoo eligi. Bei, nayo see mo molee gibadalai tekeponee. Esiga no tou epedee pagalaiso,' diso.

<sup>3</sup> Esem e molee gibadeli odo oso egeesee gooleeso, 'Mo wiligi odo oso mo tou ee olo peegoo magooso. Esiga a see ogoo tou toomoba? A nei howo segelame mi gabalai a kitulugu mauwe. Osoloso ayo odo mapoo wulo hoowamo silei diya simileeyo. <sup>4</sup> Esino ayo mo tou poogooga, mo odooso a dia mosopoo ido palame, ayo goo talai epedee olo gooleedoso.'

<sup>5</sup> Egeesee gooloso yayo o wiligi odo mapoo bi wulayo temelee odo ee gilimadooso. Osoloso daga odo hee mapoo egeesee takaso, 'Nayo mo wiligi odo mapoo bi wulayo too eyo nei tenelega ka pagala? Nei kasolowo?' diso.

<sup>6</sup> Esem e odo ogoso nei egeesee takaso, 'Ayo mo dalamoo 100 mapoo olipi i keedoo ee nei tenele,' diso.

Esem e molee gibadeli odo oso nei yimapoo egeesee takaso, 'Wiligi odo o booka hagooso. Esiga no saga buloso booka hamapoo nayo dalamoo 100 mapoo olipi i keedeme hogugu ee tabuguloso, see dalamoo 50 mapoo olipi i keedoo ono too doloso hogigi,' diso.

<sup>7</sup> Osoloso molee gibadeli oso see odo hee mapoo egeesee takaso, 'Nayo mo wiligi odo mapoo bi wulayo too eyo nei tenelega ka molosomo? Nei kasolowo?' diso.

Esem e odo ogoso nei egeesee takaso, 'Ayo mo wogai 100 mapoo palawa wo soo too eyo nei tenele,' diso.

Esem e molee gibadeli odo oso yimapoo nei egeesee takaso, 'Wiligi odo o booka hagooso. Esiga no saga buloso booka hamapoo nayo wogai 100 mapoo palawa wo soo too hogugu ee tabuguloso, see wogai 80 mapoo palawa wo soo ono too doloso hogigi,' diso.

<sup>8</sup> Esino o wiligi odo oso goo hagee duloso o molee tokenee gibadeli odo mapoo egeesee takaso, 'Nayo odo abo pidi goo oso see hamamee no pidileiso,' diso."

Esem e Yesuye see egeesee takaso, "O, mi odo oso eyo nediliyo goolone emegei dimaga pidili goo susuga ee medee gooleedooso. Esino Godeeyo odo oso goo egeesee moodolai kibiya gooleede. <sup>9</sup> Esiga ayo nimapoo taka, niyo mipoo toowa hamapoo dobolone, nibada molee sabolo osoloso nibada bi sabolo oso emegei pidi osoloso emegei dolone ka debee. Niyo egeeseega nei bi egee mauwe poogooga, Godeeye niba Kei mi ma dokodoo kookaiyo moloso osee malai moso omapoo ido palaiso.

<sup>10</sup> Esiga edebeeyo goo pepooko medee kibiya bamologa, yo see goo toowa balai tebileiso. Osoloso odo agayo goo pepooko balai tebilega poogooga, yo goo toowa balai tebileime. <sup>11</sup> Esiga niyo mi toowa eyo bi medee belega poogooga, see niyo Kei mi eyo goo ee medee kasee balaisomo? <sup>12</sup> Osoloso see niyo nee

odoowo bi medee belega poogooga, odo agayo nee bidee ee no balame namapoo ka tenelaiyo?

<sup>13</sup> Esiga edebeeyo wiligi odo bakadio eyo to mapoo mesiloso silone tou talai tebile. Bei, yo o wiligi odo hee goomogolone hee gowoolaiso. Egeeseelone yayo wiligi odo heeyo to mapoo mesiloso silone, see heeyo to mapoo mesileime. Esiga edebeeyo Godee mapoo mesimo silone molee toowa toloso badalai goo mapoo mesilei tebile.”

<sup>14</sup> Esem Pelisi odo oso Yesuye to taka hagee du- loso manolone yiligaso. Bei, Pelisi odo hagee bia molee diya goomegeli. <sup>15</sup> Esem Yesuye dimapoo egeesee takaso, “Niba wulo edebeeyo tekepo odo dalame, odo howo woola gamenee goo tekepo moodeliso. Esino ee ma kulodu Godeeye niyo goo goolee olo gooleedooso. Esiga edebeeyo nibada goo ogoloso tekepo deli ee nei Godeeye nibada goo ee diya tokenee deliso.

<sup>16</sup> Godeeye tei magoo Moses mapoo tenee ee hogugu sabolo osoloso Godee maga to toloso kokodo takomo sili odo oso to hogugu oso odo abaga gilimado simino, Yoneeye badebei beeame omapoo peledabaso. Osoloso Yoneeye beeame poogoloso hamamee mapoo to tekepo Godeeye wiligi doloso badeli goo ee odo mapoo takaso. Esiga edebeeyo Godeeye wiligi doloso badeli goo mapoo gadilame diya ka kituluguso. <sup>17</sup> Esiga mipoo sabolo Kei mi sabolo oso me pagalai ee tebia. Esino Godeeye tei magoo hogugu ee ma kulodu hu pepuso hee peegoo pagalai tebile.

<sup>18</sup> Esiga edebeeyo osobo poogoloso, see sobo hee huga, yo sobo egee heli toso. Osoloso edebeeyo sobo omoye poogoo huga, yo odo heeyo osobo ee peedee huso.”

#### Bi bei odo dio Lasales dio

<sup>19</sup> “Beeame heeso bi bei odo badebeiso. Yo beeame susuga dugo kali bi tekepo kaloso badolone nei medee tekepo nolone badebeiso. <sup>20</sup> Beeame domo mapoo bi mauwe odo badebeiso, o hu Lasales. Yo o su susuga e buloso badebeiso. Esino yo beeame susuga bi bei odoowo moso osulu miyopoo iboduloso badolone bi bei odo oso nei ne kokou mou ee nalame goomegeliso. Osoloso soso sibilesos o e mapoo pieliso.

<sup>22</sup> Osoloso beeame abo poogoloso hamamee bi mauwe odo Lasales taso. Esem Godeeye momaiye oso yo todilesos Eibalahameeye badebei koola mapoo ibediso. Osoloso hamamee bi bei odo taso. Esem odo aboso o su midoosooso. <sup>23</sup> Yo toloso abaga dino odo wedia oso debeli mi mapoo dala ma kulodu badebeiso. Yo omapoo badolone, dokodoo egeino, Eibalaham eli sage badoboome ogoloso, yima koola mapoo Lasales badoboome egeiso. <sup>24</sup> Esem yo ilone egeesee takaso, ‘Ma Eibalaham, nayo a sooloo dele. Osoloso Lasales amapoo sibeye dee, yayo sibilesos o dee wolugu oso howomoo olugudolosos, mo i mapoo

sigoga, kekebie palame. Bei, a dou hagee ma kulodu dala sabolo bado,’ diso.

<sup>25</sup> Esino Eibalahameeye nei egeesee takaso, ‘Mo holo, no goolee. Nayo gie badebei beeame omapoo bi medee tekepo ono temelesos. Esino Lasales yo bi mauwe gilibo holo masi badebeiso. Esiga epedee Lasaleseye hamapoo goomoga sabolo badoga, nei nayo dala ma kulodu ka badosos. <sup>26</sup> Osoloso goo hee ee, niba ogo osoloso iba ogo doloso domo omapoo goodobia diya toowa edebeeyo hodiokoo dabagalai tebile moloso. Esiga iyo hagee do omaga niyo egee do mapoo dabagalai eli mauwe. Osoloso niyo egee do omaga edebeeyo iyo hagee do mapoo dabagalai onosee eli mauwe,’ diso.

<sup>27</sup> Esem bi bei odo oso nei egeesee takaso, ‘Ma Eibalaham, ayo namapoo howasos, nayo Lasales mo mayo moso mapoo molo dio dee tiadoo omapoo dosos. Esiga Lasaleseye see wedi dilesos dimapoo kokodo takalai tekepo, diba toga see dala mi hamapoo sibiya,’ diso.

<sup>29</sup> Esem Eibalahameeye egeesee takaso, ‘Dimapoo Moseseeye tei hogugu sabolo osoloso Godee maga to toloso kokodo takomo sili odo oso Godeeye to hogugu sabolo olo moloso. Esiga dia goo goolee tekepo palame, diayo kokodo taka to ee dulei tekepo,’ diso.

<sup>30</sup> Esem bi bei odo oso nei egeesee takaso, ‘Haye, egeesee selaimes. Esino odo hee ta maga see hogado sibilesos dimapoo takooga, diayo dibada goo tokenee maga miligi pialosos Godee mapoo ka sibilei,’ diso.

<sup>31</sup> Esino Eibalahameeye see tobu yimapoo egeesee takaso, ‘Diayo Moseseeye tei hogugu sabolo osoloso Godee maga to toloso kokodo takomo sili odo oso Godeeye to hogugu omapoo tei telega poogooga, diayo see kasee maga odo hee ta maga hogado sibilesos to takooga, omapoo tei ka talaiyo?’ diso.”

#### Tokenee goo mapoo gido dili goo

(Matiyu 18:6-7,21-22, Maka 9:42)

**17** Beeame heeso Yesuye o hamamee dili odo mapoo egeesee takaso, “Edebeeyo goo tokenee mapoo gido dilei goo ee tei sibileisos. Esino goo egee bei mooloogoomo sili odo mapoo, ayo yimapoo ka taka, eeye-ee! <sup>2</sup> Esiga odo heeso amapoo tei too odo ee goo tokenee mapoo gido dilame gooleega, daga odo aboso yimapoo sibilesos, diayo o mu mapoo yo toowa bagagolosos howo bou mapoo toosoga, odo egee dala pepooko toloso talaisos. Esino yayo odo amapoo tei too pepooko ee goo tokenee mapoo gido dilesos, tokenee toga, edebeeyo tokenee mapoo gido dili odo mapoo takelega poogooga, Godeeye yimapoo nei dala toowa tenelaisos. <sup>3</sup> Esiga niba niso nediliyo medee bamelees.

Osoloso nee odo tei too odo oso goo tokenee toga, yimapoo takees. Osoloso yayo o goo tokenee mapoo goohel sabolo o tokenee mapoo miligi piaga, o tokenee egee boobado bigi. <sup>4</sup> Osoloso yayo beeame hedebe ma kulodu namapoo tokenee too ee 7 daga,

osoloso namapoo sibilesu yayo emegei di to taka onosee 7 daga, nayo o tokenee goo ee boobado bigi."

### Tei too goo

<sup>5</sup> Diye di odoo oso Lodee mapoo egeesee takaso, "Iyo tei too goo ee toowa moodee," diso.

<sup>6</sup> Esemee Lodeeye nei egeesee takaso, "Niyo tei too goo oso homokoko pepooko egeesi masi nimapoo mologa, niba tebia niyo molobei hamapoo takolone, 'No nee too sabolo tado dilesu abei mapoo tebee,' daga egeesee selaiso," diso.

### Wiligi odoo o tou teli odoo eyo goo

<sup>7</sup> "Tou teli odoo oso o wiligi odoowo homolee mapoo mi doomelee maga, o, sipi be hu bamelee maga siboga, yo wulo sibilesu nei nalaima, haye. <sup>8</sup> Yo daga o wiligi odoo taba eyo nei siloso, dugo hapoo ee kaloso, nei si ee yimapoo tenelaiso. Osoloso o wiligi odoo taba oso nei naloso koodobuoga, see hamamee yayo wo sabolo howo sabolo nalaiso. <sup>9</sup> Esino yayo tou egeesi tomo siloga, o wiligi odoo taba oso nei yimapoo goomoga to takalaima. Bei, egee o tou. <sup>10</sup> Esiga niba egeesee selai tekepo. Ayo nimapoo tou teye daga, niyo goo egee tolosu egeesee takalai tekepo, 'Iba wulo tou teli odoo. Esiga iyo tou hagee tomo silesibo goo hee talame koo seeso,' dee takee," diso.

### Yesuye odoo e bia 10 ee tekepo moodoo

<sup>11</sup> Yesu Yolusalem mi mapoo dulone, Gelili mi ogo osoloso Samaliya mi ogo doloso domo abaga diso. <sup>12</sup> Yo eli domo mapoo mi pepooko hee mapoo dumolome, odoo e bia 10 egeiso. Odoo e bia 10 oso Yesu ogoloso yima hegi sibadele. Esino wulo eli sage tebisamolone, <sup>13</sup> toso neligidi yimapoo egeesee takaso, "Yesu, wiligi odoo, nayo iba sooloo dolone pidi!" diso.

<sup>14</sup> Esemee yayo diba ogoloso egeesee takaso, "Niba dilesu Godee ogo odoo ogo doloso domo debeli odoo mapoo nibada su eligi," diso. Diba Yesuye egeesee taka duloso dimelee omapoo, dia kolo see tekepo paso.

<sup>15</sup> Osoloso dima kulodu odoo hee o kolo tekepo pa ogoloso Yesu mapoo wedi sibulone, toso neligidi Godee mapoo goomoga poudoomo simiso.

<sup>16</sup> Egeeseemo sibilesu Yesuwo homo beiyopoo gasuwolosu badolone Yesu mapoo goomoga teneeso. Odoo hagee Samaliya odoo.

<sup>17</sup> Esemee Yesuye egeesee takaso, "Ayo odoo 10 olo tekepo moodooso. Esino odoo abo egee bia kasomo?"

<sup>18</sup> Bei kasee maga, Yu dele poogoo odoo hedebe ha-gooso obusomo Godee mapoo goomoga tenelame ka wedi simiyo?" diso. <sup>19</sup> Osoloso Yesuye odoo hamapoo egeesee takaso, "Nayo amapoo tei too maga no olo tekepo paso. Esiga no toboloso di," diso.

### Godeeye wiligi doloso badeli goo oso sibilei

(Matiyu 24:23-28,37-41)

<sup>20</sup> Beeame heeso Pelisi odoo oso Yesu mapoo egeesee takaso, "Godeeye wiligi doloso badeli goo ee kobolone sibileiyo?" diso.

Esemee Yesuye nei dimapoo egeesee takaso, "Godeeye wiligi doloso badeli goo ee woola sibo agalaima.

<sup>21</sup> Osoloso edebeeyo Godeeye wiligi doloso badeli goo ee hamapoo hagee moloso, o, koogee moloso, dee takalaima. Bei, Godeeye wiligi doloso badeli goo ee nima kulodu moloso," diso.

<sup>22</sup> Osoloso see o hamamee dili odoo mapoo egeesee takaso, "Odoo Holo mo beeame oso siboga niyo agalame goomogalai beeame ee sibileiso. Esino niba agalaima. <sup>23</sup> Osoloso see edebeeyo nimapoo takolone, 'Odoo Holo a koo badoso, o, hamapoo badoso,' dee takooga, dia to mapoo tei tolosu omapoo na agala di.

<sup>24</sup> Esino Odoo Holo ayo sibilei beeame ee, kei ebiedi buguga mi susuga egee gadeebugu egeesee selaiso. Egeeseega odoo susuga oso agalaiso. <sup>25</sup> Esino daga Odoo Holo a dala toowa talaiso. Osoloso odoo epedee hagee do oso a diya gowoolaiso.

<sup>26</sup> Nowaye badebei beeame omapoo goo peledaba, goo hedebe egeesi masi oso Odoo Holo ayo sibilei beeame omapoo peledabalaiso. <sup>27</sup> Nowaye badebei beeame mapoo edebeeyo nei na howo na dolone dobolone, soboso giso obuwo osoloso gisoso sobo huya dolone debeiso. Egeesee selone doboome, beeame heeso Nowa du ma kulodu gadiso. Esemee howo toowa duwa oso sibilesu odoo susuga piluguso.

<sup>28</sup> Osoloso goo hedebe egeesi masi oso Loteeye badebei beeame mapoo peledabaso. Bei, Loteeye badebei beeame mapoo edebeeyo nei na howo na dolone debeiso. Osoloso biso emegei nei pidi nei pidi dolone debeiso. Osoloso nei howo sogo, moso togo dolone debeiso. <sup>29</sup> Egeesee selone doboome beeame heeso, Loteeye Sodom mi poogoloso dime, kei ma dokodooga dou sabolo osoloso yo dei heliye oso sibilesu odoo Sodom mi mapoo debeli susuga piluguso.

<sup>30</sup> Esiga Odoo Holo ayo sibilei beeame mapoo odoo susuga oso goo egeesi tolone daga, ee ma kulodu a ka sibilei. <sup>31</sup> Esiga beeame omapoo odoo hau mapoo badebei oso see moso kulodu o bi talame gadilei tekeponee. Osoloso odoo homolee mapoo nei howo sogo-mologa, yo see mosopoo wedi dilei tekeponee. <sup>32</sup> Esiga niba Loteeyo osobowo goo ee goolee. <sup>33</sup> Esiga odoo agayo o gie badeli eyo nediliyo pidilame wegegeega, o gie badeli egee osugobalaiso. Esino odoo agayo mo goo maga o gie badeli peegoo magooga, yo badoboso kookaiyo gie osee badalaiso. <sup>34</sup> Esiga ayo nimapoo taka, beeame omapoo giso bakadio kida hedebe mapoo tileiso. Esino odoo hee ido polone, odoo heeno omapoo pagalaiso. <sup>35</sup> Osoloso beeame omapoo sobo bakadio wo gamalaiso. Esino sobo hee ido polone, sobo heeno omapoo pagalaiso. [ <sup>36</sup> Osoloso beeame omapoo giso bakadio homolee ma kulodu tou tomo

sileiso. Esino odoo hee ido polone, heeno omapoo pagalaisy.]

<sup>37</sup> Yesuye to hageesee takoloso koodobume, o hamamee dili odoo oso yimapoo egeesee takaso, "Lodee, goo hagee kamapoo peledabalaayo?" diso. Esemee Lodeeye dimapoo nei egeesee takaso, "Mi hee mapoo gala ta eyo su hune mologa, kukodee susuga hune egee nalame omapoo busiliso," diso.

### Sobo bauwo goo maga dio masi taka

**18** Osoloso Yesuye see tobu dio masi hamaga o hamamee dili odoo dimapoo eligiso, diayo beeamee susuga dokodoo takomo silone gowoolega pagalame. <sup>2</sup> Egeeseelone yayo egeesee takaso, "Mi hee mapoo goo meedili odoo badebeiso. Esino yo Godeebolo ebilega badolone, odoo koo gweli. <sup>3</sup> Osoloso mi hedebe omapoo sobo bau hee badebeiso. Esino sobo hagooso beeamee susuga goo meedili odoo hamapoo sibilesa howolone egeesee takeliso, 'Nayo a pidilone odoo amapoo ha egee tomolo eyo goo meedi,' deliso.

<sup>4</sup> Esino goo meedili odoo oso daga sobo hagee pidilei yo goomegele. Esino beeamee susuga sobo hagooso yimapoo sili sileeme ogoloso egeesee gooleeso, 'A Godeebolo koo ebili osoloso a odoo koo gweli. <sup>5</sup> Esino a sobo hageeyo to dumeleso diya gowoo. Esiga yayo see mo moso mapoo sibili ee pagalame yo pidileiso,' diso."

<sup>6</sup> Esiga Lodeeye egeesee takaso, "Goo medee koo meedili odoo eyo goo hagee ogoloso goo goolee medee kibiya te. Bei, goo meedili odoo hagooso daga sobo hagee pidilei gowoomeleso see hamamee yo pidiso. <sup>7</sup> Esiga Godeeye hesiga odoo oso beeamee sabolo gesi sabolo yimapoo howa mologa ogoloso diba tei pidileiso. Osoloso yayo diayo dokodoo taka to ee duloso nei tenelai koo dagili. <sup>8</sup> Esiga ayo taka, Godee o odoo oso yimapoo howa duloso goomoga sabolo diba pidiliso. Esino Odoo Holo ayo see wedi sibilei beeamee mapoo, mipoo hamapoo tei too goo ee molo agalaisomo?"

### Pelisi odoo sabolo osoloso tekisi molee misigeli odoo sabolo

<sup>9</sup> Odoo abo dieso nediliyo diba Godeeyo howo woola tekepo dolone, hee odoo abo tokenee deli odoo mapoo Yesuye dio masi hageesee takaso, <sup>10</sup> "Odoo bakadio, Pelisi odoo sabolo osoloso tekisi molee misigeli odoo sabolo, Yu odoowo tei moso mapoo dokodoo takalame palaso. <sup>11</sup> Osoloso Pelisi odoo oso toboloso obusomo tobululone dokodoo hageesee takaso, 'Godee, a namapoo goomoga to taka. Bei, a odoo abo egeesinee. Bei, diba adaba bi teliso, osoloso goo tokenee teliso, osoloso diba adaba sobo sabolo giso sabolo heli teliso. Osoloso a see tobu namapoo goomoga to taka. Bei, a tekisi molee misigeli odoo keeseenee. <sup>12</sup> Bei, a sadee hedebe ee ma kulodu beeamee bakadio nei nelega tei doloso badeliso. Os-

oloso ayo bi too beeamee mapoo mo bi 10 ee ma kulodu hedebe namapoo teneliso,' diso.

<sup>13</sup> Esino tekisi molee misigeli odoo oso hamameedee hoogoo bia omaga toboloso o goo tokenee mapoo gooholone o su eyo nediliyo o budo mapoo kobuguloso oo goobodobuloso tobululone dokodoo egeesee takaso, 'Godee, a tei medee diya tokenee odoo. Esiga nayo a sooloo dolone mo goo tokenee eyo nei na tenee,' diso.

<sup>14</sup> Esiga ayo nimapoo taka, tekisi molee misigeli odoo hagooso o mosopoo wedi dulone, Godeeyo howo woola abaga tekepo odoo doloso diso. Esino Pelisi odoo mapoo goo hageesi mauwe meleeso. Esiga odoo agayo eyo nediliyo yo toowa daga, nei yo Godeeye pepooko dalaiso. Esino odoo agayo eyo nediliyo yo pepooko daga, nei Godeeye yo toowa dalaiso."

### Yesu sabolo holaiso sabolo

(Matiyu 19:13-15, Maka 10:13-16)

<sup>15</sup> Beeamee hedebeeso odoo aboso holope Yesu mapoo ido sibadeeso, o deeso sigoloso pidilame. Esino o hamamee dili odoo oso goo egee ogoloso hamaga takaso. <sup>16</sup> Esemee Yesuye holaiso gilimadoloso, o hamamee dili odoo dimapoo egeesee takaso, "Holaiso amapoo sibilei soowa. Niyo na hamaga takee. Bei, edebeeyo holaiso hageesi masi poga, diba Godeeye wiligi doloso badeli mapoo gasibileiso. <sup>17</sup> Ayo nimapoo taka, edebeeyo o goo holaiso masi amamo to mapoo mesimo sili, egeesee selega poogoloso, Godee mapoo mesilega poogooga, yo Godeeye wiligi doloso badeli mapoo gasibilei mauwe."

### Bi bei odoo

(Matiyu 19:16-30, Maka 10:17-31)

<sup>18</sup> Wiligi odoo heeso sibilesa Yesu mapoo egeesee takaso, "Eligili odoo tekepo, ayo ogoo goo toga kookaiyo badoboso gie badeli ka talaiyo?" diso.

<sup>19</sup> Esemee Yesuye nei yimapoo egeesee takaso, "Bei kasalame nayo a tekepo odoo dee ka takala? Tekepo odoo hee koo badoso. Esino hedebe Godeeno tekepo. <sup>20</sup> Esiga Godeeyo tei magoo no olo gooleedooso: adaba kooka sobo na peedee hui, osoloso odoo na wooloome, osoloso heli na te, osoloso odoo hee mapoo gamenee na gigidi, osoloso nama dio noowee dio oso taka to omapoo mesie."

<sup>21</sup> Esemee odoo oso Yesu mapoo egeesee takaso, "A holope pepooko maga simi tei magoo susuga hagee tobuloso tomo simiso," diso.

<sup>22</sup> Esemee Yesuye o to duloso nei egeesee takaso, "No goo hedebe doopoo dagadi moloso. No dilesa nee bi susuga odoo abo mapoo tenee, nei molee talame. Osoloso bi too eyo nei molee ee bi mauwe odoo mapoo pi. Nayo egeesee seega, Kei mi ma dokodoo bi tekepo nee hu sabolo mologa agalaiso. Esiga no a deede sibe," diso.

<sup>23</sup> Odoo hagooso Yesuwo to duloso diya pupudaso. Bei, yimapoo bi bei meleega. <sup>24</sup> Esemee Yesuye yimapoo bolone egeesee takaso, "Bi bei odoo oso Godeeye wili-

gi doloso badeli mapoo gadilei diya kalawa. <sup>25</sup> Esiga dugo duseli midole ou maga kemol be toowa oso gadilei kalawa. Esino bi bei odoo oso Godeeye wiligi doloso badeli mapoo gasibilei diya kalawa toowa."

<sup>26</sup> Esem e hamamee dili odoo oso eligi goo hagee duloso egeesee takaso, "Esino kalawa egee odoo agayo gie badeli ka talaisomo?" diso.

<sup>27</sup> Esem e Yesuye dimapoo egeesee takaso, "Ede-beeyo eyo nediliyo o gie badeli pidilei tebile. Esino hedebe Godee yino tebia. Bei, yayo goo susuga ee moodoolai yimapoo kalawa mauwe," diso.

<sup>28</sup> Osoloso Pitaye Yesu mapoo egeesee takaso, "Iba ibada bi susuga poogoloso, no dodomo simiso," diso.

<sup>29</sup> Esem e Yesuye dimapoo nei egeesee takaso, "Ayo nimapoo taka, edebeeyo Godeeye wiligi doloso badeli goo maga o moso sabolo, osoloso osobo sabolo, osoloso emei dio sabolo omolo sabolo, osoloso ama dio owee dio sabolo, osoloso owolo dio sabolo poogoloso siboga, yayo epedee hamapoo nei toowa talaiso. Osoloso hamamee yo kookaiyo badoboso gie badeli talaiso," diso.

#### Yesuye see eyo talai goo ee taka

(Matiyu 20:17-19, Maka 10:32-34)

<sup>31</sup> Osoloso see Yesuye o hamamee dili odoo 12 gilimadoloso peegoo gilimado dilesa dobolone dimapoo egeesee takaso, "Iba epei Yolusalem mi mapoo poloso. Esiga Godee maga to toloso kokodo takomo sili odoo oso daga Odoo Holo mo goo hogugu susuga omapoo peledabalaiso. <sup>32</sup> Osoloso a Yu dele poogoo odoo mapoo tenelaiso. Osoloso diayo a manalaiso, osoloso amapoo tokenee goo moodoolaiso, osoloso amapoo makawo pakalaiso. <sup>33</sup> Osoloso a tiso dabalaiso, osoloso a wooloomalaiso. Esino a midoo ma kulodu tamoloso, beame bakadio hedebe di poogoloso see gie badeli toloso hogabileiso," diso.

<sup>34</sup> Esino Yesu o hamamee dili odoo oso to hagee duloso goo eyo bei medee kibiya gooleede. Bei, goo eyo bei dimaga mada magooga.

#### Yesuye odoo howo bakadio si moodoo

(Matiyu 20:29-34, Maka 10:46-52)

<sup>35</sup> Yesu Yeliko mi koola mapoo sibumolome, odoo howo bakadio si oso Yesuye sibilei eli pee mapoo badolone molee howameleeso. <sup>36</sup> Egeeseelone odoo mooloogoodoo susuga oso to bowoomo sibume duloso odoo abo mapoo woosaso, ogoo goo oso peledaba beleso. <sup>37</sup> Esem e odoo aboso yimapoo takolone egeesee takaso, "Yesu Nasalet odoo oso odoo abo sabolo ka diadee," diso.

<sup>38</sup> Yo to hagee duloso neligidi iso, "Yesu, Deibidiyo amawe, nayo a sooloo dolone a pidiye!" demeleso.

<sup>39</sup> Esino odoo malalo diadee oso yimapoo to kitulugu sabolo egeesee takaso, "No to mauwe badebee," diso. Esino edebeeyo yimapoo egeesee takeme, yayo dia to mapoo dulega, to kitulugu sabolo neligidi egeesee takolone badebeiso, "Deibidiyo amawe, nayo a sooloo dolone a pidiye!" demeleso.

<sup>40</sup> Esem e Yesu o to duloso omapoo kookoo toboloso tobudulone, odoo abo dimapoo egeesee takaso, "Odoo egee hamapoo ido sibe," diso. Osoloso odoo howo si olo Yesu mapoo ido sibilesa badoboome, Yesuye yimapoo egeesee takaso, <sup>41</sup> "No ayo namapoo ogoo goo moodoolai goomogodo?" diso.

Esem e howo si odoo oso nei yimapoo egeesee takaso, "Lodee, mo howo tekepo pe. A see agalai goomogo," diso.

<sup>42</sup> Esem e Yesuye yimapoo egeesee takaso, "Esiga no epedee nee howo see ege. Bei, no tei tooga, no see olo tekepo paso," diso. <sup>43</sup> Esem e haga bologelega o howo bakadio see tekepo paso. Esem e yayo Yesubolo dulone Godee mapoo goomoga poudoomo diso. Esem e goo peledaba hagee egei odoo susuga oso Godee mapoo goomoga poudoomo diadeeso.

#### Sekiyes tekisi molee misigeli odoo

**19** Yesu Yeliko mi mapoo peledoboloso, see mi domo abaga dimeleeso. <sup>2</sup> Mi omapoo tekisi molee misigeli wiligi odoo taba badebeiso, o hu Sekiyes. Osoloso yo bi bei odoo. <sup>3</sup> Yesu eli domo abaga dumolome, odoo susuga oso yo agalame diya mooloogoodoo. Sekiyes yo Yesu agalai goomogaso. Esino yo odoo diya deiyepoga, yayo Yesu agalai odoo mooloogoodoo oso yo gooloogoo. <sup>4</sup> Esem e Sekiyes yo Yesu agalame Yesu diayo sibademelee eli su mapoo malalo saga hoguo dilesa homo ma dokodoo peleso badebeiso.

<sup>5</sup> Esem e Yesuye sibilesa egeino, Sekiyes yo homo ma dokodoo peleso badoboome ogoloso yimapoo egeesee takaso, "Sekiyes, no saga miyomoo mei. A epei nobolo hodobo nee mosopoo dilei goomogo," diso. <sup>6</sup> Esem e yo saga miyomoo meilesa, goomoga sabolo Yesu o mosopoo ido diso.

<sup>7</sup> Osoloso odoo susuga oso goo hagee ogoloso diya gowoolone egeesee takaso, "Yesu tokenee teli odoowo mosopoo diso," dee takaga meleeso.

<sup>8</sup> Osoloso diba dilesa Sekiyeseeyo moso mapoo dobolone Sekiyeseeye toboloso egeesee takaso, "Lodee, a epei goo hageesi moodoolaiso: Ayo mo bi abo hodio ee bi mauwe odoo mapoo pileiso. Osoloso adaba molee ayo gamenee taka maga ayo hedebe too eyo nei see mawo dimapoo nei toowa bakadio bakadio di egeesi dimapoo tenelaiso," diso.

<sup>9</sup> Esem e Yesuye Sekiyeseeyo to duloso yimapoo egeesee takaso, "Epei moso hageeyo kulodu debeli odoo mapoo gie badeli goo olo tosimiso. Bei, Sekiyes hagee nose Eibalahameeyo amawe. <sup>10</sup> Bei, Odoo Holo ayo simi hagee tei tele poogoo odoo peegoo osugoba ee esiameloso ogoloso diba gilimadoloso dimapoo gie badeli tenelame ka simi," diso.

#### Wiligi odoo oso o tou teli odoo mapoo molee tenee

(Matiyu 25:14-30)

<sup>11</sup> Edebeeyo Yesuwo to hagee dulone dobolone egeesee goolone debeiso, "Yesu Yolusalem koola mapoo sibilesa badoso. Esiga Godeeye wiligi doloso

badeli goo onosee koola tooboo malaiso," demeleeso. Egeesee gooloogamelee ogoloso, Yesuye dio masi hagee takaso, <sup>12</sup> "Osoloso wiligi odoos hee mi eli sage mapoo gihadeli hu tala dilame badolone, o tou teli odoos 10 gilimadoloso dimapoo molee ko mina † deli hedebe tenee, hedebe tenee diso. Esiga yayo dimapoo egeesee takaso, 'Niyo ayo see wedi sibilei ee bolone molee see toowa palame, biyo moso togoloso bei mooloogee,' diso.

<sup>14</sup> Osoloso yo dime, o mosobia oso yo diya gowoolone, yima hamamee odoos abo diye diso, yayo diba gihadalai goo maga diayo gowe goo ee takalame.

<sup>15</sup> Esino odoos egee gihadeli hu toowa tolosos see wedi simiso. Yo see wedi sibilesos odoos molee yayo pi ee gilimadoos, molee toowa mala belesos agalame.

<sup>16</sup> Osoloso daga odoos heesos malalos sibilesos egeesee takaso, 'Nayo molee amapoo tenemeni oso biyo moso togoloso bei mooloogolosos see molee ko mina deli abo 10 egeesos toosos,' diso.

<sup>17</sup> Esemee gihadeli odoos oso yimapoo goomogolone egeesee takaso, 'No tou medee tekepo todoos. Esiga nayo goo pepooko hagee medee bameleegas, see nayo mi 10 wiligi dolosos bolone badalaisos,' diso.

<sup>18</sup> Esemee see omapoo badeli tou teli odoos hee oso sibilesos egeesee takaso, 'Nayo molee amapoo tenemeni oso biyo moso togoloso bei mooloogolosos see molee ko mina deli abo dee tiadoos egeesos toosos,' diso.

<sup>19</sup> Esemee gihadeli odoos oso yimapoo egeesee takaso, 'Nayo mi dee tiadoos wiligi dolosos bolone badalaisos,' diso.

<sup>20</sup> Osolosos see tou teli odoos hamameedesos oso sibilesos egeesee takaso, 'Wiligi odoos, nee molee hagoosos. Nayo amapoo teneme, todilesos dugosos tiadolosos mada magoosos. <sup>21</sup> Bei, no diya kitulugos odoos. Esiga a nobolos diya ebiasos. Osolosos nayo kitulugos maga odoos abosos bi ma ee telisos. Osolosos odoos abosos nei segei nayo gebiselisos,' diso.

<sup>22</sup> Esemee o wiligi odoos taba oso yimapoo egeesee takaso, 'No tou tokenee teli odoos. Esiga no to egeesee taka gos omagas, ayo nee gos meedileisos. Bei, nayo takolone a diya kitulugos odoos diso. Osolosos nayo amapoo takolone ayo kitulugos maga odoos abosos bi ma ee telisos diso. Osolosos odoos abosos nei segei nayo wulos gebiselisos. <sup>23</sup> Egeesee ma kulodus bei kasee magas molee toowa palame molee gihadeli odoowos mosopoo magelegas ka poogoowos, ayo see wedi sibilesos molee toowa polosos mologas ka talais?' diso.

<sup>24</sup> Yo egeesee badolone odoos koola omapoo tebidi mapoo egeesee takaso, 'Niba yimapoo molee ko mina deli egee molos tolosos see molee ko mina deli 10 toos odoos mapoo tenee,' diso.

<sup>25</sup> Esemee diayos yimapoo egeesee takaso, 'Wiligi odoos, no ege, yo molee ko mina deli 10 olos tolosos badosos,' diso.

† Molee ko mina deli hagee molee toowa. Esiga tou teli odoos oso tou tomo dimelesos beames 100 tugodogas, eyo nei molee ko mina deli hedebe telisos.

<sup>26</sup> Esino wiligi odoos oso dimapoo egeesee takaso, 'Ayo nimapoo taka, odoos agayos dimapoo bi tenee ee medee gihadogas, dimapoo see bei tenelaisos. Esino odoos agayos dimapoo tenee bi ee medee gihadelegas poogoogas, dimapoo bi pepusos abo egee molos tolosos peegos todileisos. <sup>27</sup> Osolosos odoos agayos ayo dibas gihadalames semes amapoo gowes, dibas hamapoo iyados sibilesos mo howos woolas piligis,' diso."

### Yesuye Yolusalem mi mapoo wiligi odoos masi tobolosos gadi

(Matiyu 21:1-11, Maka 11:1-11, Yonee 12:12-19)

<sup>28</sup> Yesuye to taka hagee koodobulosos see Yolusalem mapoo dimeleeso. <sup>29</sup> Yo Olipi mubis kulis mapoo mosodeis bakadios, Betepage osolosos Betanis koola mapoo peledabagos. Osolosos o hamamee dili odoos bakadios diye dolone dimapoo egeesee takaso, <sup>30</sup> "Mosodeis koogees mapoo dilesos omapoo ogogas, be hu gie kauwas donkis edebeeyos wakis mas dokodoo bulosos dilegas poogoo ee, o mu mapoo ebigisos bagagolosos, omou mapoo bagagoo molosos. Esiga be ee niyo ebigis pidis poogolosos, hapoo hados sibe.

<sup>31</sup> Egeeseegas odoos heesos sibilesos nimapoo takolone, 'Beis kaselames be hu donkis ebigis kas pidibagalas, dees takoogas, niyo yimapoo to neis egeesee takee, 'Lodeeyes be hagee talais goomogonas,' dees takee," diso.

<sup>32</sup> Esemee o hamamee dili odoos oso Yesuye takas to ee dulosos mi omapoo diadeesos. Dibas dilesos egeinos, gos susugas Yesuye takas to sabolos tobulosos molomes egeisos. <sup>33</sup> Esemee dibas donkis be hu ee ebigis pidimeleenos, be eyo amameeyes dimapoo egeesee takaso, "Niba kasalames be ebigis kas pidibagalas?" diso.

<sup>34</sup> Esemee neis diayos dimapoo egeesee takaso, "Lodeeyes be hagee talais goomogonas," diso.

<sup>35</sup> Esemee diayos donkis be ee Yesu mapoo hados simisos. Osolosos dibadas kekeisilis dugas tikadolosos donkis be eyo wakis mas dokodoo malosos, Yesu dees mapoo tolosos dokodoo bedisos. <sup>36</sup> Yo be mas dokodoo bulosos dumolomes, odoos susugas oso dibadas kekeisios dugas susugas tikadolosos yayos dileis elis mapoo poomos diso.

<sup>37</sup> Osolosos Yesuye Olipi mubis mas dokodoogas Yolusalem mapoo momolomes, o hamamee dedelis odoos susugas oso yayos gos opusomos di moodoomos silees gos magas Godees mapoo goomogas neligidis poudoomos mousos.

<sup>38</sup> Egeeseelones diayos egeesee takagameleesos, "Wiligi odoos taba ee Godeeyos hu magas kitulugos sabolos egee sibos o hu dokodoo poude!

Osolosos Keis mi mas dokodoo mesies gos osos meles dees!

Osolosos Keis mi mas dokodoo badelis Godees mapoo goomogas poude!" dees takolone debeisos.

<sup>39</sup> Esino mooloogoodos toowa ee mas kulodus Pelisis odoos abos omapoo debeisos. Diayos Yesu mapoo egeesee takaso, "Eligilis odoos, no nee hamamee dedelis odoos dibas to koodobilames dimapoo to kitulugos sabolos takee," diso.

<sup>40</sup> Esemé Yesúye nei dimapoo egeesee takaso, "Ayo nimapoo taka, odoó hagee bia oso to mauwe duga, nei yo susuga hagooso to neligidi kesalaiso," diso.

### Yesúye Yolusalem mi ogoloso pisa

<sup>41</sup> Yesu Yolusalem koola mapoo dulone, Yolusalem mi ee malalo molo ogoloso pusulone egeesee takaso, <sup>42</sup> "Yolusalem odoó, niba kaseeyo? A diya goomogo, epedee niyo mesie goo toloso sibilei goo ono diya gooleedalame. Esino niba goo hagee medee ogoloso koo gooleedo. Bei, mesie goo ee nimaga mada magoo moloso. <sup>43</sup> Esiga nimapoo ha teli odoó oso nee mi belee pee maga sulodoboloso mi kukaloso omaga peleso mi edebeeyo bia ee ma kulodu gadilei beeamé oso nimapoo sibileiso. <sup>44</sup> Osoloso diayo nibada moso guobuguloso odoó susuga piligileiso. Osoloso nibada mi guobugu ee ma kulodu yo heeso yo hee ma topudoo molo agalaime. Esiga goo hageesi oso nimapoo peledabalaiso. Bei, Godeeye niba pidilame simi ee niyo medee ogoloso koo gooleedo."

### Yesúye Yu odoowo tei moso mapoo pala

(Matiyu 21:12-17, Maka 11:15-19, Yonee 2:13-22)

<sup>45</sup> Yesu Yolusalem mi mapoo gadileso Yu odoowo tei moso mapoo palaso. Yo moso ee ma kulodu gapeleso tobudulone egeino, odoó susuga oso bi odoó abo mapoo tenelo nei ka to domolome egeiso. Esemé yayo bi eyo ama dio susuga moso ee ma kuloduga peegoo hasisobugulone egeesee takamo sileeso, <sup>46</sup> "Niba goolee, Godeeyo to booka mapoo hogugu oso egeesee takooso, 'Mo tei moso ee howo gisili moso oso,' diso. Esino niyo Godeeyo moso hagee heli teli odoó oso mada debeli moso paso," diso.

<sup>47</sup> Yesu Yolusalem mi mapoo dileso badolone beeamé susuga Yu odoowo tei moso ma gapeleso odoó susuga mapoo Godeeyo to eligimeleso. Esemé tei moso wiligi odoó tebisa sabolo, osoloso tei eligili odoó sabolo, osoloso Yu odoowo wiligi odoó tebisa oso Yesu wooloomalame eli esiamo silesibiso. <sup>48</sup> Esino diba Yesu wooloomalai eli egele. Bei, odoó susuga oso Yesúye eligi goo ee hodu dileso diya goomoga sabolo duliso.

### Yesúye kitulugu maga woosa

(Matiyu 21:23-27, Maka 11:27-33)

**20** Beeamé hee mapoo Yesu Yu odoowo tei moso mapoo peleso odoó susuga mapoo Godeeyo to eligimolome, tei moso wiligi odoó tebisa sabolo, osoloso tei eligili odoó sabolo, osoloso Yu odoowo wiligi odoó oso Yesu mapoo sibileso egeesee takaso, <sup>2</sup> "No ogoso kitulugu maga goo hagee ka moodoomo silala? Odoó agayo namapoo kitulugu hagee ka teneeyo?" diso.

<sup>3</sup> Esemé Yesúye dimapoo nei egeesee takaso, "Ayo woosali to hedebe nimapoo woosalaiso. Esiga niyo amapoo takee, <sup>4</sup> Odoó howo sauwudumo silame

Yonee mapoo kitulugu odoó agayo ka teneeyo? Godeeye teneeyo, o, edebeeyo teneeyo?" diso.

<sup>5</sup> Esemé diayo to hagee duloso, dieso nediliyo dima kulodu to moulone egeesee takaso, "Iyo kasee takalaiyo? Iyo Godee maga simi dee takooga, yayo imapoo egeesee takalaiso, 'Bei kasee maga niyo Yoneeyo to mapoo tei telega ka poogoowo?' dee takalaiso. <sup>6</sup> Osoloso iyo see yayo kitulugu ee edebeeyo teneedoo, dee takooga, see odoó susuga oso imapoo komonolone iba wooloomalame yoso enigileiso. Bei, odoó susuga oso Yonee yo tei Godee maga to toloso kokodo takomo sili odoodoo, dee gweliso," diso.

<sup>7</sup> Egeeseelone diayo nei Yesu mapoo egeesee takaso, "Yoneeye kitulugu too eyo bei, iba gooleedele," diso.

<sup>8</sup> Esemé Yesúye dimapoo egeesee takaso, "Esiga ayo kitulugu tomo hagee sulo goo ee nimapoo takalaime," diso.

### Tou tokenee gibadeli odoó eyo goo maga dio masi taka

(Matiyu 21:33-46, Maka 12:1-12)

<sup>9</sup> Osoloso Yesúye see dio masi hamaga odoó mapoo egeesee takaso, "Beeamé heeso odoó hee o homolee ma kulodu geleipi howo segeiso. Yo geleipi howo sogoloso eyo nei odoó abo maga nei tamalame dimapoo bameleeye doloso, yo mi hee eli sage mapoo badalame diso. <sup>10</sup> Yo omapoo dileso badoboome, homokokoso bi moodolai beeamé oso simiso. Osoloso yayo o tou teli odoó hee mapoo o homolee mapoo dileso homokoko abo diayo goolooga ee tala dileso tosibeye diso. Esino omapoo dileso peledoboome, homolee gibadeli odoó oso yo woomele poogoloso bi mauwe see wedi di diso. <sup>11</sup> Egeesee ogoloso amameeye tou teli odoó hee diye diso. Esino gibadeli odoó oso odoó hagee sabolo woolone yimapoo ebia goo teneloso bi mauwe see wedi diye diso. <sup>12</sup> Esemé amameeye see tobu o tou teli odoó hee diye diso. Esino yinosee gibadeli odoó oso woomele poogoloso peegoo habuguso.

<sup>13</sup> Egeesee see ogoloso amameeye eyo egeesee gooleeso, 'Ayo ogoo goo moodolaiyo? A see mo holo ayo gooma diye dalaiso. Egeesee seega diayo o to mapoo mesilei malaiso,' diso.

<sup>14</sup> Esino homolee gibadeli odoó oso homolee eyo amayo owoloye simi ogoloso dieso nediliyo egeesee takagameleso, 'Holo hagooso ama toga, amomo bi gilibo susuga ee yayo talaiso. Esiga yo wooloomaloso homolee hagee iyo tomo,' dee takagameleso.

<sup>15</sup> Egeeseelone diayo holo egee homolee peegoo ido dileso wooloomaso."

Yesúye to hagee taka koodobuloso badolone o to dulone debei odoó mapoo egeesee takaso, "Homolee eyo amameeye homolee gibadeli odoó mapoo ogoo goo moodolaiyo? <sup>16</sup> Yo sibileso diba piliguloso see odoó dia toloso o homolee gidebeeye dalaiso," diso.

Esemé odoó susuga Yesuwo to dulone debei oso egeesee takaso, "Goo hageesi oso peledabalai tekeponee," dee takagameleso.



<sup>17</sup> Esino Yesuye dimapoo bolone egeesee takaso, "Esino bei kaselame Godeeyo to booka mapoo hogugu oso egeesee ka takoosomo?"

'Moso tegeli odooso omou gowoolone togobugu oso see moso omu domo pupodoo ka moloso.'

<sup>18</sup> Esiga odoos agayo omou omapoo takodi buguloso homodobuoga, yo dala toowa talaiso. Osoloso omou oso odoos hee bulugu magooga, odoos ee ebidibig-ileiso," diso.

<sup>19</sup> Esemee tei eligili odoos sabolo osoloso tei moso wili-gi odoos tebisa sabolo oso Yesuye dio masi taka hagee gooleedoloso takolone, 'Ibada goo ee takoo,' doloso, yo omapoo talame eli esiaso. Esino diba odoos mooloo-goodoo toowa ogoloso Yesu talai ebigaso.

### Sisa mapoo tekisi molee tenelai goo

(Matiyu 22:15-22, Maka 12:13-17)

<sup>20</sup> Egeesee ma kulodu tei eligili odoos sabolo, osoloso tei moso wili-gi odoos tebisa sabolo oso Yesu wooloomalame eli esilone, diayo eli kweli odoos abo diye dolone egeesee takaso, "Niba dilesio gamenee odoos tekepo masi silesibulone, yimapoo woosali to oso woosamo silesibe. Egeesee ma kulodu Yesuye nei to tokenee kasee takooga, iyo yo toloso gamalee wili-gi odoos mapoo tenelaiya," diso. <sup>21</sup> Esemee diayo Yesu mapoo dilesio to hodolone egeesee takaso, "Eligili odoos, iba gooleedooso, nayo eligi ma kulodu no hedebe tekepo goo ono eligili. Osoloso no odoos su mapoo koo egeli. Esino no tei Godeeyo goo ono ka eligimo sili. <sup>22</sup> Esiga Loum gamalee wili-gi odoos Sisa mapoo tekisi molee tenelai tekepowa, o, tokeneeyo?" diso.

<sup>23</sup> Esino diayo Yesu yimapoo gamenee takalame si gooleedoloso dimapoo egeesee takaso, <sup>24</sup> "Amapoo molee ko hee eligi," diso. Osoloso yayo molee ko toloso tobudulone egeesee takaso, "Molee hamapoo agamo mudu sabolo osoloso agamo hu sabolo molo-lo?" diso.

<sup>25</sup> Esemee diayo nei yimapoo egeesee takaso, "Sisayo mudu sabolo, osoloso o hu sabolo oso ka molo," diso.

Esemee Yesuye tobudulone dimapoo egeesee takaso, "Niba Sisayo bi ee Sisa mapoo tenee, osoloso Godeeyo bi ee Godee mapoo tenee," diso.

<sup>26</sup> Esemee diayo Yesuye to nei tekepo taka duloso diya howoogadolone to abo takele poogooso. Egeesee ma kulodu Yesuye odoos howo woola to tokenee takelega poogoome, diayo yo talai eli egele poogooso.

### Ta maga see hogabili eyo goo maga Yesu mapoo woosa

(Matiyu 22:23-33, Maka 12:18-27)

<sup>27</sup> Osoloso Sedisi odoos aboso Yesuye badebei mapoo sibadeeso. Odoos hagee biaso takolone odoos wedia see hogoga bileime deliso. Esemee diayo sibilesio Yesu mapoo egeesee takaso, <sup>28</sup> "Eligili odoos, Moseseeye imapoo kokodo takolone egeesee hoguguso, 'Gisoso sobo huloso holo soomagelega toga, see omoloye emei ta eyo osobo bau huloso emeiyo hu maga holo

soolooga magee,' diso. <sup>29</sup> Omolo dio 7 debeiso. Esino daga emeiye sobo huloso holo soomagelega taso.

<sup>30</sup> Osoloso omoloye emei ta eyo osobo bau huso. Esino holo soomagelega taso. <sup>31</sup> Osoloso omolo hee domo oso bau see huloso, holo soomagelega taso. Egeesee seemelee ososee omolo dio 7 susuga holo soolooga magelega wediaso. <sup>32</sup> Osoloso hamameedee sobo bau yinosee taso. <sup>33</sup> Bei, sobo yo giso 7 oso huga, ta maga hogabilei beeamo omapoo, yo agamo osobo dalaiyo?" diso.

<sup>34</sup> Esino Yesuye to nei dimapoo egeesee takaso, "Epedee hagee do beeamo omapoo gisoso sobo huya, osoloso soboso giso obuo dolone ka doso. <sup>35</sup> Esino Godeeye hesiga odoos oso wedia maga hogabuloso dogo, diba see giso sabolo sobo sabolo huleime. <sup>36</sup> Bei, diba Godeeyo momaiye masi dobolone see wedileime. Osoloso diba Godeeyo owolo dio doloso dabalaiso. Bei, diba wedia maga hogoogadi goo oso ka eligiso.

<sup>37</sup> Esiga Moseseeye daga hoogoo edebeeyo wedia maga hogoogabilei goo ee o booka mapoo hoguguso. Bei, yayo homo du douso namolome, ogoloso goo ee hogugulone egeesee takaso, 'Lodee yo Eibalaham, Aisek, osoloso Yekob dibada Godeeso,' diso. <sup>38</sup> Esiga Godee hagee wedia odoos dia Godeenee. Haye, odoos gie egee do dia Godee. Bei, Godeeyo howo woola odoos susuga gie doso."

<sup>39</sup> Esemee tei eligili odoos abo oso Yesu mapoo nei egeesee takaso, "Eligili odoos, nayo egee takoo tekepo," diso. <sup>40</sup> Esemee ee ma kulodu odoos susuga oso see Yesu mapoo woosalai ebiaso.

### Keliso agamo owolowo?

(Matiyu 22:41-46, Maka 12:35-37)

<sup>41</sup> Osoloso Yesuye see odoos susuga mapoo woosali to hagee takaso, "Bei kasee maga odoos aboso takolone Keliso ee Deibidiyo amawe dee ka takeliyo?"

<sup>42</sup> Esino Deibidi eyo Sam booka ma kulodu egeesee takaso,

'Godeeye mo Lodee mapoo egeesee takaso:

No abolo wili-gi doloso badalame mo dee deede dokolo bie.

<sup>43</sup> Esiga nayo badolone, namapoo ha teli odoos ee nama hemi debee dalaiso.'

<sup>44</sup> Esiga Deibidiye Keliso o Lodee diso. Esino kasee maga Keliso ee Deibidiyo amawe dee ka takalaiyo?" diso.

### Yesuye tei eligili odoos eyo goo taka

(Matiyu 23:1-36, Maka 12:38-40)

<sup>45</sup> Odoos susuga oso to dulone osee doboome, Yesuye o hamamee dili odoos mapoo egeesee takaso, <sup>46</sup> "Niba obeeyamo! Niyo tei eligili odoos mapoo medee ege. Diba dugo medee tekepo megigaloso silesibiliso, osoloso bi neiso teli mi mapoo debeli odoos oso diba ogoloso gasuwuloso goomoga to takalame goomegeli. Osoloso diba howo gisili moso ma kulodu wili-gi odoos taba eyo debi mapoo bulumulame, osoloso wo toowa nolone odoos hu toowa too oso bili mapoo bulu-

mulame goomegeliso. <sup>47</sup> Esino diayo sobo bauwe eбил-ame kukunoloso dia moso sabolo bi sabolo dibada doloso toloso omapoo dobolone, dia goo gagaloso dokodoo taka diya sageliso, odoos aboso diba tekepo odoos dee goolame. Esino egeesee maga diba dala toowa talaiso.”

### Sobo baso emegei di bi tenee

(Maka 12:41-44)

**21** Yesu tei moso mapoo osee badolone egeino, bi bei odoos oso emegei di molee tooseli ki bi oso moodoo mapoo soomolome egeiso. <sup>2</sup> Osoloso beeamo omapoo sobo bau bi mauwe oso molee ko ta bakadio tosibilesos toosoomo egeiso. <sup>3</sup> Esemo Yesuye goo hagee ogoloso egeesee takaso, “Ayo nimapoo taka, sobo bau bi mauwe hagoosoo tenee oso bi bei odoos oso tenee ee dagadiso. <sup>4</sup> Bei, bi bei odoos dia molee toowa osee molome molee su pepooko teneeso. Esino sobo bau bi mauwe hagee yimapoo molee ko esiesibo meleeno teneeso. Esiga yo wo talai molee olo mauwe,” diso.

### Yesuye tei moso guobigilei goo sabolo osoloso mi hoo poogoo mapoo gooso peledabalai goo ee taka

(Matiyu 24:1-14, Maka 13:1-13)

<sup>5</sup> Beeamo omapoo odoos aboso tei moso yo tekeposo tegei sabolo osoloso odoos susuga oso Godee mapoo tenee bi tei moso ma kulodu ma molome ogoloso tekepo dee takagameleeso. Esino Yesuye diayo takagamelee to ee duloso dimapoo egeesee takaso, <sup>6</sup> “Niyo epedee moso sabolo osoloso bi sabolo ogoloso tekepo dee takemenee, ee hamamee guobigileiso. Egeesee ma kulodu yo heeso hee ma topudoo malaime. Esino moso guobuguga, yo susuga oso mi mapoo misigeduboloso molo agalaiso,” diso.

<sup>7</sup> Esemo odoos aboso yimapoo egeesee takaso, “Eligili odoos, goo hagee kobolone ka peledabalaio? Osoloso goo hagoosoo peledabalame mologa, ogoo gooso imapoo ka eligileio?” diso.

<sup>8</sup> Esino Yesuye see dimapoo egeesee takaso, “Niba obeeyamo! Odoos heeso niba tei goo maga see peegoo gilimado diyaga. Bei, odoos aboso sibilesos gamenee takolone ayo diba diye di, dee takolone dieso nediliyo diba Kelisosos dalaiso. Egeeseelone diayo takolone Godeeyo beeamo olo simiso dee takooga, dia to duloso omapoo tei na te. <sup>9</sup> Esiga ha too goo sabolo osoloso galali goo sabolo oso peledoboomo duga, duloso niba haga na ebi. Bei, goo hageesi oso malalo peledabalaiso. Esino ee ma kulodu beeamo hamameedee saga sibileime.”

<sup>10</sup> Osoloso Yesuye see tobu dimapoo egeesee takaso, “Mi toowa heeso mi toowa hee mapoo ha talaiso.

<sup>11</sup> Osoloso beeamo omapoo mi abo mapoo mibia toowa sibileiso, osoloso hodia goo sibileiso. Osoloso paiye opusomo opusomo di oso mi abo mapoo sibileiso. Egeesee seemelee mapoo goo opusomo di oso kei ma dokodoo peledaba ogoloso odoos susuga oso diya ebigileiso.

<sup>12</sup> Esino goo hagoosoo epedee peledebelega mologa, niyo mo goo maga dala toowa talaiso. Egeesee ma kulodu odoos susuga oso nibada goo meedilame dibada howo gisili moso mapoo ido polo dolone dabalaiso. Osoloso diayo niba neliga moso mapoo huyaso dolone dabalaiso. Osoloso see diayo mo goo maga niba gamalee wiligi odoos toowa tebisa mapoo gilimado peleso nibada goo meedileiso. <sup>13</sup> Esino domo egee niyo mo goo ee dimapoo yiligebigilei beeamo tekepo ogoso. <sup>14</sup> Esiga niba goo medee goolee. Bei, odoos susuga oso niba goo meedilei mapoo ido duga, niyo to takalai goo mapoo haga na koude. <sup>15</sup> Bei, domo omapoo ayo nimapoo goo goolee tekepo sabolo osoloso to tekepo takalai goo sabolo tenelaiso, nimapoo goweli odoos oso nibada to ee duloso to nei takelega pagalame. <sup>16</sup> Osoloso beeamo omapoo nibada ama dio sabolo, osoloso noowee dio sabolo, osoloso nemei dio sabolo, osoloso nomolo dio sabolo, osoloso nee soosoo sabolo, osoloso nemegei odoos sabolo oso nimapoo dala teneli odoos mapoo tiasalaiso. Osoloso diayo nima kulodu odoos abo piligileiso. <sup>17</sup> Esiga odoos susuga oso mo goo maga nimapoo hegia toowa malaiso. <sup>18</sup> Esino goo hagoosoo niba Godee maga pileime. <sup>19</sup> Esiga medee kibiya debbee. Niba kibiya doge, gie badeli talaiso.”

### Yesuye Yolusalem mi oso tokenee palai goo ee taka

(Matiyu 24:15-21, Maka 13:14-19)

<sup>20</sup> “Esiga niba Yolusalem mi ee ha teli odoos oso moso silodoboloso tebisamelee ogoga, Yolusalem mi ee olo tokenee palame ka seeso doloso ogoloso niba gooleedalaiso. <sup>21</sup> Egeeseega beeamo omapoo Yudiya mi mapoo debeli niba mubi dokodoo kukulo pele. Osoloso edebeeyo beeamo omapoo Yolusalem mi ma kulodu osee doge, diba onosee saga kukulo di. Osoloso odoos agayo beeamo omapoo Yolusalem mi peegoo doge, diba mi ee ma kulodu na gadi. <sup>22</sup> Bei, beeamo omapoo Godeeyo to booka mapoo hogugu goo sabolo tobulone, nei dala tenelame ka selai. <sup>23</sup> Osoloso beeamo omapoo sobo koowasi sabolo osoloso holope too nedili sobo oso dala toowa agalaiso. Bei, beeamo omapoo Godeeyo kamana goo oso siboga, goohele toowa sabolo osoloso dala toowa sabolo mi hamapoo sibileiso. <sup>24</sup> Ee ma kulodu odoos abo ee ha teli odoos oso kaiyaso piligileiso. Osoloso odoos abo ee tiso tegisalosos tou nei mauwe talame mi abo mapoo iyado du dolone dabalaiso. Osoloso beeamo omapoo Yolusalem ee Yu dele poogoo odoos oso gagalabugulosos homosos abalaiso. Diba osee tebisa mologa, diayo goo egeesee semelee oso hoo pagalai Godeeye beeamo ee tenelaiso.”

### Odoos Holo oso sibilei goo

(Matiyu 24:29-35, Maka 13:24-31)

<sup>25</sup> “Esiga goo opusomo di oso osogo mapoo, osoloso a mapoo, osoloso giwo mapoo peledabalaiso. Osoloso mi toowa hamapoo abei maga howo ki toowa oso goowa duleiso. Egeeseega odoos susuga oso dimapoo

ogoo goo oso peledaba beleso obulone goo tiadalaiso. <sup>26</sup> Osoloso kei ma dokodoo kitulugu bi egee molo ee Godeeye halabigileiso. Egeeseega odoo susuga oso dimapoo ogoo goo oso peledaba beleso obugulone hoowama dalaiso. <sup>27</sup> Esiga beeame omapoo Odo Holo ayo kitulugu sabolo osoloso ayo toowa doloso badeli goo omaga mo gadeebugu sabolo osoloso kolobo sabolo siboga agalaiso. <sup>28</sup> Esiga niba goo susuga hagooso bei mooloogoo ogoga, ebilega toboloso bolone ka debee. Bei, Godeeye niba gilimado dilei beeame ee koola toobooso.”

**Sogai maga dio masi taka**  
(Matiyu 24:32-35, Maka 13:28-31)

<sup>29</sup> Yesuye see goo hamapoo dio masi hamaga egeese takaso, “Niba sogai ogoloso homo abo mapoo egege. <sup>30</sup> Sogai du sisigaloso mouloso see pisi-ga ogoloso niba mi kibilei koola tooboo doloso gooleedeliso. <sup>31</sup> Esiga hagonosee egeesi masi moloso. Niba goo ayo taka hagooso peledaba ogoloso, Godeeye wiligi doloso badeli goo oso sibilei koola tooboo doloso gooleedeliso.

<sup>32</sup> Ayo nimapoo taka, odoo beeame omapoo dabalai ee osee dogo, goo susuga hagooso peledabalaiso.

<sup>33</sup> Esiga kei sabolo osoloso mi toowa sabolo mauwe pagalaiso. Esino mo to ee mauwe pagalaime.”

**Niso nediliyo medee be**

<sup>34</sup> “Esiga niba niso nediliyo medee be. Osoloso niba wo sabolo howo sabolo nolone dobolone mi toowa eyo goo mapoo haga na goolee. Bei, ti gama mapoo beso gaduga, tiso be egee bagagooga egee dio du egeesi masi ayo sibilei beeame oso nimapoo dio di egeesi masi tenelai malaiso. <sup>35</sup> Bei, beeame ogoso odoo susuga mi toowa hamapoo egee do mapoo sibileiso. <sup>36</sup> Esiga niba niso nediliyo medee bolone dokodoo takolone ka debee, niba beeame oso peledabalai ee ma kuloduga kitulugu sabolo peegoo ka gadilame. Osoloso Odo Holo mo mudugiyopoo kitulugu sabolo dabalame.”

<sup>37</sup> Yesu beeame susuga Yu odoowo tei moso mapoo peleso odoo susuga mapoo Godeeye to eligimeleso koodobuloso, see tilame gesi Olipi mubi mapoo polo demelee. <sup>38</sup> Esemé odoo susuga oso Yesuye eligi goo ee dulame gesikolodee tei moso mapoo sibileso mooloogoo deliso.

**Yudaseeye Yesu wiligi odoo tebisa mapoo tiasalame to magoo**  
(Matiyu 26:14-16; 14:10-11)

**22** Isipi mi maga peegoo di ee gooleebugu wo nalai beeame ee koola tabaso. Wo nali hagee Yu odooso takolone Godeeye gababia wo nali deliso. <sup>2</sup> Beeame omapoo tei moso wiligi odoo tebisa sabolo osoloso tei eligili odoo sabolo oso odoo mooloogoo toowa ogoloso obugulone, mada Yesu wooloomalame eli esiaso. <sup>3</sup> Beeame omapoo Saitenso

Yudas-Iskaliyot eyo kulodu gapalaso. Yudaseeye Yesuwo hamamee dili odoo 12 ma kulodu odoo hee yoso. <sup>4</sup> Esiga Yudaseeye tei moso wiligi odoo tebisa sabolo osoloso tei moso pee mapoo gidebeli dia wiligi odoo tebisa mapoo dileso, yayo Yesu toloso dimapoo tenelame dibolo to mouso. <sup>5</sup> Esemé diayo goo hagee duloso tekepo doloso goomogolone Yudaseeye mapoo molee tenelame takaso. <sup>6</sup> Esemé Yudaseeye yibolosee goo hamapoo tekepo dolone mada Yesu toloso dimapoo tenelame eli esiaso.

**Godeeye gababia wo nalame mopoodoo doo**  
(Matiyu 26:17-25, Maka 14:12-21, Yonee 13:21-30)

<sup>7</sup> Isipi mi maga peegoo di gooleebugu wo ne bei mooloogoo beeame mapoo, Yu odooso Godeeye gababia wo nalame, sipi be hu weliso. <sup>8</sup> Esemé Yesuye see Pita dio Yonee dio mapoo egeese takaso, “Niba dileso iyo gababia wo nalai ee mopoodoo dalame di,” diso.

<sup>9</sup> Esemé diayo nei yimapoo egeese takaso, “Iyo kamapoo dileso wo nalai ee ka mopoodoo dalaiyo?” diso.

<sup>10</sup> Esemé Yesuye dimapoo nei egeese takaso, “Niba Yolusalem mapoo gadi. Niba omapoo gadileso ogoga, odoo hee howo keedoloso dumologa tugodalaiso. Niba yo tugodoloso yo deede di. Niba yayo dileso moso kulodu gaduga omapoo dobolone, mosowo ama mapoo egeese takee, ‘Eligili odoo oso o hamamee dili odoo sabolo Godeeye gababia wo nalai debi ee kaso-mo?’ dee takee. <sup>12</sup> Egeeseega yayo moso dokohodoo debi pooba toowa nimapoo eligileiso. Egeeseega niba iyo Godeeye gababia wo nalai omapoo ka mopoodoo de,” diso.

<sup>13</sup> Esemé Pita dio Yonee dio to hagee duloso dileso egeino, goo susuga ee Yesuye taka goo sabolo tobuloso molome egeiso. Esemé diba gababia wo nalame omapoo mopoodoo dooso.

**Lodee gooleebugu wo ne**  
(Matiyu 26:26-29, Maka 14:22-25, 1 Kolin 11:23-25)

<sup>14</sup> Esemé diayo wo nalai beeame ee sibume, Yesuye o hamamee dili odoo sabolo wo nalame bulumaso.

<sup>15</sup> Yesu badolone o hamamee dili odoo mapoo egeese takaso, “A goomoga toowa sabolo badebeiso, ayo dala ma kulodu gadilega badolone, ayo nibolo Godeeye gababia wo nalai. <sup>16</sup> Bei, ayo nimapoo taka, ayo Godeeye gababia wo nali hagee hamamee see saga nalai. Esino Godeeye wiligi doloso badeli mi oso sibulone wo nali hagee goo bei woola yiligebuguga, ayo wo nali hagee see nalaiso,” diso.

<sup>17</sup> Esemé Yesuye kapu wain i keesoo toloso Godee mapoo goomoga takoloso koodobuloso dimapoo tenelone egeese takaso, “Niba kapu wain i keesoo toloso odoo heeso naloso koodobuuga see odoo hee mapoo ka tenee domo di. <sup>18</sup> Bei, ayo nimapoo taka, a epedee wain i naloso hamamee see wain i saga nalai. Esino Godeeye wiligi doloso badeli mi oso siboga, ayo see wain i ee nalaiso,” diso.

<sup>19</sup> Yesu see wo toloso Godee mapoo goomoga takoloso wo popeiso. Osoloso o hamamee dili odoo mapoo pulone egeesee takaso, "Hagee mo suso, niba halo ka teneeso. Esiga niba a goolee sabolo dobolone wo hagee nolone ka debee," diso.

<sup>20</sup> Diba wo naloso koodobuloso Yesu see kapu wain i keesoo toloso Godee mapoo goomoga takaso. Osoloso o hamamee dili odoo mapoo tenelone egeesee takaso, "Kapu wain i keesoo hagee Godeeye mo sawo maga to kitulugu magoo dia hagooso. Mo sawo hagooso niba halo ka sologobuguso. <sup>21</sup> Esino niba ege. A ha teli odoo mapoo tiasalai odoo ee mooloogoodoo hageeyo kulodu abolo badolone wo namoloso. <sup>22</sup> Esiga Godeeye to magoo ee dodolone Odoos Holo a talaiso. Esino Odoos Holo a ha teli odoo mapoo tiaseli odoo yo, eeye-ee! Bei, odoo yo dala talaiso." <sup>23</sup> Esem o hamamee dili oso to hagee duloso dieso nediliyo dima kulodu egeesee takagameleeso, "Agayo ima kulodu goo hageesi ka moodoolaiyo?" diso.

### Toowa doloso badalai goo maga wegiga

<sup>24</sup> Esem Yesu o hamamee dili odoo oso dieso nediliyo dima kulodu odoo agayo toowa ka badosomo doloso wegigasoo. <sup>25</sup> Osoloso Yesuye goo hagee ogoloso dimapoo egeesee takaso, "Yu dele poogoo odoowo wiligi odoo tebisa oso dima hemi debeli odoo ee diayo diya kitulugu sabolo gidebeliso. Esino diba dieso nediliyo odoo susuga mapoo takolone diba odoo susuga eyo odoo deliso. <sup>26</sup> Esino niba nima kulodu egeesee selai tekeponee. Esiga nima kulodu odoo agayo toowa ka badosomo? Yo daga malalo eyo nediliyo pepooko doloso badebee. Osoloso nima kulodu odoo agayo gibadeli odoo masi ka badosomo? Yo tou teli odoo masi mesie sabolo tou tolone ka badebee. <sup>27</sup> Niba medee goolee, wo nalame badeli odoo sabolo wo pili odoo sabolo dima kulodu, odoo agayo toowa doloso ka badosomo? Odoos ee badolone wo nalame badeli oso toowa doloso ka badoso. Esino nima kulodu a wo pili odoo masi badoso. <sup>28</sup> Niba ayo hegi goo ee ma kulodu sileeme, a koo poogoo dili. <sup>29</sup> Esiga mo Mameeye o odoo gibadalame kitulugu amapoo tenee egeesi ayo nimapoo tenelaiso. <sup>30</sup> Esiga ayo wiligi doloso badeli mi oso siboga, ee ma kulodu niba abolo hodobo dobolone wo nalaiso. Osoloso niyo wiligi odoo oso debeli debi mapoo dobolone Isalael odoowo bala 12 ee gidobolone dia goo ee meedileiso," diso.

### Pitaye Yesu boobado bigilei goo ee Yesuye taka

(Matiyu 26:31-35, Maka 14:27-31, Yonee 13:36-38)

<sup>31</sup> Yesu badolone Saimon-Pita mapoo egeesee takaso, "Saimon, Saimon, Saitenso niba tei kibiya beleso kukulo agalame Godee mapoo woosome, Godeeye yimapoo kitulugu olo teneeso, yayo egeesee moodoolame. <sup>32</sup> Esino ayo no halo Godee mapoo dokodoo olo takaso, nayo tei too pegeeyaga. Osoloso nayo amapoo see wedi simi beame mapoo, mo hamamee dili odoo hagee bia oso tei too ma kulodu kibiya dabalame nayo diba pidi," diso.

<sup>33</sup> Esem Pitaye nei yimapoo egeesee takaso, "Lodee, a nobolo neliga moso ma kulodu osoloso teli mapoo dilei mopoodoo doloso ka suloso," diso.

<sup>34</sup> Esem Yesuye Pita mapoo nei egeesee takaso, "Pita, ayo namapoo taka, epei gesi kolokolo takelega mologa, nayo a gooleedele doloso puodalai ee bakadio hedebe dalaiso," diso.

<sup>35</sup> Yesuye see o hamamee dili odoo mapoo egeesee takaso, "Ayo daga niyo to tekepo takomo silesibilame diye dolone molee sabolo, osoloso o sabolo, osoloso kali bi abo sabolo toloso na di diso. Esino niba ee ma kulodu silesibilone, hegi goo abo egeisomo?" diso.

Esem diayo nei egeesee takaso, "Haye, egele," diso.

<sup>36</sup> Esem Yesuye see dimapoo egeesee takaso, "Epedee hamapoo nimapoo molee sabolo o sabolo mologa, ee toloso di. Osoloso nimapoo kaiya mauwe daga, nibada kekeisoo dugo odoo hee mapoo teneloso nei molee toloso kaiya te. <sup>37</sup> Bei, Godeeyo to booka mapoo hogugu oso egeesee takooso, 'Edebeeyo yo mesia masi wooloomalaiso,' diso. Esiga Godeeyo to booka mapoo hogugu oso taka goo oso amapoo peledabalaiso. O, tei takoo, Godeeyo to booka mapoo hogugu oso mo goo maga taka goo susuga oso peledabalame siboso," diso.

<sup>38</sup> Esem o hamamee dili odoo oso yimapoo egeesee takaso, "Lodee, no ege. Iba kaiya bakadio moloso," diso.

Esem Yesuye dimapoo egeesee takaso, "Bige oso," diso.

### Yesuye Olipi mubi mapoo badolone Godee mapoo taka

(Matiyu 26:36-46, Maka 14:32-42)

<sup>39</sup> Yesu goo eyo moodeli egeesee moodoolone Yolusalem maga peegoo dileso Olipi mubi mapoo palaso. Esem o hamamee dili odoo yibolo diadeeso. <sup>40</sup> Osoloso diba dileso omapoo dobolone, Yesuye dimapoo egeesee takaso, "Niba dokodoo takolone ka debee, goo tokenee mapoo gidoduga homodobiyaga." <sup>41</sup> Yesu egeesee takoloso dimaga pepooko hoogoo dileso ebiso miyomoo tugusaloso Godee mapoo takameleeso. <sup>42</sup> Yesuye Godee mapoo takolone egeesee takaso, "Ma, no goomogoga, amapoo dala hagee sibo peegoo magee. Esino no goomoga goo ee te, ayo goomoga goo ee na te," diso. <sup>43</sup> Esem Godeeyo momaiye oso Kei mi ma dokodoo ga sibilesi yo pidilone kitulugu teneeso. <sup>44</sup> Egeesee ma kulodu Yesu dala talame hegi goo oso sibume, yo sooloo habasaga toowa sabolo Godee mapoo diya takaso. Esem o debiaso sawo masi mi mapoo salagadibaso.

<sup>45</sup> Osoloso yo dokodoo takamelee koodobuloso dileso egeino, o hamamee dili odoo goo halagameleso tiesamolome egeiso. <sup>46</sup> Esem Yesuye dimapoo egeesee takaso, "Niba kaseega ka tiesamalala? Niba hogoogabuloso dokodoo takolone ka debee, goo tokenee mapoo gidoduga homodobiyaga," diso.

**Odoo susuga oso Yesu wooloomalame ido di**

(Matiyu 26:47-56, Maka 14:43-50, Yonee 18:3-11)

<sup>47</sup> Yesu o hamamee dili odoo sabolo to osee komolome, o hamamee dili odoo hee Yudaseeye odoo mooloogoodoo gilimadoloso sibilesa omapoo peled-abaso. Esemee Yudaseeye Yesu adalame simiso.

<sup>48</sup> Esino Yesuye yimapoo egeesee takaso, "Yudas, nayo Odoo Holo a ada sabolo ha teli odoo mapoo tiasalame ka sala?" diso.

<sup>49</sup> Esemee Yesu o hamamee dili odoo diayo odoo susuga oso Yesu talame simi ogoloso egeesee takaso, "Lodee, iyo kaiyaso ka biligileiyo?" diso. <sup>50</sup> Egeeseeme Yesu o hamamee dili odoo heeso tei moso wiligi odoo taba eyo tou teli odoo hee kaiyaso o dulu deedee dokolo ee kobuguso.

<sup>51</sup> Esino Yesuye o hamamee dili odoo mapoo egeesee takaso, "Omapoo koodobie! Goo egeesee na moodee!" diso. Osoloso Yesuye odoo o dulu mapoo sigime see tekepo paso.

<sup>52</sup> Yesu yo omapoo tobudulone yo talame sibadee, tei moso wiligi odoo tebisa sabolo, tei moso pee maga gidebeli dia wiligi odoo tebisa sabolo, Yu odoowo wiligi odoo tebisa sabolo mapoo egeesee takaso, "Niyo ogoga a mesia daga a talame, kaiya sabolo wei sabolo toloso ka sibadeeyo?" <sup>53</sup> Esino niba ayo beeame susuga tei moso ma kulodu eligimo sili egeliso. Esino niyo kaseme a omapoo badoboome telega ka poogoowo? Esino epedee hamapoo nibada beeame oso olo siboso. Bei, epedee hagee neliga wiligi odoo taba Saite-neeyo beeameso," diso.

**Pitaye Yesuwo goo puodoo**

(Matiyu 26:69-75, Maka 14:66-72, Yonee 18:15-18,25-27)

<sup>54</sup> Osoloso odoo susuga oso Yesu toloso tei moso wiligi odoo taba eyo mosopoo ido diso. Esemee Pitaye hamameedee toboloso deedee diso. <sup>55</sup> Yo deedee dileso, odoo susuga oso moso pee beelee ma kulodu dou tooloso dou halagamolome, yo dibolo hodobo omapoo badolone dou hameleeso. <sup>56</sup> Pita omapoo dou holone badoboome, sobo obuo omapoo tou teli oso sibilesa Pita mapoo medee bolone egeesee takaso, "Odoo hagee Yesubolo sili hee yoso," diso.

<sup>57</sup> Esino Pitaye nei egeesee takaso, "Sobo, odoo egee a gooleede," diso.

<sup>58</sup> Osoloso see hamamee odoo heeso sibilesa yo ogoloso yimapoo egeesee takaso, "No Yesubolo sili odoo hee noso," diso.

Esemee Pitaye nei egeesee takaso, "Giso, asonee," diso.

<sup>59</sup> Osoloso osogo howo hedebe poogoloso hamamee odoo heeso sibilesa to kitulugu sabolo egeesee takaso, "Tei takoo, odoo hagee Yesubolo sili hee yoso. Bei, yinosee Gelili odooso," diso.

<sup>60</sup> Esemee Pitaye nei egeesee takaso, "Giso, nayo egee takoo goo ee tei a gooleede," diso. Pita to osee komolome, kolokolo takaso. <sup>61</sup> Esemee Lodeeye hamameegoo bidooboloso Pita mapoo bameleeso. Es-

eme beeame omapoo Yesuye taka to hagee Pitaye gooleebuguso, "No epei gesi kolokolo takelega mologayo nayo a gooleedele doloso puodalai ee bakadio hedebe dalaiso," diso. <sup>62</sup> Egeeseelone yo to hagee gooleebuguloso diya goohelime peegoo gadilesa pisaso.

**Yesu wiligi odoo tebisa oso to mou mapoo ido pala**

(Matiyu 26:59-68, Maka 14:55-65, Yonee 18:19-24)

<sup>63</sup> Esemee Yesu yo gidebeli odoo oso yo manolone toloso weiso. <sup>64</sup> Osoloso diayo o howo dugoso gagaloso wooloso egeesee takaso, "Imapoo takee, no odoo agayo wala?" dee takaso. <sup>65</sup> Egeeseelone to tokenee abo sabolo yimapoo takaso.

<sup>66</sup> Osoloso mi hadobume gesikolodee Yu odoowo wiligi odoo tebisa sabolo, osoloso tei moso wiligi odoo tebisa sabolo, osoloso tei eligili odoo sabolo hodobo mooloogoodooso. Osoloso diayo to moulone debei mapoo Yesu ido palaso. <sup>67</sup> Esemee diayo dobolone Yesu mapoo egeesee takaso, "Nayo imapoo takee, no tei Godeeye hudi magoo Keliso nosomo?" diso.

Esemee Yesuye dimapoo nei egeesee takaso, "Ayo nimapoo takooga, niyo ayo taka goo mapoo tei talaima. <sup>68</sup> Ayo nimapoo woosaga, niyo amapoo to eyo nei takalaima. <sup>69</sup> Esino epedee beeame hamaga Odoo Holo a Godee kitulugu eyo dee deedee dokolo mapoo yibolo wiligi doloso badalame bileiso," diso.

<sup>70</sup> Esemee odoo susuga oso yimapoo egeesee takaso, "Esiga no tei Godeeyo owolowo?" diso.

Esemee Yesuye nei dimapoo egeesee takaso, "Niyo a Godeeyo owolo dee egee takoo ee tei goo takoo," diso.

<sup>71</sup> Esemee diayo egeesee takaso, "Esiga iba o goo meedilei maga to abo dulei koo goomogo. Bei, yo eyo o goo ee olo yebugulone yo Godeeyo owolo diso. Esiga yo wooloomalai tekepo," diso.

**Yesu yo Paillet sabolo osoloso Helodee mapoo ido di**

(Matiyu 27:1-2,11-26, Maka 15:1-15, Yonee 18:28—19:16)

**23** Osoloso wiligi odoo tebisa mooloogoodoo oso tebisaloso Yesu Paillet mapoo ido diso. <sup>2</sup> Diayo dileso Paillet mapoo Yesuwo goo maga takolone egeesee takaso, "Odoo hagooso ibada odoo eli tokenee mapoo gilimado di ogoloso ka too. Bei, yayo ibada odoo oso Sisa mapoo tekisi molee misigeli hamaga takoloso see eyo nediliyo yo wiligi odoo Keliso dee takemeleeso," diso.

<sup>3</sup> Esemee Pailleteeye Yesu mapoo egeesee takaso, "No tei Yu odoo dia wiligi odoowo?" diso.

Esemee Yesuye nei egeesee takaso, "O, nayo olo egee takooso," diso.

<sup>4</sup> Osoloso Pailleteeye Yu odoowo tei moso wiligi odoo tebisa sabolo osoloso odoo abo omapoo mooloogoodoloso debei mapoo egeesee takaso, "Ayo yo talaino yimapoo goo tokenee hee koo ogo," diso.

<sup>5</sup> Esino diba goo egee pagalai gowoolone to kitulugu sabolo egeesee takaso, "Edebeeyo Loum gamalee mapoo kamanalame, yayo Yudiya mi toowa mapoo

silone odoo goo tiadili goo ee eligimo siliso. Osoloso yayo goo hagee Gelili mi maga bei mooloogooloso see hamapoo sibilesa ka eligimo siloso," diso.

<sup>6</sup> Osoloso Pailteeye goo hagee duloso, Yesu tei Gelili odoo beleso odoo mapoo woosaso. <sup>7</sup> Egeesee ma kulodu yayo Yesu tei Gelili odoo dee taka goo ee duloso, Yesu Helodee mapoo ido di diso. Bei, Helodeeye Gelili mi mapoo wiligi odoo toboloso ka badebei. Beeame mapoo Helodee Yolusalem mapoo sibilesa badebeiso.

<sup>8</sup> Ee ma kulodu Helodeeye Yesu ogoloso diya goomogaso. Bei, yo Yesuwo goo epedee eiyo dumelega, yo agalai goomegeliso. Osoloso Yesuye goo opusomo di o mudugiyo moodoolame diya goomogaso. <sup>9</sup> Esem Helodeeye Yesu mapoo woosali to bei woosagaso. Esino ee ma kulodu Yesuye yimapoo to nei hee takele. <sup>10</sup> Osoloso beame omapoo tei moso wiligi odoo tebisa sabolo osoloso tei eligili odoo tebisa sabolo oso to kitulugu sabolo takolone Yesu mapoo gigidiso. <sup>11</sup> Esem Helodeeye o odoo sabolo Yesu manolone wiligi odooso kali dugo kadiso. Osoloso yo Paillet mapoo see ido di diso. <sup>12</sup> Beeame domo omapoo Paillet dio Helodee dio emegei diso. Esino daga debei ee ma kulodu dieso nediliyo nei heigo nei heigo dolone debeiso.

<sup>13</sup> Esem Yesu Paillet mapoo see ido di ogoloso, Pailteeye tei moso wiligi odoo tebisa sabolo osoloso Yu odoowo wiligi odoo tebisa sabolo osoloso odoo susuga gilimadoloso egeesee takaso, <sup>14</sup> "Niyo odoo hagooso Yu odoo oso Loum gamalee mapoo kamanalame, odoo goo tiadili goo ee eligimo silo doloso, amapoo ka ido simi. Esino ayo nibada mudugiyo o goo meedino, yimapoo goo tokenee hee molo egele. <sup>15</sup> Osoloso Helodee nosee Yesu mapoo goo tokenee hee molo egele. Egeeseeme yayo yo see imapoo ido sibe dee takaso. Esiga niso ogoso, odoo hagee wooloomalai yimapoo goo tokenee hee mauwe. <sup>16</sup> Esiga ayo yo wulo woomele poogoloso diye dalaiso.

[ <sup>17</sup> Esino Pailteeye Yu odoo oso goomogalame diayo Godeeye gababia wo nali beame mapoo odoo hee neliga moso ma kuloduga peegoo diye deliso.]

<sup>18</sup> Osoloso odoo susuga oso to neligidi egeesee takaso, "Yesu wooloomolone, nei Balabas neliga moso ma kuloduga peegoo diye dee!" dee takagameleeso.

<sup>19</sup> Balabas hagooso daga Loum gamalee mapoo ha temeleso odoo hee wooloomaso. Egeeseega yo neliga moso ma kulodu hususo.

<sup>20</sup> Pailteeye Yesu peegoo tamagalame diya goomogolone, see tobu odoo mooloogoodoo mapoo woosaso. <sup>21</sup> Esino odoo susuga oso to neligidi yimapoo nei egeesee takaso, "Yo homo bulubo magoo ma dokodoo yoguso enige! Yo homo bulubo magoo ma dokodoo yoguso enige!" dee takagameleeso.

<sup>22</sup> Esem Pailteeye see tobu odoo mooloogoodoo mapoo egeesee takaso, "Bei, niyo kasalame yo wooloomalame ka sala? Yayo goo tokenee kasee toowo? Ayo o goo meedi mapoo ayo yo wooloomalame ido dino, yimapoo goo tokenee hee molo egele.

Esiga ayo yo wulo woomele poogoloso diye dalaiso," diso.

<sup>23</sup> Esino odoo susuga oso toso neligidi diya takaso, "Yesu homo bulubo magoo ma dokodoo yoguso enige!" dee takagameleeso. Diayo egeesee takemelee Paillet to ee dulei diya gwoolone, bige dimapoo deedebeegee diso. <sup>24</sup> Egeeseeme yayo dia to duloso odoo susuga oso goomoga goo ee tooso. <sup>25</sup> Esiga Pailteeye Loum gamalee mapoo ha tolone odoo wooloomali Balabas ono neliga moso ma kuloduga peegoo diye diso. Esino Yesu homo bulubo magoo ma dokodoo talame yayo yo odoo susuga mapoo teneeso.

**Yesu homo bulubo magoo ma dokodoo yoguso eniga**  
(Matiyu 27:32-44, Maka 15:21-32, Yonee 19:17-27)

<sup>26</sup> Osoloso ha teli odoo oso Yesu toloso mi ee ma kuloduga peegoo ido dumolome, Kulene odoo Saimon Yolusalem mi mapoo dumolome eli domopoo tugodooso. Osoloso diayo homo bulubo magoo toloso see o ei mapoo imeduloso Yesu ma hamamee diye diso. <sup>27</sup> Osoloso beame omapoo, Yesu toloso diadaga molome odoo susuga hamamee diadeeso. Osoloso ee ma kulodu sobo abo sabolo dulone Yesu halo goholone hamamee dulone pupusigamo diadeeso. <sup>28</sup> Esem Yesuye bidooboloso dimapoo bolone egeesee takaso, "Yolusalem sobo, niba a halo haga na pupusige. Esino niso nediliyo osoloso nibada holo halo ka pupusige. <sup>29</sup> Bei, dala beame oso siboga, edebeeyo egeesee takagalaiso, 'Sobo deme taba nibolo osoloso sobo holo soomagoloso too koo nedili niba diya goomege.' <sup>30</sup> Bei, beame egeesi oso peledaba omapoo edebeeyo egeesee takagalaiso, 'Mubi sabolo osoloso esia niyo goodobuloso iba too goode!' dee takalaiso.

<sup>31</sup> Esiga goo hageesi oso homo su gie mapoo peledabooga, see ogoo goo oso homo su sia mapoo ka peledabalaisomo?" diso. †

<sup>32</sup> Osoloso beame omapoo ha teli odoo oso Yesu ido dulone, mesia bakadio homo bulubo magoo ma dokodoo wooloomalame ido diso. <sup>33</sup> Diba sibilesa mubi hee, eyo hu Wiligi ki mi deli mapoo, Yesu homo bulubo magoo ma dokodoo yoguso enigaloso tuluguso. Osoloso mesia bakadio onosee homo bulubo magoo mapoo yoguso enigaloso, odoo hee Yesuwo deede dokolo tulugu, osoloso hee dobusu dokolo tulugu diso. <sup>34</sup> Osoloso Yesuye homo bulubo magoo ma dokodoo telega molone egeesee takaso, "Ma, odoo hagee bia oso goo tokenee amapoo egee moodoo ee nayo hapoloso boobadobigi. Bei, diayo goo egee moodoo eyo bei diba gooleedele," diso. Osoloso ha teli odoo oso Yesuwo dugo talame diayo yo pepuso odoo hu ma ee kobuso.

<sup>35</sup> Odoosusuga oso peegooga tebisamolone balagamolome, Yu odoowo wiligi odoo tebisa oso manolone

† *Esiga to hogugu hageeyo bei egeesee moloso, "Niyo kasee gooleedo? Goo hagooso tokenee mauwe odoo mapoo peledabalai tebia daga, hee tokenee teli odoo dimapoo ogoo gooso peledabalaiyo?"*

egeesee takagameleeso, "Yayo odoo abo pidimo siliso. Esiga yo tei Godeeye hudi magoo Keliso oso daga, o su eyo nediliyo pidilei tekepo," dee takagameleeso.

<sup>36</sup> Osoloso ha teli odoo sabolo oso Yesu manolone, wain i mei nali keesoloso Yesuye nalame tenelone yimapoo egeesee takaso, <sup>37</sup> "No medee tei Yu odoo dia wiligi odoo taba daga, no telega pagalame, no nediliyo pidi," diso.

<sup>38</sup> Yesu o wiligi oo poogoo dokodooga to hageesee hoguguloso kalamaso,

**ODOO HAGEE YU ODOOWO WILIGI ODOO OSO.**

<sup>39</sup> Mesia hee Yesuwo ho hodiogooga eniga oso Yesu mapoo tokenee sisilone yimapoo egeesee takaso, "No medee tei Keliso daga, nee su no nediliyo pidilone, iba nosee pidi," diso.

<sup>40</sup> Esino mesia hee oso o odoowo to su maga to kitu-lugu sabolo egeesee takaso, "No Godeebolo koo obu-do? Bei, yayo dala egee to, no nosee dala hedebe egeesi toso. <sup>41</sup> Esiga iba asalo ibada tokenee eyo nei maga ka wodioso. Esino Yesu mapoo tokenee hee mauwe," diso.

<sup>42</sup> Osoloso yayo see Yesu mapoo egeesee takaso, "Yesu, nayo wiligi doloso badebei mapoo, nayo a gooleebigi," diso.

<sup>43</sup> Esemé Yesu nei yimapoo egeesee takaso, "Ayo namapoo tei goo taka, esiga epei no abolo hodobo goomoga mi Paladais mapoo badalaiso," diso.

#### **Yesuye ta eyo goo**

(Matiyu 27:45-56, Maka 15:33-41, Yonee 19:28-30)

<sup>44</sup> Osoloso osogo olo oo domo toboome, mi susuga neligaso, mi neligamelee ososee osogo howo bakadio hedebe di poogooso. <sup>45</sup> Bei, goo ogoso peledoboome, osogo pelega poogooso. Osoloso tei moso tegei ma kulodu dugo kodia oso kisimelee ee eyo mosoowe do-mo tologodooso. <sup>46</sup> Esemé Yesuye to neligidi egeesee takaso, "Ma, a mo dio nee dee mapoo maga," diso. Yesu to hamameedee hageesee takoloso taso.

<sup>47</sup> Osoloso ha teli odoo gibadeli odoo oso Yesuwo ho-mo bulubo magoo ma hemidu badolone Yesuye ta goo ee ogoloso, Godeeyo hu dokodoo poudoolone egeesee takaso, "Tei takoo, odoo hagee Godeeyo howo woola tekepo odoodo," diso. <sup>48</sup> Osoloso odoo susuga oso gooso peledaba ee agalame omapoo dile-so balagamelee odoo oso goo hagee ogoloso dulone diya gooholone dia budo mapoo kobugumo see wedi diadeeso. <sup>49</sup> Osoloso Yesu o odoo sabolo osoloso sobo abo Yesubolo Gelili abaga sibadee oso wulo eli sage abaga tebisamolone goo hagooso peledaba mapoo balagameleeso.

#### **Yesu mi doosoo**

(Matiyu 27:57-61, Maka 15:42-47, Yonee 19:38-42)

<sup>50</sup> Dima kulodu odoo hee badebeiso, o hu Yosep. Yudiya mi toowa ee ma kulodu mi pepooko Alimatiya ee o midee. Yo Godeeyo howo woola tekepo badolone Godeeye wiligi doloso badeli goo oso siba beleso bameleeso. Osoloso yo Yu odoowo wiligi odoo tebisa

oso mooloogoodoo ee ma kulodu yo dibolo hodobo badebeiso. Esino Yu odoowo wiligi odoo tebisa oso Yesu Loum gamalee odoo oso wooloomalame dimapoo tiaseme, yo goo omapoo gowoolone yayo hamaga takaso. <sup>52</sup> Osoloso yayo Yesu ta eyo su ee ta-lame, Paillet mapoo dileso woosaso. <sup>53</sup> Osoloso yayo Yesuwo su homo bulubo magoo ma dokodooga miy-omoo to meileso, dugoso tiadoloso yo ou madu ma-gooso. Midoo hagee dia. Esiga daga odoo hee teme omapoo magele. <sup>54</sup> Esino beame domo egee Yu odoo diayo hasali beame bei mooloogoolai osogo howo koola toboome ka see.

<sup>55</sup> Osoloso sobo abo Yesubolo Gelili abaga sibadee oso Yosepeeye Yesuwo su mi doo ma kulodu magalame todime, diba yima hamamee diadeeso. Diba omapoo dileso Yosepeeye Yesuwo su magoo medee egeiso. <sup>56</sup> Osoloso diba see wedi dileso sisigageli bi medee tekepo Yesuwo su mapoo hedilame mopoodoo dooso. Esino diba Yu odoo diayo hasali beame olo bei mooloogoome, Moseseeye tei magoo ee dodolone epedee koodobuloso hasaso.

#### **Yesu midoo ma kuloduga hogabia**

(Matiyu 28:1-10, Maka 16:1-8, Yonee 20:1-10)

**24** Esiga Sadee toowa beame gesikolodee sobo hagee bia oso sisigageli bi medee tekepo mopoodoo doo ee toloso Yesuwo bi mapoo diadeeso. <sup>2</sup> Diba omapoo dileso egeino, yo toowa wulu ou miy-opoo kisi ee peegoo bidigamo dileso molome egeiso. <sup>3</sup> Esemé diayo kulodu galagadileso egeino, Lodee Yesuwo su omapoo mauwe molo egeiso. <sup>4</sup> Osoloso di-ayo kulodu galagadileso goo tiademe balaga meleeno, odoo bakadio dugo diya gadeebugu kalaga oso saga peledoboloso soboso debei mapoo hodiogooga tebisaso. <sup>5</sup> Osoloso sobo diba diya dio dulone, ebia sabalo miyomoo gasuwaso. Esemé odoo bakadio oso dimapoo nei egeesee takaso, "Niyo kasalame odoo see gie badeli too ee midoo ma kulodu ka esiamo sile-sibana? <sup>6</sup> Yo kulo hadu mauwe. Esino yo see hogado dina. Esiga niba Yesubolo Gelili mapoo silone, yayo nimapoo taka goo ee gooleebigi. <sup>7</sup> Bei, yayo egeesee takaso, 'Odoo Holo, a tokenee teli odoo dimapoo tiasalaiso, osoloso a homo bulubo magoo ma dokodoo yoguso enigileiso. Osoloso a beame baka-dio midoo ma kulodu tamoloso, beame bakadio hedebe di mapoo midoo ma kuoduga see hogado dileiso,' diso." <sup>8</sup> Esemé sobo diba to hagee duloso Yesuye takomo sili to ee gooleebuguso.

<sup>9</sup> Osoloso diba midoo maga see wedi dileso, diye di odoo 11 sabolo osoloso odoo susuga mapoo diayo egei goo susuga ee dimapoo oposususo. <sup>10</sup> Esiga sobo hagee bia oso goo peledaba hagee ka egei, Meli-Magadaliya osoloso Yowana osoloso Yemeseeyo owee Meli osoloso sobo abo. <sup>11</sup> Esino sobo hagee bia oso sibilesa diye di odoo mapoo takeme diba duno, halabolone taka masi takeme to omapoo tei tele poogooso. <sup>12</sup> Esino Pita toboloso midoo ee agalame hoguo diso. Yo dileso gasuwuloso wulu ma kulodu egeino, dugo

Yesuwo su tiadoloso magoo ee see mosoowe wulu ma kulodu molome egeiso. Esem Pita goo hagee ogoloso howoodoomo wedi diso.

### Odoo bakadio oso Emaus mi mapoo dulone Yesu egei

<sup>13</sup> Beeame hedebe omapoo Yesuwo hamamee dili odoo bakadio oso Yolusalem mi poogoloso, see Emaus mi mapoo diadaga meleeso. Emaus mi egee Yolusalem omaga haga hoogoonee, wulo 11 kilomita egeesi masi. <sup>14</sup> O bakadio dumo dulone goo susuga Yesu mapoo peledaba goo ee oposusumo diadeeso. <sup>15</sup> Osoloso o bakadio osee oposusumo diadaga molome, Yesu dima hamamee sibilesa diba tugodoloso dibolo hodobo diso. <sup>16</sup> Esino odoo bakadio hagooso Yesu medee kibiya hoodo egele. Bei, diayo Yesu kibiya hoodo egeeyaga, Godeeye diba gooloo-goso.

<sup>17</sup> Esem Yesuye dimapoo egeese takaso, "Niba ogoo goo oposusumo diadaga malana?" diso.

Esem diba eli domo omapoo kookoo toboloso goohele sabolo mudu olugodoloso tebisameleeso.

<sup>18</sup> Osoloso dima kulodu odoo hee, o hu Keleopas, yayo Yesu mapoo egeese takaso, "Yolusalem mi mapoo odoo soo sibadee ee ma kulodu mi omapoo goo peledaba ee, no dulega badosoba?" diso.

<sup>19</sup> Esem Yesuye nei dimapoo egeese takaso, "Nayo egee takoo ogoo goo takala?" diso.

Esem diayo nei yimapoo egeese takaso, "Iba Yesu Nasalet odoo eyo goo ee taka. Bei, yo Godee maga to toloso kokodo takomo sili odoo doloso badolone Godeeyo howo woola osoloso odoo susuga eyo mudugiyo Godeeyo to kitulugu sabolo takomo siliso. Osoloso yayo goo toowa opusomo di moodoomo siliso. <sup>20</sup> Esino tei moso wiligi odoo tebisa sabolo osoloso ibada wiligi odoo tebisa oso Yesu Loum gamalee oso wooloomalame dimapoo teneeso. Esem yo homo bulubo magoo ma dokodoo yoguso enigaloso taso.

<sup>21</sup> Esino iyo goolee, yayo Isael odoo iba Loum gamalee gidebeli omaga peegoo gilimado dileiso doloso dobolone balaga meleeso. Esiga goo hagooso peledaba ee beame bakadio olo poogooso. <sup>22</sup> Osoloso ibada mooloogoodoo ee ma kulodu sobo abo oso epei gesikolodee dilesa midoo mapoo egeino, Yesuwo su mauwe molo egeiso. Esem diayo sibilesa imapoo takolone, 'Ibada howo opusomo doloso Godeeyo momaiye egeiso,' diso. Esem momaiye oso Yesu ta maga hogado di goo ee dimapoo takaso. Esem goo susuga hagee takeme, iba diya dio diso.

<sup>24</sup> Osoloso ibada mooloogoodoo ma kulodu debeli odoo abo diba nosee dilesa midoo egeino, soboso taka to sabolo tobulone, Yesuwo su midoo ma kulodu mauwe molo egeiso."

<sup>25</sup> Esem Yesuye nei dimapoo egeese takaso, "Niba medee diya boobada odoodoo. Niba kaseega Godee maga to toloso kokodo takomo sili odoo dia to mapoo tei telega ka dosomo?" <sup>26</sup> Bei, diayo egeese takaso, 'Godeeye hesia Kelisoye dala goo hageesi toloso see Godeeye egee bado mapoo peleso hu toowa toloso ki-

tulugu sabolo badalaise,' diso." <sup>27</sup> Osoloso Yesuye dimapoo Moses sabolo osoloso Godee maga to toloso kokodo takomo sili odoo susuga oso Kelisowo goo hogugu goo eyo bei dimapoo medee eligiso.

<sup>28</sup> Osoloso diba Emaus mi olo koola toboome omapoo dulone Yesuye dimapoo egeese takaso, "A hamapoo hasalaime. Esino a olo wulo duso," diso.

<sup>29</sup> Esem odoo bakadio oso to kitulugu sabolo yimapoo egeese takaso, "Emegei, no epedee na di, no ibolo hodobo tiamo. Bei, olo nolugo," diso. Esem Yesu yo dibolo hodobo tilame diso.

<sup>30</sup> Osoloso diba moso kulodu peleso nei nalame dobolone, Yesuye wo toloso goomoga to takoloso koodobuloso wo populoso dimapoo piso. <sup>31</sup> Egeese seemelee beame omapoo diayo Yesu medee kibiya hoodo egeiso. Omapoo diayo Yesu medee kibiya hoodo egeme, yo saga omapoo osugoboodooso. <sup>32</sup> Esem obakadio dobolone dibusomo egeese takagameleeso, "O. Tei takoo, iba eli domo abaga sibadaga molome, yayo Godeeyo to eyo bei imapoo takeme, ibada sooloo ma kulodu diya goomogaso," diso.

<sup>33</sup> Osoloso diba saga tebisaloso see Yolusalem mapoo wedi diadeeso. Diba omapoo dilesa egeino, diye di odoo 11 sabolo osoloso Yesuye di hamamee dedeli odoo susuga oso diesono hodobo mooloogoodoloso doboome egeiso. <sup>34</sup> Esem odoo omapoo mooloogoodoloso debei oso dimapoo egeese takaso, "O. Tei takoo, Lodee yo ta maga see hogado didoo. Osoloso yo see Saimon-Pitaye badebei mapoo peledabadoo," dee takagameleeso. <sup>35</sup> Osoloso odoo bakadio hagee bia oso Yesu eli domopoo diba tugodoloso di eyo goo sabolo osoloso Yesuye dibolo hodobo nei nalame dobolone, wo toloso popume, diayo yo medee kibiya hoodo egei goo ee dimapoo oposususo.

### Yesuye o hamamee dili odoo dimapoo dilesa peledaba

(Matiyu 28:16-20, Maka 16:14-18, Yonee 20:19-23, Diye Di Odo 1:6-8)

<sup>36</sup> Diba goo hamapoo to osee kesamolome, haga bologelega diayo debei domo omaga Yesu peledoboloso tobululone dimapoo egeese takaso, "Emegei, mesie goo oso nibolo hodobo mele," diso.

<sup>37</sup> Esino diayo goolee yo odoo dio bele dolone, dio dulone diya ebigaso. <sup>38</sup> Esem Yesuye nei dimapoo egeese takaso, "Niba kaseega ebia sabolo goo tiadoo sabolo nibada goo goolee ma kulodu ka malana?" <sup>39</sup> Esiga niba mo dee sabolo osoloso mo homo sabolo ogoloso tei aso doloso gooleede. Osoloso mo su sige, niyo a tei su moloso doloso gooleedalame. Bei, odoo dio diba su mauwe," diso.

<sup>40</sup> Yo to hagee takoloso o dee boowo sabolo osoloso o homo boowo sabolo dimapoo eligiso. <sup>41</sup> Esino diayo medee tei telega goomoga sabolo osoloso dio dulone debei ogoloso Yesuye dimapoo egeese takaso, "Nimapoo nei nali hee molosomo?" diso. <sup>42</sup> Esem diayo yimapoo di si pepooko teneeso. <sup>43</sup> Osoloso yayo dia howo woola di egee neso.



<sup>44</sup> Osoloso yayo dimapoo egeesee takaso, "Ayo nibo-  
lo hodobo silone nimapoo takeliso, 'Mo goo maga  
Moseseeye hogugu sabolo, osoloso Godee maga to  
toloso kokodo takomo sili odoo oso hogugu sabolo,  
osoloso Sam booka mapoo hogugu goo oso amapoo  
peledabalaiso,' deliso. Esiga epei goo hagooso  
amapoo olo ka peledobooso," diso.

<sup>45</sup> Osoloso Godeeyo to booka mapoo hogugu goo ee  
medee kibiya gooleedalame, Yesuye dibada goo  
goolee medee hoodo magooso. <sup>46</sup> Yesu egeesee  
selone tobudulone dimapoo egeesee takaso, "Esiga  
Godeeyo to booka mapoo hogugu ee egeesee moloso:  
Godeeye hesia Keliso, a dala toloso beeame bakadio  
midoo ma kulodu ta moloso see beeame bakadio  
hedebe di mapoo hogabuloso toboloso dileiso." <sup>47</sup> Os-  
oloso Yesuye see tobu dimapoo egeesee takaso, "Niba  
Yolusalem abaga bei mooloogooloso mipoo toowa  
mapoo mo hu maga odoo mapoo hageesee eligimo  
silesibe, 'Niba goo goolee su wuduloso nibada goo to-  
kenee maga miligi pie. Eseega nibada goo tokenee  
hapoloso boobado bigileiso,' dee takomo silesibe.

<sup>48</sup> Esiga niyo mo goo hagee ogoloso takomo silesi-  
bileiso. <sup>49</sup> Osoloso niba Yolusalem poogoloso epedee  
na di. Esino niba epedee hamapoo osee doga, Kei mi  
ma dokodooga kitulugu siboga talaiso. Bei, ayo mo  
Maye taka to ee dodolone nimapoo Dio Tei tenelaiso,"  
diso.

### Yesu Kei mi ma dokodoo ido pala

(Maka 16:19-20, Diye Di Odoo 1:9-11)

<sup>50</sup> Osoloso Yesuye o hamamee dili odoo gilimadoloso  
Betani mi koola mapoo diadaga meleeso. Diba  
omapoo dileso peledoboloso Yesuye dee dokodoo  
poudoloso diba halo dokodoo takolone diba pidilame  
goomoga to takaso. <sup>51</sup> Yo egeesee takomolome, Yesu  
Kei mi ma dokodoo ido palaso. <sup>52</sup> Esemé diayo Yesuwo  
hu dokodoo poudoloso, goomoga sabolo Yolusalem  
mi mapoo see wedi diadeeso. <sup>53</sup> Osoloso beeame  
susuga ee ma kulodu, diba Yu odoowo tei moso  
mapoo dobolone, Godee mapoo goomoga poudolone  
debeiso.

# Yonee

## Yonee booka goo eyo bei

Yonee booka hagee Yesu o hamamee dili odoo hee Yoneeye hogugu. Yayo to hogugu ee ma kulodu goo toowa hagoso. Yesu yo Keliso osoloso yo tei Godeeyo Owolo. Esiga iyo Yesu mapoo tei toga, iba gie badeli talaiso.

### Toso odoo su paso

**1** Daga mipoo hagee moodelega molome, To † olo badebeiso. To oso Godee sabolo badebeiso. Osoloso To ee Godee. <sup>2</sup> Yo mipoo gie daga moodoo omapoo Godee sabolo badebeiso.

<sup>3</sup> Esiga bi hee yo mauwe moodele poogoo me. Esino bi susuga hedebe yimaga ka moodoo. <sup>4</sup> Esiga gie badeli eyo bei hedebe yoso. Gie badeli oso odoo susuga mapoo gadeebugu tenemeleeso. <sup>5</sup> Esiga gadeebugu oso neliga ma kulodu ka pounimoloso. Esiga gadeebugu egee neligasos semidilei tebile.

<sup>6</sup> Esiga biame omapoo Godeeye odoo hee diye diso, o hu ee Yonee. <sup>7</sup> Yayo odoo mapoo gadeebugu oso sibilei goo ee takalame simiso. Osoloso odoo susuga oso to yayo taka ee duloso tei ka talame. <sup>8</sup> Yonee yo gadeebugunee, esino yayo gadeebugu eyo goo ee odoo mapoo takalame ka simi. <sup>9</sup> Bei, tei gadeebugu oso odoo susuga mapoo pouni meli oso mipoo hamapoo sibilei ee olo koola tabaso.

<sup>10</sup> Esiga To ee mipoo hamapoo meleeso. Osoloso mipoo hagee yimaga moodooso. Esino mi odoo oso yo medee hoodo egele. <sup>11</sup> Yo o odoo mapoo simiso. Esino o odoo oso yo idile. <sup>12</sup> Esino edebeeyo yo idoloso yimapoo tei teme, yayo odoo egee bia dimapoo kitulugu teneeso, diayo Godeeyo owolo dio doloso dabalame. <sup>13</sup> Esino edebeeyo owee dio ama dio eyo sawoso, o, suso gilee, o, odoo heeso gilee goo maga diba Godeeyo owolo dio dee ka sele. Esino Godeeye goomoga goo omaga diba Godeeyo owolo dio diso.

<sup>14</sup> Osoloso Toso odoo su poloso ima kulodu badebeiso. Yayo iba diya sooloo dolone pidiliso. Osoloso yayo tei goodee ee takeliso. Osoloso yayo hu toowa toloso badeli goo ee iyo egeiso. Esiga Ma Godee maga simi, Owolo hedebe yayo hu toowa egeesi toloso ka badoso.

<sup>15</sup> Yoneeye o goo maga takolone toso neligidi egeesee takaso, "Ayo takolone, odoo hee ama hamamee sibileiso dee takomo silimenee, odoo ee hagoso. Yayo kitulugu oso ayo kitulugu ee dagadi. Bei, a soomagelega badoboome, yo daga olo badebeiso."

<sup>16</sup> Esiga sooloo dolone pidili goo toowa yimapoo egee molo maga biame susuga yayo iba ka pidi-

† Toee Yesu

moloso. <sup>17</sup> Tei magoo goo ee Godeeye Moses maga imapoo teneeso. Esino sooloo dolone pidili goo sabolo osoloso tei goodee ee Yesu Keliso maga simi. <sup>18</sup> Egeesi ma kulodu odoo heeso Godee egele. Esino hedebe Godeeyo Owolo yayo imapoo Godeeyo goo ee yilige buguso. Bei, yayo Godee koola ogolone badolone yo tei Godee doloso ka badoso.

### Yoneeye takolone a Kelisonee dee taka

(Matiyu 3:1-12, Maka 1:1-8, Luka 3:1-18)

<sup>19</sup> Yelusalem mapoo debeli Yu odoo dia wiligi odoo oso Godee ogo odoo ogo doloso debeli sabolo, osoloso odoo abo Libaiyo bala †† maga Yonee mapoo diye diso, diayo Yonee yo tei odoo ogumo doloso woosalame. Esemee diayo Yonee mapoo dilesos egeesee woosaso, "No tei odoo ogumo?" diso. <sup>20</sup> Esemee Yonee yo to nei takalai gowelee. Esino yayo nei dimapoo egeesee takaso, "A Kelisonee," diso.

<sup>21</sup> Esemee diayo see yimapoo egeesee woosaso, "No odoo ogumo? No Ilayayo?" diso.

Esemee yayo nei egeesee takaso, "Haye, a Ilayanee," diso.

Esemee see diayo yimapoo egeesee woosaso, "No Godee maga to toloso kokodo takomo sili odoo sibileigo neme bamelee ‡, odoo ee nosomo?" dee takaso.

Esemee yayo nei dimapoo egeesee takaso, "Haye, asonee," diso.

<sup>22</sup> Esemee see diayo yimapoo egeesee takaso, "No tei odoo ogumo? Iba goomogo, to nei nayo taka ee iyo todilesos ibada wiligi odoo iba diye di mapoo takalaiya. Esiga no tei odoo ogumo?" diso.

<sup>23</sup> Esemee nei Yoneeye Godee maga to toloso kokodo takomo sili odoo Aisayaye taka to ee dimapoo egeesee takaso,

"A miwe poogoo mi maga idageli odoo ee aso, Niba Lodeeye sibilei eli medee hoodo magee."

†† *Libaiyo bala eyo bei ee egeesi moloso. Eibalahameeyo amawe Yekobowo owolo hee eyo hu ee Libai. Osoloso Libaiyo bala ee ma kulodu debeli odoo oso Yu odoo dia tei moso ma kulodu tou opusomo opusomo di ee teliso. Esino Godee ogo odoo ogo doloso debeli odoo diba nose tei moso ma kulodu tou teliso. Diba Eloneeyo bala hedebe. ‡ Yu odooso Godee maga to toloso kokodo takomo sili odoo Moses egeesi masi oso sibilei ee bameleeso. (Deut 18:18)*

<sup>24</sup> Esemé Pelisi odoó dia wiligi odoó oso diye di odoó oso díleso, nei Yonee mapoo egeesee takaso, <sup>25</sup> "Nayo takolone, no Kelisonee, osoloso no Ilayanee, osoloso no Godee maga to tolosó kokodo takomo sili odoó osonee, dee takoo. Esino bei kasalame nayo odoó howo ka olugumo silala?" diso.

<sup>26</sup> Esemé nei Yoneeye dimapoo egeesee takaso, "Ayo wulo odoó howomoo oluguliso. Esino odoó hee nima kulodu badoso. Esino niba yo gooleedele. <sup>27</sup> Yo ama hamamee egee siboso. Esino a tekeponee, ayo o ho-mo mapoo kali bi ee pidigilei."

<sup>28</sup> Osoloso Yoden howo hodiokoo Yoneeye odoó howo olugumelee Betani mi mapoo goo ogoso peled-abaso.

### Yesu Godeeyo Lam be

<sup>29</sup> Biame hee mapoo Yesu Yonee mapoo sibume ogoloso Yoneeye egeesee takaso, "Ege, hagee Godeeyo Lam beso. † Yayo mipoo hamapoo debeli odoó dia goo tokenee susuga ee hapoloso boobado bigileiso. <sup>30</sup> Ayo takolone, odoó sibileisogo doloso takomo sileemeni, odoó ee hagosó. Bei, ayo egeesee takomo sileeso, odoó hee ama hamamee sibileiso. Esino yayo kitulugu oso ayo kitulugu ee dagadi, dee takeliso. Bei, a soomagelega molome, yo daga olo badebeiso, dee takeliso. <sup>31</sup> Esiga Isalael odooso Kelisowo goo ee medee gooleedalame ayo diba howo olugulame ka simi."

Esiga Yonee eyo egei goo ee egeesee takaso, "Ayo daga Keliso odoó ogu bele dolone medee kibiya gooleedele. Esino ayo odoó howomoo olugulame, Godeeye a diye dolone amapoo egeesee taka, 'Nayo Keliso egeesee gooleedalaiso. Dio Tei sibilesó yibolo hodobo badoga agalaiso. Osoloso yayo odoó mapoo Dio Tei tenelaiso,' diso. Godeeye egeesee taka duloso hamamee Dio Tei molo masi pusibleso yimapoo pub-alegeme egeiso. <sup>34</sup> Esiga ayo goo hagee tei ogoloso yo tei Godeeyo Owolo dolone to hagee ayo nimapoo ka taka."

### Yesuye o hamamee dili odoó daga hudi magoo

<sup>35</sup> Biame hee mapoo Yonee o hamamee dili odoó bakadio dibolo hodobo mi hedebe omapoo tebisa meleeso. <sup>36</sup> Egeesee semelee omapoo Yesuye di ee ogoloso dimapoo egeesee takaso, "Niso ege, odoó egee Godeeyo Lam be ogoso," diso.

<sup>37</sup> Esemé Yonee o hamamee dili odoó oso to egee duloso Yesuye di hamamee diso. <sup>38</sup> Esemé Yesuye bidi toboloso, odoó bakadio oso yima hamamee simi ee ogoloso, yayo dimapoo egeesee takaso, "Niba ogoo goo tala sibala?" diso.

Esemé diayo nei yimapoo egeesee takaso, "Labai, no kapoo badeliyo?" diso. Labai hu eyo bei ee eligili odoó dolone ka takoo.

† Lam be dee egee takoo sipi be hu gie kauwa ee takoo. Bei, Isalael odoó oso tokenee goo hapalame sipi be gie kauwa wooloomaloso Godee mapoo teneliso.

<sup>39</sup> Esemé yayo nei egeesee takaso, "Niso sibilesó ege," diso. Osoloso neli tigime, odoó bakadio hagosó Yesubolo díleso yayo badeli mi ee egeiso. Esemé diba biame omapoo yibolo hodobo debeiso.

<sup>40</sup> Odoó bakadio hagee bia dia kulodu odoó hee o hu ee Endulu. Endulu yo Saimon-Pitayo omolo. <sup>41</sup> Esiga Enduluye Yesu ogoloso emei Saimon esiaso. Yo ogoloso yimapoo egeesee takaso, "Iba Mesaya egeiso," diso. Mesaya hu eyo bei ee Keliso dolone ka takoo. ††<sup>42</sup> Osoloso Enduluye Saimon Yesu mapoo ido diso. Esemé Yesuye yo ogoloso yimapoo egeesee takaso, "Saimon, Yoneeyo owolo, nee hu see Kepas hedileiso." Kepas dee egee takoo ee Pita dolone ka takoo. ‡

### Yesuye Pilipi dio Nataniyol dio gilimadoo

<sup>43</sup> Osoloso biame hee mapoo Yesu yo see Gelili mi mapoo dilame goomogaso. Esino biame omapoo yo odoó hee Pilipi tugodoloso yimapoo egeesee takaso, "No ama hamamee sibe," diso.

<sup>44</sup> Pilipi hagee Betesaida odoó. Betesaida mi hagee Endulu dio Pita dio dia midée. <sup>45</sup> Osoloso Pilipiye díleso Nataniyol ogoloso yimapoo egeesee takaso, "Moses sabolo osoloso Godee maga to tolosó kokodo takomo sili odoó oso dia booka mapoo to hogugu oso takolone, odoó hee hamamee sibileisogo, dee takemelee odoó ee iyo olo egeiso. Yo Yesu, Nasalet mi mapoo badeli, yo Yosepeeyo owolo," dee takaso.

<sup>46</sup> Esino Nataniyoleeye Pilipi mapoo egeesee takaso, "Goo tekepo oso Nasalet mi maga kasee sibileiyó?" diso. †. Esemé Pilipiye nei yimapoo egeesee takaso, "No sibilesó ege," diso.

<sup>47</sup> Esemé Nataniyoleeye Yesu yima hegi simi ee ogoloso Yesuye o goo maga egeesee takaso, "Niso ege, odoó hagee tei Isalael odoó. Yo medee tei goo takeli odoó," diso.

<sup>48</sup> Esemé Nataniyoleeye nei yimapoo egeesee takaso, "Nayo a kasee gooleedoowo?" diso. Esemé Yesuye nei yimapoo egeesee takaso, "No daga Pilipiye díleso egelega badoboome, no pigi homo bei mapoo bado-boome, ayo no egeiso," diso.

<sup>49</sup> Esemé Nataniyoleeye Yesu mapoo egeesee takaso, "Eligili odoó, no Godeeyo Owolo. Osoloso no Isalael odoó ibada wiligi odoó," dee takaso.

<sup>50</sup> Esemé Yesuye nei Nataniyol mapoo egeesee takaso, "No homo bei mapoo badoboome, ayo egei goo maga nayo amapoo tei ka toowala? Esino goo hagee pepooko, no hamamee goo toowa agalaiso. <sup>51</sup> Esiga ayo nimapoo tei goo taka. Niyo Kei mi osulu yam-ogoloso mologa, Godeeyo momaiye oso Odoó Holo ††

†† Esiga Hibulu dia toso Mesaya dee egee takoo sabolo osoloso Guliki toso Keliso dee egee takoo goo eyo bei ee hedebe Godeeye hesia dolone ka takoo. ‡ Esiga Hibulu toso Kepas dee egee takoo sabolo osoloso Guliki toso Pita dee egee takoo hu eyo bei ee yo dolone ka takoo. †† Yu odooso goolee, Nasalet mi ee haga goo toowanee, dee gweliso. Esiga odoó hu toowa too oso mi omaga sibileime, dee gweliso. †† Odoó Holo - Yesuye eyo nediliyo takolone, a Odoó Holo, dee taka hagee yo tei odoó dolone ka takoo silee.

amaga dokodoo polo osoloso amapoo sibo domologa agalaiso," dee takaso.

### Yesuye howo ee wain i palame moodoo

**2** Biame bakadio poogoloso hamamee Gelili mi toowa ee ma kulodu Kana mi pepooko mapoo odoo heeso sobo hu wo neso. Biame domo omapoo Yesuwo owee onosee omapoo badebeiso. <sup>2</sup> Osoloso Yesu sabolo o hamamee dili odoo sabolo sobo hu wo ne ee agalame diba gilimadoloso debeiso. <sup>3</sup> Wo ne biame domo mapoo wain i hosudoo ee ogoloso Yesuwo oweeye Yesu mapoo egeesee takaso, "Wain i olo hosu-doona," diso.

<sup>4</sup> Esemee Yesuye nei owee mapoo egeesee takaso, "Mo wee, ayo ogo goo talame no amapoo ka simiyo? Mo biame tugodele," dee takaso.

<sup>5</sup> Esemee oweeye nei odoo moso kulodu tou teli mapoo egeesee takaso, "Niba Yesuye to nimapoo takooga duloso to egee te," dee takaso.

<sup>6</sup> Egeesi ma kulodu sesepeni yugoso moodoo 6 omapoo bediga meleeso. Sesepeni 6 hedebe hedebe di egee howo 100 lita egeesi keeseli. Yu odooso dia adaga dia goo ee dodolone, sesepeni howo keesoo hamapoo dee sabolo, homo sabolo, osoloso bi abo hapeliso.

<sup>7</sup> Esemee Yesuye odoo moso kulodu tou teli dimapoo egeesee takaso, "Sesepeni susuga hagee howoso metamagise," diso. Esemee diayo sesepeni susuga egee howoso metamagisaso.

<sup>8</sup> Esemee yayo tou teli odoo mapoo egeesee takaso, "Niba sesepeni omapoo howo keesaloso todilesi, odoo sobo hu wo ne eyo wiligi odoo mapoo tenee," diso. Esemee diayo egeesee moodooso. <sup>9</sup> Esino howo eyo see wain i paso. Esemee wiligi odoo oso wain i egee wulo nalo egeiso. Egeesi ma kulodu wain i hagoso simi eyo bei yo gooleede. Esino o tou teli odoo diba olo gooleedoo. <sup>10</sup> Egeeseelone yayo sobo hulame simi giso ee idoloso yimapoo egeesee takaso, "Odoosusuga oso Yu odoo dia adaga dia goo ee dodolone, wo ne mapoo sibadee odoo mapoo daga wain i hadali keeneliso. Osoloso diba wain i toowa naloso hal-abolone daga, see wain i haga koo hadali ee dimapoo keeneliso. Esino nayo wain i dooboo hadali ee magoo moloso, see epedee keedoloso ka teneeso," diso.

<sup>11</sup> Esiga Gelili mi toowa ma kulodu Kana mi pepooko mapoo Yesuye daga malalo goo toowa opusomo di ee moodoo maga, yayo hu toowa toloso badeli goo ee eligiso. Esemee o hamamee dili odoo oso goo hagee ogoloso yimapoo tei tooso.

<sup>12</sup> Osoloso goo hagoso dileso koodobume, Yesuye owee sabolo, osoloso omolo dio sabolo, osoloso o hamamee dili odoo sabolo Kapeniyum mi mapoo diso. Osoloso diba omapoo dileso dobolone biame abo poogooso.

### Yesuye tei moso ma kuloduga odoo peegoo hasiso bugu

(Matiyu 21:12-13, Maka 11:15-17, Luka 19:45-46)

<sup>13</sup> Osoloso Yu odoo dia Gababia wo nali biame ee olo koola tooboome, Yesu Yelusalem mi mapoo palaso.

<sup>14</sup> Osoloso yo omapoo peleso egeino, odoo susuga oso tei moso beele ma kulodu bulumakau be sabolo, osoloso sipi be sabolo, osoloso molo sabolo edebeeyo neiso talame, tosibilesi odoo mapoo tenee domolome egeiso. Osoloso odoo aboso molee opusomo opusomo di ee tei moso eyo molee piligeli debi pooba mapoo doboome egeiso. <sup>15</sup> Osoloso Yesuye gowoolone tiso wei masi moodooloso wei oso sipi be sabolo, osoloso bulumakau be sabolo, osoloso odoo susuga peegoo hasisobuguso. Osoloso molee piligeli debi pooba bidige buguloso molee ko sabolo peegoo kugobuguso. <sup>16</sup> Osoloso see molo neiso talame debi odoo mapoo egeesee takaso, "Bi susuga hagee toloso moso hamaga peegoo diyadee. Niyo mo Mamo moso ee bi teli moso dee na see," dee takaso.

<sup>17</sup> Esiga goo hagoso peledaba ogoloso Yesu o hamamee dili odoo oso Godeeyo to booka mapoo hogugu oso taka goo ee egeesee gooleebuguso, "Ayo nee moso ee diya gooleeso.

Esiga edebeeyo a wooloomalaiso."

<sup>18</sup> Esemee Yu odoo dia wiligi odoo tebisa oso bi susuga malos gidebei odoo egee bia ee Yesuye tei moso ma kuloduga peegoo hasiso bugu goo ee ogoloso diayo yimapoo egeesee takaso, "No ogoso kitulugu toloso goo hageesee ka moodoowo? Esiga nayo kitulugu egee Godee maga too, dee takooga, nayo goo toowa opusomo di hee imapoo eligilei tekepo," diso.

<sup>19</sup> Esemee Yesuye dimapoo nei egeesee takaso, "Niyo tei moso hagee guobigi. Egeeseega, ayo see tobu biame bakadio hedebe di ee ma kulodu tegelaiso," dee takaso.

<sup>20</sup> Esemee diayo yimapoo egeesee takaso, "Iyo dugo 46 ee ma kulodu tei moso hagee tegeiso. Esiga biame bakadio hedebe di ee ma kulodu nayo saga kasee togo dalaiyo?" diso. <sup>21</sup> Esino Yu odoowo wiligi odoo hagee biaso Yesuye taka goo ee medee kibiya gooleede. Bei, Yesuye tei moso eyo goo maga taka hagee, eyo nediliyo o su ee taka. <sup>22</sup> Esiga Yesuye toloso hogado polome, hamamee Yesu o hamamee dili odoo oso Yesuye taka goo hagee gooleebuguso. Egeeseelone diayo Godeeyo to booka maga taka sabolo osoloso Yesuye taka to omapoo tei tooso.

<sup>23</sup> Yesuye Gababia wo ne biame omapoo Yelusalem mapoo peleso goo toowa opusomo di moodoo ogoloso odoo susuga oso yimapoo tei tooso. <sup>24</sup> Esino Yesuye dimapoo haga tei dele. Bei, yo odoo susuga dia sooloo ma kulodu goo goolee ee yo olo gooleedoo.

<sup>25</sup> Esiga yimapoo odoo heeso odoo dibada goo goolee ee takalai ee bei me. Bei, goo goolee susuga dibada sooloo ma kulodu egee molo ee, yayo malalo olo gooleedooso.

### Nikodimaseeye Yesu mapoo simi

**3** Esiga odoo hee badebeiso, o hu Nikodimas. Yo Pelisi odoo, osoloso Yu odoo dia wiligi odoo tebisa ee ma kulodu yinosee wiligi odoo hee yoso.

<sup>2</sup> Osoloso yayo gesi sibilesa Yesu mapoo egeesee takaso, "Eligili odoo, iba gooleedoo, no eligili odoo Godeeye diye di ee noso. Bei, edebeeyo eyo goolee goo toowa opusomo di nayo egee moodoomo silo egeesi moodoolai tebile. Esino Godee nobolo hodobo badoga, nayo goo toowa opusomo di hageesi moodoolai tebileiso," diso.

<sup>3</sup> Esemé Yesuye nei yimapoo egeesee takaso, "Ayo namapoo taka. Edebeeyo see soomagelega poo-googa, yo Godeeye wiligi doloso badeli goo mapoo gadileime," dee takaso.

<sup>4</sup> Esemé Nikodimaseeye nei yimapoo egeesee takaso, "Odo kauwa ee oweeyo beliye maga see tobu kasee soomagalaiyo? Yo see holope poloso oweeye see tobu soomagalai tebile," diso.

<sup>5</sup> Esino Yesuye see egeesee takaso, "Ayo namapoo taka. Edebeeyo howo maga osoloso Dio Tei maga see dia delega poogooga, yo Godeeye wiligi doloso badeli goo mapoo gadileime. <sup>6</sup> Mi odoo oso holope soomagoloso mi hamapoo debeliso. Esino Dio Tei oso gie badeli egee tenemolo odoo ee, Godeeyo owolo dio doloso badoboso kookaiyo gie badalaiso. <sup>7</sup> Esiga ayo namapoo takolone no see tobu soomagee dee hagee takoo duloso haga na dio di. <sup>8</sup> No pooso eyo goomoga maga sibulone goowa ee duliso. Esino yayo sibili eli sabolo osoloso yayo dili eli ee no gooleedele. Esiga Dio Tei oso odoo mapoo gie badeli egee tenemolo edebeeyo ogoloso koo gooleedeli."

<sup>9</sup> Esemé Nikodimaseeye egeesee takaso, "Ha? Goo hagoso kasee peledabalaiyo?" diso.

<sup>10</sup> Esemé Yesuye yimapoo egeesee takaso, "No Isael odoo dia eligili odoo, esino no goo hagee koo gooleedolo? <sup>11</sup> Esiga ayo namapoo taka. Iyo gooleedoo sabolo osoloso iyo egei goo ee Yu odoo nimapoo ka takomo siloso. Esino niyo ibada to mapoo tei talai ee ka gowooso. <sup>12</sup> Esiga ayo nimapoo mi goo maga takeme, niyo tei tele. Egeesi ma kulodu ayo see nimapoo Kei mi eyo goo maga takooga, niyo kasee tei talaisomo? <sup>13</sup> Odo heeso bi Kei mi ma dokodoo egee molo ee agalame pele. Haye. Hedebe Odo Holo ayo Kei mi mapoo ka badebei. Osoloso ayo Kei mi ma dokodooga mipoo hamapoo simiso. <sup>14</sup> Esiga daga hoo-goo Isael odoo diba miwe poogoo mi mapoo do-boome, Moseseeye hebise ki biso moodoo ee homo sabolo poudooso †. Goo hedebe egeesi masi, edebeeyo Odo Holo anosee toloso egeesee poudileiso. <sup>15</sup> Goo egeesi maga edebeeyo amapoo tei toga, yo badoboso kookaiyo gie badeli talaiso.

† Daga hoogoo Isael odooso Godee mapoo mesile poo-goome, diba palame hebise diye diso. Esino Moseseeye hebise ki biso moodoo ee homo sabolo poudoome amapoo ogoloso diba hebiseso pa ee see weidooso.

<sup>16</sup> Godeeye mi odoo diya sooloo dolone Owolo hedebe a meye diso, ayo mi odoo ee halo talame. Esiga edebeeyo amapoo tei toga, diba Godee maga pileime, esino diba badoboso kookaiyo gie badeli talaiso. <sup>17</sup> Esiga Godeeye Owolo a mipoo hamapoo meye dee taka hagee, mi odoo dia goo tokenee eyo nei tenelame ka meye dele. Esino mi odoo oso amaga gie badeli pidili talame ka simi. <sup>18</sup> Osoloso edebeeyo Godeeyo Owolo amapoo tei toloso doga, dia goo tokenee eyo nei dimapoo dala tenelaime. Esino odoo agayo amapoo tei telega doga, diba dia goo tokenee eyo nei talame ka doso. Bei, diba Godeeyo Owolo hedebe amapoo tei telega. <sup>19</sup> Gadeebugu mipoo hamapoo simiso. Esino mi odoo oso gadeebugu egee goomegele poogoloso see neliga ono diya goomogaso. Bei, diayo dia suso goo moodoo ee diya tokeneega. Goo egeesi maga Godeeye dia goo tokenee eyo nei tenelaiso. <sup>20</sup> Esiga goo tokenee teli odoo ee gadeebugu hegilone gadeebugu mapoo sibilei diya ebiliso. Bei, gadeebugu oso dia goo tokenee ee woola eligiyaga. <sup>21</sup> Esino edebeeyo Godeeye goomoga goo ee tomo siloga, diba gadeebugu mapoo sibilei ebileime. Bei, gadeebugu oso dia goo ee yilige buguga, goo susuga diayo moodoo ee Godeeye kitulugu maga ka moodoodoo doloso edebeeyo gooleedalaiso."

### Yonee odoo howo oluguli oso Yesuwo goo taka

<sup>22</sup> Osoloso goo hagoso dilesa koodobume, Yesuye o hamamee dili odoo sabolo Yelusalem poogoloso see Yudiya mi toowa ee ma kulodu mi pepooko abo mapoo diso. Diba omapoo dilesa dobolone odoo howo olugumeleeso. <sup>23</sup> Esino Yonee yo neliga moso ma kulodu tooselega badolone, Salim mi koola mapoo Aionon mi mapoo yayo odoo howo oluguso. Bei, mi omapoo howo toowa meleega, odoo susuga diba Yoneeye howo olugulame yimapoo sibumeleeso.

<sup>25</sup> Egeesee semelee biame omapoo Yonee o hamamee dili odoo aboso Yu odoo dia adaga dia goo ee dodolone dee sabolo, homo sabolo, osoloso bi abo hapeli goo maga Yu odoo hee sabolo toso agadigaso. <sup>26</sup> Osoloso diayo sibilesa Yonee mapoo egeesee takaso, "Eligili odoo, daga Yoden howo hodiokoo odoo nobolo hodobo badebei ee no gooleedoo. Esiga nayo odoo egeeyo goo imapoo takemeni oso odoo howo ka olugumoloso. No ege, odoo susuga oso no poogoloso see yimapoo ka duso," dee takaso.

<sup>27</sup> Esino Yoneeye egeesee takaso, "Edebeeyo eyo goolee goo hee moodoolai tebile. Esino Godeeye yimapoo kitulugu teneega, yo goo egee moodoolai ee tebileiso. <sup>28</sup> Esiga ayo nimapoo takolone, a Kelisonee, dee taka goo ee niba olo duso. Esino a wulo o eli moodoolame malalo diye di odoo ee aso. <sup>29</sup> Soboso giso obuoga, yo olo giso egeeyo. Odo giso ido peli ee omapoo tobudulone, giso sibabeleso bameliso. Osoloso gisoso peledoboloso to taka ee duloso yo diya goomegeliso. Egeesi ma kulodu odoo giso ido peli masi ee aso. Esiga a epedee diya goomoga sabolo ka

badoso. <sup>30</sup> Esiga Kelisoye toowa dolone, nei ayo pepooko dolone badalai tekepo.

<sup>31</sup> Esiga Kei mi ma dokodooga simi odoo oso odoo susuga dagadileso ka badoso. Esino mipoo hamapoo soomagoo ee mi odooso. Esiga yo wulo mipoo hageeyo goo ee takomo sili. Esino Kei mi ma dokodooga simi odoo yayo goo susuga diya dagadileso ka badoso. <sup>32</sup> Osoloso yayo egei goo sabolo osoloso yayo du goo ee takeliso. Esino odoo heeso o to mapoo tei koo teli. <sup>33</sup> Esino odoo agayo o to duloso tei too goo oso Godee yo tei goo takeli dolone ka eligiso. <sup>34</sup> Esiga Godeeye diye di odoo oso Godee maga to toloso takomo siliso. Bei, Godeeye o Dio Tei su goodegelega yimapoo olo teneeso. <sup>35</sup> Godeeye Owolo sooloo dolone goo susuga ee yayo wiligi doloso badalame kitulugu yimapoo olo teneeso. <sup>36</sup> Esiga odoo agayo Owolo mapoo tei toga, yo badoboso kookaiyo gie badeli talaiso. Esino odoo agayo Owolo mapoo mesile poo-googa, yo badoboso kookaiyo gie badeli talaimo. Esino Godeeyo kamana goo oso yimapoo kookaiyo os-ee malaiso."

#### Yesu dio Samaliya sobo dio

**4** Yesuye howo olugu odoo oso diya bei molone, yima hamamee deedeeso. Osoloso diayo Yoneeyo hamamee dili odoo ee dagadi goo ee, Pelisi odoo diba duso. <sup>2</sup> Esino Yesuye odoo howo olugumo sile. Hedebe o hamamee dili odoo oso odoo howo ka olugumo silee. <sup>3</sup> Esino Yesu yo Pelisi odoo oso o goo gooleedoo goo ee yo olo duloso, Yudiya mi poogoloso see Gelili mi mapoo wedi diso.

<sup>4</sup> Osoloso yo Gelili mi mapoo wedi dulone, Samaliya mi domo abaga dili eli omaga diso. <sup>5</sup> Yesuye Samaliya mi mapoo sibilesi mi edebeeyo bia Saika deli mapoo peledabaso. Esiga Saika mi edebeeyo bia hagee mi hee daga hoogoo Yekobeeye owolo Yosep mapoo tenee eyo koola omapoo moloso. <sup>6</sup> Esiga Yekobeeyo howo ou omapoo osee meleeso. Egeesi ma kulodu Yesu yo mi eli sage simiga kwasime, howo ou koola ogolone omapoo badebeiso. Biame egee osoko olo oo domo taba mapoo egeese ka see.

<sup>7</sup> Osoloso Yesu o hamamee dili odoo ee edebeeyo bia mi mapoo nei neiso talame dime, Samaliya sobo howo ou omapoo howo kalame simiso. Esem Yesuye yimapoo egeese takaso, "Nayo a howo keenee," diso.

<sup>9</sup> Esino sobo egee yayo taka to ee duloso dio diso. Bei, Yu odooso Samaliya odoo maga peegooga boologamo silesibiliso. Esem sobo ogoso Yesu mapoo egeese takaso, "Nayo kasi maga amapoo howo keenee dee ka takala? Bei, no Yu odoo. Esino a Samaliya sobo," dee takaso.

<sup>10</sup> Esem Yesuye nei yimapoo egeese takaso, "Nayo Godeeye wulo egee tenemolo goo ee gooleedoloso, odoo namapoo howo hoowa mo goo ee, no gooleedoloso badebei diepi, nayo amapoo kookaiyo gie badeli teneli howo ee hoowali. Osoloso nayo amapoo hoowa diepi, ayo nei namapoo howo egee teneli," diso.

<sup>11</sup> Esem sobo ogoso nei Yesu mapoo egeese takaso, "Wiligi odoo, no gie badeli teneli howo ee kamapoo keelaiyo? Osoloso namapoo ou howo keli me. Osoloso howo ou hagoonosee diya goobodomou. <sup>12</sup> Esiga ibada amawe Yekob pepooko dolone see nayo toowa dalame ka sala? Bei, ibada amawe Yekobeeye howo hagee ka ou, osoloso yayo owolo dio sabolo osoloso o be sabolo howo ou hedebe hagee naliso. Osoloso yayo howo ou hagee imapoo poogoo diso."

<sup>13</sup> Esem Yesuye nei yimapoo egeese takaso, "Edebeeyo howo ou hamapoo howo naga, diba see howo nala pagalaiso. <sup>14</sup> Esino odoo agayo howo ayo hagee keenee ee naga, yo see howo nala pagalaime. Esiga kookaiyo gie badeli teneli howo ayo yimapoo tenelai oso yima kulodu howo ou masi molone, yimapoo badoboso kookaiyo gie badeli ee tenelaiso."

<sup>15</sup> Esem sobo ogoso nei yimapoo egeese takaso, "Wiligi odoo, nayo egee takoo howo egee amapoo tenee, a hamamee see howo nala pegelega pagalame. Osoloso hamamee a hamapoo see howo kala sibilega pagalame," dee takaso.

<sup>16</sup> Esem Yesuye yimapoo egeese takaso, "No dileso nomo ido sibe," diso.

<sup>17</sup> Esem sobo ogoso nei yimapoo egeese takaso, "A giso me," diso.

Esem Yesuye nei egeese takaso, "Nayo takolone, no giso me, dee egee takoo tei goo takoo. <sup>18</sup> Bei, no daga giso dee tiadoo egeesi mapoo obiaso. Esino giso epedee nobolo hagee bado ee tei nomonee. Esiga nayo egee takoo, tei goo takoo," dee takaso.

<sup>19</sup> Esem sobo ogoso nei yimapoo egeese takaso, "Wiligi odoo, a gooleedo, no Godee maga to toloso kokodo takomo sili odoo hee nosodoo. <sup>20</sup> Samaliya bia ibada amawe dio oso mubi hagee ma dokodoo Godeeyo hu dokodoo poudiliso. Esino Yu odoo niyo takolone hedebe Yelusalem mi mapoo Godeeyo hu dokodoo ka poudilei tekepo dee takeliso. Esiga nayo amapoo takee, mi tekepo kamapoo iyo Godeeyo hu dokodoo ka poudileiyo?" dee takaso.

<sup>21</sup> Esem Yesuye nei yimapoo egeese takaso, "Emegei, no mo to mapoo tei te. Edebeeyo Ma Godeeyo hu dokodoo poudalame Yelusalem mapoo osoloso mubi hamapoo sibilega pagalai biame ee olo siboso. <sup>22</sup> Samaliya odoo niyo goomoga poudili goo ee niba gooleede. Esino Yu odoo iyo goomoga poudili goo ee iba gooleedooso. Bei, gie badeli pidili odoo ee hedebe Yu odoo imaga sibileiso. <sup>23</sup> Esiga biame olo siboso, esino biame ee olo simiso, tei yimapoo goomoga poudili odoo oso Dio Tei oso kitulugu maga, osoloso tei goo maga, Ma Godee mapoo goomoga poudalame. Bei, Ma Godeeye goo hageesi maga yimapoo goomoga poudili odoo omapoo diya goomegeliso. <sup>24</sup> Godee yo Dio. Osoloso yimapoo goomoga poudili odoo oso Dio Tei maga, osoloso tei goo maga yimapoo goomoga ka poudilei tekepo," dee takaso.

<sup>25</sup> Esem sobo ogoso nei yimapoo egeese takaso, "A gooleedooso, Mesaya edebeeyo takolone Keliso deli

ee sibileiso. Osoloso yayo sibileso imapoo goo susuga medee eligileiso," diso.

<sup>26</sup> Esemee Yesuye nei yimapoo egeesee takaso, "Odoe ee Mesaya aso, nobolo to egee komolo," dee takaso.

<sup>27</sup> Egeesee semelee mapoo Yesuwo hamamee dili odoo oso edebeeयो bia mi ee ma kuloduga wedi sibileso egeino, Yesuye sobo sabolo to komolome, diya dio diso. Esino odoo heeso sobo omapoo woosolone, no ogoo goomogolo, dee takele. Osoloso odoo heeso Yesu mapoo woosolone, nayo kasalame sobo sabolo to ka kamalala, dee takele.

<sup>28</sup> Osoloso sobo oso o ou howo keli omapoo magoloso see o moso bia takalame see wedi diso.

<sup>29</sup> Sobo ogoso dileso egeesee takaso, "Niba odoo hee hagee agalame sibe. Yayo goo ayo moodoo susuga ee takaso. Esiga odoo egee Keliso malaiso."

<sup>30</sup> Esemee moso bia susuga Yesu agalame diyadeeso.

<sup>31</sup> Odoe susuga Yesu agalame sidadaga molome, Yesuwo hamamee dili odoo oso Yesu mapoo egeesee takaso, "Eligili odoo, no nei ne," diso.

<sup>32</sup> Esino Yesuye dimapoo egeesee takaso, "A nei moloso. Esino nei ayo nali ee niba gooleedele," dee takaso.

<sup>33</sup> Esemee Yesu o hamamee dili odoo oso diesono egeesee takaso, "Odoe heeso yimapoo nei tenee bele?" dee takaga meleeso.

<sup>34</sup> Esemee Yesuye dimapoo egeesee takaso, "Mo nei ee Godeeye goomoga goo talai goo oso. Osoloso yayo a diye diso, tou yayo amapoo tenee ee tomo dimeleso hoo poogoo mapoo hosudalame. <sup>35</sup> Niyo egeesee takeliso, 'a bakadio bakadio di poogoloso nei howo segei tala dileiso,' dee takeliso. Esino ayo nimapoo taka. Niba howo puo ogoloso nei howo segei † mapoo ege. Bei, epedee hagee nei telegee ee talai biame hagoso. <sup>36</sup> Esiga nei howo segei teli odoo oso dia tou eyo nei epedee hamapoo toso. Osoloso diayo odoo ee homokoko masi gooloogaloso tosibileso kookaiyo gie badeli talai mi mapoo mooloogoo mageliso, nei howo segeli odoo sabolo, osoloso nei howo segei teli odoo sabolo hodobo goomogalame. <sup>37</sup> Egeesi ma kulodu toso hagee takoo ee tei takooso, 'Odoe heeso nei howo segeliso. Osoloso see odoo heeso nei howo segei ee teliso.' <sup>38</sup> Esiga a niyo nei howo segele poogoo mi mapoo nei howo segei ee talame diye diso. Bei, mi omapoo odoo aboso daga tou toowa tooso. Esino see niyo dileso talaiso."

### Samaliya odooso tei too

<sup>39</sup> Samaliya soboso dileso o odoo mapoo takolone, "Goo susuga ayo moodoo ee yayo amapoo taka," dee takeme, Samaliya odoo susuga mi omapoo debeli oso to hagee duloso Yesu mapoo tei tooso. <sup>40</sup> Osoloso di-ayo sibileso Yesu mapoo egeesee takaso, "No epedee ibolo hodobo hamapoo badebee," diso. Esemee Yesu yo

† NEI HOWO SEGEI - Yesuye wudu taka hagee tei neidee eyo goo maga takele. Esino edebeeयो Godeeyo to tekepo takomo dilei goo sabolo, osoloso odoo Godee mapoo gilimado sibilei goo ee wudu taka.

biame bakadio dibolo hodobo omapoo badebeiso.

<sup>41</sup> Egeesi ma kulodu odoo susuga oso to yayo taka ee duloso yimapoo tei tooso. <sup>42</sup> Esemee diayo sobo omapoo egeesee takaso, "Nayo daga Yesuwo goo ee imapoo takeme, nee to duloso tei tooso. Esino iba epedee yayo takooga iso duloso tei toso. Esiga iba gooleedooso, odoo hagee mi odoo susuga dia gie badeli pidili odoo osodoo," diso.

<sup>43</sup> Egeesi ma kulodu Yesu eyo daga egeesee takaso, "Godee maga to toloso kokodo takomo sili odoo ee tei o moso bia oso goweliso," diso. Yesu biame bakadio Samaliya mi mapoo badoboso see Gelili mapoo diso.

<sup>45</sup> Osoloso yo Gelili mapoo sibileso peledoboome, edebeeयो yo ido diso. Bei, diba nosee Yesuye Yelusalem mapoo Gababia wo ne biame mapoo goo susuga yayo moodoo ee diba egeiga.

### Yesuye gamalee odoo eyo owolo tekepo pa

<sup>46</sup> Osoloso Yesu Gelili mi toowa omapoo badolone see Kana mi pepooko mapoo diso. Daga mi omapoo howodee ee see yayo wain i palame moodooso.

Biame omapoo Kapenyum mi mapoo gamalee odoo heeyo giso holo paiye badebeiso. <sup>47</sup> Esino gamalee odoo ogoso Yesuye Yudiya mi maga see Gelili mi mapoo simi goo ee duloso Yesu mapoo diso. Yo dileso howolone egeesee takaso, "Mo holo paiyeso talame badoso. Esiga nayo mo holo tekepo palame Kapenyum mi mapoo abolo sibe," dee takaso.

<sup>48</sup> Esino Yesuye yimapoo egeesee takaso, "Niyo ayo goo toowa opusomo di moodoo ee egelega poo-googa, amapoo tei talaime," dee takaso.

<sup>49</sup> Esemee odoo ogoso nei Yesu mapoo egeesee takaso, "Wiligi odoo, mo holo teyaga, nayo saga sibileso yo tekepo palame moodee," diso.

<sup>50</sup> Esino Yesuye yimapoo egeesee takaso, "No see wedi di. Nee holo wedileiso," diso.

Esemee odoo yo Yesuwo to duloso tei toloso see o mi mapoo wedi diso. <sup>51</sup> Osoloso yo see eli domopoo osee dimolome, o tou teli odoo oso sibileso yimapoo egeesee takaso, "Nee holo olo weidiloso badoso," dee takaso.

<sup>52</sup> Esemee odoo ogoso nei dimapoo egeesee takaso, "Osoko howo domo kamapoo molome, yo kekebisa ka koododiala?" diso. Esemee diayo nei yimapoo egeesee takaso, "Eiyo osoko olo wudu magoo mapoo ka koododia," diso.

<sup>53</sup> Esemee odoo yo gooleedoloso egeesee gooleebuguso, bei, eiyo osoko howo hedebe omapoo Yesuye yimapoo takolone, "nee holo weidileiso," dee taka goo ee goolee buguso. Esemee odoo susuga o moso kulodu debeli sabolo osoloso yibolo Yesu mapoo tei tooso.

<sup>54</sup> Esiga Yesuye Yudiya mi maga see Gelili mi mapoo sibileso goo toowa opusomo di moodoo hagoso olo bakadio diso.

**Yesuye Betesada howo sauwili ou mapoo odoo hee tekepo moodoo**

**5** Osoloso goo hagoso dileso koodobume, Yu odooso wo nali hee nalame Yelusalem mapoo polome, Yesu yinosee omapoo palaso. <sup>2</sup> Esiga Yelusalem mi beelee mapoo osulu hee Sipi Be Osulu deli meleeso. Osoloso ee ma kulodu howo sauwili dadabayo ou toowa meleeso. Howo sauwili dadabayo ou o hu ee Yu odoo dia toso takolone Betesada deliso. Osoloso howo ou pee mapoo hau pooba dee tiadoo egeesi meleeso. <sup>3</sup> Egeeseelone odoo paigiga sabolo, osoloso odoo howo neliga sabolo, osoloso odoo kido todobia sabolo, osoloso odoo su kakawa poogoo sabolo hau omapoo tieseliso. [Osoloso diba omapoo tiesamolone, biame abo mapoo Godeeyo momaiye heeso sibilesa howo egee wolabeleso bolone osee tiesameliso. Bei, momaiyeso howo wolomeleso koodobuoga, odoo daga malalo howo ee ma kulodu meili odoo ee tekepo peliso.] <sup>5</sup> Egeeseelone giso hee dugo 38 ee ma kulodu paiye melee onosee hau omapoo badebeiso. <sup>6</sup> Odoos daga yayo hoogoo pailoso badebei Yesuye ogoloso yimapoo egeesee takaso, "No see weidilei goomogolo?" dee takaso.

<sup>7</sup> Esemee odoo ogoso yimapoo nei egeesee takaso, "Wiligi odoo, howo weeleega, a pidilame ido meilei odoo hee me. Bei, a meilame seega, odoo heeso malalo meiliso," dee takaso.

<sup>8</sup> Esemee Yesuye yimapoo egeesee takaso, "No toboloso nee kida tolosa di," diso.

<sup>9</sup> Osoloso biame omapoo odoo egee see olo tekepo poloso o kida tolosa diso. Esino goo hagoso peledaba ee Yu odoo dia hasali biame omapoo ka peledaba.

<sup>10</sup> Esemee Yu odoo dia wiligi odoo tebisa oso odoo hagoso o kida tolosa di ee ogoloso yimapoo egeesee takaso, "Hasali biame hamapoo odoo heeso o kida tolosa dilei tei," dee takaso.

<sup>11</sup> Esemee odoo ogoso nei egeesee takaso, "Odoos a tekepo pa oso amapoo takolone, mo kida tolosa di, dee takeme a ka di," diso.

<sup>12</sup> Esemee diayo yimapoo nei egeesee takaso, "Odoos agayo namapoo takolone, nee kida tolosa di, dee ka takala?" dee takaso.

<sup>13</sup> Esino odoo yo tekepo pa ee yo medee kibiya gooleedele. Bei, odoo susuga oso diya mooloogoodeme, Yesu yo mooloogoodoo ee ma kulodu esiga-booosoo.

<sup>14</sup> See hamamee Yesuye odoo egee tei moso tegei ma kulodu badebei ogoloso yimapoo egeesee takaso, "No, no medee goolee, no epedee olo tekepo paso. Esiga no see goo tokenee na te. Nayo goo tokenee see tobu tomo siloga, goo tokenee toowa see namapoo peledebeyaga," dee takaso. <sup>15</sup> Esemee odoo ogoso dileso Yu odoo dia wiligi odoo dimapoo takolone egeesee takaso, "Yesuye a tekepo ka pa," diso.

<sup>16</sup> Egeesi ma kulodu Yesuye Yu odoo dia hasali biame mapoo goo hageesee teme, Yu odoo dia wiligi odoo tebisa oso komonolone yimapoo hegi goo tenelame

bei mooloogooosoo. <sup>17</sup> Esino Yesuye dimapoo egeesee takaso, "Mo Ma biame susuga tou tomoloso. Esiga anosee biame susuga tou ka tomoloso," diso.

<sup>18</sup> Yesuye to egeesee takeme, nei diayo yo wooloomalame diya goomogaso. Bei, yayo hedebe Yu odoo dia hasali biame ee gababile, esino yayo takolone, Godee yo tei Ama, dee taka goo omaga, eyo nediliyo yo Godee sabolo hodobo teiba neme.

**Godeeye kitulugu Owolo Yesu mapoo tenee**

<sup>19</sup> Esiga Yesuye Yu odoo dia wiligi odoo tebisa mapoo egeesee takaso, "Ayo nimapoo taka. Owolo ayo mawo goomoga goo hee talai tebile. Esino Owolo ayo hedebe Maye teli goo ee ogoloso anosee goo ee teliso. <sup>20</sup> Maye Owolo a diya sooloo dalaga, goo yayo teli susuga ee Owolo amapoo eligiliso. Esemee niyo Owolo ayo goo moodoo ee ogoloso hoowoolame, Maye amapoo goo diya toowa moodoolai eligileiso.

<sup>21</sup> Egeesi ma kulodu Maye odoo wedia hogogaduloso see gie badeli egee tenemolo, egeesee solone, Owolo ayo odoo mawo goomoga mapoo gie badeli ka tenemoloso. <sup>22</sup> Esiga Maye odoo goo koo midili. Esino yayo Owolo amapoo kitulugu olo teneeso, ayo odoo susuga dia goo ee midilame. <sup>23</sup> Egeesi ma kulodu Maye goo egee moodooso, odoo susuga oso Ma mapoo goomogolone o hu dokodoo poudalame. Osoloso diayo Owolo amapoo goomogolone mo hu onosee dokodoo ka poudalame. Esiga odoo agayo Owolo amapoo goomoga poudilega badoga, yo Ma Godee a diye di odoo mapoo goomoga koo poudoso.

<sup>24</sup> Esiga ayo nimapoo ka taka. Mo to duloso a diye di odoo mapoo tei teli odoo ee badoboso kookaiyo gie badeli olo tooso. Odoos egeesee seli ee o goo tokenee eyo nei talaime. Yo teli maga dagadileso see gie badeli mapoo badoso. <sup>25</sup> Esiga ayo nimapoo ka taka. Biame oso sibileiso, esino biame ee olo simiso, odoo tei tellega wedia oso Godeeyo Owolo mo to dulei. Egeesi ma kulodu edebeeyo mo to duloso tei toga, yo badoboso kookaiyo gie badeli talaiso. <sup>26</sup> Bei, Ma yo gie badeli eyo bei yoso. Esiga Owolo ayo gie badeli eyo bei doloso badalame, yayo kitulugu amapoo olo teneeso. <sup>27</sup> Osoloso Maye Owolo amapoo kitulugu olo teneeso, ayo odoo susuga dia goo ee midilame. Bei, a Odoos Holo.

<sup>28</sup> Esiga ayo taka to hagee duloso niba haga na dio di. Bei, biame oso sibileiso, odoo wedia dia bi mapoo egee tiesamoloo oso Odoos Holo mo to duloso dia bi maga hogogadileiso. <sup>29</sup> Egeesi ma kulodu goo tekepo tomo sili odoo diba badoboso gie badeli talame hogogadileiso. Esino goo tokenee tomo sili odoo diba dia goo tokenee eyo nei talame hogogadileiso. <sup>30</sup> Ayo goo mawo goolee ee tomo silei tebile. Bei, Ma a diye di oso goo midilei goo amapoo takooga, ayo goo egeesi ka midili. Esiga ayo goo midili ee diya tekepo. Bei, ayo mawo goomoga goo koo tomo sili. Esino ayo hedebe odoo a diye di oso goomoga goo ee ka tomo siloso.



### Yesuwo goo taka

<sup>31</sup> Esiga ayo hedebe mo goo maga takooga, ede-beeyo mo to mapoo tei talai goo eyo bei mauwe dalaiso. <sup>32</sup> Esino mo Maye mo goo maga takomoloso. Bei, a gooleedoo, yayo mo goo maga egee takoo, ee tei takooso.

<sup>33</sup> Esiga niyo odoo abo Yonee mapoo diye diso. E-eme yayo dimapoo tei goo takaso. <sup>34</sup> Esino edebeeyo mo goo maga tei goo egee takoo goo ee tei beleso, a medee koo gooleeso. Esino niyo gie badeli talame ayo goo susuga hagee nimapoo takaso. <sup>35</sup> Yonee yo keme masi gadeebugu nimapoo teneeso. Esiga niyo biame deiyepo ee ma kulodu gadeebugu sabolo dabalame diya goomogaso.

<sup>36</sup> Esiga Yoneeye mo goo maga tei goo takomo siliso. Esino tou ayo temeleso hosudalame Godeeye amapoo tenee oso Yoneeye mo goo takomo sili ee dagadiso. Bei, tou ayo tomo sili oso Maye a diye di goo ee ka eligiso. <sup>37</sup> Osoloso mo Maye a diye di oso mo goo maga tei goo ka takooso. Esino niyo to yayo taka ee dule, osoloso o mudu egele. <sup>38</sup> Esiga niba Godeeyo to duloso nibada sooloo ma kulodu tei koo teli. Bei, niyo Maye diye di odoo amapoo tei koo teli.

<sup>39</sup> Niyo Godeeyo to booka mapoo hogugu medee hesigaloso gooleedoloso dobolone, nei to oso nimapoo gie badeli tenelaiso doloso doso. Esino niyo to hesiga ee mo goo takeli. <sup>40</sup> Esino ayo nimapoo gie badeli tenelame seega, niyo amapoo sibilei koo goomegeli.

<sup>41</sup> Osoloso niyo see mo hu dokodoo poudilei, ayo haga koo gooleeso. <sup>42</sup> Bei, a gooleedooso, niyo nibada sooloo ma kulodu Godee goolee mauwe. <sup>43</sup> Esiga ayo mo Ma Godeeyo hu maga simiso. Esino niyo a koo goomogoso. Esino edebeeyo eyo goolee o hu maga siboga, niyo odoo egee goomogolone yo idiliso. <sup>44</sup> Esiga niyo wulo edebeeyo nibada hu dokodoo poudilei goomogolone debeliso. Esino Godee hedebe yayo nibada hu ono dokodoo poudalame, niyo ki koo kituluguli. Esiga niyo amapoo kasee tei talaiyo?

<sup>45</sup> Esiga ayo Mayo mudugiyopoo niba odoo tokenee dee takeeya dee na goolee. Niyo goolee, Moseseeye niba pidilei gooleeso. Esino yayo Mayo mudugiyopoo niba odoo tokenee dalaiso. <sup>46</sup> Egeesi ma kulodu niyo Moseseeye taka to mapoo tei too diepi, niba ayo taka to mapoo tei teliyo. Bei, Moseseeye mo goo ee Godeeyo to booka mapoo ka hogugu. <sup>47</sup> Esino niyo Moseseeye to hogugu mapoo tei telega ka doso. Esiga niyo to ayo hagee takoo mapoo kasee tei talaiyo?"

### Yesuye odoo 5000 mapoo nei pi

(Matiyu 14:13-21, Maka 6:30-44, Luka 9:10-17)

**6** Esemee goo hagoso dilesa koodobume, Yesu yo see Gelili abei hodiokoo du maga dalo soowaso. Gelili abei hageeyo hu hee ee Taibiliyes deliso. <sup>2</sup> Egeeseelone Yesuye goo toowa opusomo di moodoolone, odoo paigiga susuga tekepo moodoo demelee maga, odoo mooloogoodoo toowa oso goo

egee ogoloso yima hamamee mili diyadeeso. <sup>3</sup> Esemee Yesuye o hamamee dili odoo sabolo mubi ma dokodoo peleso debeiso. <sup>4</sup> Osoloso biame omapoo Yu odoo dia Gababia wo nali biame ee olo koola tabaso.

<sup>5</sup> Biame omapoo odoo mooloogoodoo toowa oso yimapoo sibadee ee ogoloso Yesuye Pilipi mapoo egeese takaso, "Iyo nei moleeso kamapoo toloso odoo susuga hamapoo ka pileiyo?" diso. <sup>6</sup> Esiga Yesuye odoo hagee bia dimapoo moodoolai goo ee yo olo gooleedoloso badolone, see wulo Pilipiye tei too ee agalame yimapoo egeesee ka taka.

<sup>7</sup> Esemee Pilipiye nei egeesee takaso, "Odoosusuga hagee bia dimapoo iyo nei toloso pilei ee, molee toowa kamapoo talaiyo? Bei, edebeeyo odoo susuga hagee bia nei pilame molee talame biame 200 ee ma kulodu tou toowa toga, molee oso odoo hedebe hedebe di mapoo wulo nei pepooko pilei tebileime," dee takaso.

<sup>8</sup> Esemee Yesu o hamamee dili odoo hee Saimon-Pitayo omolo Enduluye Yesu mapoo egeesee takaso, "Hagee ma kulodu giso holo heeso wo si dee tiadoo sabolo osoloso di bakadio sabolo toloso badoso. Esino nei pepooko hagoso odoo susuga ee pilei tebile," diso.

<sup>10</sup> Esemee Yesuye o hamamee dili odoo dimapoo egeesee takaso, "Odoosusuga hagee bia bulume doloso takee," diso. Mi omapoo obu bouwe meleso. Esemee odoo susuga go domo omapoo bulumaso. Egeesi ma kulodu hedebe gisowe hesiga ee 5000 egeesi tugodooso. <sup>11</sup> Esemee Yesuye wo si toloso Godee mapoo goomoga to takoloso, wo si popeiloso odoo susuga mapoo piso. Osoloso di bakadio toloso goo hedebe o egeesi moodooso. Esemee odoo susuga oso nei egee naloso diya edigasoo.

<sup>12</sup> Diba nei naloso oduguloso doboome, Yesuye o hamamee dili odoo dimapoo egeesee takaso, "Nei abo poogoo susuga ee misigamo di. Nei abo wulo gameenee peegeeyaga," diso. <sup>13</sup> Esemee wo si dee tiadoo odoo susuga oso naloso abo poogoo ee, Yesu o hamamee dili odoo oso misigamo dilesa bou tegei 12 egeesi metamagisaso.

<sup>14</sup> Odoosusuga oso Yesuye goo toowa opusomo di moodoo hagee ogoloso egeesee takaso, "Tei takoo, odoo hagee Godee maga to toloso kokodo takomo sili odoo iyo sibileiso doloso bolone debei odoo ee hagosodoo," dee takaga meleso. <sup>15</sup> Esemee Yesuye dia wiligi odoo tabalame, Yesu mapoo sibilesa seselame gooleemelee goo ee, yo olo gooleedooso. Esino Yesuye olo ogoloso diba poogoloso see obusomo mubi ma dokodoo palaso.

### Yesuye howo ma dokodooga di

(Matiyu 14:22-33, Maka 6:45-52)

<sup>16</sup> Olo habedee mapoo Yesu o hamamee dili odoo oso yo balame abei mapoo mouso. <sup>17</sup> Esino Yesu sibilega molome olo neligasoo. Esemee diba dia du mapoo toboloso Kapenyum mi mapoo dalo soowaso. <sup>18</sup> Diba sudaso olo sulugamo diyadaga molome, i toowa simi oso howo ki toowa simiso. <sup>19</sup> Diba eli sage 5 kilomita

egeesi diyadaga molome, Yesuye howo ma dokodooga dimapoo sibume egeiso. Esem diba diya obulone dio diso. <sup>20</sup> Esino Yesuye dimapoo egeesee takaso, "Niba haga na ebi. Ayo siba," diso. <sup>21</sup> Esem di-ayo goomoga sabolo yo dia du ma kulodu dabeegee diso. Egeesee semelee mapoo haga booloogelega mi diayo di omapoo peledoboloso dia du omapoo oluguso.

### Yesu yo wo gie badeli teneli

<sup>22</sup> Biame hee mapoo Yesuye nei pi odoo susuga oso du dali hedebe omapoo meilesa Yesu bameleeso, daga omapoo du hedebe meleega, diayo goolee Yesu omapoo badaba bele dolone. Bei, Yesu o hamamee dili odoo dibusomo daga malalo du egee toloso dime diayo egeiga. <sup>23</sup> Esem biame domo omapoo odoo du abo maga Taibilyes mi maga sibilesa odoo mooloo-goodo toowa oso debei mapoo peledabaso. Daga mi koola omapoo Yesuye Godee mapoo goomoga to takoloso odoo susuga mapoo nei piso. <sup>24</sup> Esino diayo omapoo egeino, Yesu sabolo o hamamee dili odoo sabolo me neme, see diayo du omaga Yesu esilame Kapeniyum mi mapoo soowaso.

<sup>25</sup> Diayo abei daloso Kapeniyum mi mapoo peledoboloso Yesu ogoloso yimapoo egeesee takaso, "Eligili odoo, no kopolone hamapoo ka simiyo?" dee takaso.

<sup>26</sup> Esem Yesuye nei egeesee takaso, "Ayo nimapoo taka. Niyo a esiamo simi egee, ayo goo toowa opusomo di moodoo ee egeiga, niyo a ka esiamo sibile. Esino niba ayo nei pime ne oso diya edigaga, niyo wulo a ka esiamo simidoo. <sup>27</sup> Esiga niba nei saga me pegeli egeesi haga na esiamo silesibe. Esino niba kookaiyo moloso osee meli nei ono ka esiamo silesibe. Odoo Holo ayo nei hagee nimapoo tenelaiso. Bei, Ma Godeeye Owolo ayo goo hagee talame amapoo kitulugu olo teneeso."

<sup>28</sup> Esem diayo nei egeesee takaso, "Godeeye iyo ogoo goo talame diya ka goomogosomo?" dee takaso.

<sup>29</sup> Esem Yesuye nei dimapoo egeesee takaso, "Godee yo goomogoso, yayo diye di odoo amapoo tei talame."

<sup>30</sup> Esem odoo mooloogoodoo oso yimapoo egeesee takaso, "Iyo namapoo tei talame, nayo ogoo goo toowa opusomo di ka moodolaiyo? Bei, Godeeye to booka mapoo hogugu oso takolone, ibada amawe dio oso miwe poogoo mi mapoo silesibume, Moseseeye Kei mi ma dokodooga wo mana deli † ee diayo nalame teneliso. Esiga Moseseeye ibada amawe dimapoo goo hagee moodooso. Esino iyo namapoo tei talame, nayo imapoo ogoo goo moodolaiyo?" dee takaso.

<sup>32</sup> Esem Yesuye nei dimapoo egeesee takaso, "Ayo nimapoo taka. Moseseeye nibada amawe dio mapoo Kei mi wo ee tenele. Esino mo Maye dimapoo wo egee ka tenele. Goo hedebe egeesi masi, yayo Kei mi ma

† Yu odooso dugo 40 ee ma kulodu miwe poogoo mi mapoo silesibume, Godeeye wo mana deli hagee diayo nalame teneliso. Mana deli hagee, wo masi heliye pepooko dooboo hadali.

dokodooga tei wodee ee nimapoo ka tenemoloso.

<sup>33</sup> Esiga Godeeye wo Kei mi ma dokodooga mi hamapoo sibeye dee taka ee aso. Bei, ayo mi odoo mapoo gie badeli ka tenemoloso."

<sup>34</sup> Esem nei diayo yimapoo egeesee takaso, "Wiligi odoo, biame susuga gie badeli wo egee nayo imapoo tenemelee," dee takaso.

<sup>35</sup> Esem Yesuye egeesee takaso, "Gie badeli teneli wo aso. Esiga odoo agayo amapoo siboga, yo see hodileime. Osoloso odoo agayo amapoo tei toga, yo see howo nala pagalaime. <sup>36</sup> Daga ayo nimapoo takolone, goo toowa opusomo di ayo moodoo ee niyo olo egeiso, dee takaso. Esino niba amapoo tei koo to. <sup>37</sup> Odoo mo Maye amapoo tenee oso amapoo sibileiso. Esiga dima kulodu odoo hee ayo peegoo habigileime. <sup>38</sup> Bei, ayo Kei mi ma dokodooga mi hamapoo simi egee, mawo goomoga goo ee talame ka sibile. Esino mo Ma, a diye di odoo oso goomoga goo ee talame ka simi. <sup>39</sup> Egeesi ma kulodu yayo goomoga goo ee hagoso. Odoo yayo amapoo tenee dima kulodu ayo hedebe osugobalai, yo koo goomogoso. Esino hamameedee biame mapoo ayo diba wedia maga see gie badeli talame hogogadileiso. <sup>40</sup> Bei, mo Ma yo goomogoso, odoo agayo Owolo a ogoloso amapoo tei toga, diba badoboso kookaiyo gie badeli talaiso. Osoloso hamameedee biame mapoo ayo diba wedia maga see hogogadileiso."

<sup>41</sup> Egeesee semelee biame omapoo Yesuye takolone, "A Kei mi ma dokodooga simi wo aso," dee takeme, Yu odoo oso duloso komonolone to boowaso. <sup>42</sup> Esem diayo egeesee takaso, "Odoo hagee Yosepeeyo owolo Yesuso. Esiga ama dio owee dio, iba gooleedoo. Esino yayo takolone, yo Kei mi maga simi, diso. Yayo kasalame egeesee ka takayo?" dee takaso.

<sup>43</sup> Esino Yesuye nei dimapoo egeesee takaso, "Nima kulodu to boowa egee molo omapoo koodobie. <sup>44</sup> Bei, edebeeyo eyo goolee amapoo sibileime. Esino Ma a diye di oso amapoo sibilame gi odoo oso amapoo sibileiso. Osoloso hamameedee biame mapoo ayo yo ta maga see hogadileiso. <sup>45</sup> Osoloso Godee maga to toloso kokodo takomo sili odoo heeso egeesee hoguguso, 'Godeeye odoo susuga eligileiso,' diso. Esiga odoo agayo Mayo to duloso yimaga goo gooleedoga, diayo amapoo sibileiso. <sup>46</sup> Odoo heeso Ma egele. Esino hedebe Ma Godee maga simi odoo ayo Ma egeiso. <sup>47</sup> Esiga ayo nimapoo taka. Amapoo tei too odoo yo olo badoboso kookaiyo gie badeli tooso. <sup>48</sup> Gie badeli teneli wo ee aso. <sup>49</sup> Esino nibada amawe dio oso miwe poogoo mi mapoo dobolone, wo mana deli ee nolone debeiso. Esino wo mana deli ee nali odoo egee bia olo wediaso. <sup>50</sup> Esino wo hagee Kei mi maga simi. Esiga wo hagee naga odoo egee bia wedileime. <sup>51</sup> Kei mi ma dokodooga simi gie badeli teneli wo ee aso. Esiga edebeeyo wo hagee naga, yo badoboso kookaiyo gie badalaiso. Osoloso wo ayo tenelai egee molo ee mo hwei, mi odoo oso gie badeli talame."

<sup>52</sup> Esemé Yu odooso to hagee duloso dima kulodu to boowoolone egeesee takaso, "Odoos hagoso o hwei iyo nalame kasee tenelaiyo?" dee takaso.

<sup>53</sup> Esemé Yesuye nei dimapoo egeesee takaso, "Ayo nimapoo taka. Niyo Odoos Holo mo sawo sabolo osoloso mo hwei sabolo nelega poogooga, niba gie badeli talaiame. <sup>54</sup> Esiga mo hwei sabolo osoloso mo sawo sabolo nali odoos, diba badoboso kookaiyo gie badeli talaiso. Osoloso hamameedee biame mapoo ayo diba wedia maga see hogogadileiso. <sup>55</sup> Mo hwei sabolo osoloso mo sawo ee tei nei dee oso. <sup>56</sup> Egeesi ma kulodu mo hwei sabolo osoloso mo sawo sabolo nali odoos oso abolo hedebe doloso ka badoso. Osoloso anosee dibolo hodobo badoso. <sup>57</sup> Esiga Ma a diye di oso gie badoga anosee ka badoso. Esiga mo hwei sabolo osoloso mo sawo sabolo nali odoos oso amaga gie badeli talaiso. <sup>58</sup> Egeesi ma kulodu a nibada amawe diayo namo silee wo egeesinee. Bei, diayo wo egee ne oso dimapoo gie badeli tenele. Esino a Kei mi ma dokodoga simi wo tei aso. Esiga edebeeyo wo hagee naga, diba badoboso kookaiyo gie badalaiso."

<sup>59</sup> Yesuye Kapeniyum mapoo howo gisili moso ma kulodu odoos susuga mapoo eligilone goo susuga egeesee ka taka.

#### Yesuwo to ee gie badeli teneli

<sup>60</sup> Esino Yesu yo deede silesibili odoos oso Yesuye eligi goo ee duloso egeesee takaso, "Eligi goo hagee diya koudadoo. Odoos agayo to hagee talai ka teibayo?" dee takaso.

<sup>61</sup> Egeesi ma kulodu Yesu yo deede silesibili odoos oso dima kulodu to boowoogamelee ee gooleedoloso dimapoo egeesee takaso, "Goo ayo hagee takoo oso nimapoo dala teneedo? <sup>62</sup> Goo hagoso nimapoo dala teneega, niyo Odoos Holo ayo see Kei mi ma dokodoo wedi pala ogoloso kasee goolaisomo? <sup>63</sup> Dio Tei oso gie badeli ka tenemoloso. Esino suso goomoga goo oso gie badeli koo tenemoloso. To ayo nimapoo taka ee Dio Tei maga simi, esiga to oso gie badeli ka tenemoloso."

<sup>64</sup> Yesu yo daga malalo olo gooleedoos, yimapoo tei telega pagalai odoos ee. Osoloso yo tolosa ha teli odoos mapoo tiasalai odoos onosee yo olo gooleedoos. Esiga yayo dimapoo egeesee takaso, "Odoos abo nima kulodu egee do amapoo tei koo toso. <sup>65</sup> Goo egeesi maga ayo to hagee nimapoo olo takaso, 'Edebeeyo eyo goolee amapoo sibileime. Esino Maye amapoo sibilame kitulugu tenee odoos oso amapoo sibileiso,' dee takooso."

<sup>66</sup> Yesuye to hagee taka koodobume, yo deede silesibili odoos aboso yo deede silei gowoolone yo poogo diso.

<sup>67</sup> Esemé Yesuye o hamamee dili odoos 12 mapoo egeesee takaso, "Niba nosee a poogoos dilei goomogoso?" dee takaso.

<sup>68</sup> Esemé Saimon-Pitaye nei egeesee takaso, "Lodee, iba odoos ugu mapoo dileiyo? Hedebe nee to oso gie badeli ka tenemoloso. <sup>69</sup> Esiga iyo namapoo tei toso.

Osoloso iba gooleedoos, no tei odoos Godee maga simi oso," diso.

<sup>70</sup> Esemé Yesuye nei dimapoo egeesee takaso, "Ayo odoos 12 niba olo hudi magoos. Esino nima kulodu odoos hedebe Saiteneeyo tou teli odoos badoso." <sup>71</sup> Esiga Yesuye to hageesee taka egee, Saimon-Iskaliyot eyo owolo Yudas eyo goo ee taka. Bei, Yudas yinosee Yesuwo hamamee dili odoos 12 ee ma kulodu badeli. Esino yayo hamamee Yesu ha teli odoos mapoo tiasalaiso.

#### Yesuwo omolo dio oso yimapoo tei tele poogoos

<sup>7</sup> Esiga goo hagoso dileso koodobume, Yesu yo Yudiya mi mapoo silei gowoolone, see Gelili mi mapoo dileso siliso. Bei, Yudiya mi omapoo Yu odoos dia wiligi odoos oso Yesu wooloomalame eli esiamo siliso. <sup>2</sup> Osoloso Yu odoos dia Waseme moso maga wo nalai biame † olo koola tabaso. <sup>3</sup> Esemé Yesuwo omolo dio oso yimapoo egeesee takaso, "No mi hagee poogoloso see Yudiya mi mapoo di, no deede silesibili odoos oso nayo goo toowa opusomo di moodooga ee agalame. <sup>4</sup> Bei, edebeeyo o goo ee odoos susuga oso gooleedalai goomogoga, yo goo mada koo moodoomo siliya. Esiga no goo toowa opusomo di medee woola moodoomo sile, odoos susuga oso nee goo ee ogoloso gooleedalame," diso. <sup>5</sup> Goo egeesi ma kulodu Yesuwo omolo dio oso yimapoo tei telega debeiso.

<sup>6</sup> Esemé Yesuye nei dimapoo egeesee takaso, "Ayo Yelusalem mapoo dilei biame koo tugodo. Esino niba dilei goomogoga, wulo biame hee mapoo dilei tekepo. <sup>7</sup> Mi odoos oso niba hegilei eyo bei me. Esino diayo a hegiliso. Bei, ayo dia goo tokenee ee woola yilige buguga. <sup>8</sup> Esiga niba wo ne mapoo diyadee. Esino a dileime. Bei, mo biame tugodelega." <sup>9</sup> Yesuye egeesee takoloso Gelili mi mapoo badebeiso.

#### Waseme moso maga wo ne biame mapoo Yesuye odoos mapoo eligi

<sup>10</sup> Yesuwo omolo dio oso Waseme moso maga wo nalame Yelusalem mapoo paladee neme, Yesu yinosee hamamee palaso. Esino odoos howo woola palai gowoolone mada palaso. <sup>11</sup> Osoloso wo ne ee ma kulodu Yu odoos dia wiligi odoos oso Yesu esilone egeesee takaso, "Yesu kasomo?" dee takaso.

<sup>12</sup> Esemé odoos mooloogoodoo toowa oso mada dima kulodu Yesuwo goo maga mada takomo silesibulone, odoos aboso egeesee takaso, "Yesu odoos tekepo," dee takaso. Esino odoos aboso takolone, "Haye, yo wulo gamenee goo maga odoos peegoo ka gilimado du," dee takaso. <sup>13</sup> Esino Yu odoos dia wiligi odoos bolo obulone, diayo Yesuwo goo maga to woola takele.

† Yu odoos dia amawe diayo miwe poogoos mi mapoo dobolone, dugoso moso tegegaloso omapoo debeliso. Biame ee goolone, Yu odoos Waseme moso maga wo nali biame mapoo homo deeso waseme moso tegegaloso omapoo debeliso. Osoloso Yu odoos dia wo nali hagee sabolo osoloso abo ee Yelusalem mapoo naliso.

<sup>14</sup> Osoloso wo ne olo domo taba mapoo, Yesuye tei moso mapoo peleso Godeeyo to eligilame bei mooloo-gooso. <sup>15</sup> Esemé Yu odoo oso yayo eligi goo ee duloso diya howogadolone diayo egeesee takaso, "Odoó hagee kasi maga Godeeyo to susuga ka gooleedoowo? Bei, yo Godeeyo to gooleedeli sukulu mapoo dile," dee takaso.

<sup>16</sup> Esemé Yesuye nei dimapoo egeesee takaso, "Ayo hagee eligi wulo mawo goolee koo eligili. Esino a diye di Godee maga simi goo ee eligili. <sup>17</sup> Esiga Godeeye goomoga goo ee talame goomoga odoo oso ayo eligi goo hagee tei Godee maga simidoo doloso gooleedalaiso. Osoloso ayo mawo goolee koo eligili goo onosee gooleedalaiso. <sup>18</sup> Edebeeyo eyo goolee eligimo siloga, yo o hu eyo nediliyo doko topoloso. Esino edebeeyo yo diye di odoo oso goolee ee eligimo siloga, yo diye di odoo eyo hu ee doko topoloso. Esiga yo tei goo takeli, osoloso yo gamenee koo takeli.

<sup>19</sup> Moseseeye nimapoo tei magoo hogugu ee teneeso. Esino niba susuga tei magoo hagee koo dedeli. Esiga kasi maga niyo a wooloomalame ka sala?"

<sup>20</sup> Esemé odoo mooloogoodoo oso nei yimapoo egeesee takaso, "Bo holoso nama kulodu palaga, no to egeesee ka takoo. Iba no wooloomalame koo seeso," diso.

<sup>21</sup> Esino Yesuye dimapoo nei egeesee takaso, "Niyo hasali biame mapoo ayo goo toowa opusomo di hedebe moodoo ogoloso niba susuga dio diso.

<sup>22</sup> Egeesi ma kulodu niba noseé Moseseeye tei magoo ee dodolone niyo hasali biame mapoo tou teliso. Bei, niyo Moseseeye tei magoo ee dodolone holope kolo kweliso. Esino holope kolo koolame tei magoo hagee Moseseeye magele. Esino nibada amawe diayo ka magoo. <sup>23</sup> Esiga Moseseeye tei magoo gababiyaga hasali biame mapoo niyo holope kolo kweliso. Esino niyo kaseega ayo niyo hasali biame mapoo odoo paiye tekepo moodooga niyo amapoo ka komonowala? <sup>24</sup> Esiga niyo wulo edebeeyo o suso goo moodoo ee ogoloso saga na midi. Esino tei goodee maga niyo o goo ka midi."

### Yesu tei Kelisowo?

<sup>25</sup> Osoloso Yesuye to taka hagee duloso, Yelusalem odoo aboso dieso nediliyo egeesee takaso, "Odoó hagee ibada wiligi odoo oso wooloomalaigo dee takemeni osobebe? <sup>26</sup> Niba ege, yayo odoo susuga eyo howo woola eligime, odoo heeso yimapoo to hee koo takooso. Esiga ibada wiligi odoo oso goolee yo tei Keliso goolee malaiso. <sup>27</sup> Esiga Kelisoye siboga, mi yayo simi ee odoo heeso gooleedalaimé. Esino mi Yesuye simi ee iba gooleedooso," diso.

<sup>28</sup> Esemé Yesuye tei moso mapoo osee eligilone toso neligidi egeesee takaso, "O. Tei takoo. Mo goo sabolo osoloso ayo simi mi sabolo niba olo gooleedoodoo. Esino a mawo goolee maga sibilesó hamapoo koo badoso. Haye, a diye di odoo eyo goo ee tei, esino niba yo gooleedele. <sup>29</sup> Esino hebebe ayo yo ka gooleedoo.

Bei, a yimaga simi osoloso yayo a nimapoo sibeye diso."

<sup>30</sup> Esemé biame omapoo wiligi odoo diba goomogaso, Yesu omapoo talame. Esino odoo heeso yimapoo goo hee moodele. Bei, o biame tugodelega. <sup>31</sup> Esino odoo mooloogoodoo ee ma kulodu odoo aboso Yesu mapoo tei tolone egeesee takaso, "Odoó heeso sibilesó goo toowa opusomo di moodooga, goo toowa opusomo di Yesuye moodoo hagee dagadileime. Esiga Yesu hagee tei iyo hagee bamolo Keliso oso," dee takaso.

<sup>32</sup> Esiga odoo mooloogoodoo oso Yesuwo goo maga taka ee Pelisi odoo oso duso. Esiga Pelisi odoo egee bia sabolo osoloso tei moso wiligi odoo tebisa oso tei moso gidebeli odoo diye diso, diayo dilesó Yesu talame.

<sup>33</sup> Yesuye see odoo mapoo takolone egeesee takaso, "A biame deiyepo hamapoo nibolo hodobo badalaiso. Osoloso a diye di odoo mapoo see wedi dileiso. <sup>34</sup> Niyo a esileiso. Esino niyo a agalaimé. Bei, ayo badalai mi omapoo sibilei niba tebileime," diso.

<sup>35</sup> Esemé Yu odooso dieso nediliyo dima kulodu egeesee takaga meleeso, "Yo kamapoo duga iyo yo egelega ka pagalaiyo? Yo ibada odoo abo Guliki odooso debeli mi mapoo egee do mapoo dilesó Guliki odoo mapoo Godeeyo to eligilame ka sabele. <sup>36</sup> Osoloso yayo imapoo takolone, iyo yo esileiso, esino iyo yo agalaimé. Osoloso, yayo badalai mi omapoo sibilei iba tebileime, dee taka eyo bei ogoobo?" dee takemeleeso.

### Gie badeli teneli howo

<sup>37</sup> Esiga Waseme moso maga wo ne hamameedee biame egee goo toowa. Osoloso biame omapoo Yesuye toboloso to neligidi egeesee takaso, "Odoó agayo howo ka na poogoosomo, yo amapoo howo nala sibeye dee. <sup>38</sup> Osoloso Godeeyo to booka mapoo hogugu oso egeesee takooso, 'Edebeeyo amapoo tei toga, gie badeli teneli howo oso yima kuloduga gasibileiso.'"

<sup>39</sup> Esiga Yesuye goo taka hagee, yimapoo tei too odoo mapoo Dio Tei tenelai goo ee takolone egeesee ka taka. Esino epedee omapoo Dio Tei dimapoo tenele. Bei, Yesu yo Ama mapoo pelega.

<sup>40</sup> Esiga odoo mooloogoodoo ee ma kuloduga odoo aboso Yesuye taka to ee duloso egeesee takaso, "Odoó hagee tei Godee maga to tolosó kokodo takomo sili odoo sibabelesó iyo bamelee osodoo," dee takaga meleeso.

<sup>41</sup> Esemé odoo aboso egeesee takaso, "Yo Keliso," dee takemeleeso. Esino aboso egeesee takaso, "Haye, yo Kelisonee. Bei, Keliso yo Gelili mi maga sibileime.

<sup>42</sup> Bei, Godeeyo to booka mapoo hogugu oso egeesee takooso, 'Keliso yo Deibidiyo amawe dio dima kuloduga sibileiso. Osoloso yo Deibidiye badebei mi Betilihem mapoo soomagalaiso,' diso," dee takaso.

<sup>43</sup> Egeeseelone Yesuwo goo maga odoo abo puloso debeiso. <sup>44</sup> Osoloso odoo aboso Yesu talame goomogaso. Esino odoo heeso yimapoo goo hee moodele.

**Yu odoo dia wiligi odoo tebisa oso tei tele poogoo**

<sup>45</sup> Esem epedee omapoo tei moso gidebeli odoo oso see mosoowe wedi simi ogoloso, tei moso wiligi odoo tebisa sabolo, osoloso Pelisi odoo oso dimapoo egeesee takaso, "Bei kaseme niyo Yesu hamapoo ido sibilega ka poogoowo?" diso.

<sup>46</sup> Esem diayo nei egeesee takaso, "Daga odoo heeso to Yesuye keli egeesee koo keli," dee takaso.

<sup>47</sup> Esem Pelisi odooso nei dimapoo egeesee takaso, "Niba nose see yayo eligi goo oso peegoo gilimado diso-mo? <sup>48</sup> Esino Pelisi odoo ima kulodu osoloso ibada wiligi odoo dima kulodu odoo heeso yimapoo tei too niyo egeisomo? Haye. <sup>49</sup> Esino odoo mooloogoodoo hagee ma kulodu, odoo aboso Moseseeye tei magoo goo ee kibiya gooleedelega tei tooso. Esiga diba Godeeyo kamana ma hemidu doso."

<sup>50</sup> Esiga dima kulodu Pelisi odoo hee badebeiso, o hu Nikodimas. Daga yayo gesi Yesu agalame diso. Esiga yayo dimapoo egeesee takaso, <sup>51</sup> "Moseseeye tei magoo ee dodolone iyo daga odoo o goo midilega, wulo o tokenee eyo nei tenelai ee tekeponee," diso.

<sup>52</sup> Esem Pelisi odoo abo sabolo osoloso wiligi odoo tebisa oso yimapoo egeesee takaso, "Nonosee Gelili odoowo? No Godeeyo to booka mapoo hogugu ee medee hesigaloso gooleede. Bei, Godeeyo toso egeesee takooso, Godee maga to toloso kokodo takom sili odoo ee Gelili mi maga sibileime."

[ <sup>53</sup> Osoloso to kesamelee omapoo koodobuloso odoo susuga dia mosopoo diyadeeso.

**Kooka soboso adaba giso goo heli too Yesu mapoo ido simi**

**8** Esino Yesu Olipi mubi ma dokodoo palaso. <sup>2</sup> Osoloso gesikolodee Yesu yo tei moso mapoo wedi sibilesa badoboome, odoo susuga oso yimapoo simiso. Esem yayo omapoo badolone odoo eligimeleeso.

<sup>3</sup> Esem domo omapoo tei eligili odoo sabolo, osoloso Pelisi odoo oso kooka sobo heeso adaba giso goo heli too ee ogoloso, diayo yo ido sibilesa odoo howo woola tebediso. <sup>4</sup> Esem diayo Yesu mapoo egeesee takaso, "Eligili odoo, kooka sobo hagosu adaba giso goo heli tomo sileeme ogoloso yo hamapoo ka ido simi. <sup>5</sup> Moseseeye tei magoo hogugu oso egeesee takaso, 'Sobo heeso goo hageesee toga, yo yoso enigameleso wooloome,' dee takooso. Esiga nayo imapoo takee, iyo sobo hamapoo goo kasee moodoolaisomo?" dee takaso. <sup>6</sup> Goo egeesi maga Yesuye to tokenee takooga ka midilame, diayo yo kukolo egeiso †.

† *Biame omapoo Yu odoo oso tei magoo bakadio ee dodolone debeiso. Moseseeye tei magoo hogugu oso egeesee takaso, "Sobo heeso goo hageesee toga, yo yoso enigameleso wooloome," dee takooso. Esino Loum gamalee eyo tei magoo hogugu oso egeesee takaso, "Goo ee tei." Yesuye takolone, sobo egee wooloome, dee takooga, yayo Loum gamalee eyo tei magoo ee gababileiso. Esino*

Esino Yesu miyomoo gauwuloso dee woluguso mi mapoo hogugu meleeso. <sup>7</sup> Esino diayo yimapoo osee woosa molome, Yesu yo toboloso dimapoo egeesee takaso, "Esiga nima kulodu odoo hee goo tokenee koo teli daga, odoo ogoso malalo sobo omapoo yoso ka enige," diso. <sup>8</sup> Osoloso Yesu see tobu miyomoo gauwuloso dee woluguso mi mapoo hogugu meleeso.

<sup>9</sup> Esem odoo susuga sobo egee ido simi oso Yesuwo to duloso obulone, daga adaga dimaga bei mooloogooloso hedebe du, hedebe du diso. Osoloso odoo susuga olo poogoo dulone, hedebe Yesu dio sobo egee dio omapoo poogooso. <sup>10</sup> Esem Yesuye toboloso sobo mapoo egeesee takaso, "Sobo, no goweli odoo hamapoo debei ee kasomo? Odoo hee nee tokenee eyo nei namapoo dala tenelai hedebe badolo?" dee takaso.

<sup>11</sup> Esem sobo ogoso nei Yesu mapoo egeesee takaso, "Wiligi odoo, haye, odoo hee medoo," diso.

Esem Yesuye yimapoo egeesee takaso, "Anosee nee tokenee eyo nei ayo namapoo dala tenelaime. Esiga no di. Esino no tokenee see tobu na te," dee takaso.]

**Yesu mipoo hageeyo gadeebugu**

<sup>12</sup> Esem Yesuye odoo mooloogoodoo mapoo see egeesee takaso, "Mipoo hageeyo gadeebugu ee aso. Esiga a dodomo sili odoo yo neliga ma kulodu sileime. Esino yo gie badeli talai eligili gadeebugu ee talaiso," dee takaso.

<sup>13</sup> Esem odoo mooloogoodoo ee ma kuloduga Pelisi odooso nei egeesee takaso, "No wulo nee goo ee takomolo. Esiga nayo egee takoo goo ee iba tei koo toso," dee takaso.

<sup>14</sup> Esem Yesuye nei dimapoo egeesee takaso, "O. Tei takoo. A mo goo ee takooso. Esino ayo hagee takoo tei goo taka. Bei, ayo simi mi ee a gooleedoo. Osoloso ayo dileso badalai mi onosee a gooleedoo. Esino ayo simi mi sabolo, osoloso ayo dileso badalai mi ee, niba gooleede. <sup>15</sup> Esiga mi odoo dia goo ee dodolone, niyo emegei dia goo ee midiliso. Esino ayo emegei dia goo ee koo midili. <sup>16</sup> Esino ayo emegei dia goo midilei gooleega, ayo medee tei goo maga dia goo midileiso. Bei, ayo mobusomo koo midili. Esino mo Ma a diye di sabolo goo ka midili. <sup>17</sup> Esiga Moseseeye tei magoo hogugu oso egeesee takooso, 'Goo hedebe mapoo odoo bakadio oso to hedebe onosee takooga, diayo egee takoo ee tei goo takooso,' deliso. <sup>18</sup> Esiga anosee tei magoo egee dodolone mawo nediliyo mo goo maga tei goo takooso. Osoloso mo Ma a diye di oso mo goo maga tei goo takeliso."

<sup>19</sup> Esem Pelisi odooso nei yimapoo egeesee takaso, "Nama kasomo?" diso. Esino Yesuye dimapoo egeesee takaso, "Mo Ma sabolo osoloso a, niba gooleede. Niba a gooleedoo diepi, mo Ma nose niba gooleedeliyo," dee takaso.

<sup>20</sup> Yesuye tei moso ma kulodu emegei di molee tenee mageli koola omapoo tobodulone, goo susuga hagee yayo takolone, sobo egee na wooloome, dee takooga, yayo Moseseeye tei magoo ee gababileiso.

eligimeleeso. Esino odoos heeso yo tele. Bei, o biame tugodelega.

### Yesu eyo o goo taka

<sup>21</sup> Esemé Yesuye see dimapoo egeesee takaso, “Ayo peegoo duga, niyo a esileiso. Esino niba goo tokenee ma kulodu dobolone, nibada goo tokenee hapelega poogoloso wedileiso. Osoloso ayo badalai mi omapoo sibilei, niba tebileime,” dee takaso.

<sup>22</sup> Esino Yu odoos oso egeesee takaso, “Bei kasi maga Yesuye takolone, yayo badalai mi omapoo sibilei, iba tebileime, dee ka takayo? Iba gooleedele, Yesu eyo nediliyo wooloomalame ka sabele,” diso.

<sup>23</sup> Esemé Yesuye dia to duloso nei egeesee takaso, “Niba mipoo hamapoo debeli odoos. Esino a Kei mi ma dokodooga simi. Esiga niba mi odoos. Esino a mi odoonee. <sup>24</sup> Goo egeesi maga ayo nimapoo takolone, nibada goo tokenee hapelega poogoloso wedileiso, dee ka taka. Bei, ayo mo goo † maga taka mapoo niyo tei telega poogooga, niba nibada goo tokenee hapelega poogoloso wedileiso.”

<sup>25</sup> Esemé diayo nei egeesee takaso, “No odoos ogu-mo?” diso. Esemé Yesuye nei dimapoo egeesee takaso, “Ayo nimapoo eligi bei mooloogooloso abaga simino epedee hamapoo mo goo nimapoo olo eligiso. <sup>26</sup> Esiga ayo nimapoo tokenee odoos dee takalai goo bei moloso. Esino a diye di odoos oso takeme du goo ono ayo odoos mapoo ka takomo sili. Bei, yo tei goo takeli.”

<sup>27</sup> Egeesi ma kulodu Yesuye amamo goo takano, Yu odoos duloso medee kibiya gooleedele. <sup>28</sup> Esemé Yesuye see dimapoo egeesee takaso, “Niyo Odoos Holo a tolosos dokodoo poudoga ††, omapoo niyo mo goo ee medee kibiya gooleedalaiso. Osoloso ayo mawo goomoga goo koo tomo sili goo onosee niba gooleedalaiso. Bei, mo Maye amapoo taka goo hedebe ee ayo ka eligimo sili. <sup>29</sup> Esiga a diye di odoos ee abolo hodobo badosos. Yo a koo poogoo dili. Bei, ayo hedebe yo goomogalai goo ono tomo sili.” <sup>30</sup> Esiga Yesuye goo hagee takeme, odoos susuga yimapoo tei toosos.

### Tei goo oso odoos tokenee ma kuloduga peegoo gilimado dili

<sup>31</sup> Esemé Yesuye Yu odoos yimapoo tei telaga odoos mapoo egeesee takaso, “Niyo ayo eligi goo hamapoo medee kibiya kookoodolosos dodomos silesiboga, niba tei mo hamamee dili odoos dalaisos. <sup>32</sup> Esiga niba tei goo ee gooleedalaisos. Osoloso tei goo oso niba nei mauwe tou teli goo maga peegoo gilimado dileisos.”

<sup>33</sup> Esemé diayo Yesu mapoo egeesee takaso, “Eibalahameeyo amawe dio ibasos. Esiga iba odoos heeso wiligi dolosos badoboome, hegi goo ma kulodu nei mauwe o tou tolone ka debele. Bei kasi maga nayo imapoo

takolone, ‘hegi goo ma kuloduga puo pagalaisos,’ dee ka takala?”

<sup>34</sup> Esemé Yesuye nei dimapoo egeesee takaso, “Ayo nimapoo taka. Edebeeyo goo tokenee tolone badoga, yo goo tokeneeso wiligi dolosos ka badosos. <sup>35</sup> Esiga nei mauwe tou teli odoos ee o wiligi odoos eyo soosoo sabolo kookaiyo osee koo badeli. Esino owoloye o soosoo sabolo kookaiyo osee badeliso. <sup>36</sup> Esiga Owolo ayo niba tokenee goo ma kuloduga puo poogooga, niba tokenee goo ma kuloduga tei olo puo pagalaisos.

<sup>37</sup> A gooleedoosos, niba Eibalahameeyo amawe dios. Esino niyo a wooloomalame ka goomogosos. Bei, ayo eligi goo ee nima kulodu malai, niba koo goomogosos. <sup>38</sup> Mo Maye goo amapoo eligi ee ayo nimapoo ka takomo silosos. Esino niba nosee nibada amaye takeme du goo ee tomo silesibosos.”

<sup>39</sup> Esemé diayo nei Yesu mapoo egeesee takaso, “Ibada ama ee Eibalaham,” diso.

Esemé Yesuye nei dimapoo egeesee takaso, “Niba tei Eibalahameeyo owolos dio diepi, niyo goo Eibalahameeyo moodoo egeesee moodoolone debeli. <sup>40</sup> Esino tei goo Godeeye amapoo tenee ee ayo takomos sileeme, niyo a wooloomalame seesos. Esino Eibalaham goo egeesi moodele. <sup>41</sup> Esiga goo nibada amaye moodoo hedebe onosee niyo ka moodoomo silosos.”

Esemé diayo Yesu mapoo egeesee takaso, “Iba giba holonee. Esino ibada Amadee ee hedebe Godeesos,” dee takaso.

<sup>42</sup> Esemé Yesuye nei dimapoo egeesee takaso, “Godee tei nibada Ama diepi, a niyo diya goolee sabolo debeliyo. Bei, a Godee maga siblesos hamapoo ka badosos. Yayo a diye diso. Esiga a mawo goolee siblesos hamapoo koo badosos. <sup>43</sup> Niba kasi maga goo ayo taka ee duloso gooleedelega ka dabala? Niba goo ayo eligi ee dulei gowoolone ka seesos. <sup>44</sup> Esiga nibada ama ee Saiten. Esiga niyo o goo ogolosos yayo goomoga goo ee talame diya goomegelisos. Bei, bei mooloogoo biame maga epedee hamapoo sibulone yo odoos wooloomali dolosos badebeisos. Osoloso yo gamenee takeli odoos. Bei, yima kulodu tei goo takeli me. Osolosos yayo gamenee takooga, yayo wulos o goo ee takeli. Bei, yo gamenee takeli odoos. Osolosos gamenee takeli eyo bei yosos. <sup>45</sup> Esino ayo nimapoo tei goo take-lisos. Goo egeesi maga niyo mo to mapoo tei koo teli. <sup>46</sup> Esiga goo tokenee ayo moodoo ee niyo egeisomos? Haye, me. Ayo tei goo takomos silinos, niyo kaseega mo to mapoo tei tele ka pagala? <sup>47</sup> Godeeyo odoos oso o to duloso omapoo mesimos silesibilisos. Esino niba Godeeyo odoonee. Esiga goo egeesi maga niba o to duloso omapoo mesilega ka poogoosos.”

### Yesuye Eibalaham dagadi

<sup>48</sup> Esemé Yu odoos nei Yesu mapoo egeesee takaso, “Iyo namapoo takolone no Samaliya odoos bo holo pala, dee takemeni ee tei taka.”

<sup>49</sup> Esemé Yesuye nei dimapoo egeesee takaso, “Mo kulodu bo holo koo badosos. Esino ayo mo Mayo hu dokodoo poudilisos. Esino niyo abolo takolone mo hu

† Godeeyo to Guliki odoos dia toso hogugu mapoo Yesuye takolone, yo aso, dee taka egee yo Keliso, Godeeye hesia dolone ka taka. †† Yesuye taka hageeyo bei ee, yo homo bulubo magoo ma dokodoo yogusos enigalosos poudulosos tulugilei ee taka.

dokodoo poudilega pegeliso. <sup>50</sup> Esiga edebeeyo mo hu dokodoo poudalame ayo goo hagee koo tomo siloso. Esino odoo heeso diya goomogoso, edebeeyo mo hu dokodoo poudalame. Yo goo midili odoo. <sup>51</sup> Esiga ayo nimapoo tei goo taka. Odoo agayo mo to mapoo mesimo siloga, yo talaime."

<sup>52</sup> Esemé Yu odooso Yesu mapoo egeesee takaso, "Iba epedee olo gooleedo, no tei nee kulodu bo holo bado. Bei, nayo daga egeesee takaso, 'odoo agayo nee to mapoo mesimo siloga, yo talaime,' diso. Esino ibada amawe Eibalaham dio osoloso Godee maga to toloso kokodo takomo silesibili odoo diba olo wediaso. <sup>53</sup> Esiga ibada amawe Eibalaham ee nayo dagadi doloso ka takala? Bei, ibada amawe Eibalaham olo taso, osoloso Godee maga to toloso kokodo takomo silesibili odoo onosee olo wediaso. Egeesi ma kulodu nayo goolee no odoo ogu gweliyo?" dee takaso.

<sup>54</sup> Esemé Yesuye nei dimapoo egeesee takaso, "Ayo goo tomo sili hagee mo hu dokodoo poudalame ka tomo sili diepi, goo hagee bei mauwe meliyo. Esino mo Maye mo hu dokodoo ka poudomoloso. Yo niyo takolone nibada Godee deliso. <sup>55</sup> Esino niba yo gooleede. Esino ayo yo ka gooleedoo. Esino ayo takolone, 'a o goo gooleede,' dee takeli diepi, a gamenee takeli odoo niba egeesi masi badeliyo. Esino a o goo gooleedoo, osoloso a to yayo taka mapoo mesimo siliso. <sup>56</sup> Esiga nibada amawe Eibalaham goomogaso, ayo mipoo hamapoo simi ee agalame. Osoloso a olo sibume, yayo ogoloso diya goomogaso."

<sup>57</sup> Esemé Yu odooso nei yimapoo egeesee takaso, "No dugo 50 tugodele. Esino nayo takolone, no Eibalaham olo egeiso, dee ka takala?"

<sup>58</sup> Esemé Yesuye nei dimapoo egeesee takaso, "Ayo tei goo nimapoo ka taka. Bei, Eibalaham soomagelega badoboome, daga a olo badebeiso." <sup>59</sup> Yesuye egeesee taka duloso diayo komonolone, yo toloso enigilame sino poogooso. Esemé Yesu mada wua moloso tei moso ma kuloduga peegoo diso.

### Yesuye odoo howo neliga osee soomagoo ee tekepo pa

**9** Esiga Yesu yo dulone odoo hee egeiso. Odoo egee oweeye soomagolone howo neliga o egeesi soomagoona. <sup>2</sup> Esemé Yesu o hamamee dili odoo oso Yesu mapoo egeesee takaso, "Eligili odoo, odoo agamo goo tokenee oso yo howo neliga egeesee ka soomagoowo? O goo tokenee oso egeesee ka soomagoowo, o owee dio ama dio eyo goo tokenee maga howo neliga egeesee ka soomagoowo?" dee takaso.

<sup>3</sup> Esemé Yesuye egeesee takaso, "Odoo howo neliga hagee o goo tokenee oso egeesee ka sele, osoloso ama dio owee dio eyo goo tokenee oso egeesee ka sele. Esino odoo howo neliga soomagoo goo eyo bei ee egeesi moloso. Godeeye kitulugu goo ee yimaga woola yilige bigilame, yo howo neliga egeesee ka soomagoo. <sup>4</sup> Esiga biame osee mologa, iba odoo a diye di eyo tou ee tomo. Esino gesi olo siboga, odoo heeso tou hee talai tebileime. <sup>5</sup> Esiga ayo mipoo

hamapoo osee hagee bado oso mipoo hamapoo keme masi gadeebugu ka moloso."

<sup>6</sup> Yesu to hagee takoloso mi mapoo magawo pagamagoloso, deeso deeseegoloso omapoo beesee doloso odoo howo neliga eyo howo mapoo hediso. <sup>7</sup> Osoloso odoo omapoo egeesee takaso, "No Sailowam howo ou mapoo nee howo hapalame di," diso. Esiga Sailowam hu eyo bei ee diye dolone takeli. Esemé odoo egee dilesio o howo hapoome tekepo paso. Esemé yo see wedi sibulone medee ogomo simiso.

<sup>8</sup> Egeesi ma kulodu odoo koola mapoo debeli sabolo osoloso odoo aboso yo daga eli domopoo bi howolone badoboome egei oso egeesee takaso, "Odoo hagee eli palaga bi howolone badoboome ni osobele," diso.

<sup>9</sup> Esemé odoo aboso egeesee takaso, "O. Odoo hedebe ogoso." dee takemeleeso. Esino odoo aboso egeesee takaso, "Haye, odoo ogosonee, odoo hee yo masi molodoo," dee takemeleeso. Esemé odoo eyo egeesee takaso, "Odoo egee tei aso." dee takemeleeso.

<sup>10</sup> Esemé diayo yimapoo egeesee takaso, "Nee howo kaseme tekepo ka payo?" diso.

<sup>11</sup> Esemé yayo egeesee takaso, "Edebeeyo takolone Yesu deli oso mi mapoo magawo pagamagoloso, deeso deeseegoloso omapoo beesee doloso mo howo mapoo basago hediloso amapoo egeesee taka, a Sailowam howo ou mapoo mo howo hapalame diyena. Esemé a dilesio mo howo keesee hapoono tekepo ka poowa," diso.

<sup>12</sup> Esemé diayo yimapoo egeesee takaso, "Odoo egee kasomo?" Esemé yayo dimapoo egeesee takaso, "A gooleede," dee takaso.

### Pelisi odooso odoo howo neliga tekepo pa mapoo woosa

<sup>13</sup> Yesuye odoo howo neliga tekepo pa hagee, Yu odooso hasali biame mapoo tekepo ka pa. Esiga odoo aboso odoo howo neliga Yesuye tekepo pa ee Pelisi odoo mapoo ido diso. <sup>15</sup> Esemé Pelisi odooso yimapoo egeesee takaso, "Nee howo kaseme tekepo ka payo?" diso. Esemé nei yayo dimapoo egeesee takaso, "Yesuye basago beesee doloso mo howo mapoo hedime, mo howo howomoo keesee hapoono, see tekepo ka pa," dee takaso.

<sup>16</sup> Egeesee taka duloso Pelisi odoo aboso egeesee takaso, "Yesu hagee Godee maga sibile. Bei, yo Godee maga simi diepi, ibada hasali biame mapoo tou tolone tei magoo ee gababile pegeliyo," diso.

Esino odoo aboso egeesee takaso, "Kasee maga goo tokenee teli odoo oso goo toowa opusomo di hageesee ka moodoomo silosomo?" dee takemeleeso. Goo egeesi maga Pelisi odooso Yesuwo goo maga dieso dima kulodu domo pi meleeso.

<sup>17</sup> Osoloso Pelisi odooso odoo howo neliga tekepo pa mapoo see tobu egeesee woosaso, "Odoo nee howo tekepo pa ee odoo ogu gooleesomo?" diso. Esemé odoo ogoso nei egeesee takaso, "Ayo goolee, yo

Godee maga to tolosa kokodo takomo sili odoo gooleeso," dee takaso.

<sup>18</sup> Esino odoo hagee daga tei howo nolugulosa badebei goo omapoo Yu odoo dia wiligi odoo diba tei dele. Esiga tei goo beleso gooleedalame, diayo owee dio ama dio idooso. <sup>19</sup> Osoloso diba olo sibilesa tebisamolome, wiligi odooso dimapoo egeesee takaso, "Niyo takolone, nowolo howo neliga osee soomagoogo, dee takemeni ee hagosomo? Esiga kasi maga epedee o howo olo tekepo poloso ka badosomo?" dee takaso.

<sup>20</sup> Esemee owee dio ama dio oso nei egeesee takaso, "O. Hagee tei ibada owolo howo neliga osee soomagoogo oso, goo ee iba gooleedooso. <sup>21</sup> Esino o howo kasee tekepo payo? Iba gooleedele. Osoloso odoo yo tekepo pa onosee, iba gooleedele. Esiga niso ibada owolo mapoo woosalo ege. Bei, yo olo kauwudooga, yayo o goo ee nimapoo takalai teiba," dee takaso.

<sup>22</sup> Diayo dia wiligi odoo tebisa ogoloso obulone wulo dimapoo to hageesee ka taka. Bei, Yu odoo dia wiligi odoo oso goomoga goo hageesee olo magooso, "Edebeeyo takolone Yesu ee Keliso dee takooga, yo Yu odoo dia howo gisili moso ma kuloduga hu taloso peegoo magoo damalaso," dee takaso. <sup>23</sup> Goo egeesi maga owee dio ama dio oso takolone, "Yo olo kauwudooga, yayo o goo ee nimapoo takalai teiba," dee ka taka.

<sup>24</sup> Esiga Yu odoo dia wiligi odoo oso see tobu odoo howo neliga tekepo pa ee idoloso yimapoo egeesee takaso, "Godeeyo howo woola nayo imapoo tei goo takee. Bei, odoo no tekepo pa egee goo tokenee teli odoo, iba gooleedoo."

<sup>25</sup> Esemee odoo ogoso nei egeesee takaso, "A gooleedele, yo goo tokenee teli odoo bele, o, goo tekepo teli odoowo. Egeesi ma kulodu goo hagee a gooleedoo, a daga howo neliga badebeiso. Esino epedee hamapoo mo howo olo tekepo poloso see ka ogomo siloso."

<sup>26</sup> Esemee diayo nei yimapoo egeesee takaso, "Odoo hagoso namapoo kasee moodoome, nee howo see tekepo ka payo?" dee takaso.

<sup>27</sup> Esemee odoo ogoso nei egeesee takaso, "Ayo nimapoo goo susuga olo takaso. Esino niyo mo to medee dule. Esiga niyo bei kasalame goo egee see dulame ka sala? Esiga niba nosee yayo di hamamee dilei goomogolone ka sala?" dee takaso.

<sup>28</sup> Esemee diayo yo manolone yimapoo egeesee takaso, "No o hamamee dili odoo. Esino iba Moseseeyo hamamee dili odoo. <sup>29</sup> Bei, Godeeye Moses mapoo to taka ee, iba gooleedooso. Esino odoo no tekepo pa ee, iba gooleedele."

<sup>30</sup> Esemee odoo ogoso nei egeesee takaso, "Goo hagee kaseeyo? Yayo mo howo tekepo paso. Esino niba o goo gooleedelega ka dosomo? <sup>31</sup> Bei, iba gooleedoo, Godee yo goo tokenee teli odoo eyo to koo duli. Esino yayo o to mapoo mesiloso yayo goomoga goo tomo silesibili odoo eyo to ee duli. <sup>32</sup> Esiga mipoo hagee bei mooloogoo maga simino epedee hamapoo,

odoo heeso odoo howo neliga soomagoo ee tekepo paso dee taka goo ee iba dule. <sup>33</sup> Esino Yesuye mo howo tekepo ka pa. Esiga yo Godee maga sibile diepi, yayo goo hee moodoolai tebile pegeliyo."

<sup>34</sup> Esemee diayo gowoolone nei yimapoo egeesee takaso, "No gie daga soomagoo biame maga simino epedee hamapoo, no goo tokenee teli odoo doloso badebeiso. Esiga nayo kasalame imapoo goo eligilame ka sala?" dee takaso. Esemee diayo yo tolosa howo gisili moso ma kuloduga peegoo ido diso.

### Diowo howo seme

<sup>35</sup> Esino Yu odoo dia wiligi odoo tebisa oso odoo howo neliga tekepo pa ee howo gisili moso maga peegoo ido di goo ee Yesu yo duso. Esiga yayo odoo egee ogoloso yimapoo egeesee takaso, "No Odoo Holo mapoo tei tosom?" dee takaso.

<sup>36</sup> Esemee odoo ogoso nei egeesee takaso, "Odoo Holo ee odoo ogumo? Amapoo takee, eseega ayo yimapoo tei ka talaiya," dee takaso.

<sup>37</sup> Esemee Yesuye yimapoo egeesee takaso, "No yo olo egeiso. Esiga yayo epedee nobolo to egee komoloso," diso.

<sup>38</sup> Esemee odoo ogoso nei egeesee takaso, "Lodee, a namapoo tei toso." Osoloso yo gasuwoloso badolone Yesuwo hu dokodoo poudooso.

<sup>39</sup> Esemee Yesuye egeesee takaso, "Ayo mipoo hamapoo goo midilame simiso. Goo ee odoo howo neliga oso see medee agalame, osoloso odoo howo tekepo ee see howo neligalame," dee takaso.

<sup>40</sup> Esemee Pelisi odoo abo koola omapoo tebisamelee oso Yesuye to egeesee taka ee duloso yimapoo egeesee takaso, "Nayo goolee, iba howo neliga goolone, egeesee ka takala?" dee takaso.

<sup>41</sup> Esemee Yesuye nei dimapoo egeesee takaso, "Niba howo neliga odoo diepi, niba goo tokenee teli odoo dele pegeliyo. Esino niyo takolone, niba howo neliga odoonee dee egee takoo oso niba goo tokenee teli odoo doloso osee ka doso."

### Sipi be bali odoo eyo goo maga wudu taka

**10** Yesuye see egeesee takaso, "Ayo nimapoo taka. Edebeeyo sipi be beele ma kulodu osulu maga gadilega, see eli hee maga sibilesa kulodu gaduga, yo heli teli odooso. <sup>2</sup> Esino osulu maga gadili odoo ee tei sipi be bali odoo oso. <sup>3</sup> Esiga osulu gibadeli odoo oso osulu yadeliso, sipi be bali odoo oso kulodu gadilame. Osoloso sipi beso dia bali odoo eyo to duliso. Osoloso dia bali odooso dia hu hesigaloso, beele ma kuloduga peegoo gilimado diliso. <sup>4</sup> Osoloso yayo o sipi be susuga peegoo gilimado dilesa, daga yayo malalo duga, diba yima hamamee diliso. Bei, diba o to gooleedooga. <sup>5</sup> Esino diba odoo heeso di hamamee koo dili. Esino ee ma kulodu odoo heeso diba sibilame haga, diayo yimaga kukulo dileiso. Bei, diba odoo egeeyo to gooleedelega."



<sup>6</sup> Yesuye wudu takolone odoo mapoo hageesee eligiso. Esino wudu taka goo eyo bei ee diba medee kibiya gooleedele.

### Yesu yo osulu

<sup>7</sup> Osoloso Yesuye dimapoo see egeesee takaso, "Ayo nimapoo taka. Sipi be beelee eyo osulu ee aso †.

<sup>8</sup> Esino a sibilega badoboome, odoo susuga daga malalo sibadee egee bia ee heli teli odooso. Esiga sipi beso dibada to duloso mesile. <sup>9</sup> Osulu aso. Edebeeyo amaga gaduga, yo Godeeye wiligi doloso badeli goo mapoo gadilesa, kookaiyo badoboso gie badeli talaiso. Osoloso yo siloga, Yesuye medee bamalaiso. <sup>10</sup> Esiga heli teli odoo ee wulo heli talame, osoloso odoo wooloomalame, osoloso tokenee palame ka sibili. Esino ayo simi hagee, niyo gie badeli tolosa, goo tekepo susuga ee tolone dabalame ka simi."

### Yesu sipi be medee bali odoo

<sup>11</sup> "Esiga sipi be medee bali odoo ee aso. Egeesi ma kulodu sipi be medee bali odoo oso o sipi be ee gooloogalame o gie badeli teli mapoo mageliso.

<sup>12</sup> Esino nei talame tou teli odoo oso sipi be medee bel-ega pegeliso. Bei, yo sipi be bali odoonee, osoloso sipi be hagee tei onee. Esiga dobu so simi ogoloso sipi be omapoo poogoloso yo pulo diliso. Eseega dobu soso sibilesa sipi be abo wooloomaga, abo kukulo diliso.

<sup>13</sup> Bei, nei talame tou teli odoo oso sipi be medee goolega, wulo pulo diliso.

<sup>14</sup> Esiga sipi be medee bali odoo ee aso. Egeesi ma kulodu mo Maye mo goo ee gooleedoloso ka badoso. Osoloso ayo mo Mayo goo onosee gooleedoloso ka badoso. Goo egeesi masi mo sipi beso a gooleedoloso ka doso, osoloso ayo diba gooleedoloso ka badoso. Esiga mo sipi be ee gooloogalame ayo mo gie badeli teli mapoo magalaiso. <sup>16</sup> Osoloso mo sipi be abo †† dono, diba mooloogoodoo hagee ma kulodu mauwe. Esiga a goomogoso, diba nosee gilimado sibilame. Osoloso di-ayo mo to duleiso. Osoloso diba soosoo hedebe doloso daga, bali odoo hedebeso bamalaiso.

<sup>17</sup> Esiga mo Maye a diya gweliso. Bei, ayo mo gie badeli ee teli mapoo magalaiso, osoloso see ka talame. <sup>18</sup> Esiga odoo heeso mo gie badeli ee amaga peedee dalaime. Esino mawo goomoga goo ee dodolone, ayo mo gie badeli ee wulo wulayo tenelaiso. Esiga ee ma kulodu, ayo mo gie badeli ee odoo halo teli mapoo magalai amapoo kitulugu moloso, osoloso see peedee dalai amapoo kitulugu moloso. Bei, goo hagee mo Maye ayo moodoolame amapoo kitulugu sabolo olo takaso."

<sup>19</sup> Esemu Yu odooso Yesuwo to duloso dieso dima kulodu toso agadigilone abo piso. <sup>20</sup> Egeeseelone odoo aboso egeesee takaso, "Yo bo holo peleso badolone ka halaboomo silo. Esiga o to na dui," dee takaga meleeso.

† Edebeeyo Godeeye wiligi doloso badeli goo mapoo gadili ee Yesu maga ka gadili. †† Sipi be abo - odoo hagee Yu odoonee ee takooso. Osoloso mooloogoodoo hagee Yu odoo ee takooso.

<sup>21</sup> Esino odoo aboso egeesee takaso, "Odo bo holo pala oso goo tekepo hageesi kasee takomo sileiyo? Osoloso bo holoso odoo howo neliga tekepo palai teibayo?" dee takaga meleeso.

### Yu odooso Yesu mapoo tei tele poogoo

<sup>22</sup> Esiga wau biame mapoo Yelusalem mi mapoo Yu odooso dia tei moso osulu ya ee gooleebugulone wo neso ‡. <sup>23</sup> Osoloso wo ne biame omapoo Yesuye tei moso tegei beelee ee ma kulodu Solomonowo hau mapoo sileeso. <sup>24</sup> Esemu Yu odooso yo ogoloso sibilesa toblo sidiboloso yimapoo egeesee takaso, "Iba biame susuga nee goo mapoo diya goolone ka doso. Esiga nayo imapoo woola takee, no tei Kelisowo?" dee takaso.

<sup>25</sup> Esemu Yesuye nei dimapoo egeesee takaso, "Ayo nimapoo olo takaso. Esino niyo mo to mapoo tei tele. Esiga goo toowa opusomo di ayo mo Mayo hu maga moodeli oso nimapoo mo goo ee eligiso. <sup>26</sup> Esino niyo tei koo toso. Bei, niba mo sipi benee. <sup>27</sup> Mo sipi beso mo to duliso. Osoloso a diba gooleedoo. Osoloso di-ayo ama hamamee dedeliso. <sup>28</sup> Osoloso ayo dimapoo kookaiyo badoboso gie badeli teneliso. Osoloso diba Godee maga pileime. Osoloso diba mo dee maga odoo heeso peedee dalaime. <sup>29</sup> Mo Maye mo sipi be hagee amapoo olo teneeso. Osoloso yayo kitulugu oso odoo susuga oso kitulugu ee dagadi. Esiga odoo heeso mo Mayo dee maga peedee dalai tebile. <sup>30</sup> A mo Ma sabolo hedebe."

<sup>31</sup> Esemu Yu odooso Yesu enigilame yo see tobu misigaso. <sup>32</sup> Esemu Yesuye nei dimapoo egeesee takaso, "Mo Maye amapoo kitulugu teneme, ayo nibada howo woola goo tekepo moodoomo sileeso. Esino goo tekepo susuga ayo moodoo ee ma kulodu goo hee kaso tokenee daga, niyo a wooloomalame ka sala?" dee takaso.

<sup>33</sup> Esemu see Yu odoo dia wiligi odoo tebisa oso egeesee takaso, "Nayo goo tekepo moodoo maga iyo no wooloomalame koo seeso. Esino nayo Godeeyo goo maga to tokenee taka ee duloso no wooloomalame ka seeso. Bei, no wulo odoo wuluge, esino see nayo takolone, no Godee, dee takeliso."

<sup>34</sup> Esemu Yesuye nei dimapoo egeesee takaso, "Nibada tei magoo ee ma kulodu Godeeye egeesee takooso, 'Niba godee,' deliso. <sup>35</sup> Egeesi ma kulodu iba gooleedoo, Godeeyo to booka mapoo hogugu oso tei goo takooso. Esiga Godeeye o to mapoo tei teli odoo mapoo takolone, diba godee, deliso. <sup>36</sup> Esiga ayo takolone, a Godeeyo Owolo doloso ka takano, bei kasi maga niyo takolone, ayo Godeeyo goo maga to tokenee takoo, dee ka takala? Bei, mo Maye a hesialoso mipoo hamapoo sibeye diso.

‡ Daga hoogoo Siliya biaso Yu odoo sabolo ha temeleso Yelusalem peedee buguso. Osoloso diayo tei moso mapoo be wooloso, siloso dia godee mapoo teneeso. Esiga tei moso ee Godeeyo howo woola tokenee paso. Osoloso see hamamee Yu odooso Siliya bia habuguloso Yelusalem see dieso peedee dooso. Osoloso see tobu tei moso ee Godeeyo dalame peegoo magoloso see osulu yaso.

<sup>37</sup> Esiga ayo mo Maye goomoga goo ee moodelega badoga, niyo to ayo taka mapoo tei tele ka peegee. <sup>38</sup> Esino niyo to ayo taka mapoo tei tele poogolone, wulo goo ayo hagee tomo silo ee ogoloso to ayo taka mapoo tei ka te. Bei, niyo egeesee seega, mo Ma asalo hedebe doloso hagee do goo ee niba gooleedalaiso." <sup>39</sup> Esemee odoo susuga oso to hagee duloso Yesu see talame seme, Yesu dimaga peegoo diso. <sup>40</sup> Osoloso Yesu see Yoden howo dalo sooweleso, Yoneeye daga odoo howo olugumelee mi omapoo badebeiso. <sup>41</sup> Esemee odoo susuga oso yimapoo sibilesso egeesee takaso, "Yoneeye goo toowa opusomo di moodoomo sile. Esino yayo Yesuwo goo maga taka goo susuga ee tei goodoo," dee takaga meleeso. <sup>42</sup> Esemee odoo susuga omapoo debeli oso Yesu mapoo tei tooso.

### Lasaleseeeye ta

**11** Betani mi mapoo badeli odoo hee paiye badebeiso, o hu Lasales. Osoloso omoo Meli dio Mata dio onosee Betani mi omapoo debeli. <sup>2</sup> Meli hagoso hamamee Lodeeyo homo mapoo mopoodoosoo sooloso o wuduso talaiso. <sup>3</sup> Esiga Meli dio Mata dio odoo hee mapoo dia to takaso, yayo dilesos Yesu mapoo takalame. Esemee yayo dilesos Yesu mapoo egeesee takaso, "Lodee, odoo no gooma ee paiyega badoso," dee takaso. <sup>4</sup> Esino Yesu to hagee duloso egeesee takaso, "Paiye ogoso yo talaime. Esiga goo hagoso peledabalaiso, edebeeyo goo hagee ogoloso Godeeye kitulugu sabolo osoloso Owolo ayo kitulugu ee gooleedalame," dee takaso. <sup>5</sup> Esiga ee ma kulodu Yesuye Mata dio, omolo Meli dio, osoloso Lasales diya gweliso. <sup>6</sup> Esino yo Lasaleseeeye paiye goo ee duloso saga dilega, biame bakadio omapoo badebeiso. <sup>7</sup> Biame bakadio poogoloso Yesuye o hamamee dili odoo mapoo egeesee takaso, "Iba see Yudiya mi mapoo wedi dimo," dee takaso. <sup>8</sup> Esemee o hamamee dili odoo oso yimapoo egeesee takaso, "Eligili odoo, no omapoo badoboome, Yu odooso no yoso wooloomalame sino poogooso. Esiga no see kasalame mi omapoo wedi dilame ka sala?" dee takaso. <sup>9</sup> Esemee Yesuye egeesee takaso, "Biame hedebe ma kulodu osoko howo 12 moloso. Esiga edebeeyo biame siloga, yo takodee bigileime. Bei, yo gadeebugu ma kulodu siloga †. <sup>10</sup> Esino edebeeyo gesi siloga, yo takodee bigileiso. Bei, yimapoo gadeebugu mega." <sup>11</sup> Yesuye to hagee takoloso see egeesee takaso, "Ibada odoo Lasales yo tiamoloso. Esiga ayo yo tidibigileiso," dee takaso. <sup>12</sup> Esemee o hamamee dili odoo oso egeesee takaso, "Lodee, yo wulo tiaga, see weidileiso," dee takaso.

† To hageeyo bei ee egeesi moloso. Yesu yo gadeebugu. Yayo o hamamee dili odoo dibolo hodobo egee bado goo maga, diayo goo kodilei bei mauwe. Bei, Godeeye goomoga goo ee talame yayo biame teiba dimapoo teneeso.

<sup>13</sup> Esino Yesuye taka goo ee ma kulodu Lasales yo tei olo ta neme ka taka. Esino Yesu o hamamee dili odoo oso goolee Lasales wulo tiamolo gooleeso.

<sup>14</sup> Esemee Yesuye dimapoo woola egeesee takaso, "Lasales olo ta moloso. <sup>15</sup> Esiga a goomogoso, ayo niba halo yo agalame dile. Esino ayo yimapoo goo moodoo ee niso ogoloso amapoo tei talaiso. Esiga yimapoo dimo."

<sup>16</sup> Esemee Tomas, o hu hee Didimas deli, oso Yesu o hamamee dili odoo abo mapoo egeesee takaso, "Iba nose Yudiya mi mapoo dimo, Yesu bolo hodobo talame," dee takaso.

### Odoo wedia hogogaduloso see gie badeli teneli ee Yesu yoso

<sup>17</sup> Yesuye sibilesso Betani mi mapoo peledoboloso egeino, Lasales bi ma kulodu tamelee biame bakadio bakadio di poogoloso molome egeiso. <sup>18</sup> Betani mi hagee Yelusalem mi maga haga hoogoonee, wulo kilomita bakadio hedebe di egeesi. <sup>19</sup> Osoloso Meli dio Mata dio omolo Lasaleseeeye ta maga goohele sabolo do-boome, Yu odoo aboso dibolo hodobo dabalame, Yelusalem maga sibadeeso.

<sup>20</sup> Esemee Mataye Yesuye simi goo ee duloso, yo eli domopoo tugodalame diso. Esino Meli yo mosopoo badebeiso. <sup>21</sup> Esemee Mataye Yesu tugodoloso yimapoo egeesee takaso, "Lodee, no hamapoo badebei diepi, molo telega pegeliyo. <sup>22</sup> Esino a gooleedoo, goo hagee ma kulodu, nayo ogoo goo ee Godee mapoo woosaga, Godeeye goo egee namapoo tenelaiso," dee takaso.

<sup>23</sup> Esemee Yesuye yimapoo egeesee takaso, "Nomolo see hogabileiso," diso.

<sup>24</sup> Esemee Mataye nei yimapoo egeesee takaso, "A gooleedoo, yo biame hamameedee mapoo odoo wedia oso hogogabuoga, yinosee omapoo hogadileiso," dee takaso.

<sup>25</sup> Esemee Yesuye yimapoo egeesee takaso, "Odoo wedia maga hogogaduloso see gie badeli teneli ee aso. Esiga edebeeyo amapoo tei tolosos badobosos toga, yo kookaiyo gie badalaiso. <sup>26</sup> Osoloso edebeeyo amapoo tei toga, o dio talaime, esino yo kookaiyo gie badalaiso. Esiga Mata no goo hamapoo tei tosomo?"

<sup>27</sup> Esemee Mataye nei yimapoo egeesee takaso, "O, Lodee, a goo hamapoo tei toso. Bei, no Keliso, Godeeyo Owolo, mipoo hamapoo sibileigo dee takemelee ee noso," dee takaso.

<sup>28</sup> Mataye to hagee taka koodobuloso see wedi dilesos omolo Meli mapoo mada egeesee takaso, "Eligili odoo olo sibilesso bado. Esiga yayo no agalai goomogona," dee takaso. <sup>29</sup> Meli to hagee duloso toboloso Yesu agalame saga diso.

<sup>30</sup> Yesu mosopoo peledebelega, Mataye dilesos yo tugodoo mi omapoo osee badebeiso. <sup>31</sup> Esemee Yu odooso Meli pidilone diba yibolo hodobo mosopoo de-beiso. Esino yayo saga toboloso di ogoloso yima hamamee diso. Diayo goolee Meli bi mapoo dilesos pisilei gooleeso.

<sup>32</sup> Esino Meliye Yesuye badebei mapoo dileso o homo beiyopoo gauwuloso badolone egeesee takaso, "Lodee, no hamapoo badebei diepi, molo telega pegeliyo," dee takaso.

<sup>33</sup> Yesuye Meli dio osoloso Yu odoo abo Melibolo sibadee oso hodobo pupusiga molome ogoloso su hegi sabolo badolone diya gooheselo. <sup>34</sup> Osoloso yayo dimapoo egeesee takaso, "Niyo yo kapoo magooba?" diso. Esem diayo nei egeesee takaso, "Lodee, no agalame ibolo hodobo sibe," dee takaso.

<sup>35</sup> Esem Yesu yinosee pisaso.

<sup>36</sup> Esem Yu odooso goo egee ogoloso egeesee takaso, "Yesuye Lasales diya gweli goo ee niso ege," diso.

<sup>37</sup> Esino odoo aboso egeesee takaso, "Odoos hagosoo odoo howo neliga ee tekepo paso. Esiga bei kasi maga yayo Lasales telega pagalame pidile ka poogoowo?" dee takaso.

### Yesuye Lasales ta maga see hogadi

<sup>38</sup> Yesu su hegi osee molone, Lasales magoo wulu ou miyopoo simiso. Osoloso wulu ou ee yo toowaso kisiso.

<sup>39</sup> Osoloso Yesuye egeesee takaso, "Yo egee peegoo bidibigi," diso.

Esem Lasaleseeoyo omoo Mataye egeesee takaso, "Lodee, o kou ee wulu ma kulodu melee biame bakadio bakadio di egeesi poogooga, olo hune koko," dee takaso.

<sup>40</sup> Esem Yesuye nei yimapoo egeesee takaso, "Ayo namapoo daga takolone egeesee takaso, nayo tei daga, no Godeeye kitulugu ee agalaiseo," diso.

<sup>41</sup> Esem odoo aboso yo toowa wulu ou kisi ee peegoo bidibuguso. Esem Yesuye dokodoo bolone egeesee takaso, "Ma, ayo namapoo goomoga to ka taka. Bei, ayo namapoo taka goo ee nayo duga. <sup>42</sup> Osoloso a gooleedoo, nayo biame susuga ayo namapoo taka goo ee nayo duliso. Esino odoo hamapoo egee tebisamoloso nayo a diye di goo mapoo tei talame, goo hagee ayo ka taka."

<sup>43</sup> Yesuye egeesee takoloso to neligidi egeesee takaso, "Lasales, no wulu ma kuloduga peegoo gasibe," dee takaso. <sup>44</sup> Esem Lasales o dee sabolo, osoloso o homo bodo sabolo, osoloso o mudu ee dugo semeso tiegisa sabolo wulu ma kuloduga peegoo gasibilesito tobudume egeiso. Esem Yesuye dimapoo egeesee takaso, "Dugo egee puobigi, osoloso yo diye dee," dee takaso.

### Yesu wooloomalame eli esia

(Matiyu 26:1-5, Maka 14:1-2, Luka 22:1-2)

<sup>45</sup> Esiga Yu odoo susuga Meli agalame sibadee oso goo Yesuye moodoo ee ogoloso yimapoo tei tooso.

<sup>46</sup> Esino odoo aboso dileso goo Yesuye moodoo ee Pelisi odoo mapoo takaso. <sup>47</sup> Esiga tei moso wiligi odoo tebisa sabolo osoloso Pelisi odoo oso Yu odoo dia wiligi odoo mooloogoodoo Sanhedelin deli ee gili-madoloso dimapoo egeesee takaso, "Iyo kasee selaisomo? Bei, odoo hagosoo goo toowa mudu opusomoo di

bei moodoogamo siliso. <sup>48</sup> Iyo wulo baga, odoo susuga oso yimapoo tei talaiseo. Osoloso Loum gamalee odoo oso ibada tei moso ee guobuguloso ibada odoo tokeenee palaiseo," dee takaso.

<sup>49</sup> Esem dima kulodu odoo hee badebeiso, o hu Kayapas. Dugo omapoo yayo tei moso wiligi odoo toboloso badolone, odoo mooloogoodoo mapoo egeesee takaso, "Niba goo goolee mauwe odoo. <sup>50</sup> Esiga niba koo gooleedolo? Odoos hedebeeso odoo susuga ee halo talai tekepo. Egeeseega, Yu odoo susuga iba tokenee palaime," diso.

<sup>51</sup> Esiga Kayapaseeye taka goo hagee, wulo eyo goolee takele. Esino yayo dugo omapoo tei moso wiligi odoo toboloso badoboome, Yesuye Yu odoo halo talai goo ee Godeeye yimapoo eligime, yayo egeesee ka taka. <sup>52</sup> Esino hedebe Yu odoo halo talaim. Esino Godeeyo odoo mi opusomoo opusomoo di mapoo egee do ee see hedebe dalame ka talai. <sup>53</sup> Esiga biame omaga bei mooloogoloso dulone Yu odoo dia wiligi odoo tebisa oso Yesu wooloomalame eli esiameliseo.

<sup>54</sup> Goo egeesi maga Yesu see Yu odoo dia howo woola koo sili. Esino yayo o hamamee dili odoo sabolo mi egee poogoloso, see miwe poogoo mi koola mapoo mi hee, Epelaim deli, mapoo dileso debeiso.

<sup>55</sup> Osoloso Godeeye Gababia wo nalai biame olo koola tooboome, Yu odoo dia mi pepusoo maga Yelusalem mapoo palaso, Godeeyo howo woola diba medee mopoodoo doloso tekepo dabalame †. <sup>56</sup> Osoloso diayo Yelusalem mapoo dobolone Yesu esiamo silesibiso. Egeeseelone tei moso ma kulodu mooloogodoloso dieso nei woosa nei woosa demeliseo, "Niyo kasee gooleedo? Yesu wo ne hamapoo sibileisomo?" dee takaga meliseo.

<sup>57</sup> Esino tei moso wiligi odoo tebisa sabolo osoloso Pelisi odoo oso to kitulugu sabolo odoo susuga mapoo egeesee takaso, "Odoos heeso Yesuye badebei egei daga, imapoo takee, egeeseega iyo dileso yo ka talaiya," dee takaso.

### Meliye Yesuwo homo mapoo mopoodoo soo soo

(Matiyu 26:6-13, Maka 14:3-9)

**12** Gababia wo nalai ee biame 6 malalo hoogoo molome, Yesu yo Lasaleseeoyo mi Betani mapoo see wedi diso. Lasales hagee daga Yesuye ta maga hogadi ee yoso. <sup>2</sup> Osoloso habe mi omapoo diayo Yesuwo nei toowa mopoodoo dooso. Osoloso Mataye nei piso. Osoloso Lasales yinosee ee ma kulodu dibolo hodobo dobolone Yesubolo nei nameleeso. <sup>3</sup> Esem Meliye mopoodoo soo tekepo nad deli i salama soo lita botoloo gegelee egeesi tolosoo Yesuwo homo mapoo sooso. Osoloso o homo o wudusoo taso. Esem mopoodoo soo oso sisigage oso moso kulodu tiadooso. Mopoodoo soo tekepo hagee molee toowasoo teli.

† Biame omapoo Yu odoo diba Godeeyo howo woola subugo mauwe dabalame, dia adaga dia goo ee dodolone, dia su medee hapoloso gala wooloso, siloso Godee mapoo teneliso.

<sup>4</sup> Esino domo omapoo Yesu o hamamee dili odoo hee badebeiso, o hu ee Yudas-Iskaliyot. Odoo hagoso hamamee Yesu ha teli odoo mapoo tiasalaiso. Osoloso yayo egeesee takaso, <sup>5</sup> "Mopoodoo soo tekepo hagee molee ko † 300 oso teli. Esino bei kasi maga mopoodoo soo tekepo hagee, iyo odoo mapoo teneloso nei molee toloso bi mauwe odoo mapoo tenele ka poogoowo?" dee takaso. <sup>6</sup> Esino Yudaseeye to hageesee taka egee, yo bi mauwe odoo ee sooloo dolone to hagee ka takele. Esino yo heli teli odooga to hageesee ka taka. Bei, yayo Yesu o hamamee dili odoo dia molee ee gibadolone abo mada heli temeleso.

<sup>7</sup> Esemee Yesuye egeesee takaso, "Meliye goo egee moodoo ogoloso yimapoo goo hee na moodee. Bei, yayo goo egeesi moodoo egee a toga mi doosalai ee gooleebugulone ka moodoo. <sup>8</sup> Osoloso bi mauwe odoo oso biame susuga nibolo dabalaiso. Esino a biame susuga nibolo badalaime," dee takaso.

#### Wiligi odoo oso Lasales wooloomalame to mou

<sup>9</sup> Esiga biame domo omapoo Yu odoo mooloogoodoo toowa oso Yesuye Betani mi mapoo sibilesos badebei goo ee duloso Yesu agalame dulone, Lasales yinosee agalame diyadeeso. Bei, Yesuye yo ta maga see hogadiso. <sup>10</sup> Goo egeesi maga tei moso wiligi odoo tebisa oso Lasales onosee wooloomalame to mouso. <sup>11</sup> Bei, Lasales see hogadi eyo goo maga Yu odoo aboso dia wiligi odoo ee poogoloso see Yesu mapoo tei tooso.

#### Yesuye Yelusalem mi mapoo gadi

(Matiyu 21:1-11, Maka 11:1-11, Luka 19:28-40)

<sup>12</sup> Osoloso biame hee mapoo odoo mooloogoodoo toowa Yelusalem mapoo Gababia wo ne mapoo di odoo oso Yesu sibosogo di goo ee duso. <sup>13</sup> Osoloso di ayo weiyo kookoloso Yesu tugodalame dulone to neligidi egeesee takomo diyadeeso,

"Iba Godeeyo hu dokodoo poudoomo.

Odoo Godeeyo hu maga kitulugu sabolo egee sibo, yo wiligi odoo Godeeye pidiye dee.

Osoloso Isalael odoo dia wiligi odoo, yo Godeeye pidiye dee," dee takomo diyadeeso.

<sup>14</sup> Biame domo omapoo Yesuye donki be gie kauwa ogoloso o wagi ma dokodoo biaso. Goo peledaba hagee Godeeyo to booka mapoo hogugu sabolo tebilame ka seeso. Bei, Godeeyo toso egeesee takooso,

<sup>15</sup> "Yelusalem odoo, niba haga na ebi.

Nibada wiligi odoo donki be pe eyo wagi ma dokodoo buloso siboso," diso.

<sup>16</sup> Esino biame omapoo Yesuwo hamamee dili odoo oso goo hagee medee kibiya gooleedele. Esino Yesu ta maga hogaduloso hamamee goo susuga Yesu mapoo moodoo oso Godeeyo to booka mapoo hogugu sabolo tobume, goo ee ogoloso gooleedooso.

<sup>17</sup> Esiga Yesuye Lasales ta maga hogaduloso see wulu ou ma kuloduga peegoo gasibilame i goo ee egei

† molee ko hagee denali deli ee, biame hedebe mapoo tou too eyo nei hedebe hageesee teliso.

odoo mooloogoodoo hagee biaso odoo abo mapoo takalame diyadeeso. <sup>18</sup> Esemee odoo susuga oso goo toowa opusomo di Yesuye moodoo ee duga, diba Yesu tugodalame diso. <sup>19</sup> Esemee Pelisi odooso dieso dima kulodu egeesee takaso, "Niso ege. Iba kitulugu olo me poogoo. Bei, odoo susuga oso yima hamamee deedeeso," dee takemeleso.

#### Yesuye eyo talai goo ee edidi taka

<sup>20</sup> Osoloso Guliki odoo aboso odoo Yelusalem mapoo Gababia wo ne mapoo paladee sabolo palaso, Godeeyo hu dokodoo poudalame. <sup>21</sup> Osoloso diba dileso Gelili mi ma kulodu mi pepooko Betesaida mapoo badeli odoo hee Pilipi mapoo egeesee takaso, "Emegei, iba Yesu agalai goomogo," dee takaso. <sup>22</sup> Esemee Pilipiye Endulu takala dileso obakadio Yesu takalame diso.

<sup>23</sup> Esemee Yesuye nei dimapoo egeesee takaso, "Odoo Holo ayo toowa doloso badalai biame ee olo siboso.

<sup>24</sup> Esiga ayo nimapoo ka taka. Edebeeyo ko mi mapoo segele poogooga, ko egee see opusomo dalaimo. Esino ko hedebe onosee osee malaiso. Esino ko mi mapoo sogoloso opusomo doloso pologa, bou dia gasibilesos kauwuloso ko okopolo palaiso ††. <sup>25</sup> Esiga edebeeyo o gie badeli ee eyo diya goodogoga, o gie badeli ee osugobalaiso. Esino edebeeyo mipoo hamapoo badolone o gie badeli goodogelega badoga, odoo egee o gie badeli osugobalaime. Esino yo bado-boso kookaiyo gie badeli talaiso. <sup>26</sup> Esiga edebeeyo mo tou talai goomogoga, yo a deede sibe. Eseega, yo ayo egee bado mi omapoo yayo abolo hodobo badalaiso. Esiga mo tou teli odoo ee mo Maye o hu dokodoo poudileiso.

<sup>27</sup> Epedee hamapoo a su diya hegi moodoo. Esiga ayo mo Ma mapoo takolone, 'Ma, dala amapoo egee sibo nayo peegoo magee,' dee takalai tekepowa? Haye, tekeponee. Bei, a dala egee talame mipoo hamapoo ka simi. <sup>28</sup> Esiga Ma, nayo toowa doloso egee bado goo ee odoo mapoo eligi."

Esemee toso Kei mi ma dokodooga egeesee taka, "Ayo toowa doloso egee bado goo ee odoo mapoo olo eligiso. Osoloso ayo dimapoo see eligileiso," dee takaso. <sup>29</sup> Esino odoo mooloogoodoo omapoo tebisamelee oso to hagee duloso egeesee takaso, "Kei woo," diso. Osoloso odoo aboso takolone, momaiyeso Yesu mapoo to takoo, dee takaso.

<sup>30</sup> Osoloso Yesuye see egeesee takaso, "To taka hagee a pidilame ka takele. Esino niba pidilame ka taka. <sup>31</sup> Esiga Godeeye mi odoo dia goo midilei biame ee hagoso. Osoloso mipoo hageeyo wiligi odoo Saiten ee Godeeye daga dileiso. <sup>32</sup> Esiga edebeeyo a toloso mi hamaga dokodoo poudoga ‡, ayo odoo susuga amapoo gido sibileiso." <sup>33</sup> Yesuye taka hagee, eyo talai goo ee kasee tomoba dolone ka taka.

†† Yesuye wudu taka hagee, eyo toloso see hogadilei goo sabolo, osoloso edebeeyo yimapoo tei talai goo maga ka taka. ‡ Yesuye taka hageeyo bei ee, yo homo bulubo magoo ma dokodoo yoguso enigaloso pouduloso tulugilei ee taka.

<sup>34</sup> Esemé odoo mooloogoodoo oso egeesee takaso, "Ibada tei magoo oso egeesee taka duliso, Keliso yo badoboso kookaiyo badalaiso, dee takeliso. Esino bei kasi maga nayo takolone, Odoo Holo yo tolosó mi hamaga dokodoo poudileiso, dee ka takeliyo? Osoloso Odoo Holo hagee odoo ogumo?" dee takemeleeso.

<sup>35</sup> Esemé Yesuye dimapoo egeesee takaso, "Gadeebugu oso biame deiyepo nibolo malaiso. Esiga gadeebugu nimapoo mologa, niba gadeebugu ee ma kulodu silesibe, neligaso niba gooloogeyaga. Egeesi ma kulodu niba neliga ma kulodu silesiboga, niba niso egee du eli ee medee ogoloso gooleedalaime. <sup>36</sup> Esiga gadeebugu nimapoo osee egee molo mapoo tei te. Niyo egeesee seega, niba gadeebugu eyo owolo dio dalaiso." Yesu to hagee takoloso koodobuloso peegoo dilesó dimaga mada wuaso.

### Yu odooso Yesu mapoo tei tele poogoo

<sup>37</sup> Yesuye goo toowa opusomo di susuga odoo howo woola moodoogaso. Esino edebeeyo yimapoo tei tele.

<sup>38</sup> Esiga Godee maga to tolosó kokodo takomo sili odoo Aisayaye taka goo sabolo tebilame, goo hagoso peledabaso. Aisayaye egeesee takaso,

"Lodee, odoo agayo iyo taka goo ee tei ka toba?"

Osoloso Lodeeye kitulugu ee odoo ogu bia dimapoo ka yilige buguba?" dee takaso.

<sup>39</sup> Esiga edebeeyo Yesu mapoo tei talai tebile. Bei, Aisayaye see egeesee takaso,

<sup>40</sup> "Godeeye odoo susuga dia howo gooloogooso.

Osoloso yayo diba goo goole pagalame moodooso, dia howoso kibiya egelega pagalame, osoloso diayo medee kibiya gooleedelega pagalame,

osoloso see Godee mapoo wedi sibilesó tekepo pel-ega pagalame."

<sup>41</sup> Aisayaye Yesuye toowa doloso badeli goo ee ogoloso o goo maga egeesee ka taka.

<sup>42</sup> Esino odoo abo sabolo osoloso Yu odoo dia wiligi odoo abo oso Yesu mapoo tei tooso. Esino diba Pelisi odoobolo obulone, diayo tei too goo ee woola yilige bigile. Bei, Pelisi odooso dia hu howo gisili moso ma kulodu magoo ee tabigiyaga. <sup>43</sup> Osoloso diayo Godee maga goomoga talai haga goole poogoloso, hee odoo maga goomoga talai ono diya gweliso.

<sup>44</sup> Esemé Yesuye to neligidi egeesee takaso, "Edebeeyo amapoo tei toga, yo hedebe amapoo tei koo toso. Esino a diye di odoo omapoo nose tei toso.

<sup>45</sup> Osoloso edebeeyo a ogoga, yo a diye di odoo onosee ogoso. <sup>46</sup> Esiga ayo mipoo hamapoo neliga ma kulodu keme masi poudo simiso. Egeesi ma kulodu edebeeyo amapoo tei toga, yo neliga ma kulodu osee badalaime.

<sup>47</sup> Esiga edebeeyo mo to duloso mesilega poogooga, ayo o goo midileime. Bei, ayo mipoo hamapoo simi hagee, odoo goo midilame ka sibile. Esino odoo dia gie badeli ee pidilame ka simi. <sup>48</sup> Esino edebeeyo a gowoolone mo to telega poogooga, Godeeye goo midilei biame mapoo to ayo taka oso nei dia goo ee

midileiso. <sup>49</sup> Bei, a mawo gooleeso to hagee ka takele. Esino mo Ma, a diye di oso to ayo takalai sabolo osoloso ayo kasee takalai goo ee, yayo amapoo takaga, ayo egeesee ka taka. <sup>50</sup> Esiga Godeeye taka to hagoso odoo mapoo gie badeli tosibiliso. Goo egeesi maga mo Maye amapoo taka goo ee see nimapoo ka takomoloso."

### Yesuye o hamamee dili odoo dia homo howo hapoo

**13** Yu odooso Gababia wo nali biame olo koola tooboome, Yesu yo mipoo hagee poogoloso see Ama mapoo palai biame ee olo koola tooboo, doloso gooleedooso. Esiga yayo mipoo hamapoo gie badolone, o hamamee dili odoo ee sooloo deliso. Esino yayo diba diya sooloo deli goo ee epedee dimapoo eligiso.

<sup>2</sup> Osoloso Yesuye o hamamee dili odoo sabolo habe nei nolone debeiso. Esino ee ma kulodu Saimon-Iskaliyoteeyo owolo Yudas mapoo Saitenso goo goolee olo teneeso, yayo Yesu ha teli odoo † mapoo tiasalame.

<sup>3</sup> Osoloso Amaye goo susuga ee balame kitulugu Yesu mapoo tenee goo ee yo olo gooleedooso. Osoloso yo Godee maga simi, esiga yo see Godee mapoo wedi palai goo ee yo olo gooleedooso. <sup>4</sup> Osoloso nei nolone debei maga toboloso o dugo sage tamagoloso see dugo howo i tali ee tolosó o bagi mapoo booso. <sup>5</sup> Osoloso katolo mapoo howo salama soloso o hamamee dili odoo hedebe hedebe di eyo homo hapoloso, dugo howo i tali o bagi mapoo boo oso howo i ka ta domo dilame bei mooloogooso.

<sup>6</sup> Egeeseelone Saimon-Pitayo homo hapalame seme, yayo egeesee takaso, "Lodee, nayo mo homo hapalame ka sala?" dee takaso ††.

<sup>7</sup> Esemé Yesuye egeesee takaso, "Goo ayo hagee moodoo eyo bei no epedee koo gooleedoso. Esino no hamamee gooleedalaiso," diso.

<sup>8</sup> Esemé Pitaye egeesee takaso, "Nayo mo homo hapalame," diso. Esemé Yesuye nei yimapoo egeesee takaso, "Ayo nee homo hapelega poogooga, no mo hamamee dili odoonee," dee takaso.

<sup>9</sup> Esemé Saimon-Pitaye see egeesee takaso, "Lodee, nayo hedebe mo homowe ono na hapee. Esino mo dee sabolo osoloso wiligi sabolosee hapee," diso.

<sup>10</sup> Esemé Yesuye egeesee takaso, "Odoo howo sauwe ee o su mapoo subugo me meleeya. Esiga hedebe o homowe hapalai tekepo. Esiga niba olo subugo mauwe. Esino nima kulodu odoo hee subugo sabolo badoso." <sup>11</sup> Osoloso Yesu yo ha teli odoo mapoo tiasalai odoo ee, yo olo gooleedooso. Esiga yayo egeesee ka taka, "Odoo hee nima kulodu subugo sabolo badoso," dee ka taka.

<sup>12</sup> Yesuye o hamamee dili odoo dia homo hapaga koodobuloso o dugo sage kaloso wedi sibilesó bulone egeesee takaso, "Niba goo ayo epedee nimapoo

† Yesu mapoo ha teli odoo ee Yu odoo dia wiligi odoo tebisa ee takooso. †† Homo hapeli ee nei mauwe tou teli odoo dia tou. Esiga Yesuye o hamamee dili odoo dia homo hapoo ee ogoloso diya dio diso. Bei, Yesu yo dia wiligi odooga.

moodoo eyo bei gooleedoosomo? <sup>13</sup> Esiga niyo amapoo takolone, 'eligili odoo,' osoloso 'Lodee,' deliso. Niyo amapoo egeesee takeli ee tei goo. Ee aso. <sup>14</sup> Esiga nibada eligili odoo osoloso nibada Lodee ayo nibada homo ka hapooso. Esiga niyo nee odoowo homo nei hapoo nei hapoo dolone ka debbee. <sup>15</sup> Goo ayo nimapoo hagee edidi ee peedee. <sup>16</sup> Esiga ayo nimapoo taka. Odoou tou nei mauwe teli oso o wiligi odoo dagadileso koo badoso. Osoloso to tosili odoo oso yo diye di odoo ee dagadileso koo badoso. <sup>17</sup> Egeesi ma kulodu niyo goo hagee gooleedoloso peedeega, Godeeye goo hagee ogoloso nimapoo goomogalaiso.

<sup>18</sup> Esiga goo ayo hagee takoo, haga odoo susuga nimapoo koo takooso. Bei, odoo ayo hesiga ee, a olo gooleedooso. Esino Godeeye to booka mapoo hogugu oso egeesee takooso, 'Odoou abolo wo nolone badebei oso amapoo ha talaiso.' To hagoso gooso peledabalai sabolo tebilame ka hogugu. <sup>19</sup> Esiga goo hagee peledabelega mologa, ayo nimapoo malalo ka taka. Goo hagoso tei peledobooga, niyo a tei Kelisodoo doloso tei ka talame. <sup>20</sup> Esiga ayo nimapoo taka. Edebeeyo odoo ayo diye di ee idoga, yayo a idoso. Osoloso edebeeyo a idoga, mo Ma a diye di ee idoso."

**Yesu yo tiasalai odoo eyo goo taka**  
(Matiyu 26:20-25, Maka 14:17-21, Luka 22:21-23)

<sup>21</sup> Yesuye to hagee taka koodobuloso su hegi sabolo badolone, o hamamee dili odoo mapoo egeesee takaso, "Ayo nimapoo taka. Odoou heeso nima kuloduga a ha teli odoo mapoo tiasalaiso," dee takaso.

<sup>22</sup> Esemee o hamamee dili odoo oso dieso dima kulodu nei ogo nei ogo dolone egeesee gooleeso, "goo hagee odoo ugu mapoo takabele," dee gooleeso.

<sup>23</sup> Osoloso Yesu o hamamee dili odoo dima kulodu odoo hee Yesuye diya gooma ee † yima koola ogolone badebeiso. <sup>24</sup> Esemee Saimon-Pitaye odoo omapoo howo gisolooogoso, Yesuye odoo ugu taka beleso yayo yimapoo woosalame.

<sup>25</sup> Esemee yayo Yesu mapoo bouwa molone yimapoo egeesee takaso, "Lodee, odoo agayo no ha teli odoo mapoo ka tiasalaiyo?" dee takaso.

<sup>26</sup> Esemee Yesuye nei egeesee takaso, "Ayo wo i mapoo oluguloso teneega, odoo oso a ha teli odoo mapoo tiasalaiso." Osoloso Yesuye wo toloso i mapoo oluguloso Saimon-Iskaliyoteeyo owolo Yudas mapoo teneeso. <sup>27</sup> Yudaseeye wo teme, Saitenso o kulodu palaso. Esemee Yesuye yimapoo egeesee takaso, "Nayo goo talame egee gooleemolo goo ee saga moodde," diso. <sup>28</sup> Egeesi ma kulodu Yesuye Yudas mapoo egeesee taka goo eyo bei ee o hamamee dili odoo diba medee kibiya gooleedele. <sup>29</sup> Esiga odoo aboso goolee, Yudaseeye Gababia wo nalame bi abo talame di, dee takoo gooleeso. Osoloso odoo aboso goolee, ee molee odoo bi mauwe mapoo tenelame di, dee takoo gooleeso. Bei, Yesu o hamamee dili odoo dia

† Yonee eyo nediliyo o hu dokodoo poudilei goomegele. Esiga o hu woola hesile.

molee ee Yudaseeye gibadeliga. <sup>30</sup> Osoloso gesi Yudaseeye wo Yesuye tenee ee toloso peegoo gadiso.

### Kokodo takeli to dia

<sup>31</sup> Yudas olo peegoo dime, Yesuye egeesee takaso, "Epedee Odoou Holo ayo toowa doloso badeli goo ee woola yilige bigileiso. Osoloso Godeeye toowa doloso badeli goo ee amaga woola yilige bigileiso. <sup>32</sup> Esiga Godeeye toowa doloso badeli goo ee amaga woola yilige buguga, nei Godee eyo Odoou Holo ayo toowa doloso badeli goo onosee woola yilige bigileiso. Esiga goo hagee saga moodoolaiso.

<sup>33</sup> Esiga mo odoo, ayo biame deiyepo nibolo hodobo badalaiso. Osoloso a duga, niyo a esileiso. Esino niyo a agalaime. Esiga ayo Yu odoo dimapoo taka goo ee see tobu nimapoo ka taka. Niba mi ayo hagee du mapoo dilei tebile.

<sup>34</sup> Esiga kokodo takeli to dia hagee ayo nimapoo ka taka. Niyo nee odoo nei sooloo dolo, nei sooloo dolo dolone ka dabalame. Ayo niba goolee sabolo egee bado egeesee masi, nee odoo nei sooloo dolo, nei sooloo dolo dolone ka debbee.

<sup>35</sup> Egeesi ma kulodu niyo emegei nei sooloo dolo, nei sooloo dolo dolone doga, odoo susuga oso niba tei mo hamamee dili odoo doloso gooleedalaiso."

**Pitaye Yesuwo goo gagadilei goo ee Yesuye taka**  
(Matiyu 26:31-35, Maka 14:27-31, Luka 22:31-34)

<sup>36</sup> Esino Saimon-Pitaye egeesee takaso, "Lodee, no kapoo dilame ka sala?" diso. Esemee Yesuye nei egeesee takaso, "No epedee ayo hagee du mapoo sibilei tebile. Esino no see hamamee sibileiso," dee takaso.

<sup>37</sup> Esemee Pitaye see egeesee takaso, "Lodee, bei kaseega ayo epedee nobolo sibilei tebile ka molosomo? Ayo no halo talame olo mopoodoo doloso ka badoso," dee takaso.

<sup>38</sup> Esemee Yesuye nei egeesee takaso, "No tei a halo talame mopoodoo doloso ka badosomo? Esiga ayo namapoo tei goo taka. Kolokolo takelega mologa, nayo mo goo gagadilei ee bakadio hedebe dalaiso," dee takaso.

### Eli hedebe Yesuso Ma Godee mapoo palai

**14** Esemee Yesuye egeesee takaso, "Niba goo haga koudulone na debbee. Esino niba Godee mapoo tei tolone amapoosee tei te. <sup>2</sup> Bei, mo Mayo moso mapoo debi bei moloso. Esiga goo hagee tei goonee diepi, ayo goo hagee nimapoo takele pegeliyo. Esiga ayo omapoo niyo dabalai debi ee moodoolame dileiso. <sup>3</sup> Osoloso ayo omapoo dileso debi mopoodoo doloso see sibilesi niba gilimadoloso abolo hodobo palaiso. Osoloso niba mi omapoo abolo hodobo dabalaiso. <sup>4</sup> Esiga ayo hagee du eli ee niba olo gooleedooso."

<sup>5</sup> Esemee Tomaseeye Yesu mapoo egeesee takaso, "Lodee, mi nayo egee du, iba gooleedele. Nayo egee du eli ee iyo kasee gooleedalaiso?" dee takaso.

<sup>6</sup> Esemé Yesúye egeesee takaso, “Eli aso. Osoloso tei goo takeli eyo bei aso. Osoloso gie badeli eyo bei aso. Esiga odoo heeso eli hee maga Ma Godee mapoo palaime. Esino yo hedebe amaga Ma mapoo ka palai. <sup>7</sup> Niyo mo goo gooleedoo diepi, niba mo Ma noseé gooleedeliyo. Esino epedee domo hamaga niyo yo olo gooleedooso. Osoloso yo olo egeiso.”

<sup>8</sup> Esemé Pilipiye egeesee takaso, “Lodee, nayo Ma imapoo eligi, iba hemisileiya,” dee takaso.

<sup>9</sup> Esemé Yesúye nei Pilipi mapoo egeesee takaso, “Pilipi, ayo biame susuga nibolo hodobo badebeiso. Esino egeesi ma kulodu nayo a gooleedelega osee ka badosoba? Esiga edebeeyo a ogoga, yo Ma olo egeiso. Esiga bei kasi maga nayo amapoo takolone, ‘Ma imapoo eligi,’ dee ka takala? <sup>10</sup> Ayo mo Ma sabolo hedebe doloso egee bado sabolo, osoloso mo Maye abolo hedebe doloso egee bado goo mapoo no tei tel-ega ka badosoba? Esiga to ayo nimapoo hagee takomo silo mawo goolee koo takomo siloso. Esino Maye abolo badolone yayo amaga o goo ee ka tomoloso.

<sup>11</sup> Esiga ayo takolone, ayo mo Ma sabolo hedebe doloso egee bado sabolo, osoloso mo Maye abolo hedebe doloso badoso, dee egee takoo goo omapoo tei te. Esino niyo to ayo taka mapoo tei telega poo-googa, goo toowa opusomo di ayo moodoo ee ogoloso to ayo taka mapoo tei dee.

<sup>12</sup> Esiga ayo nimapoo taka. Edebeeyo amapoo tei toga, goo toowa opusomo di ayo moodeli egeesi masi yayo moodolaiso. Osoloso goo toowa opusomo di abo yayo moodooga, oso ayo moodeli ee dagadileiso. Bei, a mo Ma mapoo duso. <sup>13</sup> Osoloso niyo mo hu maga ogoo goo ee woosaga, ayo goo egee moodolaiso, Maye toowa doloso egee bado goo ee Owolo amaga ka yilige bigilame. <sup>14</sup> Esiga niyo amapoo mo hu maga ogoo goo talame woosaga, ayo goo egee moodolaiso.”

### Yesúye Dio Teiso sibilei goo ee taka

<sup>15</sup> “Niyo a gooleega, niyo ayo kokodo taka goo mapoo mesimo silesibileiso. <sup>16</sup> Osoloso ayo Ma mapoo woosalaiso, yayo pidili odoo hee nimapoo tenelame. Pidili odoo hagoso kookaiyo nibolo hodobo osee badalaiso. <sup>17</sup> Pidili odoo egee Dio Tei ee takooso. Yayo tei goodee ee eligiliso. Esino mi odooso yo talai tebile. Bei, diayo yo ogoloso koo gooleedeli. Esino niba o goo olo gooleedooso. Bei, yo nibolo hodobo badoso. Osoloso nima kulodu badalaiso.

<sup>18</sup> Esiga ayo niba gilibo holo masi wulo domopoo poogoloso badalaime. Esino a see tobu nimapoo wedi sibileiso. <sup>19</sup> Osoloso biame deiyepo poogoloso mi odoo oso a see agalaime. Esino niyo a see agalaiso. Egeesi ma kulodu a gie badeliga, niba noseé gie dabalaiso. <sup>20</sup> Egeesi ma kulodu a ta maga see hogadiga, ayo mo Ma sabolo hedebe doloso egee bado goo ee, niba gooleedalaiso. Osoloso niyo abolo hedebe doloso egee do goo sabolo, osoloso ayo nibolo hedebe doloso egee bado goo ee gooleedalaiso. <sup>21</sup> Esiga edebeeyo ayo kokodo taka to ee duloso mesimo siloga,

odoo egee a diya goolee sabolo badoso. Osoloso odoo a diya goolee sabolo badeli mapoo mo Maye yo sooloo dolone ka badoso. Osoloso anosee odoo egee diya sooloo dolone ka badoso. Osoloso ayo mo goo ee yimapoo yilige bigileiso.”

<sup>22</sup> Esemé Yudas-Iskaliyot nee, esino Yudas heeso egeesee takaso, “Lodee, bei kasi maga nayo nee goo ee mi odoo mapoo yilige bigile poogoloso, see imapoo ka yilige bigileiyo?” dee takaso.

<sup>23</sup> Esemé Yesúye nei egeesee takaso, “Edebeeyo a diya gooleega, yayo goo ayo eligi mapoo mesimo sileiso. Osoloso mo Maye yo diya sooloo dalaiso. Osoloso mo Ma asalo sibilesi yibolo hodobo badalaiso. <sup>24</sup> Esino edebeeyo a goolega badoga, yo goo ayo eligi mapoo mesiloso koo siloso. Egeesi ma kulodu goo ayo eligime niyo du ee, ayo mawo goolee eligimo sile. Esino eligi hagee mo Ma, a diye di oso taka ee eligi.

<sup>25</sup> Esiga ayo nibolo hodobo osee badolone, goo susuga hagee nimapoo olo takaso. <sup>26</sup> Esino mo Maye mo hu maga Dio Tei ee nimapoo meiyee dalaiso. Osoloso yayo niba pidilone badolone goo susuga nimapoo eligileiso. Osoloso goo susuga ayo nimapoo taka ee see niyo goolee sabolo dabalame, yayo nibada goo goolee pileiso.

<sup>27</sup> Esiga mesili goo ayo nimapoo ka tonowa. Mo mesili goo ayo nimapoo hagee tenee ee mi odooso mesili goo egeesinee. Esiga niba goo diya koudulone ebia sabolo na debée.

<sup>28</sup> Esiga ayo nimapoo takolone, ‘a mo Ma mapoo peleso badoboso see nimapoo ka wedi sibileisogo,’ dee taka goo ee, niba olo duso. Esiga niyo a tei diya goolee sabolo debei diepi, ayo mo Ma mapoo pologa niba goomegeliyo. Bei, yayo toowa doloso badolone, a dagadileso ka badoga. <sup>29</sup> Egeesi ma kulodu goo egee pelededelega molome, ayo goo susuga hagee nimapoo olo takaso, goo ogoso hamamee peledobooga ogoloso niyo tei ka talame. <sup>30</sup> Esiga ayo niba eligi ee koodobilei olo koola tooooso. Bei, mi odoo dia wiligi odoo Saiten olo sibo. Yayo a dagadilei yimapoo kitulugu mauwe. <sup>31</sup> Esino ayo mo Ma diya goolee sabolo egee bado goo ee mi odoo oso ogoloso gooleedalame, to mo Maye amapoo taka ee ayo tobuloso moodeliso.

Esiga niba tebise, iba dimo.”

### Yesu tei homokoko su

**15** “Esiga tei homokoko sudee aso. Osoloso mo Maye homo su ee ka gibadoso. <sup>2</sup> Osoloso homo dee amaga agaga oso ko pelega mologa, yayo kookooloso peegoo togobiseliso. Esino homo dee ko peli eyo dee abo ee kookeliso, oso see homokoko okopolo palame. <sup>3</sup> Egeesi ma kulodu goo ayo nimapoo eligi oso niba homo dee abo egeesi masi olo kookooloso subugo mauwe ka doso. <sup>4</sup> Esiga niba amapoo oluguloso ka debée. Eseega ayo nimapoo oluguloso badalaiso. Esiga dee obusomo molone ko palai mauwe. Esino dee oso homo su mapoo oluguloso mologa, ko palaiso. Goo egeesi maga, niba

amapoo olugulega doga, homokoko palaime. Esino niyo amapoo oluguloso doga, homokoko okopolo palaiso.

<sup>5</sup> Esiga homokoko su aso. Osoloso homo dee ee ni-baso. Egeesi ma kulodu edebeeyo amapoo sibilesi oluguloso badoga, ayo yimapoo oluguloso badalaiso. Eseege yo homokoko okopolo palaiso. Esino niba a mauwe doga, niyo goo hee moodoolai tebileime. <sup>6</sup> Esiga edebeeyo amapoo sibilesi olugulega doga, yo homo dee ko koo peli koodoloso peegoo togobugu egeesi masi moloso. Esiga homo dee egee sioga misiga magoloso dou mapoo todeliso. <sup>7</sup> Goo egeesi maga niyo amapoo oluguloso dobolone, ayo eligi goo omapoo mesimo silesibulone, niyo ogoo goo talame amapoo woosaga, niba goo egee talaiso. <sup>8</sup> Esiga niyo homokoko okopolo poloso mologa, oso mo Mayo hu dokodoo poudiliso, osoloso niba mo hamamee dili odoo doloso egee do goo ee yilige bigiliso.

<sup>9</sup> Esiga mo Maye a diya sooloo dolone egee bado egeesi masi ayo niba diya sooloo dolone ka badoso. Esiga niba ayo sooloo deli goo ee ma kulodu debee.

<sup>10</sup> Egeesi ma kulodu ayo mo Maye kokodo taka to omapoo mesimo silone, yayo sooloo deli ma kulodu ka badoso. Osoloso hedebe egeesi masi niyo ayo kokodo taka to omapoo mesimo silesiboga, niba nosee ayo sooloo deli goo ee ma kulodu dabalaiso.

<sup>11</sup> Esiga goo hagee ayo nimapoo olo takaso, goomoga goo amapoo egee molo niyo talame. Osoloso nimapoo goomoga goo oso kauwuloso ka malame.

<sup>12</sup> Esiga ayo kokodo taka to hagoso. Ayo niba sooloo deli egeesi masi niyo nee odoo nei sooloo dolo, nei sooloo dolo dolone ka debee. <sup>13</sup> Egeesi ma kulodu edebeeyo o odoo diya sooloo dolone, yo halo o su teli mapoo magalai, goo oso toowa ka moloso. <sup>14</sup> Esiga niyo ayo kokodo taka to mapoo mesimo siloga, niba tei mo odoo. <sup>15</sup> Esiga niba ayo wulo mo tou teli odoo dee koo takoso. Bei, tou teli odoo ee o wiligi odoo eyo goo ee yo gooleedele. Esino niba tei mo odoo deeso. Bei, mo Maye amapoo taka goo susuga ee ayo nimapoo olo eligiso. <sup>16</sup> Egeesi ma kulodu niyo a ka hesile. Esino ayo niba ka hesiga, niyo homokoko okopolo palame. Homokoko egee kookaiyo moloso osee malaiso. Niyo egeesee solone, ogoo goo talame mo hu maga mo Ma mapoo woosaga, yayo nimapoo tenelaiso. <sup>17</sup> Esiga ayo nimapoo kokodo taka to ee hagoso. Niyo nee odoo nei sooloo dolo, nei sooloo dolo dolone ka debee.”

### Mi odoo oso heiga goo

<sup>18</sup> “Mi odoo oso niba heigoga, daga diayo a heigoso doloso gooleede. <sup>19</sup> Esiga niba mi odoo sabolo hedebe doloso ka debei diepi, diayo niba dia odoo dolone diya goolee sabolo debeliyo. Esino ayo niba mi odoo dima kuloduga olo hesiaso, niyo dibolo hedebe doloso debelega pagalame. Goo egeesi maga diayo nimapoo heiga ka moloso. <sup>20</sup> Esiga to ayo nimapoo taka ee medee goolee. Bei, ayo egeesee takaso. Wulo tou teli odoo oso o wiligi odoo ee dagadilesi koo badoso.

Egeesi ma kulodu edebeeyo amapoo dala olo teneega, diayo niba nosee dala tenelaiso. Osoloso diayo ayo eligi goo mapoo mesiega, diba nosee niyo eligi goo mapoo mesileiso. <sup>21</sup> Esino niba mo odooga, diayo goo susuga hagee nimapoo moodoolaiso. Bei, a diye di odoo ee diba gooleedele.

<sup>22</sup> Egeesi ma kulodu ayo sibilesi dimapoo to takele diepi, Godeeye dia goo tokenee midilei ee pegeliyo. Esino epedee hamapoo ayo sibilesi olo takaso. Goo egeesi maga goo tokenee diayo moodoo ee Godeeye midileiso. Esino diayo to nei takalai tebileime. <sup>23</sup> Edebeeyo a heigoga, yo mo Ma nosee heigoso. <sup>24</sup> Esiga goo toowa opusomo di ayo moodoomo silee egeesi odoo heeso moodoomo sile. Osoloso ayo dima kulodu goo hageesee moodele diepi, Godeeye dia goo tokenee midilei ee pegeliyo. Esino diayo mo Ma asalo imapoo heiga ka moloso. <sup>25</sup> Esiga goo hagee olo peledabaso, Godeeyo to booka mapoo hogugu oso taka sabolo tebilame. Bei, Godeeyo toso egeesee takoso, ‘Diayo wulo goo mauwe amapoo heiga ka moloso,’ deliso.

<sup>26</sup> Ayo niba pidilame Dio Tei nimapoo diye dalaiso. Dio Tei oso mo Ma maga sibiliso, osoloso tei goodee eligiliso. Osoloso Dio Tei oso sibilesi, mo goo ee woola yilige bigileiso. <sup>27</sup> Osoloso niba nosee niyo mo goo odoo mapoo yilige bigi. Bei, niba daga bei mooloogoo biame omaga abolo hodobo sileeso.”

**16** “Esiga niyo tei too goo maga peegoo diyaga, ayo goo susuga hagee nimapoo olo takaso.

<sup>2</sup> Bei, odoo aboso nibada hu howo gisili moso ma kulodu egee molo taloso niba peegoo hasiso bigileiso. Osoloso odoo aboso tei too odoo ee piliguga, diayo goolee Godeeyo tou to dee goalai, biame ee sibileiso.

<sup>3</sup> Esiga diayo goo hageesee nimapoo moodoolaiso. Bei, mo goo sabolo osoloso mo Mayo goo ee diba gooleedelega. <sup>4</sup> Esiga goo hagee ayo nimapoo olo takaso. Egeesi ma kulodu goo hagoso tei peledobooga, niba to ayo taka ee gooleebigileiso.”

### Dio Tei oso sibilei eyo goo taka

“Esiga ayo daga Godeeyo tou bei mooloogolone a nibolo hodobo badebeiso. Goo egeesi maga, ayo goo hagee nimapoo takele. <sup>5</sup> Esino a epei odoo a diye di mapoo duso. Esino nima kulodu odoo heeso amapoo takolone, a kapoo diala, doloso koo woosa. <sup>6</sup> Esiga ayo takolone, a epei dileiso, dee taka goo ee niyo duloso niba diya ka gooholoso. <sup>7</sup> Esino ayo tei goo nimapoo ka taka. Ayo niba poogoloso duga, goo oso niba pidileiso. Bei, a duga, nei ayo Dio Tei nimapoo diye dalaiso, yayo niba pidilame. Esino a dilega poogooga, Dio Tei ee nimapoo sibileime.

<sup>8</sup> Egeesi ma kulodu Dio Tei siboga, yayo mi odoo mapoo goo tokenee eyo goo maga tei goo takalaiso. Osoloso odoo Godeeyo howo woola tekepo dabalai goo onosee takalaiso. Osoloso Godeeye goo midilei goo eyo bei onosee takalaiso. <sup>9</sup> Esiga Dio Tei oso goo tokenee eyo goo maga tei goo takolone, amapoo tei



tele pagalai goo ee mi odoos dia goo tokenee toowa ka moloso, dee takalaiso. <sup>10</sup> Osoloso a mo Ma mapoo hagee polo see niyo a agalaime. Goo ogoso Godeeyo howo woola tekepo badalai goo ee yilige bigileiso. <sup>11</sup> Osoloso Dio Tei oso Godeeye goo midili goo ee tei goo takolone, mi odoos dia goo ee midileiso, dee takalaiso. Bei, mi odoos dia wiligi odoos Saiteneeyo goo ee olo midiso.

<sup>12</sup> Esiga amapoo goo bei moloso, ayo nimapoo takalai. Esino epedee niyo goo bei egee gooleedalai tebile. Esiga ayo goo egee nimapoo takalaime. <sup>13</sup> Esino Dio Tei oso nimapoo siboga, yayo niba tei goo susuga mapoo gilimado dileiso. Yayo eyo goolee takalaime. Esino yayo to ayo takeme du goo ee takomo sileiso. Osoloso hamamee goo ogoso peledabalai ee yayo nimapoo eligileiso. <sup>14</sup> Esiga Dio Tei oso to ayo yimapoo takalai ee see nimapoo takalaiso. Goo egeesi maga yayo mo hu dokodoo poudileiso. <sup>15</sup> Esiga goo susuga mo Maye tolosa hagee molo ee mo. Goo egeesi maga ayo takolone, Dio Tei oso to ayo taka ee nimapoo takalaiso, dee ka taka."

#### Goohle goo oso goomoga goo toosibileiso

<sup>16</sup> "Biame deiyepo badoboso hamamee niyo a agalaime. Esino see biame deiyepo poogoloso hamamee niyo a see agalaiso."

<sup>17</sup> Esiga Yesuwo hamamee dili odoos aboso dieso nediliyo egeese takaso, "Yayo imapoo takolone, biame deiyepo badoboso hamamee iyo yo agalaime, doloso see, biame deiyepo poogoloso hamamee iyo yo see ka agalai, dee taka goo eyo bei ee ogoobo? Osoloso yayo takolone, yo Ama mapoo dia, dee taka goo eyo bei ee ogoobo? <sup>18</sup> Osoloso yayo imapoo takolone, biame deiyepo, dee taka goo eyo bei ogoobo? Iba to yayo taka eyo bei medee koo gooleedo," dee takemeleeso.

<sup>19</sup> Yesuye o hamamee dili odoos oso yimapoo woosala agalame debei goo ee, yo olo gooleedoloso dimapoo egeese takaso, "Ayo nimapoo takolone, 'biame deiyepo badoboso hamamee niyo a agalaime,' dee taka sabolo osoloso, 'see biame deiyepo poogoloso hamamee niyo a see ka agalai,' dee taka goo omaga niyo amapoo woosalame ka dabala? <sup>20</sup> Egeesi ma kulo-du ayo nimapoo taka. Niba gooholone pisileiso. Esino mi odoos ee goomogalaiso. O, tei takoo, niba goohalaiso. Esino goohle goo oso nimapoo goomoga goo toosibileiso. <sup>21</sup> Esiga niba medee goolee, soboso holo soomagoo biame omapoo yo dala teliso. Esino yo holo soomagoloso hamamee eyo dala too goo ee boobado bigiliso. Bei, yayo holope soomagoo goo maga diya goomogolone. <sup>22</sup> Esiga niba egeesi masi doso. Bei, niba epedee goohle sabolo doso. Esino a see wedi sibileiso niba agalaiso. Eseega domo omapoo niba diya goomogalaiso. Goomoga goo hagee odoos heeso nimaga peedee dalai. <sup>23</sup> Biame omapoo niyo goo hee talame amapoo woosalai. Esino ayo nimapoo tei taka. Niyo ogoo goo talame mo hu maga Ma mapoo woosaga, yayo nimapoo tenelaiso. <sup>24</sup> Esiga niyo

daga goo abo talame mo hu maga woosala egele. Esino epedee hamaga dulone niyo ogoo goo talame mo hu maga woosaga, niyo goo egee talaiso. Eseega goomoga goo nimapoo egee molo ee kauwuleiso."

#### Yesuye mi odoos dia wiligi odoos ee dagadi

<sup>25</sup> "Esiga ayo goo susuga hagee takomo silone, wulo wudu takomo sileeso. Esino biame siboga, ayo goo susuga ee see nimapoo wulo wudu takomo sileime. Esino ayo Mayo goo ee nimapoo woola takomo sileiso. <sup>26</sup> Esiga biame omapoo nibada goo ee ayo Ma mapoo woosalai. Bei, niyo nibada goo ee mo hu maga Ma mapoo woosamalaiso. <sup>27</sup> Bei, niyo tei tolone, a tei Ma maga simi doloso, a diya goolee sabolo egee doo goo maga Maye niba diya sooloo dolone ka badoso. <sup>28</sup> Esiga ayo Maye badeli mi maga mipoo hamapoo simiso. Osoloso see epedee mipoo hagee poogoloso Maye badeli mi mapoo ka wedi poloso," dee takaso.

<sup>29</sup> Esemee o hamamee dili odoos oso yimapoo egeese takaso, "Epedee nayo goo hagee imapoo wulo koo wudu takoo. Esino nayo goo susuga hagee imapoo woola yilige buguso. <sup>30</sup> Esiga iba tei toso, no tei Godee maga simiga. Bei, goo susuga ee no diya gooleedo. Osoloso odoos heeso namapoo woosalame gooleemelee ee ogoloso daga nayo yimapoo nei take-liso," dee takaso.

<sup>31</sup> Esemee Yesuye nei egeese takaso, "Niba epedee tei tosomoo? <sup>32</sup> Esino niba medee dui. Biame olo sibileiso, osoloso olo simiso, niyo a poogoloso nibada mosopoo kukulo dilei. Esino a mobusomoo koo badeli. Bei, mo Maye abolo hodobo badeliso. <sup>33</sup> Niyo amapoo tei too goo maga nimapoo mesie goo oso malame, ayo goo susuga hagee nimapoo olo takaso. Niba mipoo hamapoo dala ma kulodu dabalaiso. Esino niba ebilega medee kibiya debee. Bei, mipoo hagoso kitulugu ee ayo dagadileso ka badoso."

#### Yesuye o su halo Godee mapoo taka

**17** Yesu to hagee taka koodobuloso, Kei mi ma dokodoo bolone egeese takaso, "Ma, mo biame olo siboso. Esiga Nowolo ayo toowa doloso badeli goo ee odoos susuga mapoo eligi, Nowolo ayo nei nayo toowa doloso badeli goo ee odoos susuga mapoo eligilame. <sup>2</sup> Bei, odoos susuga ee balame nayo Nowolo amapoo kitulugu olo teneeso, see ayo odoos nayo amapoo tenee dimapoo kookaiyo badoboso gie badeli tenelame. <sup>3</sup> Osoloso kookaiyo badoboso gie badeli goo ee, tei Godee hedebe no gooleedalai sabolo, osoloso nayo diye di odoos, Yesu Keliso a gooleedalai ee takooso. <sup>4</sup> Tou nayo amapoo tenee ee ayo hosudoo maga, ayo mipoo hamapoo badolone, nayo toowa doloso badeli goo ee odoos susuga mapoo eligiso. <sup>5</sup> Esiga Ma, mipoo hagee moodelega molome, ayo nobolo badolone ayo toowa doloso badebeiso. Esiga goo egee see epedee amapoo tenee."

**Yesuye o hamamee dili odoo halo Godee mapoo taka**

<sup>6</sup> “Ma, mipoo hagee ma kuloduga odoo nayo amapoo tenee mapoo ayo nee goo olo eligiso. Hagee nee odoo, nayo amapoo teneeso. Osoloso diayo nee to mapoo mesimo silesibiliso. <sup>7</sup> Esiga goo susuga nayo amapoo tenee ee, namaga siboso doloso diba epedee olo gooleedooso. <sup>8</sup> Osoloso eligi goo nayo amapoo tenee ee, see ayo dimapoo teneme, see diayo eligi goo omapoo tei tooso. Osoloso ayo namaga simi goo ee, diba olo gooleedooso. Osoloso diba nosee nayo a diye di goo mapoo tei tooso.

<sup>9</sup> Esiga ayo namapoo hagee takoo mi odoo halo koo takooso. Esino odoo nayo amapoo tenee ee halo namapoo ka taka. Bei, odoo hagee nee odoo. <sup>10</sup> Egeesi ma kulodu odoo hagee bia ee ibada odoo. Diba mo odoo osoloso diba nosee nee odoo oso. Osoloso ayo toowa doloso badeli goo ee dimaga woola yilige bigiliso. <sup>11</sup> Esiga a mipoo hagee poogoo dileiso. Bei, a namapoo olo siboso. Esino mo hamamee dili odoo oso mipoo hamapoo osee dabalaiso. Ma, no tei. Nee hu oso kitulugu amapoo tenee oso odoo hagee bia medee bamelee, nayo abolo hedebe doloso egee bado egeesee solone, diba nosee dieso hedebe doloso dabalame. <sup>12</sup> Egeesi ma kulodu ayo dibolo hodobo badolone, nee hu oso kitulugu nayo amapoo tenee goo oso ayo diba medee bameleeso. Esemee odoo hee osugobebe. Esino odoo hee Godee maga pileigo dee taka hedebe ono osugobaso, Ma Godee nee to booka mapoo hogugu oso taka sabolo tebilame.

<sup>13</sup> Esiga a namapoo olo siboso. Esino a mipoo hamapoo osee badolone, goo hagee ayo namapoo ka taka, goomoga goo amapoo egee molo oso mo hamamee dili odoo dima kulodu toowa doloso malame. <sup>14</sup> Esiga ayo nee to dimapoo olo takaso. Esino mi odoo oso diba heigaso. Bei, a mi odoonee, egeeseelone diba nosee mi odoo doloso koo doso. <sup>15</sup> Esiga Ma, ayo namapoo hagee takoo, nayo mo hamamee dili odoo mi hamaga peegoo gilimado dilame koo takooso. Esino diba Saitenso tokenee peeyaga nayo medee balame ka taka. <sup>16</sup> Esiga a mi odoonee, egeeseelone diba nosee mi odoo doloso koo doso. <sup>17</sup> Nee to ee tei goo. Esiga nayo nee to omaga diba nee odoo dalame peegoo pi magee. <sup>18</sup> Esiga nayo a diye di egeesee solone, ayo diba nosee mipoo hagee ma kulodu diye deeso. <sup>19</sup> Osoloso ayo diba halo a namapoo teneeso, diba nosee tei nee odoo doloso peegoo pi magoloso ka dabalame.”

**Yesuye tei telaga odoo halo Godee mapoo taka**

<sup>20</sup> “Esiga ayo hedebe mo hamamee dili odoo ee halo namapoo koo takooso. Esino diayo eligi goo ee duloso edebeeyo amapoo tei talai odoo sabolosee diba halo ka takooso. <sup>21</sup> Osoloso Ma, ayo namapoo to egeesee ka taka. Ayo nobolo hedebe doloso egee bado, egeesee solone nei nayo abolo hedebe doloso ka badoso. Egeesee solone diba nosee hedebe doloso da-

balame ka taka. Osoloso diba nosee ibolo hedebe doloso dabalame ka taka. Egeeseega mi odoo oso a tei nayo diye di goo mapoo tei ka talame. <sup>22</sup> Esiga toowa doloso badeli goo nayo amapoo tenee ee, see ayo dimapoo teneeso, diba dieso hedebe doloso dabalame. Egeesi ma kulodu iba nosee hedebe doloso egeesee ka doso. <sup>23</sup> Esiga ayo dibolo hodobo badoso, osoloso nayo abolo hodobo badoso. Iyo egee do egeesi masi diba nosee hedebe doloso dabalai a goomogo. Eseega mi odoo oso goo egee ogoloso a tei nayo diye di goo ee gooleedalaiso. Osoloso nayo a diya sooloo dolone egee bado, egeesee solone nayo tei telaga odoo diya sooloo dolone egee bado goo sabolo mi odoo gooleedalaiso.

<sup>24</sup> Esiga Ma, tei telaga odoo nayo amapoo tenee hagee bia ee ayo badalai mi mapoo abolo hodobo dabalai, a goomogoso. Osoloso toowa doloso badeli goo ee nayo amapoo tenee ee diayo agalai, a goomogo. Mipoo modelega molome, nayo a sooloo dolone, toowa doloso badeli goo egee nayo amapoo teneeso.

<sup>25</sup> Esiga Ma, hedebe no tekepo. Mi odoo oso no gooleede. Esino ayo no ka gooleedoo. Osoloso nayo a diye di goo ee tei telaga odoo diba olo gooleedooso. <sup>26</sup> Ayo nee goo dimapoo olo yilige buguso, osoloso see yilige bigileiso, nayo a sooloo dolone egee bado goo egeesi masi oso dima kulodu ka malame. Osoloso anosee dibolo hodobo badalame.”

**Edebeeyo Yesu too**

(Matiyu 26:47-56, Maka 14:43-50, Luka 22:47-53)

**18** Yesuye Godee mapoo taka koodobuloso, see o hamamee dili odoo sabolo Kidilon howo tolobo dalo diso. Osoloso mi omapoo olipi segei homolee meleeso. Esemee Yesuye o hamamee dili odoo sabolo omapoo gadiso.

<sup>2</sup> Egeesi ma kulodu Yudas, Yesu ha teli odoo mapoo tiaseli odoo onosee homolee ee yo gooleedoo. Bei, biame abo mapoo Yesuye o hamamee dili odoo sabolo omapoo dilesso mooloogoodeliso. <sup>3</sup> Esiga Yudaseeye Loum ha teli odoo mooloogoodoo sabolo osoloso tei moso gidebeli odoo gilimado simiso. Tei moso gidebeli odoo hagee bia ee tei moso eyo wiligi odoo tebisa sabolo osoloso Pelisi odoo oso ka diye di. Diayo sibulone keme sabolo, egime sabolo, osoloso ha teli bi toloso sibilesso peledabaso.

<sup>4</sup> Esemee Yesuye goo susuga yimapoo peledabalai ee yo olo gooleedoloso malalo toboloso dimapoo egeesee takaso, “Niba odoo ogu esiamo silala?” diso

<sup>5</sup> Esemee diayo nei yimapoo egeesee takaso, “Iba Nasalet odoo Yesu ee esiamo sila,” diso. Esemee Yesuye nei dimapoo egeesee takaso, “Niyo egee esiamo silo odoo ee aso,” diso. Epedee egeesee semelee mapoo Yesu ha teli odoo mapoo tiaseli odoo Yudas yinosee omapoo dibolo hodobo tebidiso. <sup>6</sup> Esemee Yesuye dimapoo takolone, odoo egee aso, dee taka duloso diba badayo dilesso miyomoo misigedibaso.

<sup>7</sup> Esemee Yesuye see tobu dimapoo egeesee woosaso, “Niba odoo ogu esiamo silala?” Esemee see diayo nei

yimapoo egeesee takaso, "Iba Nasalet odoo Yesu ee esiamo sila," dee takaso.

<sup>8</sup> Esemé Yesuye nei egeesee takaso, "Odoó egeé aso doloso ayo nimapoo olo takaso. Esiga niyo tei a esiamo silesiboga, odoo abolo hagee silesibo diba noseé diye dalai tekepo." <sup>9</sup> Esiga goo hagoso egeesee peled-abaso. Bei, Yesuye daga o hamamee dili odoo sabolo silesibulone taka to sabolo tebilame. Bei, yayo egeesee ka taka, "Ma, odoo nayo amapoo tenee ee ayo diba medee bameleeso, odoo hee peegoo osugobe," dee takaso.

<sup>10</sup> Esemé Saimon-Pitaye o kaiya tadoloso tei moso wiligi odoo taba eyo tou teli odoo hee Malakuseeyo dulu deedeé dokolo ee kobuguso. <sup>11</sup> Esemé Yesuye Pita mapoo egeesee takaso, "Nee kaiya egeé o moso mapoo toose. Maye dala amapoo tenelame egeé molo, ayo talai tekepo," dee takaso.

<sup>12</sup> Esemé Loum ha teli odoo mooloogoodoo toowa sabolo, osoloso dia wiligi odoo taba sabolo, osoloso Yu odoo dia tei moso gidebeli odoo oso Yesu toloso dee tiaso. <sup>13</sup> Osoloso diayo yo Kayapaseeyo nalobo Anas mapoo ido diso. Kayapas hagoso dugo omapoo tei moso wiligi odoo toboloso badebeiso. <sup>14</sup> Kayapas hedebe hagoso daga Yesuwo goo maga Yu odoo dia wiligi odoo mapoo takolone, "Odoó hedebeeso odoo susuga ee halo talai tekepo," dee ka taka.

#### Pitaye Yesuwo goo gagadi

(Matiyu 26:69-70, Maka 14:66-68, Luka 22:54-57)

<sup>15</sup> Edebeeyo Yesu toloso ido dime, Saimon-Pita dio osoloso Yesu o hamamee dili odoo hee dio hamamee diso. Esino tei moso wiligi odoo taba oso odoo Pitabolo di ee † yo olo gooleedooso. Esemé yayo Yesuye di hamamee deedeé dileso, tei moso wiligi odoo taba eyo moso †† beeleé ee ma kulodu gadiso. <sup>16</sup> Esino Pita yo beeleé osulu miyopoo tebidiso. Esemé odoo Pitabolo simi oso see osulu miyopoo wedi dileso, sobo osulu gibadeli mapoo takoloso, Pita kulodu ido diso.

<sup>17</sup> Esemé sobo ogoso Pita ogoloso yimapoo egeesee woosaso, "No noseé, Yesu o hamamee dili odoo hee nosomo?" dee takaso. Esemé Pitaye nei egeesee takaso, "Haye, asonee," diso.

<sup>18</sup> Biame omapoo tei moso wiligi odoo taba eyo tou teli odoo abo sabolo osoloso tei moso gidebeli odoo diba diya kekeisime, dou toloso dou halagameleeso. Esemé Pita yinosee dileso dibolo hodobo tobudulone dou hameleeso.

#### Tei moso wiligi odoo taba oso Yesu mapoo woosa

(Matiyu 26:59-66, Maka 14:55-64, Luka 22:66-71)

<sup>19</sup> Biame omapoo tei moso wiligi odoo taba oso Yesu yayo eligi goo sabolo, osoloso o hamamee dili odoo dia goo ee yimapoo woosaso.

† Odoó Pitabolo di ee Yonee. †† TEI MOSO WILIGI ODOO TABA EYO MOSOHAGEE ANASEEYO MOSO. DAGA YAYO TEI MOSO WILIGI ODOO TOBOLOSO BADOBOOME, see hamamee Kayapaseeyo o debi tooso. Esino edebeeyo takolone, Anas yo tei moso eyo wiligi odoo taba doloso osee takeliso.

<sup>20</sup> Esemé Yesuye nei yimapoo egeesee takaso, "Odoó susuga eyo howo woola ayo goo susuga hagee takomo sileeso. Osoloso ayo ibada howo gisili moso mapoo osoloso tei moso ma kulodu peleso odoo mapoo eligimo siliso. Bei, Yu odoo susuga oso sibilesi omapoo mooloogoo deliso. Egeesi ma kulodu ayo goo hee mada takele. <sup>21</sup> Esiga bei kasi maga nayo amapoo ka woosowala? Nayo odoo ayo eligime du mapoo woose. Bei, to ayo taka ee, diba gooleedooga."

<sup>22</sup> Yesuye goo hagee takeme, tei moso gibadeli odoo hee koola omapoo tebidi oso Yesuwo mudu mapoo kobugulone egeesee takaso, "Nayo ibada tei moso wiligi odoo taba mapoo to nei egeesee takalai tekeponee," diso.

<sup>23</sup> Esemé Yesuye odoo yo kobugu mapoo nei egeesee takaso, "To ayo taka ee ma kulodu to tokenee hee taka daga, nayo goo egeé woola odoo susuga hamapoo yebigi. Esino ayo tei goo takano, bei kasalame nayo a ka kobuguwo?" dee takaso. <sup>24</sup> Esemé Yesu o dee tia sabolo osee tobudume, Anaseeye tei moso wiligi odoo taba Kayapas mapoo ido diye diso.

#### Pitaye Yesuwo goo see tobu gagadi

(Matiyu 26:71-75, Maka 14:69-72, Luka 22:58-62)

<sup>25</sup> Saimon-Pita dou holone osee tobudume, odoo aboso yo ogoloso yimapoo egeesee takaso, "No Yesu o hamamee dili odoo hee nosomo?" diso. Esemé Pitaye egeesee takaso, "Haye, asonee," diso.

<sup>26</sup> Esemé tei moso wiligi odoo taba eyo tou teli odoo hee omapoo tebidiso, yo odoo Pitaye dulu kobugu sabolo soosoo hedebe. Osoloso yayo Pita mapoo egeesee takaso, "Ayo no Yesubolo olipi segei homolee ma kulodu sileeme egeiso," diso. <sup>27</sup> Esemé Pitaye see tobu egeesee takaso, "Odoó egeé asonee," diso. Esemé epedee omapoo kolokolo takaso.

#### Yesu Paillet mapoo ido di

(Matiyu 27:1-2,11-14, Maka 15:1-5, Luka 23:1-5)

<sup>28</sup> Gesikolodee Yu odoo dia wiligi odoo oso Yesu Kayapaseeyo moso abaga see Loum gamalee odoo Paillet mapoo ido diso. Esino diba moso ee ma kulodu gadilega peegoo debeiso. Bei, diba goomegele, diayo Yu odoonee dia moso ma kulodu gaduga goo oso diba subugo kauwe dolone Gababia wo nelega peegeeyaga. <sup>29</sup> Esemé Paillet peegoo dileso tobudulone dimapoo egeesee takaso, "Odoó hagoso goo kasi moodoowo, esiga niyo yo hamapoo ka ido simiyo?" dee takaso.

<sup>30</sup> Esemé diayo nei yimapoo egeesee takaso, "Odoó hagee goo hee tele diepi, iyo yo namapoo ido sibile pegeliyo," diso.

<sup>31</sup> Esemé Pailteeye dimapoo egeesee takaso, "Niso yo ido dileso nibada tei magoo sabolo tebilame o goo midi," dee takaso.

Esemé Yu odoo dia wiligi odoo oso nei egeesee takaso, "Iyo yo wooloomalai goomogo. Esino iyo odoo

‡ Yu odoo dia tei magoo oso egeesee takooso, "Yu odoo oso Yu odoonee dia moso ma kulodu gaduga, yo subugo kauwe badalaiso."

wooloomalai Loum gamalee odooso imapoo kitulugu tenele,"<sup>32</sup> Esiga goo hagoso olo peledabaso, Yesuye eyo talai goo ee takomo silee sabolo tebilame.

<sup>33</sup> Yayo egeesee taka duloso Paillet yo see moso kulo-du gadilesi badolone, Yesu idoloso yimapoo egeesee takaso, "No tei Yu odoos dia wiligi odoos taba nosomo?" dee takaso.

<sup>34</sup> Esemee Yesuye nei egeesee takaso, "Nayo amapoo egee woosa ee no goolee takala, o, odoos heeso mo goo ee namapoo takaga ka takala?" diso.

<sup>35</sup> Esemee Pailleteeye nei egeesee takaso, "Hagee mo goonee. Bei, a Yu odoonee. Teiyo? Esino nee odoos sabolo, osoloso tei moso wiligi odoos tebisa oso no amapoo ido simiso. Esiga no goo kasi moodoowo?"

<sup>36</sup> Esemee Yesuye nei egeesee takaso, "Ayo wiligi doloso badeli goo ee mipoo hamaga koo siboso. Egeesi ma kulodu ayo wiligi doloso badeli goo ee mipoo hamapoo meli diepi, Yu odoos a teyaga, mo tou teli odoos a galalo biligeliyo. Esino ayo wiligi doloso badeli goo ee mipoo hamaga koo siboso," dee takaso.

<sup>37</sup> Esemee Pailleteeye see egeesee takaso, "Esiga no tei wiligi odoos. Teiyo, ha?" diso.

Esemee Yesuye nei egeesee takaso, "Nayo amapoo takolone, a tei wiligi odoos, dee takemeni, ee tei taka. A mipoo hamapoo soomagoosoo, ayo odoos mapoo tei goodee takomo silame. Esiga edebeeयो tei goo ma kulodu dogaa, diba mo to dulone ka doso."

<sup>38</sup> Esemee Pailleteeye nei egeesee takaso, "Tei goo ee ogoobo?" diso.

#### Pailleteeye Yesu wooloomalame kitulugu tenee

(Matiyu 27:15-31, Maka 15:6-20, Luka 23:13-25)

Paillet see peegoo gadilesi tobululone Yu odoos dia wiligi odoos tebisa mapoo egeesee takaso, "Ayo odoos hamapoo goo hee koo ogo."<sup>39</sup> Esino ayo nibada adaga dia goo ee dodolone, niyo Gababia wo ne biame mapoo, ayo odoos hee neliga moso ma kuloduga peegoo tamageliso. Esiga ayo Yu odoos nibada wiligi odoos hagee peegoo tamagalai, niba goomogosomo?" dee takaso.

<sup>40</sup> Esemee diayo toso neligidi nei egeesee takaso, "Haye, odoos egee peegoo tamagalai, iba koo goomogo. Esino nayo Balabas ono peegoo ka tamagee," dee takaga meleso. Esino Balabas hagoso Loum odoos dia wiligi odoos tebisa mapoo ha temeleso.

**19** Osoloso Pailleteeye o ha teli odoos mapoo takolone, Yesu tolosos we tiso weeye, diso.<sup>2</sup> Esemee diayo yo woolosos we ti sidolosos, o wiligi mapoo medisos, osolosos wiligi odoos tebisa oso kali dugo bige sage yimapoo kadiso.<sup>3</sup> Osolosos diayo yo manolone yimapoo takolone, "Yu odoos dia wiligi odoos taba, iyo nee hu dokodoo poudosoo," dolone o mudu mapoo kobugu demeleso.

<sup>4</sup> Esemee Pailleteeye see o moso kuloduga peegoo gadilesi tobululone odoos mooloogoodoo mapoo egeesee takaso, "Niso be, ayo Yesu nimapoo ido

sibileisoo, ayo yimapoo goo hee egele poogoo goo nimapoo ee eligileiya," dee takaso.<sup>5</sup> Yayo egeesee takeme, Yesu we ti sidoo o wiligi mapoo medilosoo dugo bige sage ka sabolo peegoo gasimiso. Esemee Pailleteeye dimapoo egeesee takaso, "Niso ege, odoos hagoso," diso.

<sup>6</sup> Esemee epedee omapoo tei moso wiligi odoos tebisa sabolo, osolosos tei moso gidebeli odoos oso yo ogolosos toso neligidi egeesee takaso, "Yo homo bulubo magoo ma dokodoo yogusos enige. Yo homo bulubo magoo ma dokodoo yogusos enige," dee takemeleso.

Esemee Pailleteeye dimapoo egeesee takaso, "Niso yo homo bulubo magoo ma dokodoo yogusos enigilame ido di. Bei, ayo yimapoo goo hee koo ogo," diso.

<sup>7</sup> Esemee Yu odoos dia wiligi odoos tebisa oso nei yimapoo egeesee takaso, "Ibada tei magoo oso egeesee takooos, yo talai tekepo. Bei, yayo takolone, yo Godeeyo Owolos, dee takeliso," diso.

<sup>8</sup> Esino Paillet goo hagee duloso diya obulone, see moso kulodu gadilesi tobululone, Yesu mapoo egeesee takaso, "No odoos ogu biayo?" dee takaso. Esemee Yesuye Pailleteeye taka to eyo su nei takele.<sup>10</sup> Esemee Pailleteeye yimapoo egeesee takaso, "Nayo amapoo to nei takele poogoosoba? Bei, no gooleedeleyo, ayo no peegoo tamagee dee takalai, osolosos no homo bulubo magoo ma dokodoo yogusos enige dee takalai, amapoo kitulugu molosoo?" dee takaso.

<sup>11</sup> Esemee Yesuye nei yimapoo egeesee takaso, "Kitulugu epedee namapoo egee moloos ee no goolee tele. Esino kitulugu hagee Godeeye namapoo ka tenee. Esiga odoos a tolosos namapoo tenee eyo goo tokenee oso nee goo tokenee ee dagadilesi ka molosoo," diso.

<sup>12</sup> Pailleteeye to hagee duloso, Yesu peegoo tamagalai yo goomogaso. Esino Yu odoos dia wiligi odoos tebisa oso to neligidi egeesee takaso, "Odoos agayo eyo nediliyo takolone yo wiligi odoos, dee takomo siloga, yo Loum wiligi odoos Sisa mapoo ha toso. Osolosos nayo odoos hagee peegoo tamagooga, no Sisayo odoonee," dee takaga meleso.

<sup>13</sup> Pailleteeye to hagee duloso, Yesu peegoo ido sibileisoo, yo goo midili odoos oso bili mapoo biasos. Bili mi egee takolone, yopoo mi, deliso. Osolosos Hibulos toso takolone, Gabata, deliso.<sup>14</sup> Esiga goo hagee diayo Gababia wo nali sadee ee ma kulodu dia hasali biame ee mopoodoo dalai biame mapoo ka peledaba. Epedee omapoo osokoo howo olo oo domo talai koolaa tabaso. Esemee Pailleteeye Yu odoos mapoo egeesee takaso, "Niso ege. Nibada wiligi odoos hagoso," dee takaso.

<sup>15</sup> Esemee diayo toso neligidi egeesee takaso, "Yo wooloome. Yo wooloome. Yo homo bulubo magoo ma dokodoo yogusos enige," dee takemeleso.

Esemee Pailleteeye dimapoo egeesee takaso, "Niba goomogosomo, ayo nibada wiligi odoos ee homo bulubo magoo ma dokodoo yogusos enigilei?" dee takaso.

Esemee tei moso wiligi odoos tebisa oso nei yimapoo egeesee takaso, "Ibada wiligi odoos hedebe Sisasoo, odoos hee me," diso.

<sup>16</sup> Esemé Yesu homo bulubo magoo ma dokodoo yoguso enigilame, Paileteeye yo dimapoo teneeso. Esemé o ha teli odoososo Yesu tolososo ido diso.

**Yesu homo bulubo magoo ma dokodoo yoguso eniga**  
(Matiyu 27:32-44, Maka 15:21-32, Luka 23:26-43)

<sup>17</sup> Ha teli odoososo Yesu tolososo ido dulone, o homo bulubo magoo ee eyo eimaloso mi hee eyo hu wiligi ki mi deli mapoo ido diso. Mi hagee Hibulu toso takolone Gologota deli. <sup>18</sup> Osolososo mi omapoo diayo Yesu homo bulubo magoo ma dokodoo yoguso enigaloso tuluguso. Osolososo odoososo bakadio onosee homo bulubo magoo mapoo yoguso enigaloso, odoososo hee Yesuwo deedeede dokolo tulugu, osolososo hee dobusu dokolo tulugu diso.

<sup>19</sup> Osolososo Paileteeye o odoososo mapoo takolone, to hogugiyee dee takeme, diayo to hageesee hoguguloso Yesuwo oo poogoo ma dokodooga kalamasoo,

Yesu Nasalet odoososo, Yu odoososo dia wiligi odoososo taba <sup>20</sup> Esiga to hogugu hagee Yu odoososo dia to sabolo, osolososo Loum odoososo dia to sabolo, osolososo Guliki odoososo dia to ososo hogugu. Esiga odoososo susuga to hogugu egeee ogolososo hesigasoo. Bei, Yesu homo bulubo magoo ma dokodoo yoguso eniga mi ee Yelusalem maga haga hoogoonee. <sup>21</sup> Egeesoo ma kulodu tei moso wiligi odoososo tebisa ososo sibilesoso Paillet mapoo egeesee takasoo, "Nayo to hogugulone, yo Yu odoososo dia wiligi odoososo taba dolososo na hogugi. Esino hageesee hogugi, 'Odoososo hagoso takolone, yo Yu odoososo dia wiligi odoososo taba, dee takomoo silisoo,' dee," dee takasoo.

<sup>22</sup> Esemé Paileteeye nei dimapoo egeesee takasoo, "To ayo hogugu hagee osee hogugu malaisoo," dee takasoo.

<sup>23</sup> Ha teli odoososo bakadio bakadio di ososo Yesu homo bulubo magoo ma dokodoo yoguso enigaloso, o dugo diesono domo pulosoo toosoo. Osolososo o sedi sage edebeeeyo duselee poogoo sabolo diayo toosoo. <sup>24</sup> Osolososo ha teli odoososo dieso nei takoo nei takoo dolone egeesee takasoo, "Iba dugo hagee wulo domo didamoo. Esino dugo hagee odoososo agayoo toowa belesoo yosoo dasigeli hee dasigaloo ogomoo," diso. Osolososo goo hagoso olo peledabaso, Godeeyoo to booka mapoo hogugu sabolo tebilame. Bei, Godeeyoo to ososo egeesee takosoo, "Diayo mo dugo diesono pulosoo toosoo.

Osolososo mo dugo sage ee talame yosoo dasigeli hee dasigasoo," diso.

Esiga ha teli odoososo ososo goo egeee moodosoo.

<sup>25</sup> Egeesee somolome, Yesuwo owee sabolo, osolososo oweeyoo omoloo sabolo, osolososo Kolopaseeyoo osoboo Meli sabolo, osolososo Meli-Magadalin ososo Yesu homo bulubo magoo ma dokodoo molome, koola omagaa tebisamolone balagaa meleesoo. <sup>26</sup> Esemé Yesuyee owee sabolo osolososo o hamamee dili odoososo yayo diya gweli diba koola mapoo tebisamolome ogolososo owee mapoo egeesee takasoo, "Mo wee, odoososo hagee nowolosoo," dee takasoo. <sup>27</sup> Osolososo see o hamamee dili odoososo hedebe omapoo egeesee takasoo, "No ege, noowee hagoso," diso. Biame domo omagaa Yesuwo

hamamee dili odoososo hagoso o moso mapoo Meli ido dileesoo medee bameleesoo.

### Yesuyee ta

(Matiyu 27:45-56, Maka 15:33-41, Luka 23:44-49)

<sup>28</sup> Esiga goo hagoso dileesoo koodobumee, tou susugaa Godeeyee Yesu mapoo tenee ee yayo olo hosudoosoo dolosoo gooleedoosoo. Egeeseelone Godeeyoo to booka mapoo hogugu sabolo tebilame egeesee takasoo, "A howo na poogoo," diso. <sup>29</sup> Mi omapoo wain i koo hadali † katoloo mapoo keesoo ee magoo meleesoo. Esemé odoososo heesoo homo sage tolososo su mapoo dugo tialogolosoo, wain i omapoo olugoo dolosoo yayo nalame, Yesuwo maga mapoo heligisoo. <sup>30</sup> Esemé Yesuyee wain i egeee olo nalosoo egeesee takasoo, "Goo susugaa olo hosudoosoo," dee takasoo. Osolososo oo goobodoo bulosoo taso.

<sup>31</sup> Esiga biame egeee Yu odoososo hasali biame ee mopoodoo deli biame ososo. Esino dia hasali biame egeee goo diya toowa. Bei, Godeeyee Gababiasoo goo ee Yu odoososo gooleebigil sadee ee ma kulodu hasali biame egeee meleesoo ††. Goo egeesoo maga Yu odoososo dia wiligi odoososo tebisa ososo dia hasali biame mapoo odoososo ta eyo kou ee homo bulubo magoo ma dokodoo osee malai, diba goomegelee. Esiga diayo Paillet mapoo egeesee takasoo, "Odoososo homo bulubo magoo ma dokodoo egeee molo saga wedilame, dibada homo gebisaa poogolosoo, dia kou miyomoo tomeilesoo peegoo todi," dee takasoo. <sup>32</sup> Esemé ha teli odoososo ososo dileesoo odoososo hee Yesuwo dee deedeede dokolo eniga eyo homo gebisaa poogoosoo. Osolososo see odoososo hee Yesuwo dee dobusu dokolo eniga eyo homo onosee gebisaa poogoosoo. <sup>33</sup> Esino diayo sibilesoso egeino, Yesu olo tanemee, o homo gebisaa pegelee. <sup>34</sup> Esino ha teli odoososo heesoo o molo tolososo Yesuwo ho hodio mapoo gusoo. Esemé haga booloogelegaa, sawo sabolo osolososo howo sabolo molosoo gu omagaa soosoo.

<sup>35</sup> Esiga goo hagoso peledabaa egeee odoososo ‡ ososo goo hamagaa tei goo takasoo. Osolososo yo gooleedoo, yo tei goo takeli. Egeesoo ma kulodu goo yayo takaa hamapoo niyoo tei talame ka takaa.

<sup>36</sup> Esiga goo hagoso tei peledabaso, Godeeyoo to booka mapoo hogugu ososo takaa sabolo tebilame. Bei, Godeeyoo to ososo egeesee takosoo, "O ki hee gebisaa pagalaime," dee takosoo.

<sup>37</sup> Osolososo Godeeyoo to hogugu heesoo see egeesee takosoo,

"Edebeeeyoo odoososo diesoo molosoo gu mapoo balagaa malaisoo," dee takosoo.

† WAIN I KOO HADALI - bi mauwe odoososo sabolo osolososo ha teli odoososo wain i koo hadali naliso, howo nala pegeleega pagalame.

†† Godeeyee Gababiasoo goo ee Yu odoososo gooleebigil sadee ee ma kulodu, diayo Tasdee biame gesi mapoo Gababiasoo wo naliso. ‡ Odoososo hagee Yonee

**Yesu mi doosoo**

(Matiyu 27:57-61, Maka 15:42-47, Luka 23:50-56)

<sup>38</sup> Osoloso hamamee, odoo hee Alimatiya mi mapoo badeli, o hu Yosep, yayo Yesuwo kou talame Paillet mapoo dilesa woosaso. Yosep hagee Yesu o hamamee dili odoo hee yoso. Esino yo Yu odoo dia wiligi odoo tebisa ee bolo obulone, mada Yesuye di hamamee diliso. Esem Pailteeye yimapoo kitulugu teneeso, yayo Yesuwo kou talame. Esem Yosepeeye dilesa Yesuwo kou ee homo bulubo magoo ma dokodooga miyomoo tomeilesa peegoo todiso. <sup>39</sup> Esem Nikodimaseeye yo pidimo diso. Nikodimas hagee daga gesi Yesu agalame di odoo oso. Yayo sisigageli bi medee tekepo Yesuwo kou mapoo hedilame todiso. Sisigageli bi medee tekepo hagoso hegi ee 30 kilo egeesi masi. <sup>40</sup> Osoloso odoo bakadio oso Yesuwo kou toloso, Yu odooso odoo toga mi dooseli goo ee dodolone, sisi-gageli bi medee tekepo oso Yesuwo kou mapoo hediloso dugo semeso tiegisaso. <sup>41</sup> Egeesi ma kulodu Yesu homo bulubo magoo ma dokodoo eniga mi eyo koola omapoo homolee meleeso. Homolee ee ma kulodu bi dia yo ou poogoo mapoo daga odoo tayo kou magele poogoo meleeso. <sup>42</sup> Esiga dia hasali biame bei mooloogalai koola tooboome, diayo Yesuwo kou toloso saga yo ou poogoo ee ma kulodu magooso. Bei, yo ou poogoo egee haga hoogooneega.

**Bi mosoowe molo egei**

(Matiyu 28:1-8, Maka 16:1-8, Luka 24:1-12)

**20** Sadee toowa gesikolo mi hadobilega molome, Meli-Magadaliineeye Yesuwo bi agalame diso. Yayo sibilesa egeino, yo toowaso wulu ou kisi ee peegoo bidigamo dilesa molome egeiso. <sup>2</sup> Esem Meliye see hoguo dilesa Saimon-Pita dio osoloso Yesuwo hamamee dili odoo yayo diya gweli mapoo egeesee takaso, "Lodeeyo kou peegoo todina. Osoloso diayo o kou todilesa magoo mi ee, iba gooleedele," dee takaso. <sup>3</sup> Esem Pita dio osoloso o hamamee dili odoo hee egee dio bi mapoo agalame diso. <sup>4</sup> Diba hoguo diyadaga molome, o hamamee dili odoo heeso Pita dagadileso bi mapoo peledabaso. <sup>5</sup> Osoloso yo gauwuloso yo ou poogoo ma kulodu keesee egeino, hedebe dugo seme Yesuwo kou tiegisa ono molome egeiso. Esino yo yo ou poogoo ma kulodu gadile. <sup>6</sup> Esem Saimon-Pitaye hamamee sibilesa peledoboloso, yo ou poogoo ma kulodu gadilesa egeino, dugo Yesuwo kou tiadoo hedebe ono omapoo molome egeiso. <sup>7</sup> Osoloso dugo Yesuwo wiligi tiadoo ee medee tiadoloso obusomo peegoo magoo molome egeiso. <sup>8</sup> Esem o hamamee dili odoo hee bi mapoo daga malalo peledaba oso yo ou poogoo ma kulodu gadiso. Yo gadilesa goo hagee ogoloso tei tooso. <sup>9</sup> Egeesi ma kulodu Godeeyo to booka mapoo hogugu oso takolone, yo ta maga hogaduloso gie badalaiso, dee taka goo eyo bei ee, diba medee kibiya gooleedelega osee debeiso. <sup>10</sup> Osoloso o bakadio see mosopoo wedi diso.

**Yesuye Meli-Magadalin mapoo peledaba**

(Matiyu 28:9-10, Maka 16:9-11)

<sup>11</sup> Esino Meli-Magadalin bi ma peegoo tobudulone pusumeleeso. Yo omapoo pusulone gauwuloso, yo ou poogoo ma kulodu keesee egeino, Godeeyo momaiye bakadio dugo heliye kalagaloso doboome egeiso. Momaiye heeso Yesuwo wiligi poogoo dokolo buo, osoloso heeso kai poogoo dokolo buo doloso doboome egeiso.

<sup>13</sup> Esem momaiye bakadio oso yimapoo egeesee takaso, "Sobo no, bei kaseega ka pusalala?" dee takaso.

Esem Meliye dimapoo egeesee takaso, "Diayo mo Lodeeyo kou ee peegoo todina. Esino diayo o kou magoo ee a gooleedele," diso. <sup>14</sup> Meliye to egeesee takoloso bidi toboloso keesee egeino, Yesu tobudo egeiso. Esino yayo goolee, Yesu odoo hee gooleeso.

<sup>15</sup> Esem Yesuye yimapoo egeesee takaso, "Sobo no, bei kasiga ka pusalala? Osoloso no odoo ogu esi-amo silala?" dee takaso.

Esem Meliye goolee yo homolee mapoo tou teli odoo oso bele dolone yimapoo egeesee takaso, "Emegei, nayo Yesuwo kou peegoo todilesa ka magoo daga, mi egee amapoo takee. Eseega ayo dilesa o kou egee ka talaiya," dee takaso.

<sup>16</sup> Esem Yesuye yimapoo egeesee takaso, "Meli," diso.

Esem Meliye bidi toboloso yimapoo Hibulu toso egeesee takaso, "Laboni." To hageeyo bei ee eligili odoo dolone ka takooso.

<sup>17</sup> Esem Yesuye yimapoo egeesee takaso, "A nayo na gide. Bei, a mo Ma mapoo wedi pele. Esino nayo dilesa mo hamamee dili odoo mapoo takee, 'A mo Ma Godee mapoo palame ka seeso. Ma Godee hedebe onosee dibada Godee osoloso nibada Godee.' dee takee," diso.

<sup>18</sup> Esem Meli-Magadaliineeye see wedi sibilesa Yesu o hamamee dili odoo mapoo egeesee takaso, "Ayo Yesu olo egeiso," diso. Osoloso goo susuga Yesuye yimapoo taka ee see yayo dimapoo takaso.

**Yesuye o hamamee dili odoo mapoo peledaba**

(Matiyu 28:16-20, Maka 16:14-18, Luka 24:36-49)

<sup>19</sup> Sadee toowa habe omapoo Yesu o hamamee dili odoo oso Yu odoo dia wiligi odoo tebisa ee bolo obulone, hodobo mooloogoo doloso moso osulu medee kisigaloso debeiso. Esem omapoo Yesuye sibilesa peledoboloso tobudulone dimapoo egeesee takaso, "Mesie goo oso nibolo osee mele dee," dee takaso. <sup>20</sup> Yayo to egeesee takoloso tobudulone, o dee boowo sabolo, osoloso o ho hodio mapoo moloso gu eyo boowo ee dimapoo eligiso. Esem Yesu o hamamee dili odooso yo ogoloso diya goomogaso.

<sup>21</sup> Osoloso Yesuye see tobu dimapoo egeesee takaso, "Mesie goo oso nibolo osee mele dee. Esiga Maye a diye diga, ayo niba nose diye deeso," dee takaso.

<sup>22</sup> Yesuye goo hagee takoloso see dimapoo magaso hooloo nilone egeesee takaso, "Niba Dio Tei te," diso.

<sup>23</sup> Osoloso see dimapoo egeesee takaso, “Niyo odoos heeyo goo tokenee boobado buguga, odoos egee bia dia goo tokenee ee hapoloso boobado bigileiso. Esino niyo odoos heeyo goo tokenee boobado bigilega poo-googa, odoos egee bia dia goo tokenee ee hapoloso boobado bigileime,” dee takaso.

### Tomaseeye Yesu ogoloso tei too

<sup>24</sup> Esino Yesu o hamamee dili odoos hee Tomas, o hu hee Didimas † deli, yo Yesuye o hamamee dili odoos mapoo dilesos peledaba biame mapoo yo omapoo badele. <sup>25</sup> Esemes Yesu o hamamee dili odoos oso yimapoo egeesee takaso, “Iba Lodee olo egeiso,” dee takaga meleeso. Esino Tomaseeye dimapoo egeesee takaso, “A niyo egee takoo duloso epedee tei talaimes. Esino a mawo o dee boowo ogoloso mo dee wolugusos omapoo sigos, osolosos o ho hodos mapoo molosos gu eyos boowo ee ogos dolosos mo deesos omapoo sigogas, a tei ka talai,” dee takaso.

<sup>26</sup> Osolosos sadees hedebe poogolosos hamamees, Yesu o hamamee dili odoos oso mosos hedebe mapoo mooloogos dolosos debeisos. Biames omapoo Tomas yinosees dibolos hodobos omapoo badebeisos. Esino dibas osulos susugas kisigalosos doboomes, Yesuyes diayos debeis domos mapoo peledobolosos tobudulones egeesee takasos, “Mesies gos osos nibolos osee meles dees,” diso. <sup>27</sup> Osolosos tobudulones Tomas mapoo egeesee takasos, “Nees dees wolugusos osos mo dees boowo hamapoo sigolos egees. Osolosos mo ho hodos mapoo molosos gu eyos boowo mapoo nees deesos siges. Nos gos hagas nas egeges, esinos amapoo tei tes,” dee takasos.

<sup>28</sup> Esemes Tomaseeyes neis yimapoo egeesee takasos, “Mos Lodees osolosos mos Godees,” diso.

<sup>29</sup> Esemes Yesuyes yimapoo egeesee takasos, “Nayos a egeigas, amapoo tei ka tosos. Esinos edebeeyos a egelegas poogolosos wulos amapoo tei togas, Godeeyes neis dimapoo diyas goomogalaisos,” dee takasos.

### Yoneeye to booka hamapoo hogugu gos eyos bei

<sup>30</sup> Esigas Yesuyes o hamamee dili odoos dias howos woolas gos toowas opusomos di abos hees moodoogamos silisos. Esinos gos egees bookas hagees mas kulodus hogugules.

<sup>31</sup> Esinos to hagees hogugusos, niyos Yesu yo tei Kelisodosos dolosos gos omapoo tei talames. Osolosos niyos yo tei Godeeyos Owolodosos dolosos gos omapoo tei talames. Osolosos yimapoo tei too gos magas gies badelis ka talames.

### Yesuyes Gelilis abeis mapoo o hamamee dili odoos mapoo peledaba

**21** Osolosos sees hamamees Yesu o hamamee dili odoos osos Gelilis abeis †† palagas mapoo doboomes, yayos omapoo peledabasos. Gos hagosos egeesee peledabasos.

† DIDIMAS hu eyos bei ee biames hedebe mapoo bakadios soomagos dolones ka takoosos. †† GELILIS ABEIYOS hu hees ee Taibiliyas.

<sup>2</sup> Biames omapoo Yesu o hamamee dili odoos hagees biasos hodobos debeisos. Saimon-Pitas, osolosos Tomas (o hu hees Didimas), osolosos Gelilis mi toowas ee mas kulodus mi pepookos Kanas mapoo badelis odoos hees Nataniyos, osolosos Sebediyos owolos bakadios, osolosos Yesu o hamamee dili odoos bakadios omapoo debeisos. <sup>3</sup> Esemes Saimon-Pitayes o odoos mapoo egeesee takasos, “A peis oluguleis dias,” diso. Esemes odoos abosos egeesee takasos, “Ibas nobolos hodobos sibas,” dee takasos. Esemes dibas du mapoo hodobos tebisasos. Esinos dibas gesis di kobumos sileenos, di hedebe giles.

<sup>4</sup> Egeeseelones gesikolodees Yesuyes abeis palagas mapoo tobudumes egeisos. Esinos Yesu o hamamee dili odoos du mas kulodus tebisamolones Yesu ogolosos, diayos goolees yo odoos hees gooleesos. <sup>5</sup> Esemes Yesuyes abeis palagas magas tobudulones dimapoo egeesee idagasos, “Emegeis, nibas di giligasomos?” diso. Esemes diayos neis egeesee takasos, “Hayes, ibas di hedebe giles,” dee takasos.

<sup>6</sup> Esemes Yesuyes dimapoo egeesee takasos, “Nibasas peis tolosos sees deedes dokolos mapoo olugis, egeeseegas nibas di giligileisos,” diso. Esemes dibas Yesuwos to dulosos gos egeesis moodosos. Esemes di beis dias peis mas kulodus galagadisos. Esemes diayos dias peis poudulosos du mas kulodus magalais tebile poogosos.

<sup>7</sup> Esemes Yesu o hamamee dili odoos hees yayos diyas gwelis osos Pitas mapoo egeesee takasos, “Egees yo Lodees-doo,” diso. Pitayes to egeesee takasos dulosos o dugos tigamagos sees kalosos Yesu mapoo tabuos dilames howom-osos bologobugusos. <sup>8</sup> Esinos Yesu o hamamee dili odoos abosos du sumos dulones, dias peis ee di sabolos howos kulomoogas abeis pees mapoo gisibamos disos. Beis, diayos peis olugus omagas widis pees ee hagas hoogoones, wulos 100 mitas egeesis. <sup>9</sup> Osolosos dibas sibilesos dias du gimagolosos mubis mapoo dabooogolosos egeinos, dous hoo mapoo di sabolos wo sabolos sis molomes egeisos.

<sup>10</sup> Esemes Yesuyes dimapoo egeesee takasos, “Dis niyos epedees giligas egees abos hamapoo tosisbes,” dee takasos.

<sup>11</sup> Esemes Saimon-Pitayes du mas kulodus dabooogolosos peis di sabolos widis pees mapoo gisibamos dilesos booboosees mapoo gisubus magosos. Peis ee mas kulodus di toowas bei, 153 egeesis molomes egeisos. Esinos peis mas kulodus di bei galagas dinos dias peis tologos bigiles. <sup>12</sup> Esemes Yesuyes dimapoo egeesee takasos, “Nibas neis nalames sibadees,” diso. Esinos Yesu o hamamee dili odoos dimas kulodus odoos heesos Yesu mapoo takolones, “nos odoos ogumos?” dees takeles. Beis, dibas olos gooleedoo, yo tei Lodees. <sup>13</sup> Esemes Yesuyes di sabolos wo sabolos tolosos dimapoo teneesos.

<sup>14</sup> Esigas Yesu tas magas hogadulosos hamamees, o hamamee dili odoos mapoo peledabas hagosos bakadios hedebe disos.

### Yesu dios Pitas dios

<sup>15</sup> Osolosos dibas neis nalosos koodobulosos, Yesuyes Saimon-Pitas mapoo egeesee takasos, “Saimon, Yoneeyos owolos, nayos a gwelis osos odoos hagees biasos a gwelis ee dagadusomos?” dees takasos.

Eseme Pitaye nei egeesee takaso, "O, Lodee. Ayo no diya goolee sabolo hagee bado goo ee, no goolee-doo," diso.

Eseme Yesuye nei yimapoo egeesee takaso, "Mo sipi be ee nayo medee poopomelee," dee takaso.

<sup>16</sup> Osoloso Yesuye see tobu egeesee takaso, "Saimon, Yoneeyo owolo, nayo a diya goolee sabolo badosomo?" diso.

Eseme yayo nei Yesu mapoo egeesee takaso, "O, Lodee. Ayo no diya goolee sabolo hagee bado goo ee, no olo gooleedoo," dee takaso.

Eseme Yesuye yimapoo egeesee takaso, "Mo sipi be nayo medee bamelee," diso.

<sup>17</sup> Osoloso see bakadio hedebe di mapoo Saimon-Pita mapoo egeesee takaso, "Saimon, Yoneeyo owolo, nayo a diya goolee sabolo badosomo?" dee takaso.

Eseme Pita to hedebe hagonosee Yesuye bakadio hedebe di taka ee duloso diya gooheselo. Esiga yayo nei egeesee takaso, "Lodee, goo susuga no gooleedooso. Osoloso ayo no diya goolee sabolo hagee bado goo ee, no olo gooleedooso," diso.

Eseme Yesuye yimapoo egeesee takaso, "Mo sipi be nayo medee poopomelee. <sup>18</sup> Esiga ayo namapoo tei taka. No gie kauwa mapoo bi medee mopoodoo doloso no goomoga mi mapoo diliso. Esino no adaga poloso badoga, odoo heeso nee dee mapoo tiso bagagoloso, no mi nayo goweli mapoo gisibado dileiso." <sup>19</sup> Yesuye Pita mapoo taka hagee, Pitaye dooboo kasee talai goo ee taka. Esiga Pitaye ta maga Godeeyo hu dokodoo poudileiso. Osoloso Yesuye

yimapoo mapoo egeesee takaso, "No a deedee," diso.

<sup>20</sup> Eseme Pitaye bidi toboloso egeino, o hamamee dili odoo Yesuye diya gweli oso dima miligiyopooga sibume egeiso. Yesuwo hamamee dili odoo hagee biaso daga o hamamee dili odoo sabolo nei nolone dobolone, Yesu mapoo bouwa melee oso, yimapoo egeesee ka woosa, "Lodee, odoo agayo no ha teli odoo mapoo ka tiasalaiyo?" dee taka odoo ee hagoso.

<sup>21</sup> Eseme odoo ogoso dima hamamee simi ee ogoloso, Pitaye Yesu mapoo egeesee takaso, "Lodee, odoo hamapoo kasee moodoolaisomo?" dee takaso.

<sup>22</sup> Eseme Yesuye yimapoo egeesee takaso, "Yo osee badoga, ayo see wedi sibilesyo yo agalai, a goomogoga, egeesee selaiso. Esino egee nee goonee. No wulo a deedee," dee takaso. <sup>23</sup> Eseme Yesu o hamamee dili odoo egee talaime, dee taka goo ee tei telaga odoo abo mapoo dudobuguso. Esino Yesuye takolone odoo egee talaime, dee takele. Yo wulo egeesee taka, "Yo osee badoga, ayo see wedi sibilesyo yo agalai, a goomogoga, egeesee selaiso. Esino egee nee goonee," dee ka taka.

<sup>24</sup> Esiga Yesu o hamamee dili odoo hagoso goo susuga yayo egei ee booka hamapoo hoguguso. Iba gooleedooso, goo susuga yayo hogugu ee tei goo.

<sup>25</sup> Esiga Yesuye goo hagee sabolo osoloso goo abo sabolo olo moodooso. Esino goo susuga egee booka hamapoo hogugule. Esino goo susuga egee booka abo mapoo hogugu diepi, mipoo hamapoo booka bei meliyo. Egeeseelone booka magalai debi me meliyo.



# Diye Di Odo

## Diye di odoo booka goo eyo bei

Lukaye daga malalo o booka mapoo to tekepo Yesu Kelisowo goo hoguguloso, see Diye di odoo booka hagee hoguguso.

Odo Luka yo daga melesenee neli odoo badolone, o odoo Poloye Godeeyo to takomo sileeme, yibolo sileeso. Booka hagooso Yesuye toloso see hogabuloso kei mi ma dokodoo polome, hamamee sosee bei mooloogoo goo ee takooso. Diye di odoo booka hageeyo kuloduga taka goo ee dugo 30 egeesi ee ma kulodu sibulone peledobomo simiso.

Esiga sapta 1 abaga dino sapta 7 amaga takooso, daga malalo Yolusalem mapoo to tekepo Yu odoowe dibusomo toloso debei goo ee. Esino sapta 8 abaga dino sapta 12 amaga takooso, to tekepo Yu odoo abo Yolusalem peegoo debeli odoo mapoo takomo di goo ee. Osoloso see sapta 10 maga takooso, Yu dele poogoo odoo oso daga malalo to tekepo duloso tei too goo ee. Osoloso hamamee sapta 13 abaga dino hoo poogoo maga takooso, Poloye mi opusomo opusomo di susuga mapoo Yu odoo sabolo, osoloso Yu dele poogoo odoo sabolo dimapoo to tekepo takomo di goo ee.

Lukaye Diye di odoo booka hageeyo kulodu hogugu goo toowa bakadio hagooso. Malalo goo hagooso. To tekepo hagee mi opusomo opusomo di mapoo debeli odoo susuga dibada. Bei, Godeeyo to tekepo tenee hagee hedebe Yu odoo mapoo tenele. Haye, Yu dele poogoo odoo diba nosee to tekepo dimapoo teneeso. Osoloso goo hee hagooso. Diye di odoo booka oso daga malalo Dio Tei oso tei telaga odoo mapoo meledaba goo ee eligiso. Osoloso amaga bei mooloogoloso abaga simino epedee hamapoo Dio Tei oso tei telaga odoo susuga pidilone kitulugu ka tonomoloso.

## Yesu kei mi ma dokodoo ido pala goo

**1** Tiyopoles emegei,  
Ayo daga namapoo booka hoguguloso tenee omapoo, Yesuye goo tomo sili sabolo yayo eligi goo sabolo hoguguso. Osoloso yo kei mi mapoo ido palai goo sabolo hoguguso. Osoloso yo kei mi mapoo ido pelega badolone, Dio Tei oso kitulugu maga diye di odoo yayo gilimadoo odoo dimapoo kokodo takaso.  
<sup>3</sup> Osoloso Yesu toloso midoo maga hogabuloso beeame 40 eyo kulodu yayo tei hogabia goo ee diayo ogoloso tei talame yayo silone, o hamamee dili odoo mapoo peledoboo demeleeso. Osoloso dibolo silone, Godeeye wiligi doloso badeli goo dimapoo takomo siliso.  
<sup>4</sup> Osoloso beeame hedebeeso Yesu o hamamee dili odoo gilimadoloso nei nolone badolone, Yesuye to kitulugu sabolo takaso, "Niba Yolusalem poogoloso na di! Esino mo maye taka Dio Tei oso sibilei omapoo dulone bolone ka debee, bei mo maye to hagee nimapoo olo takaso.  
<sup>5</sup> Esiga Yoneeye niba howodeeso sauwidigaso, esino beeame koola mapoo Dio Tei oso sibileso nimapoo kitulugu tenelaiso," diso.

<sup>6</sup> Esem diye di odoo Yesubolo Olipi mubi mapoo mooloogoodoloso dobolone, diayo yimapoo woosaso, "Lodee, nayo epedee hamapoo Isalael odoo oso ibada mi gidabalame kitulugu see imapoo tenelaisomo?" diso.

<sup>7</sup> Esem Yesuye dimapoo nei egeese takaso, "Hedebe maye beeame hageesi yayo kitulugu sabolo mageliso. Esiga beeame egeesi niyo gooleedalai nibada goonee.  
<sup>8</sup> Esino Dio Tei nimapoo meledobooga, niba kitulugu talaiso. Osoloso niyo mo goo mi toowa mapoo takomo dileiso, Yolusalem abaga bei mooloogoloso abaga dino, Yudiya mi toowa mapoo, osoloso Samalia abaga dino mi toowa hoopoo mapoo takomo dileiso."

<sup>9</sup> Yesuye to hagee takoloso tobudulone, diayo balaga molome, Godeeyo kitulugu oso kei mi mapoo yo ido palaso. Esem kei ma dokodooga kolobo oso sibileso Yesu gooloogoo bugume diayo egele poogooso.

<sup>10</sup> Diba Yesuye kei ma dokodoo pala mapoo osee balaga molome, odoo bakadio dugo heliye megiga oso dima koola omapoo saga sibileso, tebisa meleso.

<sup>11</sup> Diayo egeese takaso, "Gelili odoo, niba bei kasee maga kei ma dokodoo ka balaga malala? Nibada howo woola Godeeye Yesu kei mapoo ido palaso. Esiga Yesu kei ma dokodoo poolome niso egemenee, yayo hamamee kolobo ma dokodooga, see egeese siboga agalaiso," diso.

## Diye di odoo hee, Matiyas hesia goo

<sup>12</sup> Diye di odoo oso Yesu kei mi ma dokodoo pala ogoloso, Olipi mubi maga Yolusalem mapoo wedi diadeeso. Yolusalem ee Olipi mubi abaga hoogonee.

<sup>13</sup> Diba Yolusalem mapoo peledoboloso, diso debeli

moso mapoo paladeeso. Odo abo hagooso moso eyo kulodu debeiso: Pita, Yonee, Yemes, Endulu, Pilipi, Tomas, Batolomu, Matiyu, Alpiyeseeyo owolo Yemes, Saimon (daga Loum gamalee maga ha teli odo), osoloso Yemesyo owolo Yudas. <sup>14</sup> Diye di odo, sobo abo sabolo, osoloso Yesuwo owee Meli sabolo, osoloso Yesuwo omolo dio sabolo hagee hodobo mooloo-goodoloso beame susuga dokodoo takeliso.

<sup>15</sup> Beame hedebe mapoo tei telaga odo susuga 120 oso hodobo mooloo-goodoloso doboome, Pitaye topoloso dimapoo egeese takaso, <sup>16</sup> "Mo odo, ayo Yudaseeyo goo nimapoo taka. Yo ibada mooloo-goodoo ma kulodu Godeeyo tou hodobo tomo siliso. Esino yayo Yesu ha teli odo mapoo tiasooso."

(Eseme tei moso wiligi odo tebisa oso Yudas yimapoo molee teneme, yayo molee oso mi su neiso tooso. Osoloso yo mi omapoo dileso, miyomoo homodobuloso, beliye tologonuloso, kakobo gwadobuloso taso. Eseme Yolusalem mapoo debeli odo susuga oso goo hagee duloso, mi egee dibada toso hu egeese hediso 'Akeledama.' Hu hageeyo bei, 'sawo go.')

Eseme Pitaye see egeese takaso, "Esiga Godeeyo to booka mapoo hogugu oso tei diso. Bei, Dio Tei oso Deibidi mapoo eligi maga yayo Yudaseeyo goo daga hoogoo Godeeyo to hogugu Sam booka mapoo egeese hoguguso,

'O mi mapoo odo mauwe pagalaiso.

Odo heeso omapoo badalaimé.'

Osoloso see egeese hoguguso,

'O tou su see odo heeso talaiso,'" diso.

<sup>21</sup> Pitaye see egeese takaso, "Esiga Yudaseeyo tou teli ee see odo heeso talame odo hee hesiamo. Yayo ibolo silone Yesuye toloso hogabia goo ee takomo silame. Osoloso odo yayo beame susuga ibolo hodobo silone, Yonee odo howomoo howo sawuiga molome egei sabolo, osoloso abaga simino Yesuye kei ma dokodoo polome egei odo ee hesileiso," diso.

<sup>23</sup> Eseme tei telaga odo susuga oso Yosep dio Matiyas dio hesiaso. Yosep hagee hu bakadio hedebe di (Balasabas osoloso Yositas). <sup>24</sup> Diayo odo bakadio hagee hesialoso dobolone dokodoo egeese takaso, "Lodee, no odo susuga oso goo goolee no gooleedooso. Esiga odo bakadio hamapoo nayo hesia imapoo eligi, yayo Yudaseeyo debi omapoo badolone, diye di odo eyo tou su ee talame. Bei, Yudas yo toke-nee tooga, eyo nei yo dou mi mapoo diso," diso. <sup>26</sup> Diba dokodoo taka koodobuloso, diye di odo heeso yo bakadio toloso hee mapoo Matiyaseeyo hu magoo, osoloso hee mapoo Yosepeeyo hu magoo doloso toloso halabume, yo hedebe miyomoo homodobiaso, diayo odo bakadio hesia ma kulodu Godeeye hesia odo ee talame. Diayo egeese moodooloso, odo hedebe Matiyas tooso. Eseme yo diye di tou ee talame diye di odo 11 sabolo hedebe diso.

## Dio Tei oso meledaba

<sup>2</sup> Pentikos beame omapoo, tei telaga odo susuga moso hedebe mapoo mooloo-goodoloso debeiso. <sup>2</sup> Eseme haga booloogelega kei ma dokodoo iso goowa masi oso diayo mooloo-goodoloso debei moso omapoo tooso. <sup>3</sup> Eseme dou paiya masi oso odo susuga moso kulodu mooloo-goodoloso debei, dimapoo tugusume egeiso. <sup>4</sup> Eseme Dio Tei oso dibada kulodu meledoboloso molome, Dio Tei oso kitulugu maga to opusomo opusomo di keso.

<sup>5</sup> Beame omapoo Godeeyo goo dia gooleedo Yu odo mi susuga maga sibilesi, Yolusalem mapoo debeiso. <sup>6</sup> Esino diba iso goowa masi goowa ee duloso, goo ee agalame sibadeeso. Diba sibilesi egeino, tei telaga odo susuga oso to opusomo opusomo di kesamolome duso. Diayo to opusomo opusomo di kesamelee ma kulodu diayo dibada to kei duloso, dia howoogadooso. <sup>7</sup> Eseme diba howoogadoloso goo tiadoo sabolo dobolone egeese takaso, "Odo to egee kesa, Gelili odo oso kesa. <sup>8</sup> Bei kasee maga diayo ibada to kesa iyo ka dusomo? <sup>9</sup> Bei, iba mi opusomo opusomo di hamaga sibadee odo: Patia abaga, osoloso Media, Elam, Mesopotamia, Yudiya, Kapadokia, Pontus, Asia, <sup>10</sup> Piligia, Pampilia, Isipi, Libia mi toowa ma kulodu mi pepooko Kulene abaga sibadee. Osoloso odo abo Loum mi abaga sibadee. Osoloso Yu dele poogoo odo abo Loum mi abaga sibadee oso, Yu odoowo Godee mapoo tei too maga, Yu odoowo hu too odo oso. Osoloso odo abo Kiliti sabolo Alabia mi abaga sibadee odo oso. Iba mi opusomo opusomo di amaga sibadee oso. Esino diayo ibada to keseme duso. Esiga diayo to hagee boowo Godeeye goo toowa moodoo maga ka boowo," diso. <sup>12</sup> Diba howooga sabolo, goo tiadoo sabolo, dobolone diso nediliyo egeese takaso, "Hagee ogo goowo?" diso.

<sup>13</sup> Esino odo abo Yolusalem mapoo sibadee oso tei telaga odo dimapoo manolone diso nediliyo egeese takaso, "Odo hagee yugune naloso ka halapaga," diso.

## Pitaye to taka goo

<sup>14</sup> Eseme Pitaye goo hagee duloso, diye di odo sabolo tebisaloso to neligidi takolone, odo mooloo-goodoo mapoo egeese takaso, "Yu odo Yolusalem mapoo debeli sabolo, osoloso odo soo sibadee, niba mo to hagee medee dui! <sup>15</sup> Odo abo niyo imapoo takolone, iba yugune naloso ka halapaga, diso. Esino iba egeese koo seeso. Bei, gesikolo osoko simi domo taba mapoo, edebeeyo yugune naloso koo halapagali. <sup>16</sup> Esino to niyo du sabolo, osoloso niyo egei goo sabolo egee, Godeeyo to tosili odo Yoweliye to taka goo sabolo olo tebiaso:

<sup>17</sup> 'Godeeye egeese takaso, "Beame hamameede omapoo ayo Dio Tei odo susuga mapoo tenelaiso.

Osoloso nibada giso holaiso sabolo, sobo holaiso sabolo, oso to Godeeye taka goo ee takalaiso. Nibada holaiso gie kakauwa oso howo opusomo doloso, Godee maga simi goo ee agalaiso. Osoloso nibada adaga oso Godee maga simi goo ee sapootileiso.”

<sup>18</sup> Osoloso Godeeye see egeesee takaso, “Beeame hamameedee omapoo mo tou teli odoo susuga, giso sabolo, sobo sabolo, dimapoo Dio Tei tenelaiso. Osoloso diayo Godeeye taka to ee duloso odoo mapoo takalaiso.

<sup>19</sup> Osoloso kei ma dokodoo osoloso mi hamapoo goo mudu opusomo di moodoolaiso. Beeame omapoo mi toowa hamapoo niyo hatoo sabolo, dou sabolo, osoloso de i toowa sabolo agalaiso.

<sup>20</sup> Osoloso kei ma dokodoo osoko neligidi bigileiso. Osoloso a see sawo masi bigileiso. Goo egeesi oso peledobooga, Lodeeyo beeame goo toowa oso sibilei koola toobooga ka salai.

<sup>21</sup> Osoloso edebeeyo Lodeeye pidilame yimapoo woosaga, nei yayo yimapoo gie badeli tenelaiso.’

<sup>22</sup> Esiga Isalael odoo, niba to hagee dui! Yesu, Nasalet odoo, Godeeye niba gooleebugulone hesiaso. Osoloso Yesuye nima kulodu goo mudu opusomo opusomo di moodoomo silone, Godeeye yo hesia goo ee woola yilige buguso. Esiga goo oso peledaba niba gooleedooso. <sup>23</sup> Esino Godee eyo goomoga maga daga hoo-goo Yesu toloso nimapoo tenelame to takoloso magooso. Egeesee maga yayo Yesu toloso nimapoo teneme, Yu odoo niyo osoloso Godeeye tei magoo mapoo koo mesili odoo sabolo oso yo homo bulubo magoo ma dokodoo yoguso eniga maga yo wooloomaso.

<sup>24</sup> Esino Godeeye Yesu dala teli goo maga peegoo tamagalame, Godeeye yo ta maga hogabidiso. Bei, teli oso yo talai tebile. <sup>25</sup> Esiga ibada amawe wiligi odoo taba Deibidiye Yesuwo goo Godeeyo to booka mapoo hogugu maga egeesee takooso,

‘A beeame susuga Godeeye mo mudugiyopoo tobudo doloso gooleedeliso. Yo koola mapoo tobudoso. Esiga a ebileime.

<sup>26</sup> Esiga mo sooloo ma kulodu goomoga toowaso molone, goomoga goo hagee ka taka. A tei toso, mo su see gie badalaiso.

<sup>27</sup> Bei, Godee nayo a toga mo gie badeli ee odoo we-dia eyo dio oso debeli mi mapoo a pagalaime. Nayo hesia odoo eyo su midoo ma kulodu hunulame pagalaime.

<sup>28</sup> Osoloso gie badeli eli nayo amapoo eligiso. Esiga ayo nobolo badolone, dia goomogalaiso,’ diso.

<sup>29</sup> Emegei, Deibidiye goo taka hagee, yayo o goo eyo nediliyo takele. Bei, yo teme midoosooso. Osoloso midoo ibolo moloso. <sup>30</sup> Esiga Godeeyo to tosili odoo daga malalo badebeiso. Esiga Godeeye to takoloso magoo ee gooleemeleeso. Bei, Godeeye yimapoo to magolone egeesee takaso, ‘Deibidiyo amawe heeso Deibidiye wiligi doloso badeli mi omapoo, see yayo wiligi doloso badalaiso,’ diso. <sup>31</sup> Esiga Deibidiye malalo hoogoo peledabalai goo ee ogoloso, Godeeye hesia Kelisoye midoo maga hogabilei maga egeesee takaso,

‘Godeeye yo midoo mapoo pagalaime, osoloso o su hunuleime,’ diso. <sup>32</sup> Esiga Godeeye Yesu ta maga see gie badeli mapoo hogabidiso. Goo ee iyo susuga ogoloso ka takomo siloso. <sup>33</sup> Osoloso Godeeye Yesu kei ma dokodoo ido peleso, o dee deede dokolo badoso, yayo yimapoo hu toowa tenelame. Osoloso yayo to magoo ee dodolone, o Dio Tei Yesu mapoo teneme, see Yesuye imapoo teneeso. Goo hagee niyo epedee hamapoo ogolone dulone ka badoso. <sup>34</sup> Esiga Deibidi yo kei ma dokodoo pele. Haya! Yayo taka egee Yesuwo goo ee taka,

‘Godeeye mo Lodee mapoo takaso: No abolo wiligi doloso badalame mo dee deede dokolo bie. <sup>35</sup> Osoloso namapoo ha teli odoo nama hemi debbe dalaiso.’

<sup>36</sup> Esiga Isalael odoo, niba goo hagee medee goolee! Niyo Yesu homo bulubo magoo ma dokodoo yoguso eniga ee, Godeeye yo Lodee wiligi toowa taba doloso hudi magoo Keliso,” diso.

<sup>37</sup> Esem odoo mooloogoodoo oso to hagee duloso, diso nediliyo dibada goo tokenee gooleedoloso, sooloo dala sabolo, ebia sabolo, Pita diye di odoo abo sabolo mapoo egeesee takaso, “Emegei, iyo ogoo goo moodoolaiyo?” diso.

<sup>38</sup> Esem Pitaye dimapoo nei egeesee takaso, “Niba susuga nibada goo tokenee maga miligi pialoso, Yesu Kelisowo hu maga howomoo howo sauwidige. Egeeseega nibada goo tokenee hapoloso boobado bigileiso. Egeeseega niba Godeeye Dio Tei wulayo egee tenemolo niyo talaiso. <sup>39</sup> Bei, Godeeye to magoo ee dodolone, yayo Dio Tei nimapoo, osoloso nowolo dimapoo, osoloso eli sage debeli odoo dimapoo tenelaiso. Osoloso odoo susuga Godeeye gilimadalai goo ee dimapoo tenelaiso.”

<sup>40</sup> Esem Pitaye to sage takolone kokodo takaso, “Goo tokenee teli odoo epedee hamapoo egee do dala talaiso. Esiga niba dala teyaga, goo tokenee ee pagalame Godeeye pidilame yimapoo takee.”

<sup>41</sup> Esem odoo Pitayo to duloso, tei too odoo diba howomoo howo sauwidigasoo. Esiga beeame omapoo 3000 odoo oso howomoo howo sauwidigaloso, tei telaga odoo sabolo hedebe doloso mooloogoodooso.

<sup>42</sup> Osoloso diba howomoo howo sauwidigaloso, beeame susuga eyo kulodu disono mooloogoodoloso, diye di odoo oso eligime, medee duluga meleeso. Osoloso diba Lodee gooleebugu wo nalagamo silesibulone, beeame susuga dokodoo takeliso.

#### Tei telaga odoo oso mooloogoodoloso debei goo

<sup>43</sup> Diye di odoo diayo Godeeyo kitulugu sabolo goo mudu opusomo opusomo di moodoogamo silesibume, odoo susuga oso ogoloso dia ebia sabolo howoogadooso. <sup>44</sup> Osoloso tei telaga odoo susuga oso beeame susuga hodobo mooloogoodoloso, bi nei pidi, nei pidi deliso. <sup>45</sup> Egeeseemo silesibulone, dibada mi sabolo, bi sabolo, odoo mapoo teneloso, nei molee tooso. Osoloso molee oso tei telaga odoo abo bi mauwe odoo ee pidigamo siliso. <sup>46</sup> Osoloso beeame

susuga diayo howo gisilame, Yu odoowo tei moso mapoo hodobo mooloogoo deliso. Osoloso diayo Yesu gooleebugu wo nolone, diba moso opusomo opusomo di mapoo nalagaliso. Osoloso diayo silesibulone, dibada sooloo ma kulodu goo goolee hedebe doloso, goomoga goo Godee mapoo poudiliso. Esemé Yoluusalem odoos susuga oso dibada goo ogoloso tekepo deliso. Osoloso Lodeeye beeamé susuga odoos abo mapoo gie badeli teneliso. Egeeseelone tei telaga odoos bei deliso.

### Pitaye odoos kido todobia tekepo moodoo goo

**3** Beeamé heeso habe omapoo Pita dio Yonee dio Yu odoowo tei moso mapoo howo gisilame pala-so. <sup>2</sup> Diba omapoo peleso egeino, odoos kido todobia osulu mi eyo hu Osulu Medee Tekepo deli omapoo badoboome egeiso. Odoos hagee soomagolone kido todobia sabolo soomagooso. Esiga beeamé susuga o odoos abo oso yo sa mapoo magoloso imado peleso, osulu mi hamapoo ka ibedi deliso. Osoloso yo omapoo badolone, odoos tei moso mapoo pala ogoga, yayo dimapoo molee howaliso. <sup>3</sup> Yo omapoo howolone badolone egeino, Pita dio Yonee dio moso kulodu gadime, dimapoo molee howaso. <sup>4</sup> Esemé Pita dio Yonee dio yimapoo bolone, Pitaye yimapoo egeesee takaso, "Imapoo ege!" diso. <sup>5</sup> Esemé yayo goolee, yimapoo molee tenelame kasabelee dolone dimapoo egeiso.

<sup>6</sup> Esemé Pitaye yimapoo egeesee takaso, "Amapoo molee tei mauwe. Esino goo hagee amapoo egee molo wulo namapoo tenelaiso. Esiga ayo Yesu Keliso Nasalet odoowo hu maga namapoo ka taka, no to-boloso di," diso. <sup>7</sup> Yayo egeesee takoloso, odoos kido todobia o dee deedeé mapoo tolosos tebidime, o kido see tekepo paso. <sup>8</sup> Yo o kido tekepo poloso silone, Pita dibolo tei moso ma kulodu galaga diso. Yo tei moso ma kulodu gadilesos pupulodomo silone, Godee mapoo goomoga poudooso. <sup>9</sup> Odoos susuga oso odoos kido todobia yayo Godee mapoo goomoga poudoomo sili ogoloso howoogadooso. Osoloso diso nediliyo egeesee takaga meleeso, "Odoos hagee kido todobia Osulu Medee Tekepo deli eyo osulu miyopoo badolone molee howali hagooso. Esino yo kasee tobolosos silone, goo hageesi ka tomos silosomo?" diso.

### Pitaye Yu odoowo tei moso mapoo to taka

<sup>11</sup> Odoos daga kido todobia oso Pita dio Yonee dio dee mapoo tolosos, Solomonowo hau † mapoo silesibi ogoloso, odoos susuga oso howoogadolosos, diayo debei omapoo hoguga sibadeeso. <sup>12</sup> Esemé Pitaye odoos susuga ogoloso, dimapoo egeesee takaso, "Isalael odoos, niba bei kasee maga ka howoogowala? Osoloso bei kasee maga niyo imapoo bologolone, goo dia ka tiadowala? Bei, odoos hagee ibada kitulugu sabolos osoloso iyo tekepo dolosos debei maga tekepo polosos

† SOLOMONOWO HAU: *Solomonowo yo daga hoogoo Yu odoowo wili-gi odoos taba Deibidiyo owolos oso. Yolusalem mi mapoo Yu odoowo tei moso tegei mapoo hau meleeso, hau eyo hu Solomonowo hau.*

koo silosos. <sup>13</sup> Esino Eibalaham, Aisek, Yekob, osolosos ibada amawe dibada Godeeye o tou teli odoos Yesu mapoo kitulugu toowa olo tenelosos, o hu dokodoo poudooso. Esino diayo yo wooloomalame, niyo yo Yu odoowo wiligi odoos tebisa mapoo teneeso. Osoloso yo goo meedilame Paillet mapoo ido dime, Pailleteeye egeesee takaso, 'Ayo yimapoo goo tokenee koo ogo,' dee takeme, niyo yo goweso. <sup>14</sup> Esino Yesu tekepo, tokenee mauwe odoos oso. Esino niyo yo gowolone, Balabas odoos wooloomali odoos ee Pailleteeye neliga moso ma kuloduga peegoo di diso. <sup>15</sup> Esino niyo Yesu gie badeli teneli wooloomasos. Esino Godeeye yo ta maga see hogadisos. Esiga yo ta maga see hogabulosos silime, iyo egei goo ee ka takomos silosos. <sup>16</sup> Esiga odoos kido todobia oso Yesu mapoo tei too maga yo tekepo paso. Esiga niba odoos hagee gooleedoosos, yo daga kido todobulosos badebeiso. Esino yayo Yesuwo kitulugu mapoo tei too maga odoos susuga oso balaga molome, yo tekepo paso."

<sup>17</sup> Osoloso Pitaye odoos mooloogoodos mapoo see egeesee takasos, "Emegei, a gooleedoosos, nibada wiligi odoos tebisa sabolos oso Yesu boobadolone, yimapoo goo moodoo eyo bei niba gooleedelee. <sup>18</sup> Esino daga hoogoo Godeeye o to tosili odoos dimaga Kelisoye dala talai goo ee malalos olo takasos. Esiga goo hagee peledabalame Godeeye moodoosos. <sup>19</sup> Esiga nibada goo su wudulosos, goo tokenee maga miligi pialosos, Godee mapoo bidiga debee. Egeeseega Godeeye nibada tokenee hapolosos boobados bigileisos. Nibada goo su wudulosos, goo tokenee maga miligi pialosos, Godee mapoo bidiga dobooga, Godeeye nimapoo kitulugu dia tenelaisos. <sup>20</sup> Osoloso owolos Yesu, Godee yayo hesia Keliso nimapoo di dalaisos. <sup>21</sup> Esiga epedee beeamé hamapoo Yesu kei ma dokodoo badosos. Yo kei ma dokodoo badolone Godeeye goo susuga dia daga, omapoo sibileisos. Esiga Godeeye o to tosili hesia odoos daga hoogoo debei dimaga goo hagee olo takasos. <sup>22</sup> Esiga Godeeyo to tosili odoos hee Moseseeye Godeeyo to booka mapoo egeesee takasos, 'Godeeye niba gooleebugulone, nima kuloduga o to tosili odoos hee a egeesi masi hesileisos.

Esiga goo susuga yayo taka mapoo medee dui.

<sup>23</sup> Osoloso edebeeyo o to dulosos, tei telega poo-googa,

odoo ee Godeeyo mooloogoodos ma kuloduga peegoo peledobolosos, talaisos,' diso.

<sup>24</sup> Godeeyo to tosili odoos hee Samiyolowos hamamee tebisa sabolos oso epedee beeamé hamapoo peledabalai goo ee takasos. <sup>25</sup> Esiga Godeeye nibada amawe sabolos, osolosos o to tosili odoos daga hoogoo debei sabolos, oso to magoo ee nibada. Bei, yayo Eibalaham mapoo egeesee takasos, 'Namawe hee maga ayo odoos susuga mi toowa mapoo hagee do ee pidileisos,' diso.

<sup>26</sup> Esiga Godeeye hesia tou teli odoos Yesu ee nimapoo di diso, niyo malalos to tekepo dulame. Esiga yayo niba pidi maga nibada goo goolee mudu opusomos dolosos, nibada tokenee maga miligi pilame," diso.

### Pita dio Yonee dio goo meedilame ido pala

**4** Pita dio Yonee dio odoo mooloogoodoo mapoo to takolone Yesuye ta maga hogabia eyo goo takaga meleeso. Esiga diayo egeesee takaso, "Yesu ta maga hogabia maga niba ta maga see hogabileiso," diso. Esememe omapoo Pitaye to taka duloso tei telaga odoo sabolo, osoloso daga tei telaga odoo sabolo, hodobo mooloogoodeme 5000 tugodooso. Esememe tei moso wiligi odoo tebisa sabolo, tei moso gihadili odoo dia wiligi odoo taba sabolo, Sedisi odoo sabolo sibilesa, Pitaye Godeeyo to takolone, ta maga see hogabilei goo maga taka duloso, dia kamanaso. Osoloso diayo Pita dio Yonee dio tooso. Osoloso olo neligime diba epedee neliga moso tegei ma kulodu toosooso, osoloso see gesikolo Yu odoowo wiligi odoo tebisa mapoo ka ido dilame.

<sup>5</sup> Osoloso gesikolo Yu odoowo tei moso wiligi odoo tebisa sabolo, osoloso Yu odoowo wiligi tebisa adaga susuga sabolo, osoloso Godeeye tei magoo ee eligili odoo susuga sabolo, Yolusalem mapoo mooloogoodooso. <sup>6</sup> Dibada mooloogoodoo ma kulodu tei moso wiligi odoo taba Anasee sabolo, o soosoo Kaya-pas sabolo, Yonee sabolo, Alesenda sabolo, osoloso o soosoo abo sabolo mooloogoodooso. <sup>7</sup> Esiga wiligi odoo tebisa susuga oso omapoo mooloogoodoloso dobolone, diayo odoo abo oso Pita dio Yonee dio ido sibe, diso. Esememe Pita dio Yonee dio omapoo do-boome, wiligi odoo tebisa oso dimapoo egeesee woosaso, "Niyo odoo kido todobia tekepo kasee moodoowo? Niba agamo kitulugu osoloso agamo hu maga yo tekepo ka payo?" diso.

<sup>8</sup> Pita Dio Tei oso kitulugu tolosa badolone Dio Tei maga dimapoo to nei egeesee takaso, "Wiligi odoo tebisa sabolo, Yu odoowo wiligi tebisa adaga sabolo, niba mo to dui. <sup>9</sup> Niba iyo odoo kido todobia yo pidilone tekepo moodoome niyo ogoloso, ibada goo meedilame ka ido dila? Niba yo tekepo pa eyo bei gooleedalai goomogosomo? <sup>10</sup> Esino nibolo Yu odoo susuga sabolo goo hagee gooleedalai tekepo. Bei, Yesu Keliso, Nasalet odoo, niyo woolooma Godeeye ta maga hogadi eyo kitulugu maga, iyo epedee niyo egee ogo odoo hagee olo tekepo paso. <sup>11</sup> Esiga Yesuwo goo Godeeyo to booka mapoo hogugu maga egeesee takooso,

'Moso tegeli odoo diayo omou gowoome poogoo, omou oso epedee hamapoo moso omu domo pupodoo ka moloso.'

<sup>12</sup> Esiga Yesu mapoo gie badeli teneli ka moloso. Esiga mi toowa hamapoo odoo hee mauwe edebeeyo badoboso gie badeli talai, hedebe Yesu yimapoo moloso."

<sup>13</sup> Esememe Yu wiligi odoo tebisa oso Pita dio Yonee dio dimapoo ebilega, diayo dimapoo to nei tekepo taka duloso, diba dia howoogadooso. Pita dio Yonee dio sukulu tele osoloso wulo mosoowe odoo. Esememe wiligi odoo tebisa oso egeesee gooleedooso, odoo bakadio hagee Yesubolo silidoo, diso. <sup>14</sup> Osoloso diayo Pita dio

Yonee dio odoo kido todobia tekepo moodooloso, Pita dibolo tebisa melee ogoloso, wiligi odoo tebisa oso to nei takele poogooso. <sup>15</sup> Diayo to nei takalai mauwe poogoome, Pita dio Yonee dio moso kuloduga peegoo galaga diye doloso, balaga melee diso. Osoloso wiligi odoo tebisa disono to mouso. <sup>16</sup> Esememe disono to moulone egeesee takaso, "Iyo dimapoo ogoo goo moodoolaisomo? Bei, Yolusalem odoo susuga oso di-ayo mudu opusomo di goo toowa moodoo egee egeiso. Esiga iyo goo hamapoo gamenee takalai tekeponee. <sup>17</sup> Esiga goo hageesi oso toowa diaga, odoo bakadio hagee tolosa, see Yesuwo hu maga odoo susuga mapoo na eligimo silesibe, kitulugu sabolo egeesee takalaso," diso.

<sup>18</sup> Esiga wiligi odoo tebisa oso Pita dio Yonee dio gili-madoloso dimapoo egeesee takaso, "Niyo silesibulone, Yesuwo hu maga goo abo na eligi," diso. <sup>19</sup> Esememe Pita diayo dimapoo to nei egeesee takaso, "Esiga niba niso nediliyo goo hagee medee goolee. Tekepo-do, Godeeyo howo woola abaga, nibada to mapoo iyo mesilone, nei iyo Godeeyo to mapoo mesilega pagalai. <sup>20</sup> Bei, iyo Yesuye goo tomo silime egei goo sabolo osoloso Yesuye takeme du goo ee takalai pagalaime," diso.

<sup>21</sup> Esememe wiligi odoo tebisa oso dimapoo to kitulugu sabolo takolone, "Yesuwo hu maga niyo see eligimo silesiboga, iyo nimapoo dala tenelaiso," dee takoloso, goo meedili moso maga peegoo diye diso. Bei, odoo susuga oso odoo kido todobia tekepo pa maga Godee mapoo dia goomogome. Esememe wiligi odoo tebisa oso Pita dimapoo dala tenelai beame egele poogooso.

<sup>22</sup> Esiga odoo kido todobuloso badebei dugo 40 poogooso.

### Tei telaga odoo oso Godee mapoo dokodoo takeli goo

<sup>23</sup> Pita dio Yonee dio goo meedili moso maga peegoo galaga dileso, tei telaga odoo sabolo mooloogoodoloso tei moso wiligi odoo tebisa sabolo, osoloso Yu odoowo wiligi odoo tebisa diayo taka goo ee dimapoo takaso. <sup>24</sup> Esememe tei telaga odoo oso to hagee duloso, disono mooloogoodoloso Godee mapoo takolone egeesee takaso, "Kitulugu Godee, nayo mi sabolo, kei sabolo, osoloso abei sabolo, osoloso bi susuga ee ma kulodu egee molo moodooso. <sup>25</sup> Esiga nayo Dio Tei maga nee tou teli odoo ibada amawe Deibidiye egeesee takaso,

'Bei kasee maga Yu dele poogoo odoo oso dia ka kamanaliyo? Osoloso goo bei mauwe maga to wulo ka moumo siliyo?

<sup>26</sup> Mi toowa eyo wiligi odoo tebisa oso disono hodobo mooloogoodoloso kitulugu Godee sabolo, osoloso yayo hesia Keliso sabolo, mapoo hatalame mopoodoo doloso doso,' diso.

<sup>27</sup> Deibidiye tei goo takaso, bei Yu odoowo wiligi odoo taba Helodee sabolo, Loum gamalee odoo Pone-tas Paillet sabolo, osoloso Isalael odoo sabolo, Yu dele poogoo odoo sabolo, disono Yolusalem omapoo mooloogoodoloso Yesu nayo hesia tou teli odoo Keliso

wooloomalame to mouso. <sup>28</sup> Esino diayo goo moodoo hagee, daga hoogoo nayo gooleedoloso, goo hagooso peledabalame, nayo kitulugu sabolo goomoga magooso. <sup>29</sup> Esiga kitulugu Godee, wiligi odoo tebisa hagooso epedee nee tou teli odoo imapoo ebili to taka ee nayo duso. Esiga imapoo kitulugu tenee, iyo nee to takomo silesibilone, ebia goo mauwe pagalame. <sup>30</sup> Esiga nayo kitulugu eligilone, odoo paigiga tekepo pe. Osoloso nee tou teli odoo nayo hesia Yesuwo hu maga goo toowa mudu opusomo di moodee," diso.

<sup>31</sup> Esino diba dokodoo taka koodobuloso, diayo debei moso ee halabume egeiso. Esemé Dio Tei oso dimapoo meledoboloso, diba Dio Tei oso kitulugu toloso dobolone, ebia goo mauwe poogoloso, Godeeyo to takomo silesibilame bei mooloogooso.

### Tei telaga odoo oso debei goo

<sup>32</sup> Esiga tei telaga odoo mooloogoodoo oso dibada sooloo ma kulodu goo goolee hedebe doloso dobolone, odoo heeso bi koo goodegeli, diba diso biso nei pidi, nei pidi deliso. <sup>33</sup> Egeeseelone diye di odoo oso kitulugu toowa sabolo silesibilone, Yesuye toloso hogabia eyo goo takomo silesibiliso. Osoloso Godeeye tei telaga odoo susuga dimapoo goo tekepo moodeliso. <sup>34</sup> Esiga tei telaga odoo oso dibada mi sabolo moso sabolo odoo mapoo teneloso, nei molee toloso diye di odoo mapoo teneliso. Egeeseega diye di odoo oso molee egee papisaloso, tei telaga odoo abo bi tebile poogoo mapoo teneliso. Osoloso dibada kulodu odoo heeso bi mauwe koo sili.

<sup>36</sup> Osoloso tei too odoo hee Yosepeeye o mi odoo abo mapoo teneloso nei molee tooso. Osoloso yayo sibilesi, molee ee diye di odoo dimapoo teneeso. (Yosep hagee Saiples mi te omapoo badeli, yo o bala Libai. Esino diye di odoo oso yimapoo hu hee teneeso, Banabasi, hu eyo bei emegei pidili odoo.)

### Ananayas dio osobo Sapila dio dibada goo

**5** Osoloso odoo hee badebeiso, o hu Ananayas, osoloso osobowo hu Sapila, diayo dibada mi su pepooko odoo mapoo teneloso nei molee tooso. <sup>2</sup> Osoloso mosopoo sibilesi, obakadio to mouloso, molee abo mada magoloso, Ananayaseeye diye di odoo dimapoo molee abo tosibilesi teneeso.

<sup>3</sup> Esemé Pitaye Ananayas mapoo egeese takaso, "Bei kasee maga nayo Saitenso gamenee taka to mapoo mesilone, Godeeyo Dio Tei mapoo gamenee takolone, mi molee too abo mada ka magoowo?" <sup>4</sup> Mi hagee odoo mapoo tenelega melee omapoo nee mi diso. Esino nayo odoo mapoo mi teneloso, nei molee too egee neeso. Esiga nee molee oso, no goomoga goo ee talai tekepo. Bei kasee maga, nayo molee abo nee mosopoo mada magoo egee imapoo takele, esino nayo gamenee takolone, ayo molee susuga tosimi hagooso, dee ka takayo? Esino nayo hedebe imapoo gamenee takele, esino nayo Godee mapoo gamenee takaso," diso.

<sup>5</sup> Esemé Ananayaseeye to hagee duloso, yo toloso homodobiaso. Esemé odoo gie kakauwa oso dugoso o su tiadoloso midoosooso. Esemé goo hagee takeme duluga, odoo susuga oso dia ebigaso.

<sup>7</sup> Esino Ananayaseeyo osobo goo hagee dule. Esino yo osoko howo bakadio hedebe di poogoloso, hamamee Pita diayo debei mapoo simiso. <sup>8</sup> Esemé Pitaye yimapoo egeese takaso, "Amapoo takee, niyo mi su odoo mapoo teneme molee too ee hagoosomo?"

Esemé Ananayaseeyo osoboye nei egeese takaso, "O, molee iyo too olo ogoso."

<sup>9</sup> Esino Pitaye yimapoo egeese takaso, "Bei kasee maga nee bakadio Godeeyo Dio Tei mapoo gamenee takalame goomoga ka magoowo? No ege, gie kakauwa odoo oso nomo midooso odoo, osulu miyopoo tebisa moloso. Osoloso no toga, diayo no midoosolaiso," diso.

<sup>10</sup> Osoloso yo to kemelee beeame omapoo Ananayaseeyo osobo toloso, Pitayo homo beiyomoo homodobiaso. Esemé odoo gie kakauwa odoo oso sibilesi ogoloso yo ta molome, diayo o su toloso, omowo midoo hodiokooga midoosooso. <sup>11</sup> Esemé tei telaga odoo susuga sabolo, osoloso goo hagee du odoo susuga sabolo oso dia ebigaso.

### Diye di odoo oso odoo paigiga susuga tekepo moodoo

<sup>12</sup> Diye di odoo oso goo toowa mudu opusomo opusomo di odoo ma kulodu moodoogamo silesibiliso. Osoloso tei telaga odoo susuga oso tei moso tegei Solomonowo hau mapoo disono mooloogoodeliso.

<sup>13</sup> Esemé tei tele poogoo odoo oso, diye di odoowo goo ee tekepo dee takeliso. Esino diayo dibolo hodobo mooloogoodoloso hedebe dalai dia ebigeliso. <sup>14</sup> Esino beeame susuga ma kulodu, sobo sabolo, giso sabolo, Lodee mapoo tei toloso, tei telaga odoo mooloogoodoo sabolo hedebe deliso. <sup>15</sup> Diye di odoo oso goo mudu opusomo opusomo di moodoogamo silesimi ogoloso, odoo susuga oso odoo paigiga iyado sibilesi, eli domopoo kida palagaloso, kida mapoo tiedigeliso. Bei, Pitaye osoko pa maga dulone, o dio taba oso gooloogooga, diba ka wedilame. <sup>16</sup> Esemé Yolusalem koola omapoo mosobia pepooko oso odoo paigiga sabolo, odoo bo holo paladee oso dala temelee sabolo, iyado sibililiso. Egeeseega diye di odoo oso diba tekepo peliso.

### Diye di odoo oso Yesuwo goo maga dala too

<sup>17</sup> Diye di odoo oso goo mudu opusomo opusomo di hagee moodoogamo silesibume, tei moso wiligi odoo taba sabolo, osoloso o emegei Sedisi odoo sabolo, goo hagee ogoloso, diye di odoo dimapoo dia kooloogaso.

<sup>18</sup> Esemé diayo diye di odoo toloso neliga moso tegei ma kulodu toosooso. <sup>19</sup> Esino gesi mapoo Lodeeyo mo-maiye oso sibilesi neliga moso eyo osulu kisi yamagooso. Esemé diye di odoo neliga moso ma kuloduga peegoo iyado dilesi, dimapoo egeese takaso, <sup>20</sup> "Niba

tei moso tegei mapoo dileso odoos mapoo gie badeli goo dia hagee takee," diso.

<sup>21</sup> Esemee diye di odoos oso o to mapoo mesiloso, gesikolodee osoko gie sibume, tei moso ma kulodu galaga dileso, Yesuwo goo ee eligilame bei mooloo-gooso.

Esemee tei moso wiligi odoos taba sabolo, osoloso Sedisi odoos sabolo, oso diye di odoos eyo goo mapoo to meilame, Yu odoowo wiligi odoos tebisa susuga gilimadoos. Osoloso diayo neliga moso gibadili odoos dimapoo to takaso, diayo diye di odoos susuga iyado sibilame. <sup>22</sup> Esemee gibadili odoos oso neliga moso tegei mapoo dileso egeino, diye di odoos me molo egeiso. Esemee diba see wedi dileso, wiligi odoos tebisa mapoo egeesee takaso, <sup>23</sup> "Iyo dileso neliga moso mapoo egeino, osulu dia kisina, osoloso gibadili odoos oso pee maga gidoboome egeiso. Esemee iyo osulu yam-agoloso, moso kulodu galaga dileso egeino, diye di odoos mauwena," diso. <sup>24</sup> Esemee tei moso tegei wiligi odoos tebisa sabolo, osoloso tei moso gibadili odoos dia wiligi odoos taba oso goo hagee duloso, goo dia gooleeso, ogoo goo oso hamamee ka peledoboome-belee doloso.

<sup>25</sup> Esemee odoos heeso dimapoo sibiloso egeesee takaso, "Dui! Niyo odoos neliga moso tegei mapoo toosoo ee, see dileso tei moso mapoo odoos eligi moloso," diso. <sup>26</sup> Esemee to ee duloso, tei moso gibadili dibada wiligi odoos taba oso o odoos sabolo diye di odoos ee see iyadalame, diso. Esino diayo diba iyadoloso wele. Bei, edebeeyo gibadili odoos mapoo gowolone, yoso diba piligiyaga.

<sup>27</sup> Esino diayo diye di odoos wiligi odoos tebisa dibada mudugiyopoo iyado simiso. Esemee tei moso wiligi odoos taba oso dimapoo egeesee takaso, <sup>28</sup> "Iyo to kitulugu sabolo nimapoo egeesee takaso, 'Niyo Yesuwo goo eligimo na silesibe,' diso. Esino niyo ibada to mapoo mesile. Esiga niba ege! Niyo eligi goo oso Yolusalemi mi toowa ee tooso. Osoloso Yesuye ta goo ee see niyo imapoo gigidilame ka see," diso.

<sup>29</sup> Esino Pitaye diye di odoos abo sabolo to nei egeesee takaso, "Iba Godee mapoo mesimo silesibiliso. Esino edebeeyo goomoga goo ee talaime. <sup>30</sup> O, tei takoo, niyo Yesu homo bulubo magoo mapoo yoguso eniga oso wooloomaso. Esino ibada amaweyo Godeeye Yesu niyo woolooma ta maga see hogadiso. <sup>31</sup> Osoloso Godeeye Yesu ta maga hogadiloso o dee deede dokolo mapoo ibediso, yayo wiligi doloso badolone gie badeli ee pidili odoos dalame. Esiga epedee hamapoo yimapoo kitulugu moloso, Yu odoos susuga oso dibada goo goolee opusomo doloso, dibada goo tokenee mapoo miligi piaga, goo tokenee hapoloso boobado bigileiso. <sup>32</sup> Esiga goo susuga hagee Yesuye moodoomo sili goo sabolo, osoloso yimapoo peledaba goo sabolo, ee iyo ogoloso, see odoos mapoo takomo silesibiliso. Osoloso Dio Tei ima kulodu egee molo oso goo hamapoo tei takoo, deeso. Bei, Godeeye to mapoo mesimo silesibili odoos mapoo Dio Tei teneliso," diso.

<sup>33</sup> Esemee Yu odoowo wiligi odoos tebisa oso goo hagee duloso komonolone, diye di odoos piligilame goomogaso. <sup>34</sup> Esino dima kulodu Pelisi odoos hee, o hu Gamaliyoye tabaso, odoos hagee Godeeye tei mapoo ee eligili odoos. Osoloso odoos susuga oso yo tekepo odoos dolone, yo dokodoo maluguso. Esino yayo to budulone, diye di ee epedee beame deiyepo peegoo gilimadoo di, diso. <sup>35</sup> Esemee wiligi odoos tebisa mapoo egeesee takaso, "Isalael odoos, niyo odoos hagee dimapoo goo moodoolame medee gooleemeleso ka moodee. <sup>36</sup> Bei, niba goolee, daga odoos hee Tudaseeye goo hageesi moodoolone o su toowa diso. Osoloso 400 odoos oso yibolo silesibiliso. Esino edebeeyo yo wooloomome, yibolo silesibili odoos 400 diba kukulo diadeeso. Egeesee maga goo mauwe poogooso. <sup>37</sup> Esemee yima hamamee, gamalee odoos oso odoos susugayo hu tomo silesimi beame omapoo odoos hee Yudas Gelili odoos oso peledabaso. Yibolosee o su toowa doloso, odoos gilimadoo sileeso. Esemee edebeeyo yo wooloomome, yibolo silesibili odoos ee kukulo diadeeso. <sup>38</sup> Esiga ayo goo hagee gooleebuguloso, nimapoo ka kokodo taka, odoos hagee dimapoo goo hee na moodee. Bei, diayo goo moodoogamo egee silesibo, odoos maga simi daga, goo hagooso mauwe pagalaiso. <sup>39</sup> Esino goo egee Godee maga siboga, niyo diba hamaga takooga tebileime. Esino wulo niyo Godee mapoo ha talame ka selai," diso.

<sup>40</sup> Esemee wiligi odoos tebisa oso Gamaliyowo to mapoo tei takoo diso. Osoloso diayo diye di odoos see iyado sibe diso. Osoloso diye di odoos diba sibiloso do-boome, edebeeyo diba woolooge, diso. Osoloso diba wologaloso, wiligi odoos tebisa oso diba diye dolone to kitulugu sabolo egeesee takaso, "Niba see Yesuwo goo ee takolone eligimo na silesibe!" diso.

<sup>41</sup> Diye di odoos oso wiligi odoos tebisa diba poogoloso dulone, dia goomogaso. Bei, diayo Yesu mapoo tei too maga dala teme, Godeeye diba dokodoo poudooso.

<sup>42</sup> Osoloso diba beame susuga tei moso tegei ma kulodu, osoloso odoos abo dia moso ma kulodu odoos mapoo to hagee eligimo silesibilone, "Yesu Godeeye hudi magoo Keliso oso," dee taka koodobile.

### Pidili odoos 7 daga hesia goo

**6** Beeame omapoo tei telaga odoos oso bei moodooso. Esino tei telaga odoos susuga ma kulodu, Guliki to kesali odoos oso Hibulu to kesali odoos sabolo toso agadigaso. Bei, diayo mooloogoodoo ma kulodu, Guliki to kesali dibada sobo bau mapoo wo toowa koo teneme. <sup>2</sup> Esiga diye di odoos oso tei telaga odoos susuga gilimadoloso egeesee takaso, "Tekeponee, iyo Godeeye to takomo sili poogoloso see sobo bau mapoo wo pilei. <sup>3</sup> Esiga emegei, nima kulodu pidili odoos giso 7 hesie. Niyo diba hesiaga, odoos goo goolee medee tekepo, osoloso Godeeye Dio Tei oso kitulugu toloso debeli giso ee hesie. Egeeseega diba iyo emegei pidili tou dimapoo tenelaiso. <sup>4</sup> Esino iba wulo Godeeye to takomo silesibilone, dokodoo takomo silesibileiso," diso.

<sup>5</sup> Esiga tei telaga odoo susuga oso to hagee duloso tekepo doloso, odoo 7 hagee hesiaso: Sitiben (odoo hagee tei too kibuloso badolone Dio Tei oso kitulugu toloso badeli), osoloso Pilipi, osoloso Polokolu, osoloso Nikanolo, osoloso Timono, osoloso Palemena, osoloso Antiyoka odoo, Nikola. Odoo hagee Yu dele poogoo odoo, esino yayo Yu odoowo Godee mapoo tei too maga Yu hu ka too. <sup>6</sup> Diba odoo 7 hagee hesialoso diye di odoo mapoo iyado sibadeeso. Esem e diye di odoo oso dimapoo deeso sigolone dokodoo takaso, bei diba tou hageese teli odoo dalame.

<sup>7</sup> Esem e tei telaga odoo oso odoo susuga mapoo Godeeyo to takomo sileeme, tei telaga odoo oso Yolusalem mi ee ma kulodu bei moodooso. Osoloso tei moso wiligi odoo tebisa bei oso Yesu mapoo tei tooso.

#### Tei moso wiligi odoo tebisa oso Sitiben too

<sup>8</sup> Godeeye Sitiben tei pidilone kitulugu teneeso, yayo odoo ma kulodu goo toowa mudu opusomo opusomo di moodoolame. <sup>9</sup> Esino Yu odoo abo Libetini howo gisili moso ma debeli odoo oso yimapoo toso agadigaso. † Odoo hagee Kulene mapoo debeli, osoloso odoo abo Alesendilia mapoo debeli, osoloso Kilikia mapoo debeli, osoloso odoo abo Asia mapoo debeli. Diayo sibilesi Sitiben mapoo toso agadigaso. <sup>10</sup> Esino diayo toso agadiga ma kulodu, Sitibeneeye Dio Tei oso kitulugu maga to takeme, odoo susuga oso to takalai eli egele poogooso.

<sup>11</sup> Esem e Sitibenbolo toso agadiga melee odoo oso Sitiben maga gamenee takalame, odoo abo mapoo mada sibilesi toso pupume, diayo egeese takaso, "Sitibeneeye Godeeyo hu sabolo, osoloso Moseseeye hu mapoo duwa takeme duso," diso.

<sup>12</sup> Esem e odoo susuga sabolo, osoloso Yu odoowo wiligi odoo tebisa sabolo, osoloso Godeeye tei magoo ee eligili odoo sabolo oso to hagee duloso, dia komonolone Sitiben tooso. Osoloso diayo Sitiben toloso wiligi odoo tebisa oso to kesamelee mapoo ido palaso. <sup>13</sup> Diba omapoo peleso dobolone, Sitibeneeye goo maga gamenee takeli odoo oso gamenee egeese takaso, "Odoo hagooso ibada tei moso maga tokenee goo takeliso, osoloso Moseseeye eligi goo hogugu goo maga tokenee goo takeliso. <sup>14</sup> Osoloso iba yayo egeese takeme duso, 'Yesu Nasalet odoo oso ibada tei moso tegei guobuguloso, see Moseseeye tei magoo hogugu ee abo poogoloso, see tei dia abo magalaiso,'" diso.

<sup>15</sup> Esem e wiligi odoo tebisa susuga dobolone Sitiben mapoo bolone egeino, Sitibeneeye mudu Godeeyo momaiye eyo mudu masi poloso tobudume egeiso.

#### Sitibeneeye to toowa taka goo

<sup>7</sup> Esem e tei moso wiligi odoo taba oso Sitiben mapoo egeese woosaso, "Odoo susuga oso nee goo maga egee takoo teiyo?" diso.

<sup>2</sup> Esem e Sitibeneeye tei moso wiligi odoo tebisa dimapoo to nei takolone egeese takaso, "Mo ei dio osoloso mo ma dio, niba mo to hagee medee dui. Ibad a amawe Eibalaham yo Halan mi mapoo dilega, Mesopotamia mi mapoo badoboome, ibada Godee kitulugu toowa oso yimapoo peledabaso. <sup>3</sup> Esem e Godeeye Eibalaham mapoo egeese takaso, 'Nee mi sabolo nee odoo sabolo poogoloso ayo namapoo eligilei mi mapoo di,' diso.

<sup>4</sup> Esiga Eibalaham Mesopotamia mi poogoloso see Halan mi mapoo badalame diso. Esino Eibalaham yo mi omapoo badoboso, ama teme, Godeeye yo see epedee niyo egee do mi hamapoo sibe, diso. <sup>5</sup> Esem e Godeeye mi hamapoo Eibalaham mapoo mi su pepooko tenele. Esino Godeeye Eibalahambolo osoloso amawe dibolo oso hamamee mi hagee talai maga to takoloso magooso. Beeame omapoo Eibalaham yo holo soomagelega badebeiso. <sup>6</sup> Osoloso Godeeye yimapoo egeese takaso, 'Namawe dio oso mi hee mapoo dileso odoo soo masi dabalaiso. Egeeseega mosobia odoo oso namawe dimapoo tou nei mauwe wulayo talaiso. Osoloso diayo dala ma kulodu dobolone dugo 400 pagalaiso. <sup>7</sup> Esino namawe dimapoo dala egee tenemolo odoo dimapoo ayo nei dala tenelaiso. Egeeseega namawe diayo mi egee poogoloso see hamapoo sibilesi, amapoo goomoga tenelone mo hu dokodoo poudileiso,' diso. <sup>8</sup> Osoloso Godeeye Eibalaham dio to takoloso magolone egeese takaso, 'Ayo nobolo osoloso namawe dio eyo Godee doloso badolone, nima koola hamapoo badalaiso. Osoloso niyo amapoo tei too goo ee eligilone nibolo, osoloso nowolo dibolo, osoloso namawe dio susuga hamamee soolooga magalai sabolo, kolo kookoolone dabalaiso,' diso. Esem e Eibalahamye giso holo Aisek soomageme, beeame 8 poogoloso kolo kooso. Osoloso hamamee Aisekeeye giso holo Yekob soomageme, kolo kooso. Osoloso Yekob sabolo owolo giso holo 12 susuga kolo kookooso. Esiga Yekobowo owolo 12 odoo hagooso ibada bala 12 eyo bei ka moloso.

<sup>9</sup> Esino Yekobowo owolo susuga hagooso dibada omolo Yosep mapoo dia kweliso. Egeeseelone dibada omolo Yosep yo Isipi odoo mapoo ido dileso neiso talame teneeso. Yayo mi omapoo dileso, nei mauwe tou toowa wulayo tolone badalame. Esino Godee yibolo badolone, <sup>10</sup> dala goo ma kuloduga yo medee pidiliso. Osoloso Godeeye Yosep mapoo goo goolee tekepo teneeso. Esem e Isipi odoowo wiligi odoo taba oso goo hagee ogoloso, Yosep mapoo dia goomogaso. Esem e Yosep mapoo egeese takaso, 'Nayo ama hemi tou tolone badolone, Isipi mi toowa nayo gibadalaiso. Osoloso mo moso sabolo nayo gibadalaiso,' diso.

† LIBETINI HOWO GISILI MOSO MA DEBELI ODOO: Odoo hagee dibada goo egeesi: Daga hoogoo Loum odoo oso gidabamelee beeame omapoo, diba iyado dileso neliga moso tegei ma kulodu toosooso. Osoloso odoo abo nei mauwe tou talagamo silesibe, diso. Osoloso hamamee Loum odoo oso dibada mi mapoo wedi diadee, diso.



<sup>11</sup> Osoloso hamamee Isipi mi sabolo, ibada amawe diayo debei Keinen mi sabolo, mapoo osoko pa toowa beeame oso nei mauwe poogooso. Esemé odoo omapoo debeli oso dala ma kulodu debeiso. Osoloso ibada amawe sabolo nei mauwe debeiso. <sup>12</sup> Esino Yekobeeye Isipi mi mapoo nei melee goo ee duloso, owolo diayo nei ee neiso talame diye diso. Esemé diayo dileso nei tolosa sibadeeso. <sup>13</sup> Nei diayo tosibadee mauwe poogoome, see Isipi mi mapoo nei abo talame diadeeso. Diba dileso nei talame doboome, Yosep yimapoo pelebada goo ee yayo emei dimapoo woola takaso. Esemé Isipi wiligi odoo taba oso Yosepeeyo soosoo eyo goo gooleedooso. <sup>14</sup> Esemé Yosepeeye ama sabolo, o soosoo sabolo, Isipi mi mapoo sibilesa dabalame to teneeso. Esemé diba Yosepeeye to egeesee taka duloso, diba susuga 75 odoo oso Isipi mi mapoo sibadeeso. <sup>15</sup> Esemé Yekobowo owolo dio Isipi mi mapoo dileso dobolone, yibolo, osoloso owolo dibolo mi omapoo wediaso. <sup>16</sup> Hamamee diba wedime, dibada su Sekem mi mapoo midoosalame todiadeeso. Midoo wulu ou hagee daga hoogoo Eibalahamyé Hamolowo owolo mapoo neiso tooso.

<sup>17</sup> Dugo bei poogoloso hamamee ibada amawe dio oso Isipi mi mapoo bei moodooso. Esemé beeame omapoo Godeeye Keinen mi Eibalaham mapoo, osoloso amawe dimapoo tenelaiso, doloso to takoloso magoo beeame oso koola simiso. <sup>18</sup> Esiga wiligi odoo taba dia, Yosepeeyo goo gooleedele poogoo odoo oso Isipi mi ee gibadebeiso. <sup>19</sup> Wiligi odoo taba hagooso ibada amawe dio dia gowolone, dimapoo kukulone dala tenelone badebeiso. Osoloso yayo to kitulugu sabolo pupulone, ibada amawe dia holope gie sooloogamagoo susuga ee wedilame, peegoo maloso peegee diso.

<sup>20</sup> Egeeseelone debei beeame omapoo, Isalael sobo hedebe oso giso holo mudu medee tekepo sooma-gooso, o hu Moses. Osoloso a bakadio hedebe di ma kulodu ama dio owee dio oso dibada moso kulodu mada gibadebeiso. <sup>21</sup> Osoloso a bakadio hedebe di poogoloso holope peegoo magooso. Esemé Isipi wiligi odoo taba eyo owolo sobo holo oso holope ogoloso, yayo maduloso, owolo doloso mosopoo madio dileso pooposo. <sup>22</sup> Esemé Moses kawume, Isipi odoo oso yimapoo sukulu goo goolee tekepo eligiso. Osoloso yayo to taka sabolo, tou too sabolo, kitulugu toowa tomo sileeso.

<sup>23</sup> Osoloso Moses dugo 40 poogoloso badolone, yayo o odoo Isalael odoo ee agalame dilame gooleeso.

<sup>24</sup> Yayo dulone egeino Isipi odoo heeso Isalael odoo hee woomelee ogoloso, yayo nei Isipi odoo hee wooloomaso. <sup>25</sup> Osoloso Moseseeye egeesee gooleeso, 'Isalael odoo oso goolee, ayo diba dala ma kuloduga peegoo gilimado dilame, Godeeye a dimapoo ka sibeye di doo,' dee gooleeso. Esino Isalael odoo oso goo ee gooleedele. <sup>26</sup> Beeame hee mapoo Moseseeye Isalael odoo bakadio biliga molome egeiso. Esemé yayo diba biliga melee hamaga takalame hodu dileso, egeesee takaso, 'Emegei, niba

kasee maga ka biliga malala? Niba soosoo hedebe,' diso.

<sup>27</sup> Esemé odoo hee emegei woomelee oso Moses halaga buguloso egeesee takaso, 'No ibada wiligi tabayo, osoloso goo meedili odoowo?' <sup>28</sup> Nayo eiyo Isipi odoo hee wooloomaso. Esiga nayo a wooloomalame ka sala?' diso. <sup>29</sup> Esemé Moseseeye to ee duloso obulone, Isipi mi maga see Midian mi mapoo pulo diso. Osoloso Midian mi omapoo odoo soo masi badolone sobo huloso, giso holo bakadio sooloogamagooso.

<sup>30</sup> Moses Midian mi mapoo dileso dugo 40 poogoloso badolone, see Sainai mubi esia kumoo miwe poogoo mi mapoo silone egeino, homo su deiyepo o du douso nadelega dou omapoo paiya molome ogoloso howoodooso. Esino dou paiya oma kulodu Godeeyo momaiye oso tebidi egeiso. Esemé Moses yo dou paiya mapoo agalame hodu dimeleeno, Godeeye yimapoo egeesee takaso, <sup>32</sup> 'A namawe dio Eibalaham, Aisek, osoloso Yekob dibada Godee oso,' diso. Esemé Moses ebia sabolo kikiligolone see tobu egele poogooso.

<sup>33</sup> Esiga kitulugu Godeeye see yimapoo egeesee takaso, 'Mi nayo taba egee molo tei mi. Esiga nee homo bi ka egee tiga magee. <sup>34</sup> Ayo mo odoo susuga oso Isipi mi mapoo dobolone dala egee tomolo, ayo egeiso. Osoloso diayo dala ma kulodu dobolone pupusiga melee ayo duso. Esiga ayo diba Isipi mi maga gilimadoloso peegoo dilame ka simi. Esiga no epedee Isipi mi mapoo see wedi di,' diso.

<sup>35</sup> Esiga Moses hagee daga Isalael odoo oso gowolone egeesee takaso, 'No ibada wiligi tabayo, osoloso goo meedili odoowo?' diso. Esino Godeeye Moses hedebe yo hesiaso, yayo Isalael odoowo wiligi odoo toboloso badolone, diba dala ma kuloduga gilimadoloso peegoo dilame. Esiga homo deiyepo o du douso nadelega paiya molone, Godeeyo momaiye oso goo hagee takaso. <sup>36</sup> Osoloso Moseseeye o odoo Isipi mi maga gilimadoloso peegoo dilame, yayo goo toowa mudu opusomo opusomo di Isipi mi mapoo, osoloso Abei Bige mapoo moodoogaso. Esemé yayo o odoo Isalael odoo gilimadoloso Isipi mi maga peegoo diso. Osoloso yayo miwe poogoo mi mapoo o odoo gilimadoloso dugo 40 ma kulodu silone goo mudu opusomo opusomo di moodoogamo sileeso.

<sup>37</sup> Osoloso Moses hedebe hagooso o odoo Isalael odoo dimapoo egeesee takaso, 'Godeeye niba ee gooleebugulone nima kulodu o to tosili odoo a egeesi masi hesileiso,' diso. <sup>38</sup> Esiga Moses hedebe hagooso ibada amawe dio Isalael odoo sabolo, miwe poogoo mi mapoo silone, yayo Sainai mubi dokodoo peleso badoboome, Godeeyo momaiye oso yibolo to kolone yimapoo gie badeli to imapoo tenelame teneeso.

<sup>39</sup> Esino ibada amawe dio oso Moseseeye to mapoo gowolone, o to mapoo mesile. Esemé diba Isipi mi mapoo wedi dilame goomogaso. <sup>40</sup> Osoloso Moses Sainai mubi dokodoo osee badoboome, odoo susuga oso Moseseeye emei Elon mapoo egeesee takaso, 'Moseseeye iba Isipi mi maga gilimado simiso. Esino

Moseseeye di, iba gooleede. Esiga iba ee gilimado dilei godee masi deeso moodee,' diso. <sup>41</sup> Esemee beame omapoo Isalael odoo oso gamenee godee be masi deeso moodooso. Osoloso diayo gamenee godee omapoo goomogolone, o hu dokodoo poudalame gala hu wologaso. <sup>42</sup> Esiga Godeeye goo hagee ogoloso dimapoo miligi piaso. Esemee diba kei ma dokodoo bi egee molo, a, osoko, osoloso giwo, omapoo godee masi goomogolone doboome, Godeeye diba hamaga takele. Esiga goo hagee Godeeyo to oso booka mapoo taka Godeeyo to tosili odoo heeso booka maga egeesee hoguguso:

'Isalael odoo, niba dui! Niyo miwe poogoo mi mapoo dugo 40 ma kulodu silesibulone, amapoo emegeidi bi sabolo gala hu sabolo woloso teneliso? Haya! Esino niyo gamenee godee mapoo teneliso.

<sup>43</sup> Esiga niba tei moso dugoso tegei ee imadoloso silesibiliso. Osoloso niyo moso oma kulodu goomoga poudili ee amapoo goomoga koo poudili. Esino niyo deeso moodoo gamenee godee Moloko sabolo Lepad godeeyo giwo sabolo omapoo goomoga poudiliso. Esiga niba ayo nibada middee hamaga see mi eli sage Be-bilon mi hodiokoo hasiso bigileiso,' diso.

<sup>44</sup> Esiga tei moso dugoso tegei hagee Godeeye Moses mapoo eligilone egeesee tege diso. Esemee edebeeyo Godeeyo to ee dodolone, moso hagee tegeiso. Osoloso ibada amawe diayo miwe poogoo mi mapoo moso hagee imado silesibulone, 'Godeeye ibolo badoso,' deliso. <sup>45</sup> Esemee dugo abo poogoloso hamamee see Yoswaye ibada amawe dio gilimadoloso mi hagee talame silone, tei moso hagee sabolo imado sibadeeso. Esemee Godeeye ibada amawe dio ee pidilone, mibia odoo susuga ee mi hamaga peegoo hasiso buguso. Osoloso diayo mi hamapoo tei moso dugoso tegei ee toloso dobolone, wiligi odoo taba Deibidiyo beame mapoo peledabaso. <sup>46</sup> Esemee Godeeye Deibidi mapoo goomogaso. Esemee Deibidiye tei moso Godee eyo badalame tei moso dia tagalame woosaso. <sup>47</sup> Esino tei moso dia egee yayo tegele. Owolo Solomonoye tegei.

<sup>48</sup> Esino ibada Godee kitulugu toowa edebeeyo deeso tegei moso oma kulodu koo badeli. Esiga Godeeyo to tosili odoo oso Godeeyo goo maga egeesee takaso,

<sup>49</sup> 'Godeeye egeesee takooso: Keimi mapoo ayo badolone ka gibadoso. Osoloso mi toowa hagee ayo mo homosoko kokusoloso ka tobudoso. Esiga niyo moso togoga, ayo moso omapoo badalai koo tebili. Osoloso niyo ayo badeli moso ee tegelai koo tebili.

<sup>50</sup> Ayo mi toowa sabolo, kei mi sabolo, osoloso bi susuga sabolo moodooso,' diso."

<sup>51</sup> Osoloso Sitibeneeye o to hamameedee see wiligi odoo tebisa mapoo egeesee takaso, "Niba koo mesili odoo. Osoloso nibada sooloo ma kulodu tei too goo mauwe. Esiga niba Godeeyo to mapoo koo duli. Osoloso namawe dio Dio Tei oso eligi goo ee gowolone poogooso. Esiga niyo see egeeseelone, Dio Tei oso eligi goo ee gowolone poogooso. <sup>52</sup> Osoloso namawe diayo Dio Tei oso eligi gowolone, Godeeyo to tosili odoo

susuga mapoo dala teneeso. Esiga Godeeyo to tosili odoo aboso egeesee takaso, 'Odoo tekepo Keliso hamamee sibileiso,' diso. Esemee namawe dio oso diba piluguso. Egeesee ma kulodu odoo tekepo Keliso simiso. Esino niyo gowolone yo tiasoloso wooloomaso. <sup>53</sup> Osoloso daga hoogoo Godeeyo momaiye oso Godeeyo tei magoo nimapoo olo teneme, niyo omapoo mesilega poogooso," diso.

### Sitiben woolooma goo

<sup>54</sup> Esemee wiligi odoo tebisa oso Sitibeneeye to duloso, dia komonolone, dibada mei dia kumudooso.

<sup>55</sup> Esemee Sitibeneeye Dio Tei oso kitulugu toloso badolone, kei mi ma dokodoo egeino, Godeeyo gadeebugu kitulugu toowa ma kulodu Yesu Godeeyo dee deede dokolo mapoo tobudume egeiso. <sup>56</sup> Esemee yayo wiligi odoo tebisa mapoo egeesee takaso, "Ege! A kei mi yamagoloso Odoo Holo Godeeyo dee deede dokolo mapoo tobudo ogoso," diso.

<sup>57</sup> Esemee odoo susuga oso Sitibeneeye to ee dulei gowolone neligidi agadiga sabolo, dibada dulu too-booga doloso sibileso Sitiben tooso. <sup>58</sup> Osoloso diayo Sitiben mosobia oma kuloduga peegoo ido dileso badoboome, yoso enigilame bei mooloogooso. Osoloso Sitibeneeye goo mapoo gamenee takeli odoo abo oso dibada kekeisu dugo tigadoloso, odoo giekauwa, Solowo homo beiyomoo tigamagooso.

<sup>59</sup> Odoo susuga oso yimapoo yoso enigime, Sitibeneeye dokodoo takolone egeesee takaso, "Lodee Yesu, mo dio nayo te," diso. <sup>60</sup> Diayo yoso enigime, yo mi mapoo ebiso tugusaloso badolone, toso neligidi takolone egeesee takaso, "Lodee, dibada goo tokenee hagee hapoloso boobado bigi!" diso. Sitiben to hagee takoloso taso.

**8** Solo omapoo tobudulone Sitiben yoso enigaloso wooloomalame odoo dimapoo goomoga goo takeme, yo wooloomaso. Esemee tei telaga odoo abo oso sibileso Sitibeneeye su midoosoloso dia pupusigaso.

### Edebeeyo tei telaga odoo dimapoo gowe

Esemee Sitiben woolooma beame omapoo Yolusalem mapoo debeli tei telaga odoo mapoo odoo susuga oso gowolone, dimapoo dala tenelame bei mooloogooso. Esemee Soloye moso susuga mapoo peleso tei telaga odoo, giso sabolo, sobo sabolo, toloso neliga moso mapoo huyaseliso. Esemee tei telaga odoo susuga oso Yolusalem maga kukulo dulone, mi pepooko abo susuga mapoo Yudiya mi mapoo osoloso Samalia mi ma kulodu diadeeso. Esino hedebe diye di odoo susuga Yolusalem mapoo debeiso.

### Pilipiye Samalia mi mapoo Godeeyo to taka

<sup>4</sup> Esiga tei telaga odoo susuga oso Yolusalem maga kukulo dileso, mi pepooko opusomo opusomo di mapoo to tekepo takolone, Kelisowo goo takagamo silesibiliso. <sup>5</sup> Osoloso Pilipiye Samalia mi toowa ee ma

kulodu Sebasete mi mapoo dileso peledoboloso, Kelisowo goo odoo susuga mapoo takaso. <sup>6</sup> Esem Pilipiye to tekepo Kelisowo goo takolone, goo opusomo opusomo di moodoogamo silee diayo ogoloso, odoo susuga oso o to medee duso. <sup>7</sup> Osoloso odoo susuga mooloogoodoo oma kulodu bo holo odoo ma kulodu paladee, Pilipiye peegoo hasiso buguso. Esem bo holo oso neligidi googa sabolo peegoo galagadiso. Osoloso odoo su kakawa poogoo sabolo, kido tigidiba sabolo, tekepo moodoogaso. <sup>8</sup> Esem Sebasete mi oma kulodu odoo susuga oso goomoga toowa meleeso.

<sup>9</sup> Esino Sebasete mi ma kulodu odoo googoo gooleedoo badebeiso, o hu Saimon. Esiga yayo beeam susuga o googoo oso goo toowa opusomo opusomo di moodoogamo siloga, Samalia mi toowa mapoo debeli odoo susuga oso ogoloso howoogadeliso. Egeeseelone yayo goolee, eyo nediliyo yo tekepo doloso, suwa peliso. Osoloso odoo susuga, hu toowa too odoo sabolo osoloso goo mauwe odoo sabolo oso, yayo goo opusomo opusomo di moodoo ogoloso, o to mapoo medee duloso tei tooso. Osoloso diayo egeesee takaso, "Odoos hagee Godee masi osoloso o hu Kitulugu Toowa," diso. <sup>12</sup> Esino Pilipiye to tekepo takolone, Godeeye wiligi doloso badeli eyo goo sabolo, Yesu Kelisowo goo sabolo, taka duloso, to omapoo tei teme, giso sabolo, sobo sabolo, howomoo howo sauwidigaso. <sup>13</sup> Osoloso Saimoneeye Pilipiyo to mapoo tei toloso howomoo howo sauwudoloso, Pilipibolo sileeso. Osoloso yayo yibolo silone, Pilipiye goo toowa opusomo opusomo di moodoogamo silee ogoloso, dia howoodooso.

<sup>14</sup> Esem Yolusalem mi mapoo diye di odoo oso Samalia odoo oso Godeeyo to duloso tei too goo ee duloso, Pita dio Yonee dio Samalia tei telaga odoo dimapoo diye, diso. <sup>15</sup> Esino Samalia mi toowa ee ma kulodu Sebasete mi mapoo debeli tei telaga odoo oso Lodee Yesuwo hu maga howomoo howo sauwidigaloso, debei odoo omapoo Dio Tei oso dimapoo meledebelega debeiso. Esem Pita dio Yonee dio Sebasete mi mapoo sibilesa, tei telaga odoo mapoo dibada deeso sigolone, dokodoo takeme, Dio Tei oso dimapoo meledabaso.

<sup>18</sup> Esem Saimoneeye goo hagee ogoloso, diye di odoo dimapoo molee ayo tosimi ee tenelame goolone, <sup>19</sup> egeesee takaso, "A goomogo, mo deeso odoo mapoo sigolone, dokodoo takooga, Dio Tei oso dimapoo ka meledoboo dalame. Niyo kitulugu egee tomo silesibo amapoo tenee," diso.

<sup>20</sup> Esino Pitaye yimapoo egeesee takaso, "No nee molee sabolo dou mi mapoo dileiso. Bei, Godeeye emegeidi bi maga Dio Tei wulayo hagee tenemolo, nayo see moleeso talai diso. <sup>21</sup> Osoloso no ibolo Godeeyo tou hodobo talai koo tobuo. Bei, Godeeyo howo woola nee goo goolee egee dia tokenee. <sup>22</sup> Esiga no epedee nayo tokenee goolee omaga mudu opusomo doloso Godee mapoo takee. Egeeseega nayo tokenee egee goolee molo, yayo hapoloso boobado bigilei

malaiso," diso. <sup>23</sup> Esem Pitaye Saimon mapoo see egeesee takaso, "Ayo ogoso, nee sooloo ma kulodu emegei hegia toowa molone, goo tokenee mapoo hamamee deedeemo siliso," diso.

<sup>24</sup> Esiga Saimoneeye obulone see Pita dio Yonee dio dimapoo egeesee takaso, "A goomogo, niyo a Godee mapoo dokodoo takee, bei niyo taka goo oso amapoo peledebelega pagalame," diso.

<sup>25</sup> Osoloso hamamee Pita dio Yonee dio oso Yesu sabolo silee goo ee odoo susuga mapoo takoloso, see Yolusalem mapoo dulone, Samalia ma kulodu mibia pepooko abo mapoo to tekepo takomo diso.

### Itiyopia odoo Pilipiye howomoo howo sauwidi goo

<sup>26</sup> Beame heeso Godeeyo momaiye oso Pilipi mapoo egeesee takaso, "No toboloso Yolusalem maga Gasa mi mapoo dili eli omapoo di. Eli egee osoko sibili deede dokolo mapoo miwe poogoo mi mapoo moloso," diso. <sup>27</sup> Esem Pilipiye toboloso dulone eli domopoo egeino, Itiyopia wiligi odoo hee, Itiyopia mi eyo wiligi taba sobo Kandake eyo molee gibadili egeiso. Yo Yolusalem mapoo howo gisilame di oso see wedi sibulone, talaka masi, esino be masi mapoo bagagoloso, be oso gisibadoloso dimolome mapoo buloso, Godeeyo to tosili odoo Aisayaye hogugu booka hesigamo sibumeleeso. <sup>29</sup> Esem Dio Tei oso Pilipi mapoo egeesee takaso, "No dileso odoo koola omapoo tee-bee," diso.

<sup>30</sup> Esem Pilipiye odoo hee yima koola omapoo hoguo sibilesa tobudulone duno, odoo yayo Godeeyo to tosili odoo Aisayaye hogugu booka hesigamelee duso. Esem Pilipiye yimapoo egeesee woosaso, "Nayo egee hesigamolo goo eyo bei no gooleedoosomo?"

<sup>31</sup> Esino odoo yayo yimapoo nei egeesee takaso, "Haye, oposusu eyo bei a gooleede. Bei, edebeeyo oposusu hagee eyo bei amapoo koo eligili." Osoloso yayo Pilipi mapoo egeesee takaso, "No talaka masi ma dokodoo peledoboloso ama hodiokooga bilei sibe," diso. Esem yo peledoboloso biaso.

<sup>32</sup> Esiga odoo yayo badolone Godeeyo to hogugu hesigamelee hagooso:

"Yo sipi be hu wooloomalame ido dili egeesi masi ido diso. Yo sipi be hu masi o too edebeeyo kooga, to mauwe tabameli egeesi masi, edebeeyo yimapoo dala teneme, dimapoo hamaga takele.

<sup>33</sup> Edebeeyo yo manolone yo pepooko dolone, o goo medee hooda meedile. Edebeeyo o amawe dio eyo goo opossileime, bei yo amawe dio mauwe. Osoloso edebeeyo yo woolomaso, esiga yo mi toowa hamapoo holo soomagele," diso.

<sup>34</sup> Esem Itiyopia odoo oso Pilipi mapoo egeesee woosaso, "Amapoo takee, Godeeyo to tosili odoo hagooso agamo goo takoolo? Eyo nediliyo o goo takoolo, o odoo heeyo goo takoolo?" diso. <sup>35</sup> Osoloso Pilipiye, odoo yayo Godeeyo to hesigamelee eyo bei yimapoo takolone bei mooloogoolone, to tekepo Yesuwo goo sabolo takaso.

<sup>36</sup> Osoloso obakadio eli domopooga dulone, howo tolobo mapoo peledabaso. Eseme Itiyopia odoo oso Pilipi mapoo egeesee takaso, "No ege! Howo tolobo bou hagooso. Nayo a howomoo howo sawwidilei soowayo?" diso. <sup>37</sup> [Eseme Pilipiye nei egeesee takaso, "Nee sooloo ma kulodu tei too mologa, no howomoo howo sawwilei soowa," diso. Osoloso Itiyopia odoo oso Pilipi mapoo nei egeesee takaso, "Ayo Yesu Keliso ee Godeeyo owolo doloso yimapoo tei toso," diso.] <sup>†38</sup> Eseme Itiyopia odoo oso talaka masi be masi mapoo bagagoloso ido dili odoo mapoo egeesee takaso, "Talaka masi omapoo kookoodebee," diso. Eseme obakadio howo tolobo omapoo meilesa, Pilipiye Itiyopia odoo howomoo howo sawwidiso. <sup>39</sup> Osoloso diba howo tolobo maga mubi dokodoo peledoboome, Dio Tei oso Pilipi toloso mi eli sage Asotus mapoo holoogooso. Eseme Itiyopia odoo oso yo see egele poogooso. Eseme yo Godee mapoo tei tooga, yayo dulone goomoga sabolo o mi mapoo diso. Esino Pilipiye Asotus mi mapoo peledoboloso, to tekepo Yesuwo goo takoloso, see Kasalia mi mapoo dulone, mi pepooko abo mapoo takomo diso.

### Yesuye Solo mapoo peledaba goo

**9** Osoloso beeame omapoo Soloye Yolusalem mapoo badolone, tei telaga odoo dimapoo komonolone hegia toowa molone, "diba piligileiso", diso. Egeeseelone yayo Damasko mi mapoo tei telaga odoo, giso sabolo, sobo sabolo, diba dee tiso tegisaloso Yolusalem mapoo iyado sibilame tei moso wiligi odoo taba agalame diso. Eseme tei moso wiligi odoo taba oso peipa mapoo to hogugulone egeesee hoguguso, "To hogugu hagee namapoo kitulugu teneeso, nayo Damasko mi mapoo dilesa, Yesu mapoo tei telaga odoo susuga talame. Esiga no Damasko mi mapoo dilesa, Yu odoowo howo gisili moso wiligi odoo tebisa dimapoo to hogugu peipa hagee tenee," diso. <sup>3</sup> Eseme Soloye odoo abo oso kitulugu toloso Damasko mi mapoo debeli tei telaga odoo susuga talame diso. Eseme diba Damasko mi koola mapoo peledabalame dimeleeno, kei ma dokodooga gadeebugu oso sibilesa Solo tooso. <sup>4</sup> Eseme Solo yo mi mapoo homodobuloso molone, to taka duno, to oso yimapoo egeesee takaso, "Solo, Solo, bei kasee maga nayo amapoo dala ka tenemalala?" diso.

<sup>5</sup> Eseme Soloye woosaso, "Wiligi odoo, no ogumo?" diso.

Eseme to oso Solo mapoo egeesee takaso, "A Yesu, nayo tei telaga odoo dimapoo dala egee tenemolo amapoo tenemoloso. <sup>6</sup> Esiga no toboloso Damasko mi toowa ma kulodu di. Egeeseega mi omapoo badeli odoo hee oso nayo goo talai namapoo eligileiso," diso.

<sup>7</sup> Eseme odoo abo Solobolo diadee oso goo hagee ogoloso, ebiga sabolo tebisamolone to takele poogooso. Bei, to taka diba duso, esino odoo tei egele poogooso. <sup>8</sup> Solo homodobia maga hogabuloso howo

<sup>†</sup> To hagee odoo abo oso taka Lukaye hogugu, dee takeliso. Esino odoo bei oso taka Lukaye hogugule, dee takeliso.

puo egeino, howo bakadio siliwe meleeso. Eseme yibolo diadee odoo abo oso Damasko mi mapoo dulone, o dee mapoo toloso ido diso. <sup>9</sup> Solo howo bakadio siliwe molone Damasko mi mapoo dilesa badolone, beeame bakadio hedebe di eyo kulodu nei sabolo howo sabolo nelega badebeiso.

<sup>10</sup> Eseme Damasko mi toowa ma kulodu tei too odoo hee badebeiso, o hu Ananayas. Beeame omapoo Lodeeye Ananayaseeyo howo opusomo doloso yimapoo egeesee takaso, "Ananayas!"

Eseme Ananayaseeye nei egeesee takaso, "Lodee, nayo egee takoo a duso," diso.

<sup>11</sup> Eseme Lodeeye yimapoo egeesee takaso, "No toboloso eli hee, o hu Hooda amaga Yudaseeyo moso ma kulodu peleso, Talesas odoo, o hu Solo, yo agalame wose, bei yo amapoo takolone badoso. <sup>12</sup> Bei, ayo o howo opusomo doloso, nayo sibilesa nee deeso yo sigoga, o howo tekepo palame ka eliga," diso.

<sup>13</sup> Eseme Ananayaseeye egeesee takaso, "Esino Lodee, odoo susuga oso odoo hagee eyo o goo amapoo opusususo. Osoloso a gooleedooso, yayo Yolusalem mapoo Godeeyo odoo mapoo dala teneli.

<sup>14</sup> Esiga tei moso wiligi odoo tebisa oso yimapoo kitulugu teneme, Damasko mi hamapoo dobolone, Yesu namapoo tei telagali odoo susuga iyadoloso see Yolusalem mapoo iyado diadeeso," diso.

<sup>15</sup> Esino Lodeeye Ananayas mapoo egeesee takaso, "Di, bei ayo Solo yo mo tou talame yo hesiaso. Osoloso Yu dele poogoo odoo susuga sabolo, osoloso dibada wiligi odoo tebisa sabolo, osoloso Yu odoo susuga mapoo mo goo woola yilige bigileiso. <sup>16</sup> Osoloso yayo amapoo tei too maga dala toowa talai goo ee ayo yimapoo eligileiso," diso.

<sup>17</sup> Eseme Ananayaseeye dilesa Yudaseeyo moso kulodu peleso, Solo mapoo o deeso sigolone egeesee takaso, "Mo odoo, Solo nayo eli domopooga sibulone, Lodee Yesu egei yayo a diye diso. Osoloso yayo nee howo tekepo poloso Dio Tei namapoo meledabalaiso," diso. <sup>18</sup> Beeame omapoo di bee masi oso Solowo howo maga homodobume, o howo tekepo paso. Eseme Ananayaseeye yo howomoo ido meilesa, howo sawwidiso. <sup>19</sup> Osoloso Solo nei naloso kitulugu tooso.

Eseme beeame abo ma kulodu Soloye tei telaga odoo abo sabolo Damasko mi mapoo debeiso.

### Soloye Damasko mi mapoo to tekepo Yesuwo goo taka

<sup>20</sup> Beeame olo omapoo yayo Yu odoowo howo gisili moso tegei ma kulodu gapeleso, to tekepo Yesuwo goo takolone bei mooloogoolone egeesee takaso, "Yesu Godeeyo owolo oso," diso. <sup>21</sup> Esiga odoo susuga to hagee dulugaloso howoodolone egeesee takaso, "Odo hagooso daga Yolusalem mapoo badolone, odoo susuga oso Yesu mapoo tei telagaga, yayo dimapoo dala teneloso piligiliso. Esiga tei moso wiligi odoo tebisa oso yo diye deme, tei telaga odoo susuga ee yayo iyadoloso Yolusalem mapoo dilame ka simidoo," diso. <sup>22</sup> Eseme Soloye Godeeyo to takalame, Godeeye yimapoo kitulugu tenee oso dia toowa diso.

Eseme yayo Yesu Godeeye hudi magoo Keliso oso doloso dimapoo eligiga, Yu odoo susuga Damasko mi mapoo debeli oso to nei takalai gooleedele pegeeliso.

<sup>23</sup> Osoloso beeambe bei poogoloso hamamee, Yu odoo oso Solo wooloomalame to mousu. <sup>24</sup> Osoloso di-ayo mosobia pee beelee eyo osulu miyopoo tebisamolone, Solo tolosu wooloomalame beeambe susuga sabolo gesi susuga sabolo gidebeiso. Esino edebeeyo yimapoo sibilesu goo hagee takeme, yo duso. <sup>25</sup> Eseme Solo o odoo abo oso yo pidilame yo pulo dilame, gesi hee mapoo yo wogai toowa ma kulodu husoloso beelee dokodooga peegoo toosooso.

<sup>26</sup> Eseme Solo Yolusalem mapoo pulo sibilesu, tei telaga odoo omapoo debei sabolo hedebe dalame seme, diayo yibolo ebiase. Bei, Soloye Lodee mapoo tei too goo ee duloso, medee tei tele. <sup>27</sup> Esino Ban-abasiye yo pidilone diye di odoo mapoo Solo ido dileso egeesee takaso, "Solo Damasko eli domopooga dimolome omapoo Lodeeye peledoboloso yimapoo to keiso. Eseme Soloye yimapoo tei tolosu Damasko mi mapoo kitulugu sabolo Godeeyo to Yesu Kelisowo goo takalai ebile," diso. <sup>28</sup> Eseme Soloye tei telaga odoo sabolo Yolusalem mapoo badolone, odoobolo ebilega, Lodee Yesuwo goo dia kitulugu sabolo mi ee ma kulodu takomo sileeso. <sup>29</sup> Egeeseelone, Guliki dia to keli Yu odoo sabolo Yesuwo goo maga Soloye dimapoo toso agadigeliso. Eseega diayo yo wooloomalame gweliso. <sup>30</sup> Osoloso tei telaga odoo oso goo hagee duloso, Solo ido dileso Kasalia mi mapoo peledabaso. Osoloso see abaga o midee Talesas mapoo diye diso.

<sup>31</sup> Eseme Yudiya, Gelili, osoloso Samalia mi bakadio hedebe di hageeyo kulodu mi susuga mapoo tei tele poogoo odoo oso tei telaga odoo mapoo dala teneli goo oso mauwe poogoome, dibada tei too toowa diso. Egeeseelone diba Lodee Yesu mapoo mesilone Dio Tei oso pidi goo sabolo badolone tei too odoo bei moodooso.

#### Pitaye Ainiyas tekepo moodoo goo

<sup>32</sup> Pitaye Yu odoowo mi susuga mapoo silone, Godeeyo odoo mapoo Godeeyo to oso pidimo siliso. Egeeseemo silone, Godeeyo odoo abo Lida mi mapoo debeli odoo mapoo dileso peledabaso. <sup>33</sup> Osoloso mi omapoo egeino, odoo su kakawa poogoo, o hu Ainiyas, o kida mapoo teleme egeiso. Yo su kakawoloso dugo 8 ma kulodu beeambe susuga tiameliso. <sup>34</sup> Esino Pitaye yo ogoloso yimapoo egeesee takaso, "Ainiyas, Yesu Kelisoye no epedee tekepo poso. Esiga no toboloso nee kida booloogee," diso. Eseme beeambe omapoo Ainiyas tekepo poloso tabaso. <sup>35</sup> Osoloso Lida mi mapoo debeli odoo sabolo Salon mi kubo mapoo debeli odoo sabolo oso odoo su kakawa poogoo tekepo poloso silee ogoloso, diayo Lodee Yesu mapoo tei telagaso.

#### Pitaye Tabita tekepo moodoo

<sup>36</sup> Esino Yopa mi mapoo tei too sobo badebeiso, o hu Tabita (o hu hee Guliki toso hedi Dokas). Yayo odoo abo pidimo silone, emegei bi mauwe odoo sabolo dia pidimo siliso. <sup>37</sup> Esino Pita Lida mi mapoo osee bado-boome, Tabita paiye tolosu taso. Eseme o odoo oso o su howo sawudoloso moso egi doko tegei ma kulodu debi pooba goopoogoo mapoo magooso. <sup>38</sup> Esino Lida mi egee Yopa mi maga haga hoogoonee. Eseme tei telaga odoo Yopa mi mapoo debeli odoo oso Pita Lida mi mapoo badoso doloso odoo bakadio oso Pita takalame diye diso. Eseme diayo Pita sibilame egeesee takaso, "Pita, no ibada mi mapoo saga sibe!" diso.

<sup>39</sup> Eseme Pita dibolo diso. Osoloso yo Yopa mi mapoo peledoboome, diayo Pita yo soboso tamelee debi dokodoo pooba mapoo ido palaso. Moso oma kulodu sobo bau susuga pupusugamelee oso, Pita ogoloso yimapoo Tabitaye telega silone dugo dusa eligiso.

<sup>40</sup> Esino Pitaye sobo bau sabolo, osoloso odoo abo sabolo peegoo di doloso, ebiso miyomoo tugusaloso badolone dokodoo takaso. Yayo takoloso, sobo ta mapoo bidibuguloso yimapoo bolone egeesee takaso, "Tabita, no teebee," diso. Eseme Tabita howo puo ogoloso, Pita ogoloso hogabiaso. <sup>41</sup> Eseme Pitaye yo pidilone, o dee mapoo tolosu tebidiso. Osoloso tei telaga odoo sobo bau sabolo, osoloso odoo abo sabolo gilimadoloso, Tabita tekepo poloso badebei dimapoo eligiso. <sup>42</sup> Eseme Yopa mi mapoo debeli odoo oso goo hagee duloso, Lodee mapoo tei telagaso.

<sup>43</sup> Eseme Pitaye Yopa mi mapoo beeambe susuga badolone, gala kolo sabolo tou teli odoo Saimonobolo o mosopoo badebeiso.

#### Godeeye Yu dele poogoo odoo Konelijas mapoo to taka goo

**10** Kasalia mi mapoo Loum ha teli odoo mooloogoodoo meleeso. Mooloogoodoo hagee Itali mi toowa eyo mooloogoodoo oso. Esino Konelijas mooloogoodoo egee gibadiliso. <sup>2</sup> Odoo Konelijas hagee Godeeye goomoga goo tomo silame goomegeliso. Osoloso Konelijas yibolo osoloso o moso kulodu debeli odoo susuga oso Godee mapoo mesiliso. Osoloso yayo bi mauwe odoo mapoo biso pidilone, beeambe susuga ma kulodu Godee mapoo takolone badebeiso. <sup>3</sup> Osoloso beeambe hee habe mapoo Godeeye Konelijaseeyo howo opusomo doloso, yayo Godeeyo momaiye tei egeiso. Osoloso momaiye oso sibilesu yimapoo egeesee takaso, "Konelijas!"

<sup>4</sup> Eseme Konelijaseeye Godeeyo momaiye mapoo ebia sabolo bolone egeesee takaso, "Wiligi odoo, nayo ogoogoomogolo?" diso.

Eseme Godeeyo momaiye oso yimapoo egeesee takaso, "Nayo Godee mapoo takemelee goo ee yayo duso. Osoloso nayo bi mauwe odoo pidimelee Godeeye ogoloso goomogoso. <sup>5</sup> Esiga nayo epedee odoo abo Yopa mi mapoo diye, dee takee, diayo Saimon Pita

namapoo ido sibilame. <sup>6</sup>Yo gala kolo sabolo tou teli odoo Saimonobolo o mosopoo badoso. O moso ee abei toowa palaga mapoo tegei moloso," diso.

<sup>7</sup>Osoloso Godeeyo momaiye oso yibolo to kemeleso dime, o tou teli odoo bakadio sabolo, osoloso ha teli odoo hee Godee mapoo tei teli odoo sabolo gili-madooso. Hateli odoo hagee Konelijas pidili. <sup>8</sup>Osoloso Konelijaseeye Godeeyo momaiye oso yimapoo taka goo ee dimapoo takoloso see diba Yopa mi mapoo diadee diso.

#### Pitaye howo opusomo di goo

<sup>9</sup>Eseme diba Yopa mi mapoo dulone eli domopoo tiesaso. Osoloso mi hadobume dulone, osoko oo domo toboome, Yopa mi koola mapoo peledabalame dimeleeso. Osoloso beeamome omapoo Pitaye Godee mapoo takalame moso omu ma dokodoo palaso. <sup>10</sup>Eseme yo dokodoo takolone badoboome, hodiaso. Eseme odoo abo oso o nei simolome, Godeeye o howo opusomo diso. <sup>11</sup>Eseme yayo egeino, kei mi yam-agoloso molome egeiso. Eseme kei ma dokodooga dugo masi eyo pee mapoo tiso bagagisaloso o mudugiyopaga mi mapoo kukoosoo molome egeiso. <sup>12</sup>Dugo ee ma kulodu gala opusomo opusomo di susuga, homo bakadio bakadio di oso dili sabolo, osoloso beliyeso kolo dili sabolo, osoloso só egeiso. <sup>13</sup>Eseme kei ma dokodooga toso yimapoo egeesee takaso, "Pita, no gala susuga hagee ma kulodu nayo abo woloso ne," diso.

<sup>14</sup>Esino Pitaye nei egeesee takaso, "Haye, Lodee, a gala egeesi koo nali. Bei, nayo gala egeesi na ne doloso daga hoogoo tei magooso. Esiga ayo gala abo woloso nalai," diso.

<sup>15</sup>Eseme toso see nei egeesee takaso, "Godee, ayo bi susuga tekepo di, bi egee see nayo tokenee dee na takee," diso.

<sup>16</sup>Godeeye Pita mapoo gala susuga nalai tekepo doloso taka goo ee bakadio hedebe di takoloso dugo masi ee see kei ma dokodoo topeleso osugob-oodooso.

<sup>17</sup>Eseme Pitaye o howo opusomo doloso egei goo eyo bei ee goolone badoboome, Konelijaseeye diye di odoo oso sibilaso, Saimonowo moso beele osulu miyopoo tobudulone bameleeso. <sup>18</sup>Osoloso diayo egeesee takaso, "Odoo hee Saimon Pita yo moso kulodu badolo?" diso.

<sup>19</sup>Esino Pita yayo egei goo ee eyo bei goolone osee badoboome, Dio Tei oso yimapoo egeesee takaso, "Pita, odoo bakadio hedebe di oso no esigamoloso. <sup>20</sup>Esiga no toboloso miyomoo meilesa dibolo di, bei ayo diba no hamapoo esiamo sibe," diso.

<sup>21</sup>Eseme Pitaye miyomoo meilesa dimapoo egeesee takaso, "Niyo odoo egee esigamo silesibo odoo ee aso. Esiga niba hamapoo ogoo talame ka sibadeeyo?" diso.

<sup>22</sup>Eseme diayo Pita mapoo nei egeesee takaso, "Ibada wiligi odoo taba Konelijas Loum ha teli odoo gibadili odoo oso iba diye diso. Konelijas yo Godeeye goomoga goo tomo silame goomegeliso, osoloso yo

Godee mapoo mesiliso. Osoloso Yu odoo susuga oso yo tekepo deliso. Esiga Godeeyo momaiye oso sibilaso Konelijas mapoo takolone, Pita nayo Konelijas mapoo Godeeyo to takee, diso. Esiga iyo no Konelijas mapoo ido dilame ka simi," diso. <sup>23</sup>Osoloso diayo goo hagee taka koodobuloso, Pitaye diba o mosopoo gesi hedebe omapoo tilame ido palaso.

Osoloso diba omapoo tiesaloso, mi beeamome Konelijaseeye diye di odoo sabolo, tei telaga odoo abo Yopa mi mapoo debeli odoo sabolo Pita idoloso Yopa mi maga Kasalia mi mapoo diadeeso.

#### Pitaye Konelijaseeyo moso kulodu Yu dele poogoo odoo dimapoo Godeeyo to taka

<sup>24</sup>Diayo dilesa eli domopoo tiesaloso beeamome hee oso Kasalia mi mapoo dilesa peledabaso. Konelijas yo beeamome omapoo bolone, o soosoo susuga sabolo, o odoo susuga sabolo, gilimadoloso balaga meleeso.

<sup>25</sup>Eseme Pitaye Konelijaseeyo moso kulodu gasibume, Konelijaseeye Pitayo homo beiyomoo ebiso miyomoo tugusaloso yimapoo goomogalame balaboo tiaso.

<sup>26</sup>Esino Pitaye Konelijaseeyo dee mapoo toloso yo tobudulone egeesee takaso, "No teebee, nayo a toowa doloso amapoo na gauwe. Bei, a mosoowe odoo," diso.

<sup>27</sup>Osoloso Pita dio Konelijas dio to komo moso kulodu gadulone egeino, odoo bei mooloogoodoo egeiso.

<sup>28</sup>Eseme Pitaye Yu dele poogoo oso mooloogoodoloso debei ogoloso dimapoo egeesee takaso, "Niba Yu odoowo tei gooleedooso. Esiga Yu odoo oso Yu dele poogoo sabolo hedebe doloso goo tomo silei tei. Osoloso Yu odoo oso Yu dele poogoo odoo dibada moso kulodu palai tei deliso. Esino Godeeye mo howo opusomo doloso amapoo egeesee eligiso, 'Yu odoo ibolo osoloso Yu dele poogoo nibolo Godeeyo howo woola hedebe.' Esiga ayo Yu dele poogoo odoo maga Godeeyo howo woola odoo hee tokenee dee takalai koo tobuo. <sup>29</sup>Esiga niyo a ime, ayo nimapoo sibilei gowoole. Esiga niyo a hamapoo sibe dee taka goo eyo bei amapoo takee," diso.

<sup>30</sup>Eseme Konelijaseeye yimapoo nei egeesee takaso, "A beeamome bakadio hedebe di poogoloso beeamome hee habe mapoo moso kulodu dokodoo takolone badebeiso. Eseme haga booloogelega, odoo hee dugo heliye hohodi kaloso mo mudugiyopoo sibilaso tobudume egeiso. <sup>31</sup>Eseme yayo amapoo egeesee takaso, 'Nayo Godee mapoo takemelee goo ee yayo duso. Osoloso nayo bi mauwe odoo pidimelee Godeeye ogoloso goomogoso. <sup>32</sup>Esiga nayo epedee odoo abo Yopa mi mapoo diye, dee takee, diayo Saimon Pita namapoo ido sibilame. Yo gala kolo sabolo tou teli odoo Saimonowo mosopoo badoso. O moso ee abei toowa palaga mapoo tegei moloso,' diso. <sup>33</sup>Eseme beeamome omapoo ayo odoo abo oso no hamapoo ido sibilame diye diso. Osoloso nayo hamapoo simi ogoloso a goomogo. Esiga iba hamapoo Godeeyo mudugiyopoo sibilaso mooloogoodoo hagee, to

susuga Godeeye namapoo tenee goo ee imapoo takee dee taka, goo ee dulame ka sibadee," diso.

<sup>34</sup> Esem Pitaye to taka bei mooloogoolone egeesee takaso, "A epedee gooleedoso, Godeeye egei maga odoo susuga ma kulodu odoo heeso, odoo hee dagadi molo koo ogoso. <sup>35</sup> Osoloso mi toowa hamapoo mi opusomo opusomo di ma kulodu edebeeyo Godeeye goomoga goo tomo silone, Godee mapoo mesimo silesibili odoo mapoo Godeeye goomegeliso. <sup>36</sup> Esiga niba Godeeye Isael odoo dimapoo to tekepo tenee goo ee niba duso. To tekepo ee hagooso, Yesu Kelisoye odoo susuga ma kulodu wiligi odoo toowa taba doloso badoso. Esiga Yesu Keliso maga Godeebolo hedebe doloso mesiloso badeli goo ee imapoo teneeso. <sup>37</sup> Osoloso Yonee odoo howomoo howo sawidili oso to takolone, odoo susuga dibada goo tokenee maga miligi pialoso howomoo howo sawidige, dee takoloso koodobume, Gelili maga bei mooloogooloso Yudiya mi toowa mapoo peledaba goo ee, niba olo gooleedooso. <sup>38</sup> Osoloso Godeeye Yesu Nasalet odoo hesialoso yimapoo Dio Tei sabolo osoloso kitulugu sabolo tenee, niba gooleedooso. Bei, Godeeye beame susuga yo pidilone yibolo badolone, yayo Yu odoowo mi susuga mapoo silone, tekepo goo susuga moodoogamo sileeso. Osoloso Saiten oso gibadili odoo susuga ee tekepo moodoogamo sileeso.

<sup>39</sup> Esiga diye di odoo, iba Yesuye Yolusalem mapoo osoloso Yu odoowo mi abo mapoo goo susuga hagee tomo silee, iyo egeiso. Osoloso Yolusalem mapoo debeli odoo oso Yesu homo bulubo magoo ma dokodoo yoguso enigaloso woolooma, iyo egeiso. <sup>40</sup> Esino beame bakadio poogoloso see beame hee mapoo Godeeye Yesu ta maga hogadiso. Osoloso Yesu yo ta maga hogabuloso silone odoo susuga mapoo peledoboo dele. Esino hedebe Godeeye daga hoogoo iba hesialoso diye di odoo imapoo Yesuye ta maga hogabuloso peledoboo demeleeso. Esem yayo hogabuloso silee ogoloso, iyo yibolo silesibulone, wo sabolo howo sabolo nolone silesibiso. <sup>42</sup> Esiga Yesuye imapoo to kitulugu sabolo egeesee takaso, 'Niyo odoo susuga mapoo Godeeyo to tekepo takomo silesibe diso. Osoloso Godeeye Yesu ayo odoo susuga wedia sabolo, osoloso mi toowa hamapoo hagee do sabolo, goo meedileiso,' diso. <sup>43</sup> Osoloso daga hoogoo Godeeyo to tosili odoo susuga oso goo hamapoo tei takoo diso. Edebeeyo Yesu mapoo tei toga, Godeeye Yesu maga o goo tokenee hapoloso boobado bigileiso," diso.

#### Dio Tei oso Yu dele poogoo odoo dimapoo daga meledaba goo

<sup>44</sup> Pita to osee takomolome, Dio Tei oso meileso Pitaye to takomolome dulugamelee odoo mapoo meledabaso. <sup>45</sup> Esem Dio Tei oso kitulugu maga diayo to opusomo opusomo di ee keselone Godeeyo hu dokodoo poudooso. Esem Yu odoo tei telaga Pitabolo sibadee oso goo hagee ogoloso dia howoogadooso. Bei, Godeeye Dio Tei Yu dele poogoo odoo sabolo dimapoo teneeso.

Esem Pitaye dimapoo egeesee takaso, <sup>47</sup> "Bei, Godeeye Dio Tei imapoo tenee egee egeesi masi dimapoo ka teneeso. Esiga diayo howomoo howo sawidilei edebeeyo hamaga takalaime," diso. <sup>48</sup> Esem Pitaye see egeesee takaso, "Niyo Yesu Keliso mapoo tei too goo ee eligilame, niba howomoo howo sawidige," diso. Osoloso diba howomoo howo sawidigaloso, diayo Pita beame abo mapoo dibolo hodobo badoboso dilame goomogaso. Esem Pitaye Yopa mapoo tei telaga odoo sabolo omapoo debeiso.

#### Pitaye Yu dele poogoo dia goo Yolusalem mapoo taka

**11** Diye di odoo sabolo, tei telaga odoo Yudiya mapoo debeli sabolo, oso Yu dele poogoo oso Godeeyo to duloso tei too goo ee duso. <sup>2</sup> Esiga Pitaye Yu dele poogoo odoo sabolo badoboso, see Yolusalem mi mapoo wedi sibume, Yu odoo tei telaga odoo oso toso kitulugu sabolo yimapoo dia takolone egeesee takaso, <sup>3</sup> "Bei kasee maga no Yu dele poogoo dia mosopoo dilesio dibolo badolone wo ka nameleeyo? Goo egee tekeponee," diso.

<sup>4</sup> Esem Pitaye goo susuga eyo bei medee dimapoo takolone bei mooloogoolone egeesee takaso, <sup>5</sup> "A Yopa mi mapoo badolone dokodoo takolone badoboome, Godeeye mo howo opusomo diso. Goo egeesi ma kulodu egeino, dugo masi eyo pee mapoo tiso bagagisaloso kei ma dokodooga holomo sibumolome egeiso. Bi oso holomo sibumolome, ayo koola mapoo tobudulone egeino, dugo masi eyo kulodu gala opusomo opusomo di susuga, homo bakadio bakadio di oso dili sabolo, osoloso beliyeso kolo dili sabolo, gala seebee sabolo, osoloso só egeiso. <sup>7</sup> Esem beame omapoo kei ma dokodooga toso amapoo egeesee takaso, 'Pita nayo gala susuga hagee ma kulodu abo woloso ne,' diso.

<sup>8</sup> Esem ayo yimapoo nei egeesee takaso, 'Haye, Lodee, a gala egeesi koo nali. Bei, nayo gala egeesi na ne doloso daga hoogoo tei magooso. Esiga ayo gala abo woloso nalaima,' diso.

<sup>9</sup> Esem toso see nei egeesee taka, 'Godee, ayo bi susuga tekepo di, bi egee see nayo tokenee dee na takee,' diso. <sup>10</sup> Goo hagooso peledaba bakadio hedebe doloso see kei ma dokodoo peleso osugoboooso.

<sup>11</sup> Esem haga booloogelega odoo bakadio hedebe di oso Kasalia mi maga a agalame diye di odoo oso ayo tieli moso mapoo sibilesio peledabaso. <sup>12</sup> Egeesee ma kulodu Dio Tei oso a Kasalia mi mapoo dibolo dilei na ebi, dee takaso. Esem tei telaga odoo 6 hamapoo buluma hagee molo oso abolo diso. Osoloso iba dilesio Konelijaseeyo moso kulodu hodobo paladeeso. <sup>13</sup> Esem Konelijaseeye Godeeyo momaiye oso moso kulo-du peledoboome egei goo ee imapoo opusususo. Godeeyo momaiye oso yimapoo egeesee takabu, 'Nayo odoo abo Yopa mi mapoo diadee dee takee. Diayo dilesio Yopa mi mapoo Saimon Pita, a Konelijas namapoo ido sibenabu. <sup>14</sup> Pita, ayo namapoo sibilesio nobolo, osoloso nee moso kulodu debeli odoo mapoo

Godee maga gie badeli teli goo ee takalaiso,' dee takeme duso.

<sup>15</sup> Esem ayo dimapoo dilesa to tekepo takalame bei mooloogooma, Dio Tei daga Pentikos beeame mapoo imapoo meledaba egeesi masi oso dimapoo meled-abaso. <sup>16</sup> Esem ayo Lodeeye to taka hagee gooleebu-guso, yayo egeesee takaso, 'Yoneeye niba howodeeso sauwidiso, esino niba hamamee Godeeyo Dio Tei oso sibileso nimapoo kitulugu tenelaiso,' diso. <sup>17</sup> Esem iyo daga Yesu Keliso mapoo tei teme, Godeeye Dio Tei imapoo teneeso. Egeesi masi diayo Yesu Keliso mapoo tei teme, Godeeye dimapoo Dio Tei ka tenee. Esiga ayo Godeeyo goo ee hamaga takalaime," diso.

<sup>18</sup> Esino Yu odoo tei telaga oso Pitaye to taka duloso diayo kamanamelee omapoo poogooso. Esem diayo Godeeyo hu dokodoo poudolone egeesee takaso, "Godeeye Yu dele poogoo odoo mapoo osulu yama-gooso, diayo dibada goo tokenee maga miligi pialoso Godee mapoo bidiga toboloso gie badeli talame," diso.

#### Yu dele poogoo Antiyoka mi mapoo debeli odoo oso Lodee Yesu mapoo tei too goo

<sup>19</sup> Sitiben woolooma beeame omapoo tei tele poo-goo odoo oso tei telaga odoo mapoo dala teneli goo oso toowa moodoome, tei telaga odoo susuga Yolusalemi mi maga mi opusomo opusomo di mapoo kukulo diadeeso. Diayo kukulo dulone odoo abo oso mi eli sage Ponisia mi toowa mapoo kukulo diadeeso. Osoloso odoo abo Saiples mi te mapoo kukulo diadeeso. Osoloso odoo abo Antiyoka mi mapoo kukulo diadeeso. Osoloso diba mi omapoo kukulo dilesa dobolone, to tekepo Yesu Kelisowo goo hedebe Yu odoo dimapoo takomo silesibiso. <sup>20</sup> Esino Yolusalemi maga kukulo diadee odoo ee ma kulodu Kulene odoo abo sabolo, Saiples odoo abo sabolo, Antiyoka mi mapoo sibileso, Yu dele poogoo odoo dimapoo Lodee Yesuwo goo takomo silesibiso. <sup>21</sup> Godeeyo kitulugu dimapoo molone, Yu dele poogoo odoo oso dibada to mapoo tei toloso, dibada goo tokenee maga miligi pialoso Lodee Yesu mapoo bidiga dabaso.

<sup>22</sup> Esem tei telaga odoo Yolusalemi mapoo debeli odoo oso Yu dele poogoo odoo oso tei too goo ee duloso, Antiyoka mi mapoo Banabasi diye diso. <sup>23</sup> Esiga Banabasi odoo tekepo doloso badebeiso, yo tei too kibiya Dio Tei oso kitulugu toloso badebeiso. Osoloso yo Antiyoka mi mapoo dilesa badoboome, odoo susuga Godeeye pidi ogoloso, yo dia goomogaso. Esem diba Lodee Yesu mapoo hedebe doloso dobolone, tei too kibuloso badalame, yayo dimapoo kokodo takaso. Esem Banabasiye to takomo silee diayo duloso to omapoo tei teme, tei too odoo bei moodooso.

<sup>25</sup> Esem Banabasi Talesas mi mapoo Solo esiamo diso. <sup>26</sup> Yayo Solo ogoloso see Antiyoka mi mapoo ido simiso. Osoloso dugo hedebe ma kulodu obakadio tei telaga odoo sabolo badolone, Godeeyo goo eligimeleeso. Esiga Antiyoka mi mapoo odoo susuga

oso daga malalo takolone tei telaga odoo ee Kelisowo odoo deliso.

<sup>27</sup> Esem Banabasi dio Solo dio Antiyoka mi omapoo osee doboome, Godeeyo to tosili odoo abo oso Yolusalemi mi maga mi hamapoo sibadeeso. <sup>28</sup> Esiga dima kulodu odoo hee, o hu Agabus, yayo dibolo sileeso. Esiga yayo Dio Tei oso kitulugu maga egeesee takaso, "Mi susuga mapoo dala goo oso siboga, nei nali bi mauwe pagalaiso," diso. (Esiga daga hoogoo goo hagooso Sisa Kolodiyaseeye Loum mi toowa wiligi doloso badebei beeame omapoo hodia goo toowa hageesi oso peledabaso.) <sup>29</sup> Esem Antiyoka mi mapoo debeli tei telaga odoo oso emegei Yudiya mi toowa mapoo debeli odoo ee pidilame molee mooloogooso. Egeesee ma kulodu bi bei odoo oso molee toowaso pidiso. Osoloso bi pepooko melee odoo oso molee pepookoso pidiso. <sup>30</sup> Osoloso diayo molee ee toloso Banabasi dio Solo dio dimapoo teneeso. Esem diayo Yolusalemi mi mapoo tei telaga wiligi odoo tebisa mapoo todiso.

#### Helodeeye tei telaga odoo dimapoo dala tenee goo

**12** Beeame omapoo Yu odoowo wiligi odoo taba Helodee Agalipaye tei telaga odoo abo toloso dimapoo dala tonolone badebeiso. <sup>2</sup> Egeeseelone yayo diye di odoo hee Yoneeyo emei Yemes toloso odoo mapoo tenelone, kaiya sage oso woolooma diso. Esem diayo Yemes wooloomaso. <sup>3</sup> Esem Yu odoo oso goo hagee ogoloso goomogolone tekepo dee takeme, Helodeeye odoo mapoo Pita onosee wooloomalame te doloso takeme, diayo Pita tooso. Goo moodoo hagee Isipi mi maga peegoo di ee gooleebugu wo nali beeame mapoo ka moodoo. <sup>4</sup> Helodeeye goomogaso, Godeeye gababia wo nali beeame ee daga dilesa, odoo howo woola mapoo goo meediloso ka wooloomalame, Pita yo epedee neliga moso mapoo toosooso. Osoloso o ha teli odoo 16 gilimadoloso diayo Pita medee gibadebee, diso.

<sup>5</sup> Esino Pita yo neliga moso ma kulodu badoboome, tei telaga odoo oso yo Godee mapoo takolone de-beiso.

<sup>6</sup> Helodeeye Pita neliga moso tegei ma kuloduga peegoo tamagoloso, odoo susuga eyo howo woola goo meedilei beeame godigi molome gesi omapoo, ha teli odoo bakadio oso Pita gitilone, Pitayo dee hodio sabolo, ha teli odoo eyo dee hodio sabolo, ki ti oso tialogoo, osoloso ha teli odoo hee eyo dee sabolo, Pitayo dee sabolo, ki ti oso tialogoo doloso tiesaso. Osoloso ha teli odoo abo oso osulu miyopoo gidebeiso. <sup>7</sup> Esem epedee omapoo Godeeyo momaiye oso Pita mapoo sibileso peledabaso. Esem gadeebugu oso neliga moso eyo kulodu gadee magoo meleeso. Osoloso Godeeyo momaiye oso Pita tidilone egeesee takaso, "Pita, no saga teebee," diso. Esem ki ti oso o dee sabolo ha teli odoo dibada dee sabolo tiegisamelee eyo mosoowe pidiga poogooso.

<sup>8</sup> Esem Godeeyo momaiye oso Pita mapoo egeesee takaso, "No toboloso nee dugo kolaiyoga gidili ee



boolooma doloso nee homo mapoo kali bi ke," diso. Eseme Pitaye bi egee kalagaso. Osoloso momaiye oso Pita mapoo see egeese takaso, "Nee dugo sage to-buduga kaloso abolo sibe," diso. <sup>9</sup> Eseme Pitaye Godeeyo momaiye sabolo neliga moso tegei debi goo-boogoo ma kuloduga peegoo dulone, Pitaye goo hagee ogoloso gooleeso, Godeeye o howo opusomo doloso goo hagee ka ogo diso. <sup>10</sup> Diayo egeeseelone, Godeeyo momaiye sabolo osulu gidebili odoo bakadio oso gidoboome, diba galagadiso. Esino diayo diba egele. Osoloso diba see ki biso moodoo osulu oso kisi hamameedee omapoo dilesa tebisa molome, osulu egee eyo mosoowe yamagooso. Eseme diba neliga moso ma kuloduga peegoo galagadilesa dumolome, Godeeyo momaiye omapoo osugoboooso.

<sup>11</sup> Eseme hamamee Pitaye goo omapoo ogoloso gooleedoloso eyo nediliyo egeese takaso, "O, goo hagee teidoo diso. Esiga a epedee gooleedoso, Godeeye o momaiye ee amapoo sibe diso, yayo a Helodeeye dee maga idoloso peegoo peledabalame. Esiga epedee Helodeeye Yu odoowo mudugiyopoo a wooloomalaime," diso.

<sup>12</sup> Eseme yayo egeese goolee sabolo Yonee Makayo owee Meliyo mosopoo dilesa palaso. Moso egee ma kulodu odoo susuga oso mooloogoodoloso dobolone dokodoo takemeleeso. <sup>13</sup> Eseme Pitaye dilesa osulu mapoo kalamadime, moso ee ma kulodu tou teli sobo obuo, o hu Loda, yayo osulu mapoo odoo agayo kalamadia beleso agalame diso. <sup>14</sup> Yayo osulu yilame dulone duno, Pitayo to duloso gooleedoloso dia goomogolone, osulu yilega see moso kulodu gasibileso, odoo susuga mapoo egeese takaso, "Pita osulu miyopoo tobudo!" diso.

<sup>15</sup> Esino odoo susuga oso to ee duloso nei yimapoo egeese takaso, "No boobadolone ka takoo," diso. Esino yayo goo egee taka koodobilega osee takemeleeso. Eseme diayo egeese takaso, "Egee Pitane, esino egee Godeeyo momaiye Pita yo bali oso malaiso," diso.

<sup>16</sup> Pita yo peegoo osee tobudulone osulu mapoo osee kalamadimeleeso. Eseme odoo susuga sibilesa, osulu yimagoloso egeino, Pita ogoloso dia howoogadooso. <sup>17</sup> Eseme Pitaye diba to kesamelee koodobilame deeso wabisaso. Osoloso Godeeye yo neliga moso maga idoloso peegoo di goo ee dimapoo oposususo. Osoloso yayo see egeese takaso, "Tei telaga odoowo wiligi odoo taba Yemes sabolo, tei telaga odoo abo sabolo mapoo goo hagee takee," diso. Eseme Pitaye to hagee takoloso see mi hee mapoo diso.

<sup>18</sup> Gesikolodee mapoo ha teli odoo Pita gidebei oso Pita mauwe molo ogoloso goo dia tiadolone ebigaso. <sup>19</sup> Eseme Helodeeye o odoo sabolo Pita dia esiaso. Esino diayo Pita egele poogoome, see wedige dilesa, Pita gidebei odoo mapoo woosaso. Eseme yayo odoo abo mapoo takolone Pita gidebei odoo ee piligi diso. Goo oso dilesa koodobume, Helodeeye Yudiya mi poogoloso see Kasalia mi mapoo badalame diso.

### Helodee Agalipaye ta

<sup>20</sup> Esino Helodee yayo Kasalia mi mapoo badolone, Taya mosobia odoo sabolo, osoloso Saidon mosobia odoo sabolo, mapoo dia komonolone badebeiso. Eseme Taya mosobia odoo sabolo, Saidon mosobia odoo sabolo, mesiloso badalame Helodee sabolo to meilame, Helodee mapoo diso. Bei, diba Helodeeye mi toowa mapoo nei nali ka teli. Bei, Helodeeye dimapoo kamana sabolo osee badoga, diayo nei talai hamaga takeeyaga, Helodeebolo to meilame sibadeeso. Osoloso diayo sibilesa Helodeeye moso gibadili odoo, o hu Balasto, sabolo emegei diso. Yo dibolo toboloso dibada goo ee Helodee sabolo to tekepo ka moodoolame.

<sup>21</sup> Eseme Helodeeye dibolo to meilame beeamo ma-gooso. Osoloso beeamo omapoo Helodeeye dibolo to meilame, yayo wiligi odoo taba oso kali dugo tekepo kaloso, wiligi odoo taba oso badeli debi mapoo biaso. Osoloso yayo badolone odoo susuga mapoo to takaso. <sup>22</sup> Yayo to taka koodobume, odoo susuga oso goomogolone to neligidi takolone, diso dimapoo egeese takaso, "Odo hagee Godeeye to kei masi keliso, yo edebeeyo to kei masi koo keli!" diso. <sup>23</sup> Esino goo hamaga Helodeeye Godeeyo hu dokodoo poudile. Hedebe o hu ee dokodoo poudooso. Eseme Godeeyo momaiye oso yimapoo paiye saga teneeso. Eseme seeso o su nadoloso taso.

<sup>24</sup> Esino tei telaga odoo oso Godeeyo to mi susuga mapoo takomo dime, odoo susuga oso to ee duloso to mapoo tei teme, tei telaga odoo bei moodooso.

<sup>25</sup> Eseme Banabasi dio Solo dio Antiyoka mi mapoo tei telaga odoo oso molee mooloogoo ee tosibilesa, Yolusalem mi mapoo tei telaga wiligi odoo tebisa dimapoo teneloso, see Antiyoka mi mapoo wedi dulone diayo Yonee Maka ido diso.

### Banabasi dio Solo dio diye di goo

**13** Antiyoka mi mapoo tei telaga odoo oso mooloogoodoloso, debei ma kulodu Godeeyo to tosili odoo sabolo Godeeyo goo ee eligili odoo ee diba-da hu hagooso: Banabasi, osoloso Simiyono (o hu hee Nigele), osoloso Kulene odoo Lukiyas, osoloso Man-ayen (wiligi odoo taba Helodee dio hodobo kauwa), osoloso Solo. <sup>2</sup> Diba nei teyuloso, Godeeyo hu dokodoo poudolone doboome, Dio Tei oso dimapoo egeese takaso, "Banabasi dio Solo dio idoloso tou ayo hesia ee talame diba diye dee takee," diso. <sup>3</sup> Eseme diayo nei teyuloso dobolone, Godee mapoo takemelee koodobuloso, Banabasi dio Solo dio mapoo dibada deeso sigeso. Bei, diayo Godeeye kitulugu toloso o tou talame. Osoloso diba Godeeyo tou talame diye diso.

### Banabasi dio Solo dio Saiples mi te mapoo diye di goo

<sup>4</sup> Banabasi dio Solo dio Dio Tei oso diye dee takeme, Selukia mi amaga du toowa toloso Saiples mi te mapoo dulone, diba pidili odoo Yonee Maka idoloso

diso. Diba sibilesa Saiples mi te mapoo mi hee eyo hu Salami mi mapoo du oluguso. Osoloso diayo mi omapoo dobolone, Yu odoowo howo gisili moso mapoo peleso Godeeyo to takoo demeleeso.

<sup>6</sup> Osoloso mi te omapoo osee silesibulone, mi hee Papos mapoo dileso peledabaso. Diba mi omapoo egeino, Yu odoo hee googoo sabolo badoboome egeiso. O hu Bale-Yesu (o hu hee Guliki dia toso hedi Elimas). Yayo mi omapoo gamenee goo eligili odoo badebeiso. Mi te eyo wiligi odoo taba Selegiyas Polus eyo odoo. Mi te eyo wiligi odoo taba yo goo goolee medee tekepo. Esiga yayo Godeeyo to dulame goomogolone, Banabasi dio Solo dio ime simiso. Esino googoo gooleedoo odoo Elimas yayo gowolone, wiligi odoo taba oso Godeeyo to duloso, Yesu mapoo tei talai goomegele. Esemeyo yayo Banabasi dio Solo dio Godeeyo to takeyaga gowolone hamaga takaso.

<sup>9</sup> Esino beeamo omapoo Solo, o hu hee Polo, Dio Tei oso kitulugu toloso badolone, googoo gooleedoo odoo Elimas yimapoo howo hooda tulugu bolone <sup>10</sup> egeesee takaso, "No Saiteneeyo owolo! Nayo goo tekepo susuga mapoo hateliso. Nayo beeamo susuga ma kulodu odoo susuga mapoo wulo kukuliso. Esiga bei kasee maga nayo Godeeyo goo tekepo ee see nayo mudu opusomo doloso odoo susuga mapoo ogoo talame ka kukumalala?" <sup>11</sup> Esiga epedee Godeeye no dala tenelaiso. Epedee no howo bakadio siloso molone, beeamo abo ma kulodu bi susuga agalaimo," diso. Esemeyo beeamo omapoo neliga oso o howo mapoo gidiseme, o howo siso. Esemeyo odoo heeso eli eligilame odoo esiamo sileeso. <sup>12</sup> Esemeyo wiligi odoo taba oso Elimas mapoo goo moodoo ee ogoloso, yayo Lodee Yesu mapoo tei tooso. Bei, yayo Polo dio Banabasi dio Lodee Yesuwo goo kitulugu sabolo eligi ogoloso howoodooso.

#### Poloye Pisidia mi Antiyoka mapoo Godeeyo to taka

<sup>13</sup> Osoloso Polo sabolo, odoo yibolo sibadee sabolo, Papos mi maga du toowa toloso abei toowa daloso see Pampilia mi toowa mapoo sibilesa peledabaso. Mi toowa ma kulodu mi hu Pelega mapoo dibada du oluguso. Esemeyo beeamo omapoo Yonee Maka diba poogoloso see Yolusalem mapoo wedi diso. <sup>14</sup> Osoloso Polo dio Banabasi dio Pelega mi maga see mili Pisidia mi Antiyoka mapoo dileso peledabaso. Diba omapoo dileso dobolone, Yu odoowo hasali beeamo omapoo, diba howo gisilame, Yu odoowo howo gisili moso ma kulodu peleso bulumaso. <sup>15</sup> Esemeyo howo gisili moso wiligi odoo tebisa oso Moseseeye eligi goo hogugu sabolo, osoloso Godeeyo to tosili odoo oso hogugu goo sabolo, odoo susuga mapoo hesigaso. Osoloso see Polo dio Banabasi dio mapoo egeesee takaso, "Emegei, niyo imapoo pidi to takalai mologa, takee," diso.

<sup>16</sup> Osoloso Polo toboloso diayo to kesamelee ee koodobilame o deeso wabisulone egeesee takaso, "Emegei, Isalael odoo sabolo, Yu dele poogoo Godee mapoo mesili odoo sabolo, niba mo to hagee dui!

<sup>17</sup> Isalael odoo ibada Godeeye ibada amawe dio hesiaso. Osoloso diba Isipi mi mapoo doboome, Godeeye diba medee gibadebeiso. Esemeyo Isalael odoo oso bei moodooso. Esemeyo Godeeye kitulugu sabolo Isipi mi maga diba gilimadoloso peegoo diso. <sup>18</sup> Osoloso diba dugo 40 ma kulodu miwe poogoo mapoo silesibulone, Godee mapoo diayo gowooloso yimaga miligi pialoso silesibiso, esino Godeeye diba pegele. <sup>19</sup> Esemeyo Godeeye Keinen mi ma kulodu to opusomo opusomo di keshali 7 mosobia odoo susuga peegoo hasiso buguloso, dibada mi peedee buguloso, see o odoo Isalael odoo imapoo teneeso.

<sup>20</sup> Esemeyo ibada amawe dio oso Isipi mi mapoo do-boso see mi hagee talame sibadee, dugo 450 poogoo. Osoloso ibada amawe dio oso omapoo osee doboome, Godeeye goo meedili odoo hesiaso, diba gibadalame. Esino hamamee Godeeyo to tosili odoo Samiyoloye badebei beeamo omapoo Isalael odoo see goomogaso, diba gibadalai wiligi odoo taba talame. Esemeyo Godeeye Beniyamen eyo bala ma kulodu odoo hee Kiseeyo owolo Solo wiligi odoo tabalame hesiaso. Esemeyo Soloye dugo 40 ma kulodu Isalael odoowo wili-gi odoo toboloso badebeiso. <sup>22</sup> Esemeyo Godeeye Solo gowoolone peegoo poogoo. Osoloso see Yesiyo owolo Deibidiye dibada wiligi odoo tabalame hesiaso. Esemeyo Godeeye Deibidiyo goo maga egeesee takaso, 'Ayo Yesiyo owolo Deibidi mapoo ogoloso goomogoso. Bei, yayo ayo goomoga goo susuga ee talaiso.'

<sup>23</sup> Esiga Godeeye daga hoogoo to takoloso magolone egeesee takaso, 'Deibidiye amawe dima kuloduga Isalael odoo dibada gie badeli pidili odoo sibileiso.' Esiga odoo ee olo simiso. Yo Yesu. <sup>24</sup> Esino Yesu sibilega molome, daga Yoneeye sibilesa Isalael odoo susuga mapoo Godeeyo to takomo silone egeesee takaso, 'Niba goo su wuduloso nibada goo tokenee maga miligi pialoso howomoo howo sauwidige,' diso. <sup>25</sup> Osoloso Yoneeye o tou hoo pagalame dulone egeesee takomo sileeso, 'Niyo a odoo ogu deliyo? Godeeye hesia Keliso asonee. Esino yo ama hamamee sibileiso. Yayo kitulugu toowa ayo kitulugu yayo dagadi. Esiga a tekeponee, o homo bei mapoo gawuloso o homo bi tigamagalai,' diso."

<sup>26</sup> Poloye see egeesee takaso, "Emegei, Eibalaham eyo amawe dio (Yu odoo) nibolo, osoloso Yu dele poogoo Godee mapoo mesili odoo, niba mo to dui! Gie badeli pidili goo hamaga to ee imapoo teneeso.

<sup>27</sup> Esino Yolusalem mi mapoo debeli Yu odoo sabolo, dia wiligi odoo tebisa sabolo oso Yesu yo kibiya hoodo egele. Esiga diayo Yesu yo wooloomalame goomogaso. Osoloso diayo goo mauwe dileso Paillet mapoo Yesu wooloomeye doloso tiasooso. Diayo goo hagee tomo silee ee Godeeyo to tosili odoo oso daga hogugu sabolo tebiaso. O, esiga goolee, Yu odoowo hasali beeamo susuga mapoo wiligi odoo tebisa oso, Yu odoowo howo gisili moso kulodu to hogugu ee hesigeliso. Esino diayo goo eyo bei kibiya gooleedele. <sup>29</sup> Esiga Godeeyo to tosili odoo oso Yesuwo goo mapoo taka goo susuga oso dileso hosuduloso, diayo Yesu yo ho-

mo bulubo magoo dokodooga tomeilesu wulu ma kulodu magooso. <sup>30</sup> Esino Godeeye yo ta maga see hogadiso. <sup>31</sup> Osoloso hamamee beeame bei ee ma kulodu Yesu yo telega Gelili mi maga Yolusalem mi mapoo yibolo sibadee odoo dimapoo o su eligimo sileeso. Osoloso odoo egee bia oso diayo Yesu ta maga hogabuloso silee ogoloso goo ee, ibada odoo Yu bia odoo mapoo takomo ka siloso.

<sup>32</sup> Esiga iyo to tekepo nimapoo tosimiso. Osoloso daga Godeeye ibada amawe dio sabolo to magoo goo oso yayo owolo Yesu ta maga see hogadi eyo goo maga epedee dibada amawe dio imapoo peledabaso. Esiga Sam booka ma kulodu, Sam bakadio mapoo Godeeye Yesuwo goo maga egeesee takooso, 'No mo holo deeso. Epei ayo no moma deeso.'

<sup>34</sup> Osoloso Godeeye Yesu ta maga hogadiso. Esiga Godeeye owolo Yesu see talaime. Goo hamaga Godeeye egeesee takaso,

'Ayo daga Deibidi mapoo to magoo sabolo tei pidili goo ee nimapoo tenelaiso,' diso.

<sup>35</sup> Osoloso Godeeye Sam hee mapoo egeesee takaso, 'Nayo hesia odoo eyo su midoo ma kulodu hunuleime,' diso.

<sup>36</sup> Esino Godeeyo to hagee Deibidiyo goo takele. Bei, Deibidiye Godeeyo tou susuga tomo siloso hosuduloso taso. Esem o su ee amawe dio midoosoo pee mapoo midoosoo. Osoloso o su omapoo huneso.

<sup>37</sup> Esino Yesu o su ee midoo ma kulodu molone hunule. Bei, Godeeye yo ta maga hogadiso.

<sup>38</sup> Esiga emegei, niba iyo to hagee taka medee dui! Bei, Yesuye ta maga nibada goo tokenee hapoloso boobado bigileiso. Esino Moseeeye eligi goo oso nibada goo tokenee susuga hapalaimo. Esino edebeeyo Yesu mapoo tei toga, yo o goo tokenee susuga hapoloso, Godeeye howo woola yo tekepo palaiso.

<sup>40</sup> Esiga niba mo to medee kibiya toloso tei too ma kulodu debee. Niyo mo to medee tele poogooga, Godeeyo to tosili odoo oso taka goo hagooso nimapoo sibileiso. Bei, diayo Godeeyo booka mapoo hageesee hoguguso,

<sup>41</sup> Godeeye egeesee takooso, 'Niyo debei domo omapoo ayo goo toowa moodoolaiso. Esino niyo goo hagee ogoloso tei talaime. Osoloso odoo heeso goo hageeyo bei nimapoo takooga, niyo medee tei talaime. Esiga mo to mapoo manali odoo niba goo hagee ogoloso howoogadalaiso. Esino niba wedileiso,' diso."

<sup>42</sup> Osoloso Poloye to takoloso koodobume, Polo dio Banabasi dio howo gisili moso maga meiyadaga molome, odoo aboso sibilesu dimapoo egeesee takaso, "Niba see hasali beeame heeso niyo to taka goo hagee see medee takalame sibadee!" diso. <sup>43</sup> Gooloo-goo oso dileso koodobume, odoo susuga oso dia moso mapoo diadeeso. Esem Yu odoo abo sabolo, osoloso Yu dele poogoo odoo oso, Yu odoowo Godee mapoo tei teli odoo abo sabolo, Polo dio Banabasi dio diadaga molome hamamee diadeeso. Esem Polo dio

Banabasi dio dimapoo egeesee takaso, "Niba Godeeye mesilone wulayo pidi ee ma kulodu debee," diso.

<sup>44</sup> Osoloso hasali beeame heeso mosobia odoo susuga oso Godeeyo to Yesuwo goo maga taka ee dulame sibadeeso. <sup>45</sup> Esem Yu bia oso odoo goologoo toowa ogoloso Polo dio Banabasi dio mapoo dia kooso. Osoloso Poloye Godeeyo to takomolome, diayo tebisaloso, Polowo to su maga gamenee goo takoo doloso, diayo Polowo goo maga to tokenee takaso.

<sup>46</sup> Esino Polo dio Banabasi dio ebilega to nei dimapoo egeesee takaso, "Godeeye to kitulugu sabolo imapoo taka, malalo nimapoo Godeeyo to Yesuwo goo ee takalaiso. Esino niyo gie badeli talai gowooso. Esiga iyo niba poogoloso see Yu dele poogoo odoo mapoo Godeeyo to takomo silesibileiso. <sup>47</sup> Bei, Godeeye o to tosili odoo hee maga Isalael odoo imapoo to kitulugu sabolo hageesee takaso, 'Ayo niba Yu dele poogoo odoo dima kulodu gadeebugoo masi badalame hesiaso. Esiga niyo gie badeli goo ee mipoo toowa hamapoo debeli odoo susuga mapoo takomo dilame.'"

<sup>48</sup> Esem Yu dele poogoo odoo oso Poloye to taka duloso goomogolone, Lodeeyo goo taka ee tekepo diso. Osoloso dima kulodu Godeeye gie badalame hesia odoo susuga oso tei tooso.

<sup>49</sup> Esem mi omapoo odoo susuga oso Godeeyo to ee dulugamo diso. <sup>50</sup> Esino Yu odoo oso Polo dio Banabasi dio dimapoo hegia toowa molone, diayo dileso Godee mapoo mesili Yu dele poogoo sobo hu toowa too sabolo, osoloso mosobia eyo wiligi odoo tebisa sabolo, oso kamanalame Polo dia goo ee dimapoo gamenee takaso. Esem diayo Polo dimapoo dala teneloso mi omaga peegoo hasiso buguso.

<sup>51</sup> Egeeseeme Polo dio Banabasi dio see Ikoniyoome mi mapoo dilame dobolone, diayo dio masi eligilone, Godeeye diba poogolone dimapoo dala tenelaiso dolone, dia homo mapoo basago tidadoo Yu odoowo howo woola mapoo taso. <sup>52</sup> Esino tei telaga odoo diba Dio Tei oso kitulugu toloso dobolone, dia goomogaso.

#### Polo dio Banabasi dio Ikoniyoome mi mapoo debei

**14** Ikoniyoome mi mapoo Polo dio Banabasi dio Yu odoowo howo gisili moso mapoo Godeeyo to takalame palaso. Omapoo diayo to kitulugu sabolo Yesuwo goo taka duloso, Yu odoo susuga sabolo, osoloso Guliki odoo susuga oso, Lodee mapoo tei tooso. <sup>2</sup> Esino Yu odoo abo oso Poloye Yesuwo goo taka talai gowolone, Yu dele poogoo dimapoo Polowo goo ee gamenee takomo silesibiso, Yu dele poogoo odoo oso tei telaga odoo mapoo kamanalame. <sup>3</sup> Esino ee ma kulodu, Polo dio Banabasi dio Ikoniyoome mapoo beeame kolopo sage debeiso. Diba omapoo dobolone ebilega, Godeeye mesilone wulayo pidi eyo goo ee odoo mapoo takolone debeiso. Esem edebeeyo dibada to mapoo tei talame, Lodeeye Polo dio Banabasi dio mapoo goo toowa opusomo opusomo di talame kitulugu teneeso. <sup>4</sup> Egeeseeme mosobia ma kulodu odoo abo oso domo pee toowa meleeso. Odoo abo oso diye

di odo Polo dibolo tooboo, osoloso odo abo oso Yu odo sabolo tooboo diso. <sup>5</sup> Osoloso ee ma kulodu Yu odo sabolo tebisa, Yu dele poogoo odo sabolo, osoloso Yu odo sabolo, osoloso dibada wiligi odo sabolo, Polo dimapoo yoso enigaloso wooloomalame to tekepo moodooso. <sup>6</sup> Esem Polo dio Banabasi dio to hagee duloso Likaonia mi toowa mapoo kukulo diso. Osoloso omapoo kukulo dilesi dobolone, Listala mi sabolo, osoloso Delebe mi sabolo, osoloso mi pepuso abo sabolo omapoo Yesuwo goo maga to tekepo takomo silesibiso.

#### **Polo dio Banabasi dio see Listala mapoo dilesi debei**

<sup>8</sup> Osoloso Listala mi ee ma kulodu odo hee oweeye soomagolone homo bidiga magoo sabolo soomagooso. Esiga yo koo sili. <sup>9</sup> Esino yo badolone Poloye Godeeyo to takomolome medee dulone badebeiso. Poloye odo homo bidiga magoo mapoo bolone gooleeso, yayo tei toso, Godeeye yo tekepo palame, diso. <sup>10</sup> Osoloso Poloye yimapoo to neligidi egeesee takaso, "No teebee!" diso. Esem yo toboloso sileeso.

<sup>11</sup> Esino odo mooloogoodoo oso Poloye odo tekepo moodoo ogoloso to neligidi takolone Likaonia toso egeesee takemeleeso, "Ibada godeeye odo masi poloso kei ma dokodooga imapoo ka simidoo," diso.

<sup>12</sup> Egeeseelone diayo Banabasi yo dibada gamenee godee toowa Sus hu hediso. Osoloso Polo yo gamenee godee hee Sus o to tosili odo Helemes hu hediso. Bei, Poloye beame susuga to takomo sileeso. <sup>13</sup> Esino mosobia odo dia godee Sus eyo tei moso ee mosobia beele peegoo eyo tegei meleeso. Esiga Sus godeeyo tei moso wiligi odo taba oso bulumakau be hu sabolo, palapalawa sabolo, toloso sibilesi beele osulu mapoo maso. Bei, yibolo osoloso mosobia odo sabolo goomogaso, Polo dio Banabasi dio mapoo goomogolone, be hu woolame. Bei, diayo goolee Polo diba godee bele dolone.

<sup>14</sup> Esino Polo dio Banabasi dio goo hagee duloso diayo gowe goo ee odo mapoo eligilone dibada dugo tologobuguso. Osoloso odo ma kulodu hoguo silesibulone to neligidi egeesee takomo silesibiso,

<sup>15</sup> "Emegei, niyo kasee maga goo hageesee imapoo ka moodala? Bei, iba mi odo, niba egeesi masiso. Esiga iyo nimapoo to tekepo teneeso, niyo gamenee godee ee poogoloso see gie badeli Godee mapoo tei talame. Bei, yayo kei sabolo, osoloso mipoo sabolo, osoloso abei sabolo, osoloso bi susuga ee ma kulodu egee molo sabolo moodooso. <sup>16</sup> Osoloso Godeeye daga edebeeyo diso goomoga goo tomo silesibume, ogoloso hamaga takele. <sup>17</sup> Esino niyo ee ma kulodu doboome, Godeeye yayo sooloo dala goo ee eligilone, kei ma dokodooga howo teneliso, osoloso nei nali bi segei oso tekepo palame pidiliso. Osoloso nimapoo nei nali bi toowa teneloso, see nimapoo goomoga teneliso. Esiga Godeeye eyo nediliyo o goo yiligebugulone goo susuga hagee nimapoo teneliso," diso. <sup>18</sup> Polo dio Banabasi dio to hagee takeme, mosobia odo oso bulumakau be hu woloso goomoga dimapoo tenelame

seme, Polo diayo hamaga takeme, diba hegi moodooso. Esino dimapoo tenele.

<sup>19</sup> Esino Yu bia odo abo Pisidia mi Antiyoka maga, osoloso Ikoniyoume maga sibadeeso. Diayo sibilesi mosobia odo oso kamanalame, Polowo goo maga gamenee takaso. Esem odo aboso kamanaloso, Polo yo yoso enigaloso, mosobia peegoo gisibado dilesi magooso. Esem diayo Polo yo olo woolooma gooleeso. <sup>20</sup> Esino tei telaga odo oso Poloye tiamelee mapoo dilesi mooloogoo doloso doboome, Polo yo hogabuloso tabaso. Esem hodobo mosobia ma kulodu wedi sibadeeso. Osoloso beame hee mapoo Polo dio Banabasi dio Delebe mi mapoo diadeeso.

#### **Polo dio Banabasi dio see Silia mi Antiyoka mapoo wedi di**

<sup>21</sup> Polo dio Banabasi dio see Delebe mi mapoo to tekepo takomo silesibume, odo susuga oso tei toso. Osoloso diba see Delebe mi maga see mi abo Listala sabolo, osoloso Ikoniyoume sabolo, osoloso Pisidia mi Antiyoka mapoo tei telaga odo see tobu Godeeyo to sabolo pidimo silesibilame diso, diayo tei too ma kulodu dobolone kibiya dabalame. Egeeseelone diayo egeesee takomo silesibiso, "Tei toloso badalai goo ee dia kodia. Esiga tei telaga odo oso dala ma kuloduga Godeeye wiligi doloso badeli mapoo gasibileiso," diso.

<sup>23</sup> Osoloso Polo dio Banabasi dio oso sosee susuga mapoo wiligi odo tebisalame hesigamo diadeeso. Osoloso nei teyuloso dobolone, diba Lodeeyo dee mapoo magalame dokodoo takeliso. Bei, diba Lodee mapoo tei toso. <sup>24</sup> Osoloso diba Pisidia mi maga see Pampilia mi Pelega mapoo sibadeeso. Omapoo Godeeyo to takoloso koodobuloso see Atalia mi mapoo mouso.

<sup>26</sup> Osoloso Atalia mi maga du toloso see Silia mi Antiyoka mapoo soowaso. Osoloso mi hamapoo daga tei telaga odo oso Polo dio Banabasi dio diba toloso, mi abo mapoo Godeeyo to takomo diye dolone egeesee takaso, "Godeeye niba mesilone wulayo pidi," diso. Esem diayo Godeeyo to olo toloso mi abo mapoo dilesi siloso tou hosudoome, see wedi sibilesi dibada mi Antiyoka mapoo peledabaso. <sup>27</sup> Osoloso Polo dio Banabasi dio sibilesi Antiyoka mapoo peledoboloso tei telaga odo susuga gilimadoloso hodobo gooloo-goodooso. Osoloso diayo Godeeyo to toloso mi susuga mapoo takomo silone, diayo goo tomo sileeme, Godeeye diba pidi goo ee odo mapoo opo-sususus. Osoloso Godeeye Yu dele poogoo odo oso tei talai osulu yamagoo goo sabolo oposusus. <sup>28</sup> Osoloso koodobuloso Polo dio Banabasi dio tei telaga odo sabolo mi omapoo beame kolobo sage debeiso.

#### **Yolusalem mapoo Yu dele poogoo odoowo goo maga to mou**

**15** Osoloso egeesee ma kulodu, odo abo oso Yudiya mi maga Antiyoka mi mapoo sibilesi, Yu dele poogoo tei telaga odo mapoo eligilone egeesee takaso, "Niba Moseseeye imapoo kolo koolai goo eligi,

ee dedelega poogooga, niba gie badeli talaime," diso. <sup>2</sup> Esem Polo dio Banabasi dio eligi hagee duloso gowolone dibolo toso dia agadigaso. Egeeseeme sosee odoo oso Polo dio Banabasi dio, osoloso tei telaga odoo abo sabolo, toloso Yolusalem mapoo diye diso, diayo dilesa diye di odoo sabolo, osoloso Yolusalem sosee eyo wiligi odoo tebisa sabolo, goo hamaga to medee meilame. <sup>3</sup> Diba sosee odoo oso diye deme diadolone, Ponesia mi maga osoloso Samalia mi maga diadeeso. Omapoo diadolone, sosee odoo susuga mapoo Yu dele poogoo odoo oso dibada gamenee godee poogoloso, see Yesu mapoo tei too goo ee oposususo. Esem tei telaga odoo susuga oso goo hagee duloso dia goomogaso. <sup>4</sup> Esiga diayo sibileso Yolusalem mapoo peledoboome, sosee yo wiligi odoo tebisa sabolo, osoloso tei telaga odoo susuga oso diba ogoloso dia goomogaso. Esem Polo dio Banabasi dio Godeeye dimaga tou too goo ee oposususo.

<sup>5</sup> Esino tei telaga odoo abo Pelisi odoo gooloogoo ma kuloduga tebisaloso egeese takaso, "Niyo Yu dele poogoo tei telaga odoo mapoo to kitulugu sabolo takee, 'Diba odoo heeso dibada kolo kooloso Moseseeye eligi goo ee deede, 'dee takee,'" diso.

<sup>6</sup> Egeeseeme diye di odoo sabolo, sosee wiligi odoo tebisa sabolo, to hagee eyo bei medee to meilame hodobo mooloogoodooso. <sup>7</sup> Beeame sage ma kulodu goo hagee to moumeleso Pitaye toboloso egeese takaso, "Emegei niba goolee! Daga Godeeye nima kuloduga, ayo Yu dele poogoo odoo mapoo to tekepo takomo dilame, a hesiaso. Esem diayo amaga Godeeye to duloso tei tooso. <sup>8</sup> Esem Godee, odoo sooloo ma kulodu egeli oso Yu dele poogoo odoo oso tei too goo hagee ogoloso, tekepo diso. Bei, yayo goo hagee tei dolone, Dio Tei ee imapoo tenee egeesi masi dimapoo teneeso. <sup>9</sup> Esiga Godeeye howo woola mapoo iba Yu odoo sabolo, osoloso Yu dele poogoo odoo sabolo opusomonee. Esiga diayo tei teme, Godeeye dibada goo tokenee hapoloso boobado buguso.

<sup>10</sup> Niyo Yu dele poogoo odoo oso Moseseeye eligi goo ee dadalame pupu maga niyo Godeeye kamanalai goomogolo? Niyo egeeseega, niyo dimapoo hegi bi masi kadalame teneeso. Osoloso ibola ibada amawe dio sabolo hegi bi masi ee kadalai tebilena. <sup>11</sup> Esino iba tei toso, ibada Lodee Yesuye imapoo mesilone wulayo pidi maga gie badeli tenee ee. Egeesee maga Yu dele poogoo odoo sabolo eli hedebe amaga gie badeli ka toso," diso.

<sup>12</sup> Esem gooloogoo toowa oso Pitayo to duloso to mauwe bulumaso. Osoloso diayo to mauwe bulumume, Polo dio Banabasi dio Yu dele poogoo odoo ma kulodu silone, Godeeye dimaga goo toowa opusomo opusomo di moodoo goo ee dimapoo oposususo.

<sup>13</sup> Diayo oposusu koodobume, see Yemeseeye toboloso egeese takaso, "Emegei, mo to dui! <sup>14</sup> Saimon Pitaye imapoo olo takaso, Godeeye daga malalo yayo sooloo dala goo Yu dele poogoo odoo mapoo eligiso. Esiga Godeeye Yu dele poogoo odoo dima kuloduga

odoo abo yayo owolo dalame hesiaso. <sup>15</sup> Esiga goo ha-gooso Godeeye to tosili odoo oso taka to sabolo tobuso. Bei, Godeeye to booka mapoo Godeeye to taka hogugu egeese moloso,

<sup>16</sup> 'Goo hagee koodobuuga, a see wedi sibileiso. Bei, wiligi odoo Deibidiye gibadebei mi goo ee moso egeesi masi guodobuloso moloso. Esino ayo sibilesa moodooloso see tobu tegelaiso. <sup>17</sup> Egeeseega odoo susuga sabolo, osoloso Yu dele poogoo odoo ayo hesia sabolo, oso Godee amapoo sibileiso. <sup>18</sup> Esiga odoo abo oso goo hagee gooleedalame Godeeye daga hoo-goo takaso.'

<sup>19</sup> Esiga Yu dele poogoo Godee mapoo gie tei too odoo oso, Moseseeye eligi goo ee dadalame pupu maga iyo hegi goo dimapoo tenelai, a koo goomogoso.

<sup>20</sup> Esino iyo wulo to hogugu ono Yu dele poogoo odoo dimapoo tenelone egeese takalaiso, 'Niba gamenee godee mapoo nali bi tenee toloso na ne. Bei, nali bi egee Godeeye howo woola olo tokenee paso. Osoloso odoo hee mapoo giba na ne. Osoloso sawo na ne, osoloso hwei sawo sabolo mologa na ne,' diso. <sup>21</sup> Esiga Yu dele poogoo odoo diba kibiya goo hagee dodolone dabalai tekepo. Bei, daga hoogoo Yu odoo oso mi susuga ma kulodu diayo howo gisili moso mapoo goo egeesi na teye dolone woola olo takaso. Bei, diayo Moseseeye tei hogugu ee hasali beeam susuga mapoo odoo mapoo olo hesigaloso eligiliso," diso.

#### Yu dele poogoo tei telaga odoo mapoo to hogugu tenee

<sup>22</sup> Osoloso diye di odoo sabolo, osoloso sosee wiligi odoo tebisa sabolo, osoloso tei telaga odoo susuga oso goomoga magoloso odoo abo toloso, Polo dio Banabasi dio see Antiyoka mapoo diye diso. Egeeseelone diayo wiligi odoo mooloogoodoo ma kuloduga odoo bakadio Yudas Balasabas dio osoloso Sailesi dio hagee hesigaso. <sup>23</sup> Esem diayo hodobo Antiyoka mapoo diadolone to hogugu hagee toloso diadeeso:

Esiga emegei, iba diye di odoo sabolo, osoloso sosee wiligi odoo tebisa sabolo, to hagee ka hoguga. Esiga iyo to hagee Yu dele poogoo tei telaga odoo susuga Antiyoka mapoo, osoloso Silia mapoo, osoloso Kilikia mapoo debeli odoo nimapoo ka hoguga.

<sup>24</sup> Esiga ibada mooloogoodoo ma kuloduga odoo abo oso dilesa nimapoo to abo takeme, niyo goo tiadoo goo ee iba duso. Esino iyo dimapoo to takeme ka moodoole. <sup>25</sup> Esiga iba see Polo dio Banabasi dio see nimapoo wedi diye deeso. Bei, odoo hagee bia Lodee Yesu Kelisowo goo mapoo dibada su tenelai koo goweli. Egeesee ma kulodu iyo goomoga maga ibada mooloogoodoo ma kulodu Yudas sabolo, Sailesi sabolo, Polo dio Banabasi dio dibolo diye dalame, iyo diba hesiaso. Esiga diayo nimapoo sibilesa to hedebe iyo hogugu hagee takalaiso. <sup>28</sup> Bei, iba Dio Tei sabolo goo goolee olo hedebe doloso magooso. Esiga iyo nimapoo hegi hee tenelaime. Esino niba wulo goo hedebe hagoono deede. <sup>29</sup> Niba gamenee godee mapoo nali bi tenee toloso na ne. Osoloso sawo na ne,

osoloso hwei sawo sabolo mologa na ne. Osoloso odoo hee mapoo giba na ne.

Niba goo hagee telega doga, niba tekepo dabalaiso. Epe-ee emegei, ibada to oso.

<sup>30</sup> Esiga odoo hagee bia oso to hogugu hagee toloso, Yolusalem maga see Antiyoka mi mapoo diadeeso. Osoloso diba Antiyoka mapoo dilesos peledoboloso, tei telaga odoo susuga gilimadoloso, to hogugu ee dimapoo teneeso. <sup>31</sup> Esem Antiyoka tei telaga odoo oso pidi to hogugu hagee hesigaloso dia goomogaso. <sup>32</sup> Osoloso Godeeyo to tosili odoo Yudas dio Sailesi dio oso, tei telaga odoo mapoo diayo tei too kibilame pidi to takaso. <sup>33</sup> Osoloso beeam abo Antiyoka mapoo do-boso, tei telaga odoo oso Yudas dio Sailesi dio see Yolusalem mapoo medee obeeamo wedi diadeeye diso. <sup>34</sup> [Esino Sailesi yo Yudasbolo Yolusalem mapoo wedi dile, esino yo Antiyoka mapoo badebeiso.] <sup>35</sup> Esem Polo dio Banabasi dio Antiyoka mi mapoo osee dobolone odoo abo sabolo, Godeeyo to Yesuwo goo maga takolone debeiso.

### Polo dio Banabasi dio domo pee

<sup>36</sup> Hamamee beeam heeso Poloye Banabasi mapoo egeesee takaso, "Iba see wedi dilesos, iyo daga Lodeeyo to takomo di mi pepuso susuga ee ogogomo dimo. Bei, tei telaga odoo mi omapoo egee do ee ayo dia gooleega, iyo dilesos diba agalai, a goomogo," diso. <sup>37</sup> Esino Banabasiye Yonee Maka dibolo ido dilame goomogaso. <sup>38</sup> Esino Polo yo Yonee Maka diayo ido dilei tekeponee diso. Bei, diayo daga di ma kulodu Yonee Maka hesiano, yayo o tou dibolo tele poogooso. Bei, Yonee Makaye diba poogoloso Pampilia mi maga diso. <sup>39</sup> Esem Polo dio Banabasi dio toso dia agadigameleso, hodobo silesibi maga domo puloso diadeeso. Esem Banabasiye Yonee Maka idoloso du toowa maga Saiples mi te mapoo soowaso. <sup>40</sup> Esem tei telaga odoo oso Poloye Sailesi ido dilame hesime egeesee takaso, "Diye, Lodeeye mesilone wulayo pidi nibolo malaiso!" diso. <sup>41</sup> Esem diayo dilesos Silia mi sabolo, osoloso Kilikia mi sabolo, omapoo tei telaga odoo mapoo Godeeyo to takomo silesibume, diayo to ee duloso, diayo tei too kibiaso.

### Timotiye Polo dio Sailesi dibolo di goo

**16** Polo dio Sailesi dio Delebe mi mapoo dilesos peledoboloso, see Listala mi mapoo dilesos egeino, tei too odoo hee badoboome egeiso, o hu Timoti. Timotiyo owee ee tei too Yu sobo. Esino ama ee Guliki odoo. <sup>2</sup> Osoloso tei telaga odoo oso Listala mi mapoo debeli sabolo, Ikoniyome mi mapoo debeli sabolo, oso takolone Timoti yo odoo medee tekepo dee takeliso. <sup>3</sup> Egeesee ma kulodu Poloye Timotibolo silame goomogaso. Esino Yu odoo susuga omapoo debel oso, Timotiyo ama ee Guliki odoo doloso gooleedooso. Esiga Poloye Yu odoo goomogalame, Yu

† To hagee odoo abo oso taka, "Lukaye hogugu," dee takeliso. Esino odoo abo oso taka, "Lukaye hogugule, odoo heeso hamamee hogugu," dee takeliso.

odoowo adaga dia goo ee dodolone Timoti idoloso kolo kooso. <sup>††</sup> Esem Polo diayo diye di odoo sabolo, osoloso sosee wiligi odoo tebisa sabolo, oso Yolusalem mapoo to hogugu ee odoo susuga oso dadalame mi susuga mapoo to hogugu hagee takomo silesibiso.

<sup>5</sup> Esem beeam susuga ee ma kulodu odoo aboso tei teme, tei telaga odoo bei moodoolone, sosee susuga ma kulodu odoo susuga oso tei too kitulugu sabolo debeiso.

### Godeeye Polo Makedonia mi mapoo diye di

<sup>6</sup> Poloye o odoo abo sabolo dilesos Asia mi toowa mapoo Godeeyo to takalai, Dio Tei oso hamaga takaso. Esiga diayo dulone Piligia mi ogo, osoloso Galesia mi ogo doloso domo amaga diadaga meleeso. <sup>7</sup> Osoloso diayo Misia mi koola mapoo siblesos peledoboloso, see Bitinia mi mapoo dilame seme, Yesuwo dio oso hamaga takaso. <sup>8</sup> Esiga diba Misia mi dagadileso see Tolowasee mi mapoo mousos. <sup>9</sup> Diba Tolowasee mi mapoo siblesos, gesi domopoo Polowo howo opusomos doloso, Makedonia mapoo badeli odoo egeiso. Odoo oso yimapoo howolone egeesee takaso, "No abei daloso Makedonia mi hamapoo siblesos iba pidi," diso. <sup>10</sup> Polowo howo opusomos doloso melee koodobuloso hamamee, iba Makedonia mi omapoo dilame mopoodoo dooso. Egeesee ma kulodu, Godeeye iba Makedonia odoo dimapoo to tekepo takomo diye doloso taka goo ee iba gooleedooso. ‡

### Lidiaye tei too goo

<sup>11</sup> Iba du toowa toloso Tolowasee mi poogoloso, Samoteleisee mi te mapoo dalo soowaso. Osoloso omapoo tialoso, beeam hee mapoo Neyapolisi mi mapoo soowaso. <sup>12</sup> Osoloso iba see abaga mili Pilipai mi mapoo diso. Mi hagee Makedonia mi eyo kulodu mi toowa hee hagooso. Loum odoo sabolo mi hamapoo debeliso. Osoloso iba beeam abo mi hamapoo debeiso.

<sup>13</sup> Osoloso iba Yu odoowo hasali beeam mapoo mosobia beelee peegoo dilesos howo palaga omapoo meiyadeeso. Bei, Yu odoo omapoo howo gisilei malaiso doloso, iba gooleedooso. Esem iba omapoo meilesos sobo abo sabolo mooloogoodoloso omapoo dobolone dimapoo to takemeleeso. <sup>14</sup> Diayo to ee dulone debel ma kulodu Tayatila mi mapoo badeli sobo hedebe badebeiso, o hu Lidia. Sobo yo o dugo tia bige odoo abo mapoo nei sabolo teliso. Osoloso yayo Yu odoowo Godee mapoo tei toloso mesiliso. Osoloso Poloye to takomolome, Godeeye sobo hagooso Polowo to mapoo medee tei talame pidiso. <sup>15</sup> Osoloso yibolo o moso kulodu mapoo debeli odoo sabolo howomoo howo sawwidigaso. Osoloso yayo iba o moso ma kulodu gilimadolone egeesee takaso, "Niyo a

†† Yu odoowo howo woola mapoo, Timoti yo Yu odoo. Bei, owee Yu sobo. Esiga Yu odoowo adaga dia goo ee dodolone, Timoti o kolo koolai tekepo diso. ‡ Polobolo Makedonia mi mapoo diadee odoo hagooso: Sailesi, Timoti, osoloso Luka (Lukaye Diye di odoo booka hagee hoguguso).

Lodee mapoo tei too sobo daga, niba dilesos mo moso ma kulodu debee," diso. Esemeyayo egeesee takeme, iba o moso ma kulodu peleso debeiso.

### Polo dio Sailesi dio neliga moso mapoo toosoo goo

<sup>16</sup> Beeame heeso iba howo gisilame howo palaga maga diadaga meleeno, odoo heeyo tou teli sobo oso iba eli domo tugodooso. Osolososobohagoososa holo oso yimapoo polome, goo peledabalai odoo mapoo olo malalo takomo siliso. Yayo egeeseemo silone, o gibadili odoo tebisa eyo molee toowa teliso. <sup>17</sup> Osolososobohagoosoma hamamee sibulone, toneligidi egeesee takomo sileeso, "Odoo hagee bia dokodoo badeli Godeeyo tou teli odoo oso, esiga diayo epei gie badeli talame ka takomo siloso," diso. <sup>18</sup> Yayo beeame susuga ma kulodu osee takomo siliso. Osolosoyayo osee takomo sileeme, Poloyedia gowolone, bidi ogolone sa holo o kulodu pala omapoo egeesee takaso, "Ayo Yesu Kelisowo hu maga namapoo ka taka, no yimaga peegoo gadi!" diso. Esemepedee omapoo sa holo oso yimaga peegoo gadiso.

<sup>19</sup> Esemesobo ee gibadili oso diayo molee teli eli pee ogoloso, sibilesos, Polo dio Sailesi dio tolosogamalee odoo mapoo iyado diso. Diayo Polo dio Sailesi dio iyado dilesosobobia domo woola mapoo holoogolosos Loum gamalee odoo dimapoo egeesee takaso, "Odoo hagee bia Yu odoo. Esiga diayo ibada mi hamapoo goo tiadili goo eligimo silesibo. <sup>21</sup> Esiga diayo eligi goo oso Loum odoo ibada adaga dia tei goo sabolo koo tobuo. Esiga Loum odoo iyo diayo eligi goo ee talai tekeponee," diso.

<sup>22</sup> Egeeseelone mosobia odoo susuga oso Polo dio Sailesi dio dia goweso. Esemegamalee odoo oso dibada odoo mapoo Polo dio Sailesi dio dia dugo ee tologobuguloso, tigamagolosos homosoweeye, diso. <sup>23</sup> Osolosogamaleeyo odoo oso diba neligidi wologaloso, neliga moso ma kulodu huyasooso. Osolosodiayo neliga moso gibadili odoo mapoo egeesee takaso, "Medee gibadebee," diso. <sup>24</sup> Esemeyayo egeesee taka duloso, neliga moso gibadili odoo oso mosokulo hoduosulu kisi ee yamagolosos, Polo dio Sailesi dio mosokuloduiyado dilesos, dibada homo homo ou soduga ma kulodugalaga dilesos kisos kisiso.

<sup>25</sup> Esemegesi domo mapoo Polo dio Sailesi dio dokodoo takolone dobolone, Godee goomogolone kosaia poulone debeiso. Esememesiya neliga mosotegei ma kulodu debeli odoo abo oso duso. <sup>26</sup> Esemepedee omapoo mibia toowa saga simi oso neliga mosohalabuso. Egeeseeme neliga mososulu susugayiligamagoosos. Osolosoki ti oso neliga moso ma kulodudebeli odoo tiegisa ee eyo pidiga poogolosos mousos. <sup>27</sup> Egeesee ma kulodu neliga moso gibadili odoo osotobolosoegeino, neliga mososulu susugayiligamagolosos molome egeisos. Egeesee ogolosoyayo goolee, neliga moso ma kulodudebeli odoo susugakukulo didoo doloso, kaiya tolosos eyo nediliyowooloomalame siso. <sup>28</sup> Esino Poloye neligidi takolone

egeesee takaso, "No nediliyo na wooloome! Iba susuga hagee doso!" diso.

<sup>29</sup> Esemeneliga moso gibadili odoo oso o odoo yimapoo keme tosibe, diso. Esemeyayo keme tolosos neliga mosokuloduhoguo dilesos, obulone kikiliga sabolo Polo dio Sailesi dio dibada homo beiyomoo ebisomiyomoo tugusalosobalaboo tiasos.

<sup>30</sup> Osolosoyayo Polo dio Sailesi dio peegoo iyado dilesos dimapoo egeesee takaso, "Wiligi odoo, ayo ogoo goo toga, gie badeli ka talaiyo?" diso.

<sup>31</sup> Esemepolo dio Sailesi dio yimapoo egeesee takaso, "No Lodee Yesu mapoo tei te! Egeeseega no gie badeli talaisos. Esiganobolosos nee mosokulodudebeli odoo oso Lodee Yesu mapoo tei toga, niba gie badeli talaisos," diso. <sup>32</sup> Esemeyayo Polo dio Sailesi dio o mosopoo idos diso. Esemediayo yibolososolosos o mosokulodudebeli odoo sabolos mapoo to tekepo Lodeeyogoo magatakaso. <sup>33</sup> Esemegesi omapoo neliga moso gibadili odoo oso Polo dio edebeeyos wei osokolo koogoo ee howo hapoosos. Osolosomapoo Polo diayo neliga moso gibadili odoo sabolos, osolosos o mosokulodudebeli odoo sabolos, howomoo howosauwidigasos. <sup>34</sup> Diba howomoo howosauwidigimes, neliga moso gibadili odoo oso Polo dio Sailesi dio o mosopoo iyado dilesos nei teneesos. Osolosoyibolos, osolosos o mosokulodudebeli odoo sabolos, diayo Godee mapoo tei too goo magadia goomogasos.

<sup>35</sup> Osolososgesikolos gamalee odoo oso dibada odoo ee neliga moso gibadili odoo mapoo diye dolone egeesee takaso, "Polo dio see peegoo tamagee," diso. Esemediayo dilesos neliga moso gibadili odoo mapoo Polo dio peegoo tamagalame, gamalee odoo osotaka to ee yimapoo takasos. <sup>36</sup> Esemeneliga moso gibadili odoo oso to hagee dulosos dilesos, Polo mapoo egeesee takaso, "Gamalee odoo osotakolone niba diyena, esiganiba medee diadee," diso.

<sup>37</sup> Esino Poloye gamalee odoo oso diye di odoo mapoo dilesos egeesee takaso, "Nibadawiligi odoo tebisa oso ibada goo ee medee meedile. Egeeseelone diayo nimapoo kitulugos teneme, niyo iba odoo howos woola mapoo wooloogasos. Esiga diba Loum mi toowa mapoo debeli odoo mapoo goo egeesee moodoolai tekeponee. Bei, Sailesi asalos iba Loum mi toowa mapoo debeli odoo. Esino niyo iba wooloogasos. Osolosos nibadawiligi odoo tebisa oso iba neliga moso ma kulodutoosoo. Osolosos see diayo iba neliga moso magamada peegoo iyado dilame ka salas? Egeesee salai tekeponee. Esiga diesos sibilesos iba neliga mosohamagayadolosos peegoo dilei tekepo," diso.

<sup>38</sup> Esemegamalee odoo oso diye di odoo ee see wedi dilesos, Poloye to taka ee gamalee odoo dimapoo takasos. Esemegamalee odoo oso Polo dio ee tei Loum mi toowa odoo, dee taka dulosos, dia dio dulone ebigasos.

<sup>39</sup> Esemegamalee odoo oso diesos sibilesos Polo dimapoo emegeidi to takasos. Osolosos diba neliga moso ma kulodugapeegoo iyado dilesos howolone egeesee takaso, "Niba epei mi hamagapeegoo diadee," diso. <sup>40</sup> Esemepolo diba neliga moso ma kulo-

duga peegoo dilesos, Lidiayo mosopoo diadeeso. Omapoo dilesos tei telaga odoos mapoo pidi to takolosos diadeeso.

#### Polos dios Sailesi dios Tesalonika mi mapoo di

**17** Polos diba Tesalonika mi mapoo diadolone, Ampipolis mi sabolos, osolosos Apolonia mi sabolos, ma kuloduga diadeeso. Egeesee ma kuloduga Yu odoowo howo gisili mosos ee Tesalonika mi mapoo meleesos. <sup>2</sup> Polos see mi omapoo eyo goo moodeli egeesee moodoolone, Yu odoowo howo gisili mosos mapoo palasos. Osolosos Yu odoowo hasali beames bakadio hedebe di ma kulodus, Poloye Godeeyo to booka ma kuloduga, Kelisowos goo ee Yu odoos mapoo medee eligi meleesos. <sup>3</sup> Yayos odoos mapoo Godeeyo to eligilone goo eyo bei woola egeesee takasos, "Godeeye to takolosos magoosos, yayo hesia Kelisoye dala tolosos, tolosos ta maga see hogabileisos. Esiga ayos nimapoo Yesuwos goo hagee takos odoos ee Godeeye hudi magoo Kelisos oso," disos. <sup>4</sup> Esemes Yu odoos abos oso Polos dios Sailesi dios dibada to dulosos tei tolosos dibada mooloogoodos sabolos hedebe disos. Osolosos Godee mapoo mesili Guliki odoos susugas sabolos, osolosos sobos hu toowa toos abos sabolos, tei tolosos dibada mooloogoodos sabolos hedebe disos.

<sup>5</sup> Esinos Yu odoos Polowos to mapoo tei tele poogoo odoos oso Polos dimapoo dia koosos. Egeeseelone diayo tokenee teli odoos mi domos silesibili, diba gilimadolosos mooloogoodolosos diba dia kamanalames tosos dia pupusos. Esemes odoos susugas oso dia komonolone, Yosaneeyos mosopoo tosos agadigamos hogugas dilesos, Polos dios Sailesi dios tolosos, odoos howo woola mapoo dibada goo meedilames esiamos disos. <sup>6</sup> Esinos diayos Polos dios koo egemes, Yosans sabolos tei telagas odoos abos sabolos tolosos, mi wiligis odoos tebisa mapoo iyados disos. Esemes kamanalames bei mooloogoo odoos oso wiligis odoos tebisa dimapoo to neligidis takolones, Polos dibada goo maga egeesee takasos, "Odoos hagee bias oso mi susugas mapoo goo tokenee talames pupugamos silesibos. Esiga epedees hamapoo diba ibadas mi hamapoo simisos. <sup>7</sup> Esemes Yosans hagoosos diba tolosos os mosos mapoo gilimados pelesos dosos. Esiga odoos hagee bias oso ibadas wiligis odoos taba Sisayes tei goo ma ee gabagamos silesibos. Bei, diayos takolones, Sisas ee ibadas wiligis odoos toowa taba osonees, esinos odoos hee Yesu onos ibadas wiligis odoos delisos," disos. <sup>8</sup> Esemes mosobias odoos sabolos, wiligis odoos tebisa sabolos, to hagees dulosos, kamanas sabolos dias to boowoogasos. <sup>9</sup> Osolosos wiligis odoos tebisa oso molees nei meyes demes, Yosans diayos wiligis odoos tebisa dimapoo molees malosos peegoo diadeesos.

#### Polos dios Sailesi dios Beleya mi mapoo di

<sup>10</sup> Osolosos gesi domos omapoo tei telagas odoos oso Polos dios Sailesi dios Beleya mi mapoo diyes disos. Esemes diayos Beleya mi mapoo peledobolosos, Yu odoowo howo gisili mosos mapoo palasos. <sup>11</sup> Osolosos egeesee ma kulodus, Poloye Tesalonika mapoo badebeis domos

omapoo Yus odoos omapoo debelis oso os to duleis gowesos. Esinos Beleya mi hamapoo Yus odoos oso Poloye Godeeyo to takemes goomogas sabolos os to dulosos, to eyo goo bei esielisos. Osolosos diayos Poloye eligi tei belesos, beames susugas Godeeyo to booka mapoo hogugu medees hesigelisos. <sup>12</sup> Esigas Yus odoos bei sabolos, osolosos Guliki sobos hu toowa toos abos sabolos, osolosos gisos abos sabolos oso tei toosos.

<sup>13</sup> Esinos Tesalonika mapoo debelis Yu odoos oso Polos diayos Beleya mapoo Godeeyo to takomolosogos di dulosos, diba sees Beleya mapoo sibadeesos. Diba Beleya mapoo sibilesos, diayos mosobias odoos oso Polos dibadas goo maga kamanalames tosos dia pupusos. <sup>14</sup> Esemes Sailesi dios Timotis dios Beleya mi omapoo osee do-boomes, tei telagas odoos oso Polos onos du dalis mapoo sagas idos mousos, yayos omagas du tolosos Atenes mi mapoo dilames. Osolosos diba Atenes mi mapoo dilesos peledoboomes, Polos yo idos di odoos dimapoo egeesee takasos, "Niba wedis dilesos Timotis dios Sailesi dios dimapoo takees, diba sees ayos bados mapoo sagas sib-eyes," disos.

#### Poloye Atenes mi mapoo Godeeyo to taka

<sup>16</sup> Polos Atenes mapoo Sailesi dios Timotis dios bameleesos. Yos omapoo diba bolones badolones egeinos, mosobias ma kulodus edebeeyos deesos dedebayos moodos gamenees godees bei molos egeisos. Egeesee ogolosos yo sooloo ma kulodus hegi toowa molones dia gooleesos. <sup>17</sup> Osolosos Yu odoowo howo gisili mosos mapoo Yus odoos abos sabolos, osolosos Godee mapoo mesili Guliki odoos sabolos to melisos. Osolosos beames susugas ma kulodus mi domopoo gamenees silesibili odoos sabolos to takomos silesibilisos. <sup>18</sup> Esemes goo goolees toowa odoos, Epikulias mooloogoodos mapoo debelis odoos sabolos, osolosos Sitoiki mooloogoodos mapoo debelis odoos sabolos, oso sibilesos Polobolos to moulones tosos agadigasos. Osolosos Poloye Yesuwos goo sabolos, osolosos odoos wedias sees ta maga hogabileis goo ee takemes, goo goolees toowa odoos abos oso egeesee takemeleesos, "Odoos hagee yayos taka goo eyos bei yo gooleedeles. Yos ogoo goo eligilames ka silabeles?" disos. Osolosos odoos abos oso egeesee takemeleesos, "Yayos imapoo mi abos dibadas godeeyos goo ee eligilames ka sulos," delisos. <sup>19</sup> Osolosos diayos Polos yayos eligimos silees goo ee medees takalames, Aleopagis esias dokodoo wiligis odoos tebisa oso to moumelees mapoo idos disos. Omapoo idos dilesos diayos Polos mapoo egeesee takasos, "Nayos eligi goo dias egees takomos sulos imapoo medees takees. <sup>20</sup> Bei, nayos eligimos silees iba gooleedeles. Esiga ibas nayos eligi goo eyos bei gooleedalais goomogosos," disos. <sup>21</sup> (Osolosos goo ee ma kulodus Atenes mapoo debelis odoos sabolos, osolosos mi abos maga sibadees odoos sabolos, beames susugas diayos goomogas goo talais beames ee poogolosos, sees game-nees eligi goo maga to dia melisos.)

<sup>22</sup> Osolosos Poloye mooloogoodos ma kulodugas to-bolosos egeesee takasos, "Atenes bias odoos, niba mos to duis! Niba elis bei maga godees susugas mapoo goomogas



tenelai gooleedoona. <sup>23</sup> Bei, ayo nibada mi ma kulodu ogogomo silone egeino, niyo goomegeli godee opusomo opusomo di egegeiso. Osoloso ee ma kulodu, godee heeyo goo maga to egeesee hogugu yo mapoo molo egeiso, 'Mi hamapoo edebeeyo gooleedele poogoo godee o hu dokodoo poudiliso,' ee egeiso. Esiga niyo gooleedele poogoo godee mapoo goomoga goo teneliso. Esino ayo nimapoo Godeeyo goo hagee takalaiso.

<sup>24</sup> "Esiga niba goolee, Godee hagooso mipoo toowa sabolo, kei dokodoo sabolo eyo wiligi doloso badoso. Bei, mipoo toowa sabolo, osoloso kei dokodoo sabolo, osoloso ee ma kulodu bi susuga egee molo sabolo, yayo moodooso. Esiga yo moso edebeeyo tegei mapoo koo badeli. <sup>25</sup> Esiga Godee hagooso gie badeli sabolo, bi susuga sabolo, odoo mapoo teneliso. Esiga iyo yo pidilei eli mauwe. Bei, yimapoo bi susuga yibolo tobuloso badoso. <sup>26</sup> Esiga Godeeye daga hoogoo odoo hedebe moodooso. Osoloso odoo hedebe yimaga odoo opusomo opusomo di susuga oso mipoo susuga mapoo diayo dabalame moodooso. Osoloso Godeeye mi diayo dabalai sabolo beeame diayo dabalai oso pagal'ai magooso. <sup>27</sup> Bei, Godeeye odoo howo si masi oso esiameliso yo agalame goomogaso. Esino yo imaga hoogoo koo badoso. <sup>28</sup> Bei, yayo imapoo gie badeli teneeso. Osoloso iba yayo kitulugu maga silone ka doso. Esiga to hagee nibada odoo oso taka to sabolo tebia. Bei, daga nima kulodu badebei odoo heeso egeesee takaso, 'Iba nose Godeeyo owolo dio,' diso."

<sup>29</sup> "Iba Godeeyo owolo dio doloso dobolone egeesee na goolee, 'Godee yo edebeeyo dedebayo yoso, osoloso bi abo sabolo oso deeso moodoona,' dee na goolee. <sup>30</sup> Godeeye daga hoogoo odoo ee egeesi goo ma kulodu osee doboome dimapoo takele. Bei kasee magayo, diba Godee gooleedelega debeiso. Esino epedee hamapoo Godeeye egeesee takooso, 'Odoo susuga mi susuga ma kulodu nibada goo tokenee maga miligi pie!' diso. <sup>31</sup> Bei, yayo mi odoo susuga dibada goo ee meedilei beeame olo magooso. Esiga yayo medee meedileiso. Egee yayo daga hesia odoo oso ka salai. Esiga Godeeye to hamapoo tei dolone, yayo hesia odoo ee ta maga hogadiso," diso.

<sup>32</sup> Poloye eligi goo maga odoo oso Yesuye ta maga hogabia duloso odoo abo oso maneso. Esino odoo abo oso Polo mapoo egeesee takaso, "Iba goo hagee beeame hee mapoo see tobu dulei goomogo," diso. <sup>33</sup> Osoloso Polo to takoloso koodobuloso diba poogoo diso. <sup>34</sup> Esino ee ma kulodu, odoo abo oso Polowo to duloso Yesu mapoo tei tolone, yibolo hedebe diso. Polowo to mapoo tei telaga odoo eyo kulodu odoo hee Dionisiyas, Aleopagi mooloogoodoo ma kulodu badeli odoo. Osoloso sobo hee Damalis, osoloso odoo abo sabolo tei tooso.

#### Poloye Kolin mi mapoo badebei

**18** Hamamee Polo Atene mi mapoo badoboso see Kolin mi mapoo diso. <sup>2</sup> Yo mi omapoo dilesi Yu odoo hee tugodooso, o hu Akwila, o midee Pontus.

Odoo hageeyo osobo Plisila dio, epedee Itali mi toowa ee ma kulodu Loum mi maga Kolin mi mapoo sibadeeso. Bei, Sisa Kolodiyaseeye Yu odoo susuga ee Loum mi maga peegoo hasiso buguso. <sup>3</sup> Esino Poloye dilesi Akwila dio osobo Plisila dio dibada moso mapoo hodobo debeiso. Bei, diba hodobo dugoso moso tegegeli tou temeliso. <sup>4</sup> Yu odoowo hasali beeame susuga mapoo Poloye Yu odoo sabolo, Guliki odoo sabolo, Yesu mapoo tei talame, Yu odoowo howo gisili moso mapoo Yesuwo goo ee to meliso.

<sup>5</sup> Esem Sialesi dio Timoti dio Makedonia maga Poloye badebei mapoo sibume, Poloye o tou poogoloso beeame susuga mapoo hedebe Godeeyo to takalai bei mooloogoloso sileeso. Egeeseelone yayo Yu odoo dimapoo, Yesuwo goo woola mapoo eligimo silone, Yesu yo Godeeye hudi magoo Kelisoso deliso. <sup>6</sup> Esino diayo Poloye eligi to talai gowolone, see Polo mapoo duwa takemeleeso. Esem Poloye Godeeye ka-manali goo ee dimapoo eligilone, o dugo megegu pilidibuguloso dimapoo egeesee takaso, "Ayo niba goolone tou toowa tooso. Esino niyo gie badeli tele poogooga, ee nibada goo. Esiga a epedee domo hamaga see Yu dele poogoo odoo mapoo Godeeyo to takomo dileiso," diso.

<sup>7</sup> Osoloso Polo Yu odoowo howo gisili moso poogoloso, see koola mapoo Yu dele poogoo odoo Titiyos Yustus eyo moso mapoo badalame diso. Odoo hagee Yu odoowo Godee mapoo mesili odooso. <sup>8</sup> Osoloso howo gisili moso wiligi odoo taba Klispas sabolo, osoloso o moso kulodu debeli odoo sabolo, Lodee Yesu mapoo tei tooso. Osoloso Kolin mi mapoo debeli odoo abo sabolo Polowo to duloso tei teme, diba howomoo howo sauwidigaso.

<sup>9</sup> Osoloso gesi heeso Lodeeye Polo howo opusomo doloso yimapoo egeesee takaso, "No haga na ebi! Osoloso nayo to takomo sili ee na koodobie! <sup>10</sup> Bei, a nobolo badalaiso. Esiga odoo heeso namapoo dala tenelaime. Bei, Kolin mi toowa hama kulodu ayo hesiga odoo susuga doso," diso. <sup>11</sup> Esem Poloye Kolin mi mapoo Godeeyo to eligilone, dugo hedebe poogoloso, osoloso see dugo hee bei mooloogoloso dulone a 6 badebeiso.

#### Yu odoo oso Polo yo gamalee odoo Galiyo mapoo ido di

<sup>12</sup> Loum odoo Galiyoye Kolin mi mapoo badolone, Akaya mi toowa gibadebeiso. Esino Poloye Kolin mi ee ma kulodu Godeeyo to eligimo silime, Yu odoo susuga oso gowolone goo goolee hedebe doloso, Polowo goo meedilame, yo Galiyo mapoo ido simiso.

<sup>13</sup> Egeeseelone, diayo Polo ido sibilesi Galiyo mapoo egeesee takaso, "Odoo hagooso eli hee maga Godee mapoo goomogalai eligimo silone, ibada tei magoo goo sabolo koo tobuo," diso.

<sup>14</sup> Osoloso Poloye epedee to hee takalame molome, Galiyoye Yu odoo dimapoo egeesee takaso, "Yu odoo, edebeeyo goo tokenee toowa too diepi o, Loum gamaleeyo tei gababia diepi, ayo o goo medee meed-

iliyo. <sup>15</sup> Esino nibada tei goo maga goo pepooko tosimiga, niso meedilei tekepo! Esiga a goo egeesi meedilei gowoo," diso. <sup>16</sup> Esememe yo to hagee dimapoo takoloso goo meedili moso maga diye diso. <sup>17</sup> Esememe yo to hagee dimapoo takoloso goo meedili moso ma kulodu odoo susuga oso howo gisili moso wiligi odoo Sostene toloso weiso. Esino Galiyoye goo hagee ogoloso yimapoo goonee diso.

#### Poloye Antiyoka mapoo see wedi di

<sup>18</sup> Polo Kolin mi mapoo tei telaga odoo sabolo beeamme bei badebeiso. Osoloso yo Silia mi mapoo wedi dilame badolone, Akwila sabolo Plisila sabolo hodobo Kenekelaya mi mapoo sibadeeso. Omapoo Polo yayo Godee sabolo to magoo dodolone, o wudu waso. <sup>19</sup> Osoloso diba du toloso see Epeses mi mapoo soowaso. Epeses mapoo dilesos peledoboloso, Plisila dio Akwila dio omapoo holoogooso. Polo Epeses mapoo osee badolone, Yu odoowo howo gisili moso mapoo peleso, Yesuwo goo maga Yu odoo sabolo to moumeleeso. <sup>20</sup> Esememe tei telaga odoo oso Polo mapoo egeesee takaso, "No beeamme sage ibolo badalai tekepo," diso. Esino Polo yo mi omapoo badalai goomegele goo takoloso see egeesee takaso, <sup>21</sup> "Godeeye goomogoga, a see nimapoo wedi sibileiso," diso. Osoloso yo du toowa toloso Epeses mi maga Kasalia mi mapoo diso. <sup>22</sup> Polo Kasalia mapoo sibileiso du oluguloso see Yolusalem mapoo palaso, tei telaga odoo mapoo emegei di to takalame. Poloye Yolusalem tei telaga odoo dimapoo emegei di to takoloso, see Antiyoka mapoo wedi diso.

<sup>23</sup> Osoloso Antiyoka mapoo beeamme deiyepo badoboso, see Galesia mi sabolo osoloso Piligia mi sabolo mapoo silone, tei telaga odoo diayo tei too kibilame pidimo sileeso.

#### Apoloseeye Epeses mi mapoo to taka

<sup>24</sup> Domo omapoo Yu odoo Apolosee, Alesendilia mapoo badeli odoo ee Epeses mapoo simiso. Yo Godeeyo to booka mapoo hogugu dia gooleedoo. Esiga yayo Godeeyo to taka domo mapoo medee tekepo takeli. <sup>25</sup> Odo hagee Lodee Yesuwo goo ee odoo heeso eligiso. Esiga yayo Yesuwo goo ee kitulugu sabolo tekepo eligiliso. Esino yo odoo Yesuwo hu maga howomoo howo sauwidili goo ee gooleedelega badolone, wulo Yoneeye odoo susuga howomoo howo sauwidiga goo ono gooleedoloso badebeiso. <sup>26</sup> Osoloso Apoloseeye Yu odoowo howo gisili moso mapoo peleso, ebilega, Godeeyo to ee kitulugu sabolo takemeleeso. Esememe Plisila dio Akwila dio o to dulone dobolone, yo dibada moso mapoo ido dilesos, Godeeye odoo mapoo gie badeli teneli eyo goo maga yimapoo medee eligiso.

<sup>27</sup> Osoloso hamamee Apolosee Akaya mapoo dilei goomogaso. Esememe tei telaga odoo oso tekepo

† Yu odoo oso wudu wali eyo goo bei hagooso. Yu odooso Godee sabolo to magolone beeamme hesieliso, yayo beeamme hesia ee ma kulodu Godeeyo tou tolone o wudu woolega badalame. Osoloso hamamee o tou oso dilesos koodobuuga o wudu waliso.

dolone, to hogugu ee Akaya tei telaga odoo mapoo te-neeso, yo sibileso dibolo badolone diba pidilame siboga, diayo yimapoo goomoga to tenelame. Esememe yayo omapoo dilesos tei telaga odoo medee pidimeleeso. Osoloso odoo hagee diayo Yesuwo mapoo Godeeye mesilone wulayo pidi goo maga olo tei tooso. <sup>28</sup> Bei, yayo Yu odoo sabolo Yesuwo goo ee odoo howo woola mapoo o toso kitulugulone Yu odoo oso to kookooliso. Egeeseelone yayo Godeeyo to booka maga eligilone, Yesuwo tei Godeeye hudi magoo Keliso doloso bado goo ee dimapoo woola eligiliso.

#### Poloye Epeses mi mapoo di

<sup>19</sup> Apolosee Kolin mi mapoo badoboome, Polo mili dilesos Epeses mi mapoo peledabaso. Polo omapoo dilesos tei telaga odoo abo tugodoloso dimapoo egeesee takaso, "Niba tei teme, Dio Tei oso nimapoo meledabasomo?" diso.

Esememe diayo nei egeesee takaso, "Nayo ogoos goo imapoo ka takala? Iba Dio Tei eyo goo ee gooleedele," diso.

<sup>3</sup> Esememe Poloye dimapoo egeesee takaso, "Niba odoo agayo eligi maga howo ka sauwidigayo?"

Esino odoo abo oso Polo mapoo egeesee takaso, "Iba Yonee odoo howomoo howo sauwidili oso eligi dodolone howomoo howo sauwidigaso."

<sup>4</sup> Esememe Poloye dimapoo egeesee takaso, "Yonee odoo howomoo howo sauwidili oso eligi goo ee egeesee moloso. Edebeeyo Kelisoye sibilei goo mapoo moodoolone, diayo dibada goo tokenee maga miligi pume, howomoo howo sauwidigaso. Esino yayo egeeseelone egeesee takeliso, 'Ama hamamee egee siboo odoo omapoo tei te,' dee takeliso. Odoos ee Yesuwo," diso. <sup>5</sup> Esememe diayo goo ee duloso Yesuwo hu maga howomoo howo sauwidigaso. <sup>6</sup> Osoloso Poloye dimapoo o deeso sigolone dokodoo takeme, Dio Tei oso dimapoo meledabaso. Esememe diayo to opusomo opusomo di kesameleeso. Osoloso diayo Godeeye taka duloso odoo mapoo takemeleeso. <sup>7</sup> Esino mooloogoodoo hagee ma kulodu odoo 12 oso goo hagee ka moodoo.

<sup>8</sup> Egeesee ma kulodu Yu odoo oso tei talame, Poloye dibada howo gisili moso mapoo peleso, a bakadio hedebe di ma kulodu ebilega, Godeeye wiligi doloso badeli eyo goo maga takemeleeso. <sup>9</sup> Esino Yu odoo abo oso tei talai goo mapoo mesilega dobolone, odoo howo woola mapoo Yesuwo goo maga to tokenee takaso. Esememe Poloye diba poogoloso tei telaga odoo gilimadoloso, Tilano sukulu moso mapoo diso. <sup>10</sup> Osoloso omapoo Poloye dugo bakadio ma kulodu beeamme susuga Lodeeyo goo ee takeliso. Egeesee ma kulodu Asia mi toowa mapoo debeli Yu odoo susuga sabolo, osoloso Guliki odoo susuga sabolo, Godeeyo to Yesuwo goo maga taka dulugaso.

<sup>11</sup> Godeeye Polo maga goo toowa opusomo opusomo di moodoogaso. <sup>12</sup> Esememe edebeeyo Poloye debia tali dugo sabolo, osoloso tou tolone kali dugo abo sabolo, toloso dilesos odoo paigiga ma dokodoo

mome, odo paigiga susuga wegigadooso. Egeeseelone bo holo odo ma kulodu paladee sabolo peegoo hasiso buguso.

<sup>13</sup> Esino Yu odo abo wulo domo silesibili odo oso bo holo odo ma kuloduga peegoo hasiso bigiliso. Diayo Poloye Yesuwo goo taka duloso, see Lodee Yesuwo hu sabolo bo holo peegoo hasiso bugulone silesibilame bei mooloogooso. Egeeseelone diayo bo holo mapoo egeesee takeliso, "Iba Poloye egee eligimo silo Yesuwo hu maga nimapoo ka taka, niba peegoo gasibel!" deliso. <sup>14</sup> Goo egeesee tomo silee ee Yu odoowo tei moso wiligi odo taba Sikibayo owolo dio 7 oso egeesee ka moodoomo silesibiso. <sup>15</sup> Egeesee moodoogamo silesibi ma kulodu, beame hee mapoo diayo bo holo peegoo hasisa molome, bo holo oso nei dimapoo egeesee takaso, "A Yesuwo gooleedooso, osoloso a Polo gooleedooso. Esino niba odo ogumo?" diso. <sup>16</sup> Esemee odo bo holo pala oso diba toloso neligidi kitulugu sabolo diba wooloogaso. Esemee diayo o moso maga sawo sabolo bododidiwe kukulo diadeeso.

<sup>17</sup> Esemee Epeses mapoo debeli Guliki odo sabolo, Yu odo sabolo goo hagee duloso dia obulone hedebe Lodee Yesuwo hu dokodoo poudooso. <sup>18</sup> Osoloso tei telaga odo susuga oso dibada goo tokenee ee woola yiligebuguso. <sup>19</sup> Esemee dima kulodu googoo gooleedo odo oso goo moodoomo silee odo egeesi masi oso dibada googoo hogugu booka ee howo woola mapoo hodobo mooloogoo magoloso dou gigalogooso. Diayo googoo booka susuga hagee odo mapoo tenee diepi, eyo nei molee ko toowa 50,000 † egeesi teliyo. <sup>20</sup> Egeesee ma kulodu Godeeyo to Lodeeyo goo maga mi toowa mapoo diayo kitulugu sabolo takomo diadeeso.

<sup>21</sup> Goo hagooso dileso hoo poogoome, Polo yo Makedonia mi sabolo Akaya mi sabolo mapoo dileso see omaga Yolusalem mapoo dilame goomogaso. Egeeseelone yayo see egeesee takaso, "A Yolusalem mapoo dileso see Loum mapoo dileiso," diso. <sup>22</sup> Osoloso Polo yo pidili odo bakadio Timoti dio Elasta dio Makedonia mi mapoo diba malalo diye doloso, yo Asia mi mapoo epedee badebeiso.

#### Epeses mi mapoo odo susuga oso kamanali goo toowa poudoo

<sup>23</sup> Polo Epeses mi mapoo epedee badoboome, odo susuga oso Yesuwo goo maga kamanali goo toowa poudooso. <sup>24</sup> Bei, Epeses mi mapoo gamenee godee Atames mapoo goomegeli moso tegei meleeso. Esemee odo hee Demetiliyuseeye o odo gilimadoloso, yoso gamenee godee masi moodoo egeesi masi dia dee oso pepuso moodoogaloso, odo mapoo tenelone nei diayo molee toowa teliso. <sup>25</sup> Osoloso Demetiliyuseeye o odo sabolo, osoloso odo abo dibolo tou hodobo teli odo egeesi sabolo, gilimadoloso

† MOLEE KO TOOWA 50,000: Molee ko toowa hageeyo hu dalakamas. Edebeeyo beame hedebe mapoo tou toga, yo nei molee ko toowa hagee hedebe nei teliso.

to mouso. Osoloso Demetiliyuseeye to moulone dimapoo egeesee takaso, "Mo odo, niba dui! Iyo tou hagee tolone badolone molee toowa teliso. <sup>26</sup> Esino niba odo Poloye goo tomo egee silo, niba gooleedooso. Yayo takolone edebeeyo deeso moodoo godee ee tei godeenee, dee takomo silime, odo susuga Asia mi mapoo debeli sabolo, osoloso Epeses mapoo debeli sabolo, oso yima hamamee dadagamo silesibiso. <sup>27</sup> Esiga iba obeeamo! Odo susuga oso Poloye eligi goo omapoo hamamee dodolone, iba gowooga, iyo tou too maga molee toowa hagee tomolo pagalai malaiso. Osoloso goo hee hagooso, odo susuga hamapoo debeli odo sabolo, osoloso mi abo mapoo debeli odo sabolo, oso ibada godee hedebe Atames mapoo tei tolone goomegeliso. Esino odo susuga oso Poloye eligi mapoo tei toga, see diayo ibada godee Atames ee gamenee godee dalaiso. Osoloso yimapoo goomegeli moso ee gowoolaiso," diso.

<sup>28</sup> Demetiliyuseeye goo hagee takomolome, o to dulone debei odo oso kamanaloso toso dia agadilone egeesee takaso, "Epeses odo ibada godee Atamesee hedebe yayo toowa ka badoso!" diso. <sup>29</sup> Goo hagooso Epeses mi toowa ma kulodu debeli odo susuga oso dia kamaso. Egeeseelone odo susuga oso mi ee ma kulodu to neligidi agadilone, edebeeyo gooloogoo doloso debeli mi omapoo hoguga diadeeso. Diayo hoguga dulone, Polowo odo Makedonia mi mapoo debeli Gaiyus dio Alistakus dio iyadoloso diadeeso. <sup>30</sup> Esemee Polo yayo odo gooloogoodoo mapoo dileso to takalame goomogaso. Esino tei telaga odo oso yo hamaga takaso. <sup>31</sup> Osoloso Polowo odo abo Asia mi mapoo wiligi odo tebisa oso yo dilame goomegele. Egeeseelone Poloye mi omapoo dilega pagalame, yo diyaga to teneeso.

<sup>32</sup> Egeeseeme gooloogoodoo ee ma kulodu odo aboso toso agadilone, goo opusomo takoo, osoloso odo aboso goo opusomo takoo, diso. Egeeseelone odo susuga oso diayo gooloogoodoo goo eyo bei kibiya gooleede. <sup>33</sup> Esiga Yu odo oso odo hee, Alesenda yo malalo mapoo pupumo dileso holoogooso, yayo odo gooloogoodoo mapoo to takolone, goo hagee Yu odo dibada goo tokenee nee, dee takalame. Esemee yayo odo susuga oso to kesamelee omapoo koodobilame, o dee wabisaso. <sup>34</sup> Esino gooloogoodoo oso Alesenda yo Yu odo doloso gooleedoloso, gowoolone to agadi sabolo see tobu egeesee takaso, "Epeses odo ibada godee Atamesee hedebe yayo toowa ka badoso!" diso. Diayo toso agadigamelee ososee, osoko howo bakadio poogooso.

<sup>35</sup> Esemee mi omapoo gamaleeyo tou teli odo heeso keese tabano, gooloogoodoo toowa oso to kesamelee omapoo koodobiaso. Egeeseeme yayo egeesee takaso, "Epeses odo, niba dui! Odo susuga ibada godee toowa Atames mapoo goomegeli moso ee iyo gibadili, diba gooleedooso. Osoloso kei ma dokodooga Atames egeesi masi imapoo homodobia, diba gooleedooso. <sup>36</sup> Esiga edebeeyo goo hamaga

gamenee takalai tebile. Esiga niba kamanaga epedee hamapoo koodobie, osoloso goo tokenee hee na te. <sup>37</sup> Osoloso niyo odoo hagee bia ee goo mauwe hamapoo iyado sibadeeso. Esino diayo ibada godee mapoo to tokenee takele. Osoloso diayo ibada godee mapoo goomegeli moso ma kulodu bi hee heli tele. <sup>38</sup> Esiga Demetiliyus nobolo, osoloso nayo gowe odoo sabolo, goo meedili moso mapoo dilesa nibada goo meedilei tekepo. Bei, goo meedili odoo osee doso. <sup>39</sup> Esino nimapoo goo hee maga to kalai mologa, mosobia oso to keli beame omapoo tosibilei tekepo. <sup>40</sup> Esiga iba susuga obeeamo. Epei iyo goo moodoo hamapoo Loum odoo oso imapoo tokenee nei te-neeyaga. Esiga Loum odoo oso imapoo goo egeesee moodooga, iba iso nediliyo pidilei eli agalaime. Bei, epei iyo kamana goo eyo bei mauwe," diso. <sup>41</sup> Osoloso mosobia gamaleeyo tou teli odoo oso to hagee takoloso koodobuloso mosobia odoo diba diadee diso.

#### Poloye Makedonia mi sabolo Akaya mi sabolo mapoo di

**20** Epeses mi mapoo kamanali goo toowa poudoo oso koodobume, Poloye tei telaga odoo susuga gilimadooso. Poloye diba gilimadoloso dimapoo pidi to takoloso see Makedonia mi mapoo dulone emegeidi to takaso. <sup>2</sup> Yayo Makedonia mi toowa ma kulodu silone, mi omapoo tei telaga odoo oso debei mapoo dibada tei too kibilame dimapoo pidi to takaso. Osoloso see Akaya mi mapoo dilesa badolone a bakadio hedebe di poogooso. Osoloso Polo a bakadio hedebe di Akaya mi mapoo poogoloso, see Silia mi mapoo dalo soowoolame badoboome, Yu odoo oso yo wooloomalame to mou duso. Esino yo goo egee duloso Akaya mi maga du tolosa dilega, see Makedonia mi mapoo wedi dilesa du tolosa Silia mi mapoo dilei diso. <sup>4</sup> Esiga odoo hagee bia oso Polobolo diadeeso, Pilusuwo owolo Sopata, yo Beleya mi mapoo badeli. Osoloso Tesalonika odoo, Alistakus dio Sekundus, osoloso Delebe odoo Gaiyus, osoloso Timoti. Osoloso Asia mi toowa odoo Takikus dio Tolopimus dio. <sup>5</sup> Esiga odoo hagee bia oso malalo dilesa Tolowasee mi mapoo iba balaga meleeso. <sup>6</sup> Esememe iba mili dilesa Pilipai mi mapoo dobolone, Isipi mi maga peegoo peledaba beame gooleebugu wo nali omapoo debeiso. Osoloso wo ne beame ee poogoloso, Pilipai mi maga du toowa tolosa Tolowasee mi mapoo dalo soowoolone, abei domo mapoo beame dee tiadoo poogooso. Osoloso Tolowasee mi mapoo dilesa odoo hagee bia tugodoloso mi omapoo dobolone beame 7 poogooso.

#### Poloye Tolowasee mosobia odoo mapoo Godeeyo to hamameedee taka

<sup>7</sup> Iba Tolowasee mi mapoo dobolone, Sadee toowa beame mapoo Yesu gooleebugu wo nalame tei telaga odoo susuga sabolo hodobo mooloogoodooso. Esememe Poloye mooloogoodoo mapoo Godeeyo to takaso. Esino Polo yo mi beamoga mi hee mapoo dilame

badolone, gesi omapoo Godeeyo to sage taka gesi domo mapoo koodobiaso. <sup>8</sup> Esememe iba moso egi doko tegei debi pooba gooboogoo ma kulodu keme bei pegiga magoloso dobolone, Polowo to duluga meleeso. <sup>9</sup> Moso ee ma kulodu giso kadiga hee Yutikus, poo osulu mapoo dokodoo badebeiso. Yo Poloye Godeeyo to sage takeme ee dulone badolone, tilasapoo meleeso. Yo egeesee tilasapoolone moso dokodooga miyomoo homodobiaso. Yo miyomoo homodobume, edebeeyo meilesa yo tolosa egeino, yo olo tana. Bei, moso egee dia egi doko tegei. <sup>10</sup> Osoloso Polo yo miyomoo meilesa ebiso miyomoo tugusaloso, yo tolosa badolone egeesee takaso, "Goo haga na koude. Yo see gie badeli toso," diso. <sup>11</sup> Osoloso Polo see moso dokodoo peleso nei naloso †, see tobu Godeeyo to takemelee osee mi beameso. Osoloso see gesikolodee mapoo mi egee poogoloso diso. <sup>12</sup> Esememe odoo susuga oso giso kadiga Yutikus ee gie badeli teme, goomoga sabolo o mosopoo ido diso.

#### Polo diayo Tolowasee mi maga Miletus mi mapoo di

<sup>13</sup> Osoloso iba Tolowasee mi maga Asos mi mapoo dilame doboome, Poloye egeesee takaso, "Niba malalo du toowa tolosa Asos mi mapoo dalo soowee. A mili dilesa Asos mi mapoo nibada du mapoo ka dabagalaiya," diso. <sup>14</sup> Esememe iba du maga soowooleso Asos mi mapoo yo tugodoloso, yo see du ma kulodu dabagaso. Osoloso see amaga Mitilene mi mapoo dalo soowaso. <sup>15</sup> Osoloso see mi beeamome, Mitilene mi maga see Kiyos mi te mapoo dalo soowaso. Osoloso omapoo tialoso, see mi beeamome, du toowa tolosa Samos mi te mapoo dalo soowaso. Osoloso omapoo tialoso, mi beeamome, see du tolosa Miletus mi mapoo dalo soowaso. <sup>16</sup> Esino Polo yo see Epeses mi mapoo dilei goomegele. Bei, yo Asia mi ee saga poogoo dilesa, Yolusalem mapoo Pentikos wo ne beame mapoo badalame goomogaso.

#### Poloye Epeses sosee wiligi odoo tebisa sabolo to kei

<sup>17</sup> Esiga Polo Miletus mi mapoo badolone, Epeses sosee wiligi odoo tebisa oso yo agalame sibilame to teneeso. <sup>18</sup> Osoloso Epeses sosee wiligi odoo tebisa oso yayo badebei mapoo sibademe, yayo dimapoo egeesee takaso, "Niba ayo beame susuga nibolo Asia mi mapoo badolone goo tomo silee gooleedooso. <sup>19</sup> A beame susuga ma kulodu Godeeyo tou talai mapoo koo goweli. Egeeseelone mawo nediliyo dokodoo koo poudoomo sili. Osoloso Yu odoo oso a wooloomalame dala teneme, ee ma kulodu didawo sabolo Godeeyo tou tomo sileeso. <sup>20</sup> Esiga ayo niba pidilame ebilega Godeeyo goo susuga nimapoo woola taka, niba gooleedooso. Egeeseelone ayo goo hee mada koo mageli. Esino odoo susuga gooloogoodoo toowa ma kulodu, osoloso nibada moso ma kulodu, Godeeyo goo susuga ee nimapoo takeliso. <sup>21</sup> Esiga a Guliki odoo

† *Odoo aboso egeesee takeliso, "Beame omapoo Polo diayo Yesu gooleebugu wo neso," diso.*

sabolo, Yu odoo sabolo, oso goo goolee su wuduloso Godee mapoo bidigadoloso ibada Lodee Yesu mapoo tei talame to takaso.

<sup>22</sup> "Esiga a Dio Tei eyo to mapoo mesiloso Yolusalem mapoo dileiso. Esino omapoo dileso badoga, amapoo goo peledabalai, a gooleede. <sup>23</sup> Esino goo hedebe hagoono a gooleedooso. Ayo mi susuga mapoo siloga, Dio Tei oso ayo dala talai goo sabolo, neliga moso ma kulodu husalai goo sabolo, amapoo eligiliso. <sup>24</sup> Esiga mo gie badeli haga koo gooleeso. Esino a hedebe Lodee Yesuye amapoo tou tenee susuga ee temeleso hosudalai dia gooleeso. Tou hagee to tekepo Godeeye mesilone wulayo pidi goo odoo mapoo takalai oso.

<sup>25</sup> Esiga a nima kulodu Godeeye wiligi doloso badeli goo ee takomo sileeso. Esino nima kulodu odoo heeso a see agalaime. <sup>26</sup> Esiga epedee ayo nimapoo taka, nima kulodu odoo heeso gie badeli telega, dou mi mapoo duga, mo goo tokenee nee. <sup>27</sup> Bei, ayo goo susuga Godeeye taka goo ee niyo gooleedalame olo takaso. <sup>28</sup> Esiga niba niso nediliyo medee bamelee. Egeeseelone Dio Tei oso nimapoo tenee sipi be hu masi medee bamelee. Esiga niba sipi be hu bali odoo masi dobolone, Godeeyo sosee ma kulodu debeli odoo medee bamelee. Bei, Godeeyo owolo Yesuye ta maga o sosee ma kulodu debeli odoo ee tooso. <sup>29</sup> A gooleedooso, a di mapoo hamamee, gamenee eligili odoo oso nimapoo sibilesi tei telaga odoo mapoo dala tenelaiso. Gamenee eligili odoo hagooso dobu so masi sibilesi sipi be hu masi wooloomaloso nalaiso. <sup>30</sup> Osoloso nima kulodu nibada odoo abo oso tebisaloso tei goo ee see bidigaloso gamenee goo ee takomo silesibileiso. Egeeseelone diayo niba domo puloso tei telaga odoo abo ee peegoo gilimado dileiso. <sup>31</sup> Esiga niba to hagee goolee sabolo dobolone, medee bolone debee. Bei, ayo dugo bakadio hedebe di ma kulodu beeame susuga, osoloso gesi susuga mapoo goo hamapoo nimapoo pisa sabolo eligimo sileeso. Esiga ayo eligi goo hagee na boobado bigi!"

<sup>32</sup> "Esiga epedee ayo niba Godeeyo dee mapoo ibedileiso. Osoloso Godee yayo sooloo dolone pidi to tekepo maga nibada tei too kibilame kitulugu tenelaiso. Osoloso to oso nibolo, osoloso Godeeye hesiga odoo susuga mapoo gie badeli tenelaiso. <sup>33</sup> Esiga niba goolee, ayo nibolo silee mapoo, a odoo abo dia bi sabolo, molee sabolo, osoloso dugo tekepo kali bi sabolo ogoloso bi ee talame koo gweli. <sup>34</sup> Esino niba olo gooleedooso, ayo goomoga goo sabolo, osoloso abolo silesibi odoo oso goomoga goo sabolo tebilame tou kitulugu sabolo teliso. <sup>35</sup> Esiga a beeame susuga ma kulodu egeesi goo maga niba see eligimo sileeso. Egeesee maga niyo tou tolone dobolone, odoo kitulugu mauwe pidimo silesibilame. Bei, Lodee Yesuye to egeesee takaso, "Teneli beeame omapoo goomoga toowa oso moloso, esino teli beeame omapoo goomoga pepooko oso moloso," diso. <sup>36</sup> Poloye to hagee takoloso koodobuloso dibolo ebiso miyomoo tugusaloso dobolone dokodoo takaso. <sup>37</sup> Osoloso diba susuga pupisigaso. Bei, Poloye dimapoo taka, "Niba

see a agalaime," deme. Osoloso hamamee Polo bolomaloso adameleso, diba yibolo du dali mapoo mousu.

### Poloye Yolusalem mapoo di

**21** Iba Miletus mi maga dilame du dali mapoo meilesi, du toowa mapoo tebisaloso, dila poogolone, Epeses sosee wiligi odoo dimapoo emegeidi to takaso. Osoloso Kos mi te mapoo dalo soowaso. Omapoo tialoso beeame hee mapoo see Lodes mi te mapoo dileso peledoboloso, see abaga Patala mi mapoo diso. <sup>2</sup> Iba Patala mapoo dileso egeino, du toowa Ponesia mapoo dilame molo egeiso. Esemie iba du omapoo daboogoloso diso. <sup>3</sup> Osoloso iba Saiples mi te dobusu dokolo poogoloso, see Silia mi Taya mapoo diso. Bei, du toowa eyo kulodu bi ma mubiyodoo malame. <sup>4</sup> Iba omapoo dileso tei telaga odoo abo ogoloso, dibolo beeame 7 debeiso. Iba dibolo omapoo doboome, Dio Tei oso eligi maga diayo Polo mapoo Yolusalem mapoo na diye, dee takemeleso. <sup>5</sup> Esino iba Taya mi mapoo dobosu see dilame bei mooloogoso. Esemie tei telaga odoo susuga sobo sabolo, holaiso sabolo, iba du dali mapoo gilimado mousu. Osoloso omapoo iba hodobo ebiso miyomoo tugusaloso dobolone dokodoo takaso. <sup>6</sup> Iba takoloso du ma kulodu tebisaloso dulone emegeidi to takeme, diba see dia moso wedi diadeeso.

<sup>7</sup> Iba Taya mi amaga see Tolemais mi mapoo diso. Mi omapoo tei telaga odoo abo tugodoloso, dibolo beeame hedebe badebeiso. <sup>8</sup> Osoloso beeame hee mapoo iba Tolemais mi poogoloso see Kasalia mapoo diso. Iba omapoo odoo to tekepo takeli Pilipiyo moso mapoo dabalame diso. Pilipiyo daga odoo pidili dikon odoo 7 hesia eyo kulodu hee yoso. <sup>9</sup> Egeesee ma kulodu Pilipiyo owolo sobo obuo bakadio bakadio di, diba Godeeyo to tosili odoo debeiso.

<sup>10</sup> Beeame abo omapoo doboome, Godeeyo to tosili odoo Agabus Yudiya maga simiso. <sup>11</sup> Yayo sibilesi Polowo gudu tamagoloso see eyo nediliyo o dee sabolo o homo sabolo tialoogoloso egeesee takaso, "Dio Tei oso egeesee takooso, 'Yolusalem mapoo debeli Yu odoo oso gudu sodu ti oso ama hageesi tialoogoloso magoloso Yu dele poogoo odoo mapoo tenelaiso," diso."

<sup>12</sup> Ibolo osoloso omapoo debeli odoo abo sabolo goo hagee duloso, Polo mapoo howolone egeesee takaso, "No Yolusalem mapoo na diye," dee takemeleso.

<sup>13</sup> Esino Poloye imapoo egeesee takaso, "Bei kasee maga niyo pupusiga sabolo amapoo goohele ka tonowala? A Yolusalem mapoo tiso tialoogoloso magalai goo hedebe mapoo mopoodoo dele. Esino Yesuwo goo maga talai sabolo mopoodoo dooso," diso. <sup>14</sup> Osoloso ee ma kulodu iba yayo Yolusalem mapoo dilei hamaga taka eli egele. Esiga haga na goolee doloso egeesee takaso, "Hagee Lodeeye goomoga goo daga, goo hagooso peledabalai tekepo," diso.

<sup>15</sup> Iba goo hagee koodobuloso, ibada bi toloso Yolusalem mapoo diso. <sup>16</sup> Iba Yolusalem mapoo sibilesi peledoboome, tei telaga odoo abo oso ibolo iba

Kasalia maga sibadee odo oso iba Nasoneeyo mosopoo iyado diso. Yo Saiples mi te mapoo badeli. Osoloso yo daga hoogoo tei toloso badebeiso.

<sup>17</sup> Iba Yolusalem mapoo dileso peledoboome, tei telaga odo oso iba ogoloso dia goomogaso. <sup>18</sup> Osoloso omapoo tialoso beeame hee mapoo Polobolo hodobo Yemes agalame diso. Esem e iba omapoo dileso egeino, sosee wiligi odo susuga oso yibolo bado-boome egeiso. <sup>19</sup> Osoloso Poloye diba ogoloso, dimapoo emegeidi to takoloso, Godeeye yimaga Yu dele poogoo odo mapoo goo toowa moodoo susuga ee medee oposususo.

<sup>20</sup> Osoloso diayo goo hagee duloso Godee mapoo dia goomogaso. Esem diayo Polo mapoo egeese takaso, "Emegei, nayo mi hagee ege. Yu odo susuga oso olo tei telagaso. Esino diba see Moseseeye eligi goo ee dadalai ono goo toowa deliso. <sup>21</sup> Osoloso odo aboso dimapoo nee goo maga gamenee takolone egeese takaso, 'Poloye Yu odo mi abo mapoo debeli dimapoo takolone: Moseseeye eligi goo sabolo, osoloso holaiso kolo koolai goo sabolo, osoloso Yu odo ibada adaga dia goo abo sabolo na deede, dee takomo silo,' diso. <sup>22</sup> "Esiga goo diayo du hagee tei goonee daga, iyo kasee moodoolaisomo? Bei, diayo no hamapoo peledaba duga, namapoo kamanalaiso.

<sup>23</sup> Esiga no iyo goo takooga, no goo hagee medee te. Goo ee ma kulodu sosee eyo kulodu odo bakadio bakadio di oso tou hee talame Godee mapoo to magooso. <sup>24</sup> Esino diayo Godeeyo tou tomo silee beeame oso koodobilee koola toobooso. Esiga no diayo tei moso mapoo wudu walame mopoodoo dalame duga, no dibolo diye. Osoloso diayo mopoodoo oso koodobuoga, niba susuga Moseseeye eligi goo ee dodolone, Godee mapoo emegeidi bi tenee. Esino nayo diayo emegeidi bi tenee ee eyo nei molee tenee. Osoloso goo susuga hagee koodobuoga, diayo wudu walai tekepo. Esiga nayo goo hagee medee deedeega, Yu odo susuga oso ogoloso, diayo no Moseseeye eligi goo ee deedeemo silo dee gooleedalaiso. Osoloso diayo nee goo maga taka du ee tei goonee dee gooleedalaiso. <sup>25</sup> Esino goo hagee Yu dele poogoo tei too odo dibada goonee. Bei, iyo dimapoo to hogugu olo teneeso. Osoloso iyo to hogugu ee ma kulodu egeese hoguguso, 'Niba gamenee godee mapoo nali bi tenee toloso na ne. Osoloso sawo na ne, osoloso hwei sawo sabolo mologa na ne, osoloso odo hee mapoo giba na ne,' diso."

<sup>26</sup> Osoloso beeame hee mapoo Poloye odo bakadio bakadio di gilimadoloso wudu walame mopoodo dalai beeame bei mooloogooso. Esem Poloye tei moso mapoo peleso wiligi odo taba mapoo egeese takaso, "Iba beeame 7 ee ma kulodu mopoodoo koodobuloso, hamamee Godee mapoo emegeidi bi tenelaiso," diso.

### Polo neliga moso mapoo todilame too

<sup>27</sup> Osoloso beeame 7 hagee koodobilee koola too-boome, Yu odo abo Asia mi maga sibadee odo oso

Polo tei moso kulodu badoboome egeiso. Osoloso diayo mosobia ee ma kulodu kamanali goo toowa poudoloso Polo tooso. <sup>28</sup> Osoloso diayo toso agadigilone egeese takaso, "Isalael odo, niyo iba pidi! Odo hagooso mi susuga mapoo silone, Moseseeye eligi goo sabolo, Isalael odoowo goo sabolo, osoloso ibada tei moso sabolo maga gamenee takeliso. Osoloso epei Guliki odo ee ibada tei moso mapoo ido pala oso ibada tei moso Godeeyo howo woola tokenee paso," diso. <sup>29</sup> (Yu odo hagee bia oso Yu dele poogoo odo Epeses mapoo badeli, Tolopimus, Polo dio Yolusalem mapoo silee ogoloso, diayo goolee, Poloye yo dibada tei moso mapoo ido palabele dolone egeese takaso.)

<sup>30</sup> Osoloso Yolusalem odo susuga oso dia komonolone, hodobo hoguo sibilesi Polo tei moso maga peegoo pupumo dileso, tei moso osulu saga kisiso. <sup>31</sup> Osoloso diayo Polo wooloomalame debeiso. Esino Loum ha teli wiligi odo taba Yolusalem mapoo kamana goo ee duloso, ha teli odo sabolo, osoloso dia gibadili odo sabolo gilimadoloso, odo mooloogoodoo mapoo saga hoguga sibadeeso. Esem odo Polo woomelee ha teli odo oso sibadee ogoloso, omapoo koodobiaso.

<sup>33</sup> Osoloso ha teli wiligi odo taba oso Polo toloso, o odo oso ki ti bakadio oso tialegee doloso, yayo Yu odo mapoo egeese takaso, "Odo hagee ogumo? Osoloso yo goo tokenee kasee toga ka woolaiyo?" diso. <sup>34</sup> Osoloso odo susuga oso goo opusomo opusomo di takolone to neligidi takaso. Egeeseelone ha teli wiligi odo taba oso dia to medee tele. Esiga o odo mapoo Polo toloso, Polo yo ha teli odoowo mosopoo ido di, diso. <sup>35</sup> Hateli odo oso Polo dia moso mapoo todime, odo abo oso hamamee sibulone, to neligidi egeese takomo sibadeeso, "Yo wooloom! Yo wooloom!" diso. Osoloso Polo yo bo maga palame to budume, ha teli odo oso yo imado palaso. Bei, ede-beeyo Polo wooloomalame dia alabume.

<sup>37</sup> Esino ha teli odo oso Polo dia moso kulodu ido dilame doboome, Poloye ha teli wiligi odo taba mapoo egeese takaso, "Ayo namapoo to takalai tekepowa?" diso.

Hateli wiligi odo taba oso Poloye yimapoo Guliki toso taka duloso egeese takaso, "No Guliki to kasee gooleedoowo? Ayo goolee, no Isipi odo beeame hee hamamee hagoo ibada gamalee odo sabolo hatomo silone odo wooloomali odo 4000 gilimadoloso miwe poogoo mapoo gilimadodi odo oso beledde."

<sup>39</sup> Esino Poloye egeese takaso, "Odo ege anee. A Yu odo Kilikia mi toowa ee ma kulodu Talesas mi mapoo badeli. Mo mi hu toowa moloso. Esiga ayo odo susuga hagee bia mapoo to takalai tekepowa?"

<sup>40</sup> Esem ha teli wiligi odo taba oso Poloye to takalai soowa, dee takeme, yo toboloso bo mapoo to budulone, odo to koodobilame odo mapoo dee wabisaso. Osoloso odo susuga oso to koodobuloso doboome, yayo Hibulu toso dimapoo to takalai bei mooloogooso.

### Poloye Yu odoo mapoo o goo taka

**22** Poloye to takalai bei mooloogolone egeesee takaso, "Ma dio, ei dio, osoloso molo dio, niba ayo mawo pidi to takooga, medee dui!" diso. <sup>2</sup> Osoloso Yu odoo Poloye dia Hibulu toso taka duloso, to koodobuloso medee dobolone dumeleeso. <sup>3</sup> Poloye egeesee takaso, "A Yu odoo Kilikia mi toowa ee ma kulodu Talesas mi mapoo soomagoo. Esino Yolusalem mi hamapoo badolone kawudooso. Osoloso Gamaliyoye a eligime, ayo ibada amawe diayo tei magoo medee gooleedooso. Esino epei niyo goolee Godeeyo tou bele dolone, komonolone a wooloomalame ka seeso. Osoloso daga a see goo ee Godeeyo tou bele dolone, ayo kitulugu toowa magolone, Yesu mapoo tei telaga odoo wooloomalame dimapoo dala toowa teneliso. Osoloso ayo giso sabolo, sobo sabolo, toloso neliga moso ma kulodu huyaseliso. <sup>5</sup> Osoloso tei moso wiligi odoo taba sabolo, Yu odoowo wiligi odoo tebisa sabolo, oso mo goo hagee diba gooleedooso. Bei, diayo tei telaga odoo Damasko mapoo debeli toloso neliga moso mapoo toosoolame, amapoo to hogugu tenelone egeesee takaso, 'Niba dilesa Damasko wiligi odoo tebisa mapoo to hogugu tenelone, tei telaga odoo toloso Yolusalem mapoo iyado sibadee, diba dala toowa talame,' diso.

<sup>6</sup> "Ayo egeeseemo silone, beeamo heeso Damasko mi mapoo tei telaga odoo talame diso. Domo mapoo osoko oo domo mapoo Damasko mi koola mapoo dimeleeno, kei ma dokodooga gadeebugu sibilesa a tooso. <sup>7</sup> Esem a mi mapoo homodobuloso tiamolome, toso egeesee takeme duso, 'Solo, Solo, nayo kasee maga amapoo dala ka tonowala?' diso.

<sup>8</sup> "Esem ayo nei yimapoo egeesee takaso, 'Wiligi odoo, no ogumo?' Yayo nei egeesee takaso, 'A Nasalet odoo, Yesu. Nayo tei telaga odoo dimapoo dala egee tenemolo ee nayo amapoo tenemoloso,' diso. <sup>9</sup> Ee ma kulodu odoo abolo diadee diba gadeebugu egeiso, esino to yayo taka medee dule.

<sup>10</sup> "Esem ayo egeesee takaso, 'Lodee, ayo ogoo goo talaisomo?' diso.

Esem Lodeeye amapoo nei egeesee taka, 'No toboloso Damasko mi mapoo di. Mi omapoo ayo goomoga goo nayo talai ee takalaisy,' diso. <sup>11</sup> Esino gadeebugu oso mo howo sime, odoo abolo diadee oso Damasko mi mapoo dulone, mo dee mapoo toloso ido diso.

<sup>12</sup> "A Damasko mapoo dilesa peledoboome, odoo hee Ananayaseeye a agala simiso. Yo Moseseeye eligi goo ee medee dodomo sili odoo. Osoloso Yu odoo Damasko mi omapoo debeli oso yo tekepo odoo, dee takeliso. <sup>13</sup> Osoloso yayo sibilesa ama koola hapoosee tobudulone egeesee takaso, 'Solo, emegei, no see tobu ege!' diso. Esem epedee omapoo mo howo see tekepo poome, ayo yo egeiso. <sup>14</sup> Esem yayo amapoo egeesee takaso, 'Ibada amawe dia Godeeye goomoga goo ee gooleedalame, yayo no olo hesiaso. Osoloso nayo odoo tekepo Keliso ogoloso o to medee dulame.

<sup>15</sup> Esiga nayo o goo ee odoo susuga mapoo nayo du sabolo, osoloso nayo egei sabolo, yiligamo sileiso.

<sup>16</sup> Esiga no ogoo bamalala? No saga toboloso howomoo howo sauwidi. Osoloso Yesu mapoo takee, yayo nee tokenee hapoloso boobado bigilame,' diso.

<sup>17</sup> "Hamamee a Yolusalem mapoo wedi dilesa tei moso mapoo dokodoo takomolome, Lodeeye mo howo opusomo diso. <sup>18</sup> Mo howo opusomo deme, Lodeeye amapoo to takomolome egeiso. Egeeseelone yayo amapoo egeesee takaso, 'No saga toboloso Yolusalem poogoo di! Bei, odoo hamapoo egee do oso, nayo mo goo takemelee duloso, tei talai megona,' diso.

<sup>19</sup> "Esino ayo Lodee mapoo nei egeesee takaso, 'Odoosuga, diba gooleedooso, ayo howo gisili moso susuga mapoo silone, tei telaga odoo toloso neliga moso kulodu toosooli, osoloso diba wooloogali goo ee. <sup>20</sup> Osoloso diba gooleedooso, nee tou teli odoo, Sitiben, woolooma beeamo mapoo a badebeiso. A dibolo goo goolee hedebe diso. Osoloso dibada kekeisu dugo tigadoo ayo bameleeso.

<sup>21</sup> "Esino Lodeeye amapoo egeesee taka, 'No epedee di. Bei, no ayo mi hamaga eli sage Yu dele poogoo odoo oso debeli mi mapoo diye dalaisy,' diso."

<sup>22</sup> Osoloso Polo daga o to bei mooloogoloso takomo silee domo mapoo odoo mooloogoodoo oso o to medee dulone debeiso. Esino see yayo Yu dele poogoo odoowo goo takomolome, diayo duloso komonolone to neligidi egeesee takaso, "Wolome! Wolome! Yo mipoo hamapoo badalai tekeponee!" <sup>23</sup> Egeeseelone diayo to neligidi takolone, kamana goo eligilone, dia kekeisu dugo tigadoloso mogoukee deeso keesee doloso dokodoo togobuguso. <sup>24</sup> Esem ha teli wiligi odoo taba oso Polo dibada mosopoo ido dilesa wosolone, yo ka woolame o odoo mapoo takaso. Bei, odoo mooloogoodoo oso Polo mapoo komonolone, to neligidi taka goo eyo bei Poloye yimapoo takalame yo goomogaso. <sup>25</sup> Osoloso ha teli odoo oso Polo woolame, ki tiso o dee homo mapoo tialogo molome, Poloye ha teli odoo ee gibadili hee koola mapoo to budume, yimapoo egeesee takaso, "Esiga nibada tei magoo oso takolone, niyo tei Loum odoo goo mauwe mosoowe weeye, dee taka molosomo? Haye! Mauwe. Bei, niyo mo goo medee meedile," diso.

<sup>26</sup> Esem ha teli odoo ee gibadili oso to hagee duloso, dilesa o wiligi odoo mapoo egeesee takaso, "Nayo goo tomo silee gooleedoso? Bei, odoo hagee tei Loum mi mapoo badeli. Esiga ibada teiso egeesee takooso, 'Loum mi mapoo badeli odoo ee mosoowe goo mauwe woolai tei,' deliso, diso."

<sup>27</sup> Esem dibada wiligi odoo taba yo dio dulone, yayo Polo mapoo dilesa egeesee takaso, "Nayo amapoo takee, no tei Loum odoowo?"

Poloye nei egeesee takaso, "O, a tei Loum odoo," diso.

<sup>28</sup> Egeeseeme ha teli wiligi odoo taba oso nei yimapoo egeesee takaso, "A tei Loum odoo dalame, nei molee toowa magooso."

Esino Poloye yimapoo egeesee takaso, "A tei Loum odoo dalame nei molee toowa ka magele. Bei, a soomagoo beeamo mapoo a tei Loum odoo paso," diso.

<sup>29</sup> Esemme ha teli odoo oso Polo woolame dobolone, to hagee duloso peegoo diadeeso. Osoloso dibada wiligi odoo sabolo dia ebigaso. Bei, diayo tei Loum odoo ki tiso tialogoloso woolame seme.

### **Polo o goo meedilame Yu odoo oso to mou mapoo ido pala**

<sup>30</sup> Osoloso beeamo hee mapoo ha teli wiligi odoo taba oso Polowo goo medee gooleedalame, tei moso wiligi odoo tebisa sabolo, osoloso Yu odoowo wiligi odoo tebisa sabolo, to meilame gilimaso. Osoloso diayo Polo ki tiso tialogoo puobuguloso, odoo mooloogoodoo dia mudugiyopoo tebidiso.

**23** Osoloso Poloye wiligi odoo tebisa oso mooloogoodoo mapoo bolone egeesee takaso, "Emegei, ayo badebei beeamo susuga mapoo, a Godeeyo howo woola silone, mo sooloo ma kuloduga goo goolee oso goolee ayo tomo sili goo ee tekepo gooleeso," diso. <sup>2</sup> Esemme tei moso wiligi odoo taba Ananayaseeye to hagee duloso, odoo abo Polo koola ogolone debei dimapoo egeesee takaso, "Polo maga mapoo weel!" diso. Esemme odoo heeso Polo maga mapoo weiso. <sup>3</sup> Esino Poloye Ananayas mapoo egeesee takaso, "Nayo a wei eyo nei Godeeye no woolaiso. Esiga no goo goolee bakadio gweli odoo. Bei, nayo Moseseeye tei magoo sabolo mo goo meediliso. Esino epedee nayo a wei oso no tei magoo gababiaso," diso.

<sup>4</sup> Esemme Poloye tei moso wiligi odoo taba mapoo egeesee takeme, odoo Polo koola ogolone tebisa melee oso nei egeesee takaso, "Nayo Godeeyo tei moso wiligi odoo taba mapoo to egeesee na takee!" diso.

<sup>5</sup> Poloye nei egeesee takaso, "Emegei, odoo hagee tei moso wiligi odoo tobagodi, a gooleede. Godeeyo to booka mapoo hogugu hagooso, 'Nibada odoowo wiligi odoo taba mapoo to tokenee na takee,' diso."

<sup>6</sup> Osoloso mooloogoodoo ee ma kulodu Poloye Sedisi odoo abo sabolo, osoloso Pelisi odoo abo sabolo egeiso. Esemme yayo to neligidi egeesee takaso, "Emegei, a Pelisi odoo, osoloso mo ma nose Pelisi odoo. Esino ayo odoo wedia maga hogogabilei goo mapoo tei teme, goo meedili mapoo todileso hagee badoso," diso. <sup>7</sup> Esemme Poloye egeesee takeme, mooloogoodoo abo puloso toso agadigasoo. <sup>8</sup> Bei, Sedisi odoo diba toloso hogabilei goo mapoo tei koo teli. Osoloso diayo tei tolone, Godeeyo momaiye sabolo dio sabolo mauwe, dee takeliso. Esino Pelisi odoo susuga goo hamapoo tei teliso.

<sup>9</sup> Esemme ee ma kulodu wiligi odoo oso mooloogoodoo abo puloso toso dia agadigasoo. Osoloso Godeeye tei magoo ee eligili odoo abo Pelisi odoo dia mooloogoodoo ee ma kulodu badeli oso toboloso kitulugu sabolo egeesee takaso, "Iba odoo hamapoo goo

tokenee koo ogo. Iba gooleede, dioso o, Godeeyo momaiye oso yimapoo to taka molodoo," diso. <sup>10</sup> Esemme toso agadiga toowa deme, Pelisi odoo sabolo Sedisi odoo sabolo abo puloso, biliga toowa bei mooloogoo. Osoloso ha teli wiligi odoo taba oso o odoo mapoo Polo wooloomeyaga, dibada mosopoo ido diye diso.

<sup>11</sup> Osoloso gesi mapoo Lodee sibilesi, Polo koola ogolone tobudulone egeesee takaso, "No haga na ebi! Nayo Yolusalem mapoo mo goo taka egeesi masi Loum mapoo mo goo takalaiso," diso.

### **Yu odooso Polo wooloomalame to magoo**

<sup>12</sup> Osoloso gesikolo Yu odoo aboso Polo wooloomalame to kitulugu magolone egeesee takaso, "Iyo Polo wooloomalega dogo, nei sabolo howo sabolo nalaimo. Esino iyo yo wooloomaloso, nei sabolo howo sabolo ka nalai," diso. <sup>13</sup> Mooloogoodoo ee ma kulodu, Yu odoo 40 egeesi masi oso to egee ka magoo. <sup>14</sup> Osoloso diayo dileso tei moso wiligi odoo tebisa sabolo, Yu odoowo wiligi odoo tebisa sabolo, dimapoo egeesee takaso, "Iyo Polo wooloomalame to kitulugu olo magoo. Esiga iba nei sabolo howo sabolo nelega doso. Osoloso Polo wooloomaloso hamamee nei sabolo howo sabolo ka nalai. <sup>15</sup> Esiga niyo ha teli wiligi odoo taba mapoo to hagee todilei, iba goomogoso. Niyo yimapoo egeesee takee, 'Nayo Polo toloso hamapoo ido sibe, iyo yimapoo woosalaiya,' diso. Esino iba eli domopoo bameleso Polo siboga, yo wooloomalaiso," diso.

<sup>16</sup> Esino Polo o besiga oso to hagee duloso, ha teli odoowo moso mapoo dileso, Polo ogoloso yo wooloomalame to magoo yimapoo takaso. <sup>17</sup> Osoloso Poloye ha teli odoo gibadili gilimadoloso yimapoo egeesee takaso, "Mo besiga hagooso nibada wiligi odoo taba mapoo to toodagalame simina, esiga yimapoo ido di," diso.

<sup>18</sup> Esemme ha teli gibadili odoo oso Polowo besiga ido dileso, o wiligi odoo mapoo egeesee takaso, "Neliga moso ma kulodu badeli Poloye a idoloso o besiga hagee namapoo ido sibena. Bei, yayo namapoo to toodagala simigona," diso.

<sup>19</sup> Osoloso wiligi odoo taba oso Polowo besiga dee mapoo toloso, obusomo peegoo ido dileso dobolone, yimapoo egeesee takaso, "Nayo amapoo ogo goo takalame ka simiyo?" diso.

<sup>20</sup> Esemme Polo besigaye nei egeesee takaso, "Yu odoo abo diba goomogogona, godigi dibada wiligi odoo tebisa oso to mou mapoo nayo Polo ido dilame. Osoloso omapoo diayo Polo mapoo see woosalai doloso gamenee takalaiso. <sup>21</sup> Esino no dia to mapoo tei dee na see! Egeeseelone, no Polo omapoo na ido di. Bei, odoo bei, 40 egeesi eli domopoo yo wooloomalame dabalaiso. Esiga odoo hagee bia to kitulugu magoloso Polo wooloomalame nei sabolo howo sabolo nalai teyuloso doso. Esiga diba olo mopoodoo doloso nayo to nei taka dulame doso," diso.



<sup>22</sup> Osoloso wiligi odoo taba oso Polowo besiga diye dolone, yimapoo egeesee takaso, "Nayo dileso odoo mapoo takolone, nayo amapoo taka goo ee ayo takago, dee na takee," diso.

### Polo Kasalia mapoo toti

<sup>23</sup> Osoloso ha teli wiligi odoo taba oso ha teli odoo gibadili bakadio gilimadoloso dimapoo egeesee takaso, "Niba epedee Polo Kasalia mapoo ido di. Omapoo dulone, odoo 200 kaiya talaga sabolo, osoloso odoo 200 tio talaga sabolo, osoloso odoo 70 be hosee maga dilei toloso, Kasalia mapoo dilame mopoodee. Niba egeesee mopoodoo doloso, epei gesi odoo susuga tiesaga, Kasalia mapoo ka dilei. Niyo egeesee lone, Polo mapoo be hosee hee yimapoo tenee, yo gamalee odoo Peliks mapoo medee ido dileso peledabalame," diso.

<sup>25</sup> Egeesee lone yayo gamalee odoo Peliks mapoo to hageesee hoguguso:

<sup>26</sup> Emegei, gamalee odoo Peliks hu toowa too, a Kolo-dias Lusiyas,

<sup>27</sup> Yu odoo oso odoo hagee toloso wooloomalame seeso. Esino yo tei Loum odoogo di duloso, ayo mo odoo sabolo yo toloso mada peegoo ido diso. <sup>28</sup> Osoloso ayo o goo dulame, Yu odoowo wiligi odoo tebisa diayo to mou mapoo ido diso. <sup>29</sup> Yu odoo oso taka Poloye dibada tei magoo gababiaso, diso. Esino yayo Loum odoowo tei toowa magoo gababile. Esiga yo wooloomalai o, neliga moso ma kulodu husilei yimapoo goo hee mauwe. <sup>30</sup> Esino Yu odoo abo oso Polo wooloomalame mopoodoo doo duloso, yo namapoo ido diye, diso. Osoloso ayo Yu odoo abo sabolo namapoo diye diso, diayo yo gowe goo ee takalame. Mo to oso.

<sup>31</sup> Osoloso gesi ha teli odoo oso dia wiligi odoowo to duloso, Polo Kasalia mi mapoo ido dulone, eli do-mopoo Antipatilis mi mapoo sibilesa peledabaso.

<sup>32</sup> Beeame hee mapoo be hosee maga dili odoo oso Polo Kasalia mi mapoo ido dumolome, ha teli odoo abo Yolusalem mapoo wedi diadeeso. <sup>33</sup> Odoos be hosee maga dili oso Kasalia mapoo sibilesa peledoboloso, gamalee odoo Peliks mapoo dia wiligi odoo taba oso to hogugu teneeso. Osoloso Polo yimapoo teneeso. <sup>34</sup> Esem gamalee odoo oso to hogugu hagee hesigaloso, Polo mapoo egeesee takaso, "No mi kamapoo badeliyo?" Esino Poloye yimapoo egeesee takaso, "A Kilikia mi toowa mapoo badeli," dee takeme, yayo nei egeesee takaso, "Odoos namapoo kamanali hamapoo peledobooga, ayo nee goo meedileiso," diso. Esem yayo o odoo mapoo Polo Helodeeye moso toowa tegei mapoo ido dileso, medee bamelee, diso.

### Yu odoos Polowo goo Peliksiyo howo woola taka

**24** Beeame dee tiadoo poogoloso hamamee, tei moso wiligi odoo taba Ananayas sabolo, osoloso Yu odoowo wiligi odoo tebisa abo sabolo, Kasalia mapoo gamalee odoo Peliksiyo howo woola Polowo

goo meedilame sibadeeso. Diayo sibulone, goo meedilei mapoo Polowo goo takalame, odoo hee Loumowo tei magoo gooleedoo odoo Teletulus ido simiso. <sup>2</sup> Osoloso diayo goo meedili moso mapoo polomologa, Peliksiye Polo hamapoo sibeye, diso. Esem Poloye goo meedili moso mapoo sibilesa badoboome, Teletuluseeye Polowo goo takalame bei mooloogolone egeesee takaso, "Peliks, no ibada wiligi odoo hu toowa too. Bei, nayo ibada mi toowa bamologa, mesie ka doso. Osoloso goo tokenee susuga ee nayo pidi maga medee tekepo moodeliso. <sup>3</sup> Esiga iyo goo susuga ogoloso, namapoo emegeidi sabolo goomoga to sabolo ka takooso. <sup>4</sup> Esiga iyo namapoo hegi goo teneeyaga beame sage nobolo to kalai koo goomogo. Esino ayo namapoo howolone ka taka, no wulo beame deiyepo mapoo to hagee dui," diso.

<sup>5</sup> Osoloso Teletuluseeye egeesee takaso, "Odoos hagee tokenee goo eligimo sili. Bei, yayo mi toowa susuga mapoo goo eligimo sili maga Yu odoo oso kamanaliso. Osoloso yinosee Nasalet odoo Yesu deedeeli dia wiligi odoo taba. <sup>6</sup> Osoloso yayo goo hee moodooso. Esino yayo ibada tei moso Godeeyo howo woola tokenee palame seme, iyo yo tooso. [Osoloso iyo ibada teiso o goo meedilame goomogaso. <sup>7</sup> Esino ha teli wiligi odoo taba, Lusiyaseeye kitulugu sabolo sibilesa Polo imaga ido diso. <sup>8</sup> Osoloso Lusiyaseeye Peliks namapoo sibilesa Polowo goo meediyo doloso imapoo egeesee takaso.] <sup>†</sup> Esiga no nosee Polo mapoo wosalo ogoga, to nei yayo taka duloso, nayo tei goo iyo Polowo goo taka duloso gooleedalaiso," diso. <sup>9</sup> Osoloso Yu odoo abo Teletulus sabolo sibadee oso Peliks mapoo takolone egeesee takaso, "O, Teletuluseeye egee takoo tei takoo," diso.

### Goo meedi mapoo Poloye o goo eyo nediliyo taka

<sup>10</sup> Osoloso gamalee odoo oso Polo no to takee neme, nei Poloye egeesee takaso, "Peliks, a gooleedoos, no dugo susuga ee ma kulodu ibada mi hamapoo badolone goo meediliso. Esiga ayo to nei namapoo takalai, a goomogo. <sup>11</sup> Nayo medee dui. Nayo goo hagee odoo abo mapoo takooga, diayo namapoo goo hedebe hagoonosee takalaiso. Goo ee ayo Godeeyo hu poudalame, Yolusalem mapoo di beame 12 poogoloso ka badoso. <sup>12</sup> Esiga a Yolusalem mapoo badolone, Yu odoowo tei moso mapoo odoo hee sabolo koo agadigeli. Osoloso howo gisili moso ma kulodu, osoloso Yolusalem mi mapoo silone, odoo kamanalame koo moodeli. <sup>13</sup> Esiga Yu odoo hamapoo egee do oso mo goo namapoo to opusomo opusomo di taka goo susuga ee tei goonee. <sup>14</sup> Esino diayo taka eyo kulodu, goo heeno tei goo. Ee, ibada amawe dia Godeeyo hu poudalame, ayo Yesu mapoo tei teliso. Esino Yu odoos takeliso, Yesuwo goo eligi sabolo di-ayo eligi sabolo hedebeenee. Esino a Moseseeye eligi goo sabolo, osoloso Godeeyo to tosili odoo oso to

<sup>†</sup> 6-8: To hagee odoo aboso taka, Lukaye hogugu, deliso. Esino odoo aboso taka, Lukaye hogugule, odoo heeso hamamee hoguguna, dee takeli.

hogugu mapoo tei teliso. <sup>15</sup> Esiga Godeeye tekepo odoo sabolo tokenee odoo sabolo ta maga see hogabidilei goo mapoo Yu odooso tei toloso egee do, goo hedebe mapoo anosee tei teliso. <sup>16</sup> Esiga goo hageesee maga, a Godeeyo howo woola osoloso odoo howo woola goo tekepo talai goomegeliso.

<sup>17</sup> "A Yolusalem poogoo dileso mi abo mapoo silone dugo abo poogooso. Omapoo siloso, see Yolusalem mapoo wedi simiso, bi mauwe odoo mapoo emegeidi bi molee tenelame, osoloso Godee mapoo emegeidi bi tenelame. <sup>18</sup> Esino a tei moso mapoo badolone, Godee mapoo emegeidi bi tenelai ee mopoodoo dolone badebeiso. Omapoo badolone, odoo susuga badele, osoloso kemenele. Osoloso ee ma kulodu Yu odoo oso sibilesa a egeiso. Esino dima kulodu, Asia mi maga sibadee Yu odoo oso mo goo maga dia kamaso. Esiga bei kasee maga odoo hagee bia hamapoo mauwe ka dosomo? Odoo hagee bia oso sibilesa mo goo namapoo takalai tekepo. <sup>20</sup> Esino odoo egee bia hamapoo mauwe. Esiga Peliks, nayo Yu odoo hagee do mapoo woosalai tekepo, diayo a Yolusalem mapoo dibada wiligi odoo tebisa oso to mou mapoo ido peleso dogo, mo goo tokenee edebeeyo egei ee takalai tekepo. <sup>21</sup> Esino ayo goo hedebe hagee diayo to mou ma kulodu to kitulugu sabolo egeesee taka, 'Esino niyo wedia maga see hogogabilei mapoo tei teme goo ka meedisoo,' diso."

<sup>22</sup> Esino Peliks yo Lodeeyo goo ee olo duloso badebeiso. Osoloso odoo mooloogoodoo mapoo egeesee takaso, "Iba Polowo goo meedilei epedee hamapoo koodobileiso. Esiga see ha teli wiligi odoo taba Lusiyas siboga, Polowo goo see meedileiso," diso. <sup>23</sup> Osoloso Peliksiye ha teli gibadili odoo hee mapoo egeesee takaso, "Niba Polo medee bolone, yimapoo hegi goo hee na tenee. Osoloso emegei odoo heeso yo pidilei na hamaga takee," diso.

<sup>24</sup> Osoloso beame abo poogoloso, Peliksiye osobo Dulusila dio Polo agalame sibadeeso. Peliksiye osobo Dulusila ee Yu sobo. Osoloso diayo sibilesa egeesee takaso, "Polo yo hamapoo ido sibe," diso. Esem Poloye sibilesa Yesu Keliso mapoo tei talai goo ee takomolome, Peliksiye medee dumeleeso. <sup>25</sup> Yayo dulone badolone, Poloye yimapoo tekepo badalai goo sabolo, osoloso tokenee goo teyaga su kookoodalai goo sabolo, osoloso Godeeye beame hamameedee mapoo goo meedilei goo sabolo takaso. Esem Peliksiye to hagee duloso obulone, yimapoo egeesee takaso, "Oso, omapoo koodobie! Amapoo beame hee mologa, no see sibe dalaiso," diso. <sup>26</sup> Egeesee ma kulodu Peliksiye mada egeesee gweliso, "Poloye amapoo molee teneega, molee oso ayo nei Polo ee neliga moso ma kuloduga peegoo ido dileiso," diso. Yayo egeesee goolone badolone, beame abo mapoo Polo sabolo to kalame yo iliso.

<sup>27</sup> Esino dugo bakadio poogoloso hamamee Peliksiye o gamalee tou teli maga peegoo dime, see odoo heeso badebeiso, o hu Posiyus Pestus. Esino Yu odoo oso goomogalame, Peliks o tou teli maga peegoo dile-

ga badolone, yayo Polo neliga moso mapoo osee badebee, diso.

### Polo o goo Sisaye meedilame taka

<sup>25</sup> Pestuseeye gamalee hu toloso beame bakadio hedebe di poogoloso, see Kasalia mi maga Yolusalem mapoo simiso. <sup>2</sup> Yayo omapoo simi beame mapoo, tei moso wiligi odoo tebisa sabolo, osoloso Yu odoowo wiligi odoo tebisa abo sibilesa yimapoo Polowo goo egeesee takaso, "Polo yo goo tokenee tooso. Esiga no iyo goomoga goo ee moodee. Egeesee Polo see Yolusalem mapoo ido sibeye, dee takee," diso. Bei, diba Polo Yolusalem mapoo sibumologa, mada eli domopoo wooloomalame goomogaso. <sup>4</sup> Esino Pestuseeye egeesee takaso, "Haye, Polo yo Kasalia omapoo osee badalaiso. Yolusalem mapoo ido sibileime. Esino a beame abo poogoloso hamamee see Kasalia mapoo wedi dileiso. <sup>5</sup> Esiga nibada wiligi odoo tebisa see abolo dilei tekepo, diayo tei Poloye goo tokenee too egei omapoo takalame," diso.

<sup>6</sup> Pestus beame 10 egeesi Yolusalem mapoo poogoloso, see Kasalia mapoo wedi diso. Yo Kasalia mapoo dileso, tialoso beame hee mapoo goo meedili moso mapoo peleso, yayo badeli debi mapoo badolone, Polo yo sibeye doloso odoo abo mapoo to teneeso. <sup>7</sup> Esem edebeeyo Polo yo goo meedili moso mapoo ido polome, Yolusalem maga sibadee Yu odoowo wiligi odoo tebisa oso Polo tobudume, pee maga tebisaloso silodoboloso, Polowo goo mapoo to opusomo opusomo di takolone, Polo yo dia tokenee odoo dee takagameleeso. Esino diayo to opusomo opusomo di taka ma kulodu, Pestuseeye tei goo egele.

<sup>8</sup> Esem Poloye eyo nediliyo pidilei to takolone egeesee takaso, "A Yu odoowo tei hee gababile. Osoloso ayo ibada tei moso eyo hu mapoo tokenee goo takele. Osoloso Loum mi toowa wiligi odoo taba Sisayo goo mapoo tokenee goo takele," diso.

<sup>9</sup> Esino Yu odoo oso goomogalame, Pestuseeye Polo mapoo egeesee takaso, "Iba susuga oso Yolusalem mapoo dileso nee goo omapoo meedilei tekepowa?" diso.

<sup>10</sup> Esem Poloye nei egeesee takaso, "A Yolusalem mapoo dileime. Bei, a Loum odoowo goo meedili moso mapoo olo badoso. Esiga hamapoo mo goo meedilei tekepo. Esino Pestus, no olo gooleedooso, ayo Yu odoo mapoo tokenee goo hee moodoole.

<sup>11</sup> Egeesee ma kulodu ayo goo tokenee too diepi, tei ee dodolone, a talai tekepo. Esino Yu odoo oso mo goo wulo gamenee taka maga, odoo heeso a Yu odoowo dee mapoo tenelai tekeponee. Esiga a Loum mi wiligi odoo taba Sisaye mo goo meedilei goomogo!" diso.

<sup>12</sup> Esem Pestuseeye yimapoo kokodo takeli odoo sabolo goo hamapoo to mouloso, Polo mapoo egeesee takaso, "No Sisaye nee goo meedilei goomoga magooga, no Sisa mapoo ido dileiso," diso.

### Pestuseeye Agilipa mapoo Polowo goo taka

<sup>13</sup> Beeame abo poogoloso hamamee Yu odoowo wiligi odoo taba Agilipaye omolo sobo holo, Benis sabolo Pestus mapoo emegeidi to takalame Kasalia mapoo sibadeeso. <sup>14</sup> Osoloso beeame bei diba Pestus sabolo omapoo debeiso. Osoloso omapoo osee doboome, Pestuseeye Polowo goo ee Agilipa mapoo oposususo. Yayo oposusulone egeesee takaso, "Odoo hee, Polo ee Peliksiye neliga moso mapoo toosoo osee badoso. <sup>15</sup> Esino a Yolusalem mapoo dileso peledoboome, Yu odoowo tei moso wiligi odoo tebisa sabolo, osoloso wiligi odoo tebisa abo sabolo, sibilesa amapoo Polowo goo egeesee taka, 'Polo ee tokenee odoo, esiga yo wooloome,' diso.

<sup>16</sup> Esino ayo dimapoo egeesee takaso, 'Loum odoo iyo odoo hee goo mauwe koo wooloomali. Esino iba Loum odoo oso goo meedili ee egeesi. Odoo hee ee goo meedi mapoo yimapoo goweli odoo oso o goo takoloso koodobuoga, nei odoo o goo eyo nediliyo takeliso. Osoloso hamamee goo meedili odoo oso yimapoo goo tokenee melee ogoga, yo wooloome, dee takeliso,' diso. <sup>17</sup> Esiga Yolusalem wiligi odoo tebisa abo abolo hodobo hamapoo ka simi. Beeame omapoo mo goo meedilei booloogoole. Esino a sibilesa, tialoso beeame hee mapoo goo meedili moso mapoo peleso badolone, Polo yo hamapoo ido sibeye, diso. <sup>18</sup> Ee ma kulodu ayo goolee, Polo yo tokenee goo toowa toobeele, diso. Esino Yu odoo oso gamenee dibada howo gisili tei goo sabolo, osoloso odoo hee Yesu, diayo olo taso deli, see Poloye odoo ee see gie badoso, dee taka goo omapoo toso agadigaloso o goo meedilame ido pala egeiso. <sup>20</sup> Esino a goo hagee medee gooleedelega badolone, Polo mapoo egeesee woosaso, 'No Yolusalem mapoo dileso nee goo meedilei soowayo?' diso. <sup>21</sup> Esino yo Yolusalem mapoo dilei goomegele. Esemme yo Sisaye o goo meedilame goomogaso. Esiga yo wulo epedee hamapoo badalaiso. Osoloso ayo beeame tekepo ogoga, yo Sisa mapoo o goo meedilame ido diye dalaiso," diso.

<sup>22</sup> Esemme Agilipaye Pestus mapoo egeesee takaso, "A odoo hagooso taka goo mawo duleiyasa," diso.

Esemme Pestuseeye yimapoo egeesee takaso, "No godigi yayo takooga duleiso," diso.

### Polo yo Agilipa dio Benis dio mapoo ido simi

<sup>23</sup> Osoloso beeame hee mapoo Agilipa dio, Benis dio, hu toowa too odoo masi, dugo medee tekepo kalagalo, goo meedili moso mapoo paladeeso. Diba goo meedili moso mapoo galaga dulone, ha teli odoowo wiligi odoo tebisa sabolo, osoloso Kasalia mi wiligi odoo tebisa sabolo galaga diso. Osoloso diba susuga goo meedili moso mapoo mooloogoodoloso doboome, Pestuseeye Polo ido sibe, diso. <sup>24</sup> Esemme Poloye goo meedili moso mapoo sibilesa tobudume, Pestuseeye egeesee takaso, "Wiligi odoo taba Agilipa nobolo, osoloso odoo susuga sabolo, odoo hagee ege!

Yu odoo hamapoo egee do sabolo, osoloso Yu odoo Yolusalem mapoo debeli sabolo, oso odoo hamapoo dia gowolone, amapoo to neligidi takolone, yo wooloomalai tekepo, dee takeliso. <sup>25</sup> Esino ayo yo teli mapoo magalai o goo tokenee hee mauwena. Esino yo eyo goomoga oso Sisaye o goo meedi diga, ayo yo Sisa mapoo ido di, diso. <sup>26</sup> Esino goo hamapoo ayo ibada wiligi odoo taba Sisa mapoo Polowo goo maga to hoguguloso tenelai to mauwe. Esiga ayo yo nibada howo woola mapoo ka ido simi. Esiga Agilipa nayo yimapoo wose. Egeeseega to yayo nei taka ee ayo hoguguloso Sisa mapoo ka tenelaiya. <sup>27</sup> Bei, neliga ma kulodu badeli odoo oso moodoo goo ee hogugule mosoowe sabolo Loum wiligi odoo taba Sisa mapoo diye dalai tekeponee," diso.

### Poloye wiligi odoo taba Agilipayo howo woola mapoo o goo taka

**26** Agilipaye Polo mapoo egeesee takaso, "Ayo epedee no nediliyo pidi to takalame namapoo beeame teneeso."

Esemme Poloye dee dokodoo poudoloso, to takalai bei mooloogoolone egeesee takaso, <sup>2</sup> "Wiligi taba Agilipa, a epei Yu odooso mo goo mapoo goo opusomo opusomo di taka mapoo nei ayo mawo a pidi to namapoo takalai goomogo. <sup>3</sup> Bei, no Yu odoo ibada adaga dia goo susuga sabolo, osoloso ima kulodu to agadigeli goo sabolo no gooleedooso. Esiga ayo namapoo howaso, mo to hagee takoo medee dui.

<sup>4</sup> "Egeesee ma kulodu, Yu odoo susuga oso ayo daga Yu odoo sabolo Yolusalem mapoo badebei goo ee, diba olo gooleedooso. <sup>5</sup> Esiga Yolusalem odoo susuga oso mo goo diba gooleedooso. Esiga diayo namapoo mo goo takalai dee takooga, diayo ayo Pelisi odoo toboloso badebei goo ee takalaiso. Egeesee mapoo Yu odoo ma kulodu Pelisi odoo oso Moseseeye eligi goo hogugu medee deedeeliso. <sup>6</sup> Esino Godeeye mawe dimapoo to takoloso magoo mapoo ayo tei teme, a epedee goo meedi mapoo ka badoso. <sup>7</sup> Osoloso ibada Yu odoo bala 12 susuga oso beeame susuga Godeeyo hu poudolone dobolone, diba to magoo hedebe ee bamoloso. Esiga mo wiligi odoo taba Agilipa, abolo epedee to magoo hedebe omapoo tei teme, Yu odoo oso a wooloomalame goomogoso. <sup>8</sup> Egeesee ma kulodu, Yu odoo niba bei kasee maga Godeeye wedia odoo ee see hogogabileiso dee taka goo mapoo tei telega ka pegiliyo?

<sup>9</sup> "Esiga a niyo egee gooloomolo egeesi masi goolone, ayo Yesu Nasalet odoo mapoo tei telaga odoo mapoo hegia toowa molone, ayo dimapoo dala tenelame goomogo meleeso. <sup>10</sup> Egeeseelone tei moso wiligi odoo tebisa oso amapoo kitulugu teneme, ayo Godee o odoo esialoso toloso neliga moso ma kulodu toseliso. Osoloso tei telaga odoo abo ee olo pilugume, ayo goo omapoo tekepo doloso, goomegeliso. <sup>11</sup> Osoloso a Yu odoowo howo gisili moso susuga mapoo silone, tei telaga odoo mapoo dala tenelone, ayo dimapoo toso pupulone, to tokenee takoloso

Yesuwo goo mapoo miligi pie, dee takeliso. Osoloso ayo dimapoo dia komonolone, mi abo mapoo dilesa, tei telaga odoo toloso dala teneliso.

<sup>12</sup>“Ayo egeeseemo silone, beeame heeso tei moso wiligi odoo tebisa oso amapoo kitulugu teneme, Damasko mi mapoo tei telaga odoo talame diso.

<sup>13</sup> Esino osoko oo domo taba mapoo a eli domopoo dimeleeno, kei ma dokodooga gadeebugu oso pouneme egeiso. Gadeebugu ee dia toowa, osokoso gadeebugu egeesinee. Esiga odoo abolo hodobo di gadeebugu oso tooso. <sup>14</sup> Osoloso iba susuga miyomoo misikedoobuloso tiesamolome, kei ma dokodooga ibada Hibulu toso amapoo egeesee takeme duso, ‘Solo, Solo, nayo bei kasee maga amapoo dala ka tene-malala? Esiga no medee goolee. Nayo egeeseemo siloga, no Godee sabolo ha taso. Esiga eyo nei no dala talaiso,’ diso.

<sup>15</sup>“Eseme ayo egeesee takaso, “Wiligi odoo, no ogumo?” diso.

Eseme Lodeeye amapoo nei egeesee taka, ‘A Yesuso. Nayo tei telaga odoo mapoo dala egee tenemolo, amapoo tenemoloso. <sup>16</sup> Esiga no teebee! Ayo namapoo sibilesa peledobooso. Bei, ayo no olo hesiaso, nayo mo tou teli odoo doloso badolone, ayo namapoo eligi sabolo, osoloso eligilei goo sabolo, odoo mapoo eligilame. <sup>17</sup> Esiga nayo Yu odoo sabolo, osoloso Yu dele poogoo odoo sabolo ma kulodu mo to takomo siloga, ayo no medee balaiso. Egeesee ma kulodu diayo no dala teneega, ayo no pidileiso. Esiga diayo tei goo ee gooleedoga, diayo neliga maga miligi pialoso, gadeebugu mapoo bidiga dabalame, osoloso Saiten oso gibadolone debei poogoloso, see Godee mapoo bidiga dabalame, ayo no dimapoo diye deeso. Egeeseega ayo dibada goo tokenee hapoloso boobado bigileiso. Egeeseega diayo amapoo tei too goo maga, Godeeye hesia odoo oso egee do sabolo hodobo dabalaiso,’ diso.

<sup>19</sup>“Eseme wiligi odoo taba Agilipa, mo howo opusomo doloso, kei ma dokodooga to taka duloso, to omapoo mesieso. <sup>20</sup> Osoloso ayo Damasko mapoo, osoloso Yolusalem mapoo, osoloso Yudiya mi toowa ma kulodu, osoloso Yu dele poogoo dia mi susuga mapoo, Godeeyo to egeesee takomo sileeso, ‘Nibada goo goolee su wuduloso, nibada goo tokenee maga miligi pialoso Godee mapoo sibadee! Osoloso niyo Godee mapoo sibadee goo ee eligilone, odoo susuga eyo howo woola tekepo goo ee tomo silesibe,’ dee takeliso. <sup>21</sup> Esiga ayo goo hagee tomo silime, Yu odoo oso ayo dibada tei moso ma kulodu badoboome, diayo a wooloomalame keliso. <sup>22</sup> Esino Godeeye pidi toowa maga, a see epedee nibada howo woola mapoo to-budulone, wiligi odoo tebisa nimapoo, osoloso odoo abo susuga nimapoo, Godeeyo to takolone ka badoso. Esino ayo taka to susuga ee Moses sabolo Godeeyo to tosili odoo sabolo oso Godeeye hudi magoo Keliso mapoo peledabalai goo taka sabolo hedebe. <sup>23</sup> Esiga to hagee eyo bei hagooso, Keliso dala toloso talaiso. Osoloso yayo daga malalo ta maga hogabuloso,

gadeebugu ee Yu odoo sabolo, osoloso Yu dele poogoo odoo sabolo mapoo tosibileiso,” diso.

<sup>24</sup> Esino Polo to osee takomolome, Pestuseeye to neligidi yimapoo egeesee takaso, “Polo, no boobadolone wulo halaboo! Nayo dia goolee oso no ka boobadoo,” diso.

<sup>25</sup> Eseme Poloye to nei Pestus mapoo egeesee takaso, “Wiligi odoo taba Pestus, a wulo koo halabooso. Bei, ayo to taka susuga hagee tei goo. Esiga goo eyo bei moloso. <sup>26</sup> Esiga wiligi odoo taba Agilipaye goo susuga hagee yo gooleedooso. Ayo goo susuga hagee yimapoo takooga, ayo to takalai koo obuso. Bei, goo susuga hagee mada moodoole. Haye! Odoo susuga eyo howo woola ka moodoo,” diso. <sup>27</sup> Eseme Poloye wiligi odoo taba Agilipa mapoo egeesee takaso, “Agilipa, no Godeeyo to tosili odoo susuga oso to hogugu mapoo tei telisomo? O, a gooleedoso, no tei teliso,” diso.

<sup>28</sup> Esino wiligi odoo taba Agilipaye egeesee takaso, “No beeame deiyepo hamapoo ayo Keliso mapoo tei talame amapoo to egeesi masi ka takamalala?” diso.

<sup>29</sup> Poloye to nei egeesee takaso, “A nayo tei talai beeame deiyepo o, beeame sage koo magooso. Esiga ayo nobolo osoloso epedee hamapoo mo to dulone hagee do odoo susuga oso Godeeyo to mapoo tei toloso ayo hagee bado egeesi masi badalame dokodoo ka takooso. Esino nibada dee mapoo ki ti oso tialagalaima,” diso.

<sup>30</sup> Eseme wiligi odoo taba Agilipa sabolo, osoloso Pestus sabolo, osoloso Benis sabolo, osoloso odoo susuga Polowo to dulone debei ee tebisaloso diadeeso. <sup>31</sup> Diayo diadolone dieso dimapoo egeesee takaso, “Odoo hagee goo tokenee hee tele. Esiga iyo yo neliga moso mapoo toosooloso wooloomalai tekeponee,” diso.

<sup>32</sup> Eseme Agilipaye Pestus mapoo egeesee takaso, “Iyo odoo hagee goo meedili maga diye dalai tekepo. Esino yo Sisaye o goo meedilei goomogaga, yo Sisa mapoo ido diye, dee takee,” diso.

### Poloye du maga Itali mi mapoo dilame bei mooloogoo

**27** Pestuseeye Polo Sisaye badebei mapoo ido dilame goomoga magoloso, yayo Loum ha teli gibadili odoo hee Yuliyes iso. Osoloso yimapoo egeesee takaso, “Polo sabolo, osoloso neliga moso ma kulodu debeli odoo abo sabolo, du maga Itali mi mapoo Sisaye badebei mapoo iyado di,” diso. Yuliyes hagee ha teli odoo mooloogoodoo hee, o hu Sisayo mooloogoodoo dee takeli eyo kulodu badeli. <sup>2</sup> Eseme iba Adalamatia odoo dia du toowa ee Kasalia mi maga see Asia mi ma kulodu mi opusomo opusomo di mapoo dilame molome egeiso. Eseme Yuliyeseeye iba du omapoo dalaga peegeena. Osoloso Makedonia mi ma kulodu Tesalonika mapoo badeli odoo hee, Alis-takus du omapoo ibolo hodobo bulumaloso, see Saidon mi mapoo dulone domopoo tiesaso.

<sup>3</sup> Osoloso beeame hee mapoo Saidon mi mapoo sibilesa peledabaso. Esino iba Saidon mi mapoo sibile-

so peledoboome, Yuliyeseeye Polo yo dia goolone yimapoo egeese takaso, "Nee odoo oso biso pidilame, no peegoo di," diso. <sup>4</sup> Osoloso iba see Mila mi mapoo dalo soowoolone, Saiples mi te koola mapoo poo toowa meneme abaga daso. Bei, abei toowa woola mapoo poo toowa oso sibulone, howo ki toowa siba. Esem e iba osee Saiples mi te maga gulugumo sibiles, Kilikia sabolo Pampilia sabolo daga diles, Lisia mi Mila mapoo sibiles peledabaso. <sup>6</sup> Iba omapoo diles doboome, ha teli gibadili odoo Yuliyeseeye Alesendilia odoo dia du toowa Itali mapoo dilame molome egeiso. Esem e yayo iba du omapoo dalaga peegeena. <sup>7</sup> Esem e iba du omapoo dalaga poogoloso, Nidus mi mapoo obeeamo dulone, beeame bei abei domopoo poogooso. Iba Nidus mi ee daga dime, poo toowa simi oso, howo ki toowa sibume, see Kiliti mi te mapoo dalo soowaso. Bei, omapoo poo toowa meneme. Osoloso iba Kiliti mi te su Salomone koola abaga obeeamo gulugumo dulone, Lasia mi koola mapoo du dali omapoo oluguso. Du dali eyo hu Du Oluguli Medee Tekepo deli.

<sup>9</sup> Iba du oluguli omapoo dobolone, egeese goolone debeiso, "Iba beeame toowa olo hosudooso. Osoloso Yu odoo oso nei teyuloso badeli beeame olo daga dileso badoso. Esino dugo beeame olo bei mooloogooso. Egeese ma kulodu iyo dugo beeame mapoo abei toowa maga dilei tekeponee. Bei, howo ki toowa oso sibulone, iba tokenee peya," diso. Esem Poloye odoo susuga mapoo egeese taka, <sup>10</sup> "Emegei, dugo beeame mapoo abei toowa maga duga, ibolo osoloso ibada bi sabolo, osoloso ibada du sabolo tokenee palai, a gooleedooso. Esiga iba hamapoo osee dabalai tekepo," diso. <sup>11</sup> Esino du wiligi taba sabolo osoloso duwo ama sabolo diba egeese salai goomegele. Esem e ha teli gibadili odoo oso Polowo to mapoo tei telaga poogoloso, odoo bakadio hageeyo to mapoo deedeeso. <sup>12</sup> Esem e odoo susuga oso egeese takaso, "Iba dugo beeame mapoo hamapoo dobolone du oluguloso dabalai du oluguli tokenee," diso. Egeeseelone diba saga Poiniks mi mapoo diles daga, dugo beeame ee koodobilame goomogaso. Kiliti mi te mapoo Poiniks hagee du oluguli tekepo hee oso. Bei, du oluguli omapoo poo toowa haga koo sibili.

#### Poo toowa sabolo howo ki toowa sabolo ma kulodu di

<sup>13</sup> Osoloso beeame heeso poo toowa koodobume, see poo pepooko oso abei toowa domo abaga pee maga sibilame bei mooloogooso. Esem e du toowa tosilesibili odoo oso egee ogoloso tekepo dolone, hegi biso du gidoloso howo kulomoo melee giligadoloso du ma kulodu maso. Osoloso iba Kiliti mi te mapoo soowooleso widi pee maga gulugumo diso. <sup>14</sup> Iba mi te widi pee maga obeeamo gulugumo dumolome, haga booloogelega mi te abaga poo toowa simi oso ibada du ee see abei toowa domopoo todiso. <sup>15</sup> Egeeseeme iba du balamelega, ibada du pooso todime, wulo balaga meleeso. <sup>16</sup> Esino pooso ibada du ee Kauda mi te mapoo poo toowa meneme hodiokooga tadi molome,

du tosilesibili odoo oso du toowa tokenee poga pidili du pepooko, du toowa eyo osio mapoo bagagoloso melee ee dia kitulugu sabolo toloso du toowa ma kulodu magooso. Osoloso howo ki oso sibileso ibada du mapoo woolone du toowa gadilega pagalame, diayo du ee tiso tialoogooso. Osoloso du tosilesibili odoo ee Libia mi hodio abaga dulone, howo soo mapoo du doguyaga dia ebigaso. Egeeseelone, diba pooso sibiles weli dugo du ma dokohodoo bagagoo ee du medee dilame miyomoo bagagooso. Esem e pooso ibada du ee abei domopoo wulo todimeleeso. <sup>18</sup> Osoloso beeame hee mapoo poo toowa oso see dia sibume, du tosilesibili odoo oso du popeeya dalame, bi abo du toowa ma kulodu melee toloso howomoo sooso. <sup>19</sup> Osoloso see beeame hee mapoo, bi abo egeesi masi du ma kulodu melee howomoo sooso. Pooso sibiles weli dugo sabolo, osoloso homo tialogoo sabolo, osoloso dugo bagagili ti sabolo, osoloso bi abo egeesi masi sabolo howomoo sooso. <sup>20</sup> Iba poo toowa oso simi ma kulodu, osoloso howo ki toowa simi ee ma kulodu beeame bei poogoomo dulone, osoko sabolo giwo sabolo egele. Egeese ma kulodu dulone, iba dabalai goole. Esino wulo wedilei gooleeso.

<sup>21</sup> Esino iba beeame bei ma kulodu nei nelega sibulone, Poloye toboloso imapoo egeese takaso, "Emegei, niba kasee maga mo to dulega Kiliti mi te poogoloso ka simiyo? Iba omapoo debei diepi, goo hageese imapoo sibile pegeliyo. <sup>22</sup> Esino niba goo hamapoo haga na ebi. Bei, odoo susuga nima kulodu odoo hee talaime. Esino hedebe ibada du ee tokenee palaiso. <sup>23</sup> Bei, mo Godee ayo o hu dokodoo poudili o momaiye oso amapoo sibeye dee takeme, eiyoo gesi amapoo sibiles egeese taka, <sup>24</sup> 'Polo, no haga na ebi, bei no wulo gamenee dile, wiligi odoo taba Sisayo mudugiyopoo nee goo meedilame duso. Esiga Godeeye nimapoo mesie maga nobolo hodobo egee du odoo sabolo, abei domo hamapoo wedileime,' diso. <sup>25</sup> Esiga odoo susuga, niba to hagee duloso na ebi. Bei, Godeeye o momaiye oso goo taka goo ee tei moodoolai doloso, a tei toso. <sup>26</sup> Esino iba omapoo dulone, mi te hee koola mapoo diles, yo mapoo godee bigileiso," diso.

<sup>27</sup> Iba Adiliyati abei domopoo silesibulone, beeame 14 poogoloso see gesi hee mapoo gesi domopoo du tosilesibili odoo oso goolee widi pee koolabelee, diso. <sup>28</sup> Egeeseelone diayo howo kasee boubeleso howo bou tebila ti toloso tebiaso. Osoloso egeino, howo bou ee tebia ibada bagi sabolo tebia 40 egeesi masi mala. Osoloso hoogoo pepooko diles, see tobu tebiaso. Osoloso egeino, howo bou ee tebia ibada bagi sabolo tebia 30 egeesi masi mala. Esem e diayo goolee widi pee olo koola tooboo, diso. <sup>29</sup> Esem e diba gesi dulone, du howo soo maga duga, yo mapoo godee bigiyaga dia ebigaso. Egeeseelone du dilega omapoo malame, diayo hegi bi bakadio bakadio di du osio mapoo bagagoloso howomoo toosooso. Osoloso gesi amapoo dobolone, du tosilesibili odoo oso saga mi beeama beleso ee bolone debeiso. <sup>30</sup> Egeeseelone

dobolone, diayo du toowa maga mada kukolo dilame, du toowa tokenee poga pidili du pepooko ee howomoo ti sabolo gisibasoloso olugu molone imapoo egeesee taka, "Iba du wiligi maga hegi bi abo howomoo toosoowagona," diso. <sup>31</sup> Esino Poloye ha teli gihadili odoo sabolo, o odoo sabolo mapoo egeesee takaso, "Du tosilesibili odoo oso kukulo duga, iba susuga wedileiso," diso. <sup>32</sup> Esemee ha teli odoo oso du toowa tokenee poga pidili du pepooko ee ti koo poogoome, pooso todiso.

<sup>33</sup> Osoloso olo mi beeamalai koola tooboome, Poloye diba nei nalame howolone odoo susuga mapoo egeesee takaso, "Niba beeamee 14 ma kulodu ebia sabolo sibulone nei medee nele. <sup>34</sup> Esiga niba wedilega pagalame, epedee hamapoo nei medee ne. Osoloso niba goolee, nima kulodu odoo hee dala talaime," diso. <sup>35</sup> Osoloso Poloye to hagee takoloso, wo tolosa goomoga to Godee mapoo takoloso, odoo susuga eyo howo woola mapoo wo po doloso neso. <sup>36</sup> Esemee Poloye nei namelee ogoloso, odoo susuga oso yibolo nei nalame goomogaso. <sup>37</sup> Diba nei ne koodobuloso, du popeeya dalame, nei abo susuga howomoo togobisaso. Esiga iba 276 odoo oso du ee ma kulodu debeiso.

### Duso dileso yo mapoo godee buguloso gagabugu goo

<sup>39</sup> Osoloso gesi mi beeamome egeino, du tosilesibili odoo oso widi pee egeiso. Osoloso diayo widi pee ee medee ogoloso gooleede. Esino omapoo dileso du olugumo, diso. Bei, diayo widi pee ee du olugulei tekepo goolee. <sup>40</sup> Egeeseelone, diba widi pee mapoo dilame hegi bi du ma bagagisaloso melee, ee howomoo kookoo sooso. Osoloso du osio mali suda masi howomoo wusuloso, pooso du todilame, du wiligi mapoo dugo bagagoloso meli hee poudoloso bagagooso. Osoloso iyo widi pee egei mapoo diso. <sup>41</sup> Esino iba widi pee mapoo dulone, du wiligi oso dileso howo soo mapoo dougaso. Esemee howo ki oso sibilesi, du osio mapoo woome, du gagabuguso.

<sup>42</sup> Egeesee ma kulodu ha teli odoo oso neliga ma kulodu debeli odoo ee howo tabuloso kukulo diyaga, dia gooleeso. Egeeseeyaga neliga ma kulodu debeli odoo ee diayo du ma kulodu wooloomalame goomogaso.

<sup>43</sup> Esino ha teli gihadili odoo Yuliyes yo Polo wooloomalai goomegele. Esiga yayo ha teli odoo dimapoo egeesee takaso, "Niyo neliga ma kulodu debeli odoo ee na wooloome," diso. Esemee yayo egeesee takaso, "Niba howo tabili gooleedoo daga, niba widi pee mapoo howo tigebie!" <sup>44</sup> Osoloso odoo howo koo tabili daga, niba du gagabugu mapoo tolosa deeso widi pee mapoo sumo di," diso. Egeesee see maga odoo susuga medee tigebuloso widi pee mapoo daboogoloso gie badeli tooso.

### Poloye Malata mi te mapoo sibilesi peledaba

**28** Osoloso iba howo tigamo dileso, mi te mapoo dalaga poogoloso dobolone duno, mi te eyo hu

Malatagona. <sup>2</sup> Iba omapoo sibilesi peledoboome, mi te mapoo debeli odoo oso iba medee pida. Esiga beeamee omapoo howo toowa simi oso kekepie melee, mi te mapoo debeli odoo oso iyo dou halame, dou toowa tooloso ka daba. <sup>3</sup> Osoloso Polo nosee dou kaka tosibilesi, dou toomeleeno, hebise sa masi dou ma mapoo kulodu tiamelee ee dia dei moodoome, dou kaka ma ma kuloduga gasibilesi Polo dee mapoo pasoo. <sup>4</sup> Esemee mi te mapoo debeli odoo oso Polo hebiseso dee mapoo poloso sooloogoosoo melee ogoloso diba diesono egeesee takaso, "Odoos hagee odoo wooloomali odoo osobe. Bei, yo abei domopooga simi oso yo tele. Esiga epedee nei dala teneli godee oso Polowo goo tokenee maga nei ka teneeso. Esiga hebiseso yo dee mapoo ka pana," diso. <sup>5</sup> Esino Polo hebiseso o dee mapoo pome, o dee keesee heyadigebuguno hebise dou mapoo toodooso. Ee ma kulodu goo hee yimapoo peledebe. <sup>6</sup> Esino mi te mapoo debeli odoo oso egeesee goolone debeiso, "Polowo dee papoloso, miyomoo homodobuloso talaiso," dee gooleeso. Esino beeamee sage ma kulodu goo heeso Polo mapoo peledebe. Esemee mi te mapoo debeli odoo oso goo hagee ogoloso, Polo yo godee hee molodoo, dee takaso.

<sup>7</sup> Osoloso ee ma kulodu iyo dou halaga melee mi maga Malata mi te mapoo debeli odoowo wiligi odoo taba, Pubiliyeseeyo mi haga hoogoonee. Esiga yayo iba ogoloso, o moso mapoo ido dileso, beeamee bakadio hedebe di omapoo doboome, yayo iba medee pidiso. <sup>8</sup> Moso ee ma kulodu Pubiliyeseeyo ama kolo dei sabolo osoloso su paiye sabolo tiameleeso. Esemee Poloye yayo tiamelee mapoo gadilesi, dokodoo takoloso, o deeso yimapoo sigime, paiye weidooso. <sup>9</sup> Hamamee odoo paigiga mi te mapoo debeli odoo oso goo hagee duloso sibademe, Poloye diba tekepo moodoo demeeleeso. <sup>10</sup> Egeesee ma kulodu iyo mi omapoo doboome, mi te mapoo debeli odoo oso imapoo hu toowa tenelone emegeidi bi teneemeleeso. Osoloso a bakadio hedebe di omapoo dobosoo, see dilame doboome, mi te mapoo debeli odoo oso iyo eli domo dulone nalai, nei sabolo osoloso bi abo sabolo imapoo tosibadeeso.

### Poloye Loum mi mapoo dileso peledaba

Osoloso iba Alesendilia odoo dia du toowa dugo beeamee mapoo Malata mi te mapoo melee mapoo dabagaso. Du ee tosilesibili odoo oso dedebayo gameenee godee masi bakadio moodooloso du wiligi mapoo tugusa molome egeiso. <sup>12</sup> Iba du amaga dileso Silakusa mi mapoo du oluguloso, beeamee bakadio hedebe di omapoo debeiso. <sup>13</sup> Osoloso see abaga Legiyome mi mapoo dalo soowaso. Omapoo tialoso beeamee hee mapoo poo iyo simi hamamee abaga sibilame bei mooloogooso. Esemee pooso ibada du saga todilame pupu buguso. Osoloso beeamee heeso Putiyoli mi mapoo dileso peledabaso. <sup>14</sup> Iba dileso Putiyoli mapoo du oluguloso, tei telaga odoo abo egeiso. Esemee diayo iba beeamee 7 dibolo debeeyena.

Osoloso omapoo doboso see mili Loum mapoo diso.

<sup>15</sup> Osoloso tei telaga odoo Loum mapoo debeli oso iba sibogodi duloso, eli domopoo iba tugodalame simina. Ee ma kulodu odoo abo sibilesi, iba Apiyus Polum mi mapoo tugodooso. Osoloso aboso mi hee, o hu Odo Soowo Moso Bakadio Hedebe deli mapoo sibilesi tugodooso. Eeme Poloye diba ogoloso dia goomogolone, Godee mapoo goomoga toowa poudooso. <sup>16</sup> Eeme iba Loum mi mapoo sibilesi pele-doboome, ha teli gibadili odoo oso Polo mapoo egeesee takaso, "No neliga moso mapoo dileime. Esino no wulo moso hee mapoo badoga, ha teli odoo hedebe oso no ka gibadalaigona," diso.

<sup>17</sup> Osoloso beame bakadio hedebe di poogoloso hamamee, Poloye Yu odoowo wiligi odoo tebisa Loum mi ee ma kulodu debeli susuga yimapoo sibilame to teneeso. Diba olo sibilesi doboome, Poloye dimapoo egeesee takaso, "Emegei, ayo goo tokenee hee Yu odoo mapoo moodoole. Osoloso ibada adaga dia tei hee gababile. Esino Yolusalem mapoo Yu odooso a goo mauwe toloso Loum odoo mapoo teneeso. <sup>18</sup> Osoloso nei diayo amapoo woosali to bei woosano, amapoo goo tokenee hee egele. Esiga diayo a teli mapoo magalai goomegele. Esino diayo a neliga moso maga peegoo tamagalame goomogaso. <sup>19</sup> Esino Yu odoo oso a neliga moso maga peegoo tamagalai teke-ponnee, dee takeme, ayo mo goo Sisaye meedilei a goomogo, dee takaso. Esino ayo mo odoo, Yu odoo mapoo gigidilei goo mauwe. <sup>20</sup> Esiga ayo goo hagee nibolo medee to meilame ka gilimadoo. Osoloso a epedee ki tiso tialogoloso moloso. Bei, ayo Isalael odoo oso dulone egee bamolo, odoo yimapoo tei too goo maga," diso.

<sup>21</sup> Eeme wiligi odoo tebisa oso Polo mapoo nei egeesee takaso, "Iyo Yudiya maga nee goo maga to hogugu teneme tele. Osoloso Yu odoo abo amaga sibadee oso nee goo maga tokenee goo taka, iba dule. <sup>22</sup> Esino goo nayo egee eligimo silo imapoo takalai goomogo. Bei, mi susuga eyo kulodu, edebeeyo Yesuwo goo eligili goweli," diso.

<sup>23</sup> Osoloso Polo sabolo Yu odoo sabolo beame hedebe magooso, diayo see tobu Polobolo Yesuwo goo maga to kalame. Osoloso diayo beame hedebe

magoo mapoo Yu odoo susuga Yesuwo goo maga to kalame Polo mapoo sibadeeso. Eeme Poloye gesikolo bei mooloogoloso abaga dino habe mapoo Godeeye wiligi doloso badeli eyo goo ee eligilone, Moseseeye eligi goo sabolo, osoloso Godeeyo to tosili odoo oso to hogugu maga Yesuwo goo eligiso, diayo Yesu mapoo tei talame. <sup>24</sup> Eeme odoo abo oso Polowo to duloso tei tooso. Esino odoo abo tei tele. <sup>25</sup> Egeesee ma kulo-du diesono abo puloso toso agadigaso. Osoloso diba dilame doboome, Poloye tei tele poogoo odoo mapoo to hedebe hagee takaso, "Dio Tei oso tei goo Godeeyo to tosili odoo Aisaya maga nibada amawe dio mapoo egeesee takaso,

<sup>26</sup> 'Nayo dilesi odoo hagee bia dimapoo egeesee takee,

"Niyo medee hodu dilesi to taka duleiso.

Esino goo eyo bei niyo medee gooleedalame.

Osoloso niyo medee hodu dilesi agalaiso, esino goo eyo bei niyo ogoloso gooleedalame."

<sup>27</sup> Bei, diba goo eyo bei gooleedalai koo goomogo.

Osoloso diba dulu tabagado, osoloso howo gisiga diga.

Esino diayo ogoloso, osoloso duloso goo goolee teke-po toloso, amapoo wedi simi diepi,

ayo dibada tokenee hapoloso boobado bigiliyo,' diso.

<sup>28</sup> Esiga niba medee goolee, Godeeye gie badeli hedebe Yu odoo mapoo tenele. Hagee, yayo Yu dele poogoo odoo sabolo mapoo teneeso. Esiga diayo goomoga sabolo Godeeyo to medee duleiso," diso.

<sup>29</sup> [Osoloso Yu odooso Polowo to duloso, dibada mooloogoodoo ma kulodu disono toso dia agadigamo diso.] <sup>†30</sup> Osoloso Polo dugo bakadio ee ma kulodu moso nei molee magoloso tieli mapoo badoboome, odoo abo yo agalame simi, yayo o mosopoo goomoga sabolo ido palaso. <sup>31</sup> Osoloso yayo dimapoo Godeeye wiligi doloso badeli goo ee eligilone, Lodee Yesu Kelisowo goo takalai ebile. Osoloso ee ma kulodu odoo heeso yimapoo hamaga takele.

---

† To hagee odoo aboso taka, Lukaye hogugu, deliso. Esino odoo aboso taka, Lukaye hogugule, odoo heeso hamamee hoguguna, dee takeli.

# 1 Tesalonika

## 1 Tesalonika booka goo eyo bei

Polo Kolin mi mapoo badolone, Tesalonika odoo dimapoo to hagee hoguguso. Polo daga Tesalonika mapoo di beeame mapoo edebeeeyo o to duloso tei tooso. Esino Yu odooso goo hagee ogoloso Polo habuguso (Diye di odoo 17:1-10 omaga egeesee ka takooso). Esiga Poloye tei telaga odoo hagee bia diya gooleebugulone, koko-do takeli to hagee hoguguloso dimapoo teneeso, diayo dala ma kulodu dobolone, Godee mapoo tei toloso medee kibiya dabalame. Osoloso tei telaga odoo susuga oso Yesu siboga beeame mapoo yayo badalai mi mapoo palai goo ee gooleedoloso dabalame diayo hoguguloso teneeso.

**1** To hogugu hagee Polo, Sailesi, osoloso Timoti iyo Tesalonika mi ma kulodu debeli tei telaga odoo nimapoo ka teneeso. Niba Ma Godee sabolo, osoloso Lodee Yesu Keliso sabolo hedebe doloso doso. Esiga iyo Godee mapoo takooso, yayo niba sooloo dolone pidilame osoloso mesie sabolo dabalame.

### Tesalonika odoo oso tei too

<sup>2</sup>Iyo beeame susuga niba halo dokodoo takolone, nibada goo maga Godee mapoo goomegeliso.

<sup>3</sup>Egeesee maga iyo niba Godee mapoo takolone goo hagee gooleebigiliso. Niyo tei too maga tou too sabolo, osoloso odoo abo sooloo dologa pidili sabolo, osoloso edebeeeyo nimapoo dala tenee ee ma kulodu dobolone, Lodee Yesu Kelisoye see sibileiso doloso, bolone tei toloso doso.

<sup>4</sup>Tei telaga odoo, emegei, iba gooleedooso, Godeeye niba sooloo dolone, niba o odoo dalame hesigaso.

<sup>5</sup>Bei, iyo to tekepo nimapoo tosimi ee wulo todee mosoowe tosilileso ka takele. Esino iyo Dio Tei oso kitulugu maga ka taka. Osoloso iba to tekepo hagee kibiya tei toloso nimapoo eligiso. Osoloso iyo niba pidilame nibolo debei ee niba gooleedooso. <sup>6</sup>Osoloso niyo ibada goo sabolo, osoloso Lodeeyo goo ee peedeeso. Egeesee maga niyo to hagee duloso toloso, dala ee ma kulodu doboome, Dio Tei oso goomoga sabolo to hagee tooso. <sup>7</sup>Esiga tei telaga odoo susuga Makedoniya mapoo debeli sabolo, osoloso Akaya mapoo debeli oso nibada goo duloso padalai tekepo.

<sup>8</sup>Esiga Godeeye nimaga eligi goo ee hedebe Makedoniya sabolo Akaya sabolo mapoo dudobigile. Haye, niyo tei too goo ee mi susuga mapoo olo dudobuguso. Esiga nibada goo ee iyo mi abo mapoo see tobu takomo dilei ee goo haga toowanee. <sup>9</sup>Bei, mi susuga ee ma kulodu edebeeeyo iyo nibada mosopoo siboga, niyo to tekepo too ee takeliso. Egeeseelone, diayo niyo gamenee godee poogoloso see tei gie badeli Godee mapoo sibileso, o to mapoo mesimo sili goo ee takeliso. <sup>10</sup>Osoloso diayo Godeeyo owoloye ta maga Godeeye hogadi oso Kei mi ma dokodooga sibileiso doloso

niyo egee bamolo goo ee takeliso. Odoo ee Yesu. Godeeye meedilei beeame mapoo, yayo komonolone tokenee eyo nei dala tenelai beeame mapoo, Yesuye tei telaga odoo iba susuga peegoo gilimado dileiso.

### Poloye Tesalonika mi mapoo tou too

**2** Tei telaga odoo, emegei, iyo nibolo hodobo dobolone, beeame wulo mosoowe hosule. <sup>2</sup>Esiga niba gooleedooso, iyo daga nimapoo sibilame, Pilipai mi mapoo doboome, edebeeeyo imapoo to tokenee takolone, dala tenee goo ee. Esino ee ma kulodu ibada Godeeye iba pidime, edebeeeyo iba gowe ee ma kulodu iba ebilega, Godeeyo to tekepo nimapoo takaso. <sup>3</sup>Bei, iyo eligi goo ee gamenee goonee, osoloso tokenee gweli goo maga koo eligiso. Esiga iyo nimapoo gameene takalaime. <sup>4</sup>Esino iyo Godeeyo to tekepo ee eligimo silesiboso. Bei, Godeeye iba tebia doloso hesigaloso o to tekepo takomo silesibe, diso. Esiga iyo tou hagee tomo silo odoo goomogalame sile. Haye! Godee ibada sooloo ma kulodu egeli yo goomogalame ka siloso. <sup>5</sup>Osoloso niba nose gooleedooso, niyo imapoo sibilame wulo gamenee toso hedebe. Osoloso iba nei molee talame to tekepo ka takele. Godeeye goo hagee tei diso. <sup>6</sup>Egeesee maga nibolo osoloso odoo susuga oso imapoo goomogalame koo seli. Esino Kelisoye diye di odoo iyo toowa doloso niba balame, imapoo kitulugu meleeso. <sup>7</sup>Esino iyo egeesee sele. Bei, iyo niba holope masi oweeye owolo dio bali egeesi masi bameleeso. <sup>8</sup>Esiga iyo niba diya sooloo dolone goomoga sabolo hedebe Godeeyo to tekepo nimapoo ka tosilile. Haye. Ibada gie badeli sabolo nimapoo tenelame ka simi. Bei, niba iyo gooma odoo. <sup>9</sup>Tei telaga odoo, emegei, nibolo dobolone iyo nali bi sabolo, osoloso iyo goomoga bi abo sabolo tebilame, iyo ibada suso gesi sabolo beeame sabolo tou toowa tomo silee, niba gooleedooso. Goo egeesee maga, iyo Godeeyo to takomo silesibulone, nimapoo hegi goo teneeyaga, bi koo howali.

<sup>10</sup>O, iyo tei telaga nibolo dobolone, iyo tokenee goo hee tele. Esino iyo nibolo hodobo medee teedee



dobolone, Godeeye o howo woola goo tekepo deli goo ee iyo tomo silesibiliso. Esiga goo hagee niba olo gooleedooso. Osoloso Godee nosee goo hamapoo tei diso. <sup>11</sup> Esiga niba gooleedooso, maye owolo bameli egeesi masi, niba iyo egeesi bameleeso. <sup>12</sup> Iyo niba Godeeyo howo woola kibiya dabalame, eli opusomo opusomo di maga nimapoo pidili to takaso. Bei, Godeeye niba imoloso, niyo Godeeye wiligi doloso badeli mapoo gadilesa dobolone, yo toowa doloso yibolo hodobo dabalame.

<sup>13</sup> Osoloso iba see Godee mapoo goomoga to takooso. Bei, niyo iyo Godeeyo to taka duloso dobolone, to hagee edebeeyo eyo gooleeso takooso, dee takele. Esino niyo to hagee tei Godee maga siboso doloso medee tooso. Esiga Godeeye o to hagee sabolo tei telaga odoo nima kulodu tou tomoloso. <sup>14</sup> Esiga niba gooleedooso, Yu odooso Yudiya mi mapoo Yesu Keliso mapoo tei telaga odoo dimapoo dala tenemelee goo ee. Egeesee maga, goo egeesee oso nimapoo peledabaso. Goo ee nibada odoo oso nimapoo dala teneliso. <sup>15</sup> Yu odoo oso daga hoogoo Godee maga to toloso kokodo takomo sili odoo piluguso, osoloso diayo Yesu Keliso woolomaso. Osoloso iyo Godeeyo to mi abo mapoo takomo silesibume, diayo iba peegoo hasisobigiliso. Esiga Godeeye Yu odoo dimapoo koo goomegeli. Osoloso diayo odoo susuga mapoo gowe toowa moloso. <sup>16</sup> Egeeseelone, diayo Yu dele poogoo odoo dimapoo iyo to tekepo todilesa takeme, Yu dele poogoo odoo oso gie badeli teyaga, diayo imapoo hamaga takalame seeso. Goo hageesee maga, dia tokenee susuga oso dieso dimapoo kadadigamo pologa, Godeeye komonolone dala toowa hoo poogoo mauwe dimapoo tenelaiso.

### Poloye see Tesalonika mi mapoo dilame goomoga

<sup>17</sup> Esiga tei telaga odoo emegei, edebeeyo iba nibada mi maga hasisobugume, iyo beeame deiyepo mapoo niba poogoo dilesa dobolone, niba boobado bigile. Esino iyo niba see agalame diya goomogolone, nimapoo sibilame wegeegeeso. <sup>18</sup> Esiga iyo niba agala sibilame goomegeliso. O, tei taka, Polo ayo niba agalame sibilame wegeegeliso. Esino Saitenso iba hamaga takeliso. <sup>19</sup> Iyo niba agala sibilame goomegeliso. Bei, ibada Lodee Yesu see wedi siboga, ogoo goo oso imapoo goomoga ka tenelaiyo? Osoloso ogoo goo oso iyo o howo woola ebilega kibiya ka dabalaiyo? Ee nibaso. Niyo tei too oso iyo tou tekepo too ee woola yiligebigileiso. <sup>20</sup> Bei, Godeeye nibada goo maga imapoo goomoga tenelaiso.

**3** Esiga iyo niba agalame sibilei beeame dagadime, see gowolone, wulo Timoti nimapoo diye dolone, iba Atene mi mapoo debeiso. Ibada omolo Timoti hagee ibolo tou tomo silone, Godeeyo to tekepo Kelisowo goo ee takomo sili odoo oso. Esiga iyo yo nimapoo diye diso, yayo niyo tei too ma kulodu kibiya dabalame kokodo takalame. <sup>3</sup> Bei, dala hagee ma kulodu odoo heeso tei too peegeeyaga. Osoloso niba gooleedooso, tei teli goo ee ma kulodu dala sabolo

moloso. <sup>4</sup> Esiga iba nibolo hodobo dobolone, dala goo oso sibilei nimapoo olo takaso. Esiga dala goo oso epedee imapoo peledaba, niba gooleedooso. <sup>5</sup> Goo egeesee maga, ayo niyo tei too goo ee dulega badalai, a goweso. Egeeseelone, ayo Timoti nimapoo diye diso. Bei, ayo niba halo goo diya kodumeleeso, niba Saitenso gamenee taka mapoo homodobuoga, oso iyo niba halo tou too goo ee wulo mosoowe hosudeeyaga.

<sup>6</sup> Esino Timotiye epedee nibolo badoboso, see wedi sibileso, yayo nibada goo imapoo takeme du medee tekepo. Bei, yayo niyo tei too goo sabolo, emegei sooloo deli goo sabolo tolone egee do goo ee yayo sibileso imapoo takaso. Osoloso yayo imapoo niyo iba goolone dobolone, iba agala sibilame goomoga goo ee takaso. Egeesee ma kulodu nei iyo niba agala sibilame diya gooleeso. <sup>7</sup> Esiga tei telaga odoo emegei, iyo dala goo sabolo hegi goo sabolo ma kulodu dobolone, niyo tei too goo ee Timotiye imapoo sibileso takeme du oso iba pidiso. <sup>8</sup> Bei, iyo niyo Lodee mapoo tei toloso kibiya debei goo ee duloso diya goomogolone ka doso. <sup>9</sup> Goo egeesee maga, iyo niba gooleebugulone, goomoga to Godee mapoo taka hoo poogoo mauwe moloso. Bei, iba Godeeyo mudugiyopoo dobolone, nibada goo oso imapoo goomoga toowa teneso. <sup>10</sup> Osoloso gesi sabolo beeame sabolo, niba see agalai ee gooleebugulone, Godee mapoo takolone ka doso. Egeesee ma kulodu, niyo tei too goo ma kulodu, goo heeso tebilega mologa, iyo sibileso goo ee tebilame pidileiso.

<sup>11</sup> Esiga iyo dokodoo takooso, ibada Ama Godee sabolo osoloso ibada Lodee Yesu sabolo oso iyo nimapoo sibilei eli medee hoodo magalame. <sup>12</sup> Osoloso iyo see dokodoo takooso, Lodeeye nima kulodu sooloo dala goo egee molo kibilame. Osoloso iyo niba diya sooloo egee dolomolo egeesi masi, see niyo nima kulodu osoloso odoo susuga ma kulodu emegei sooloo dala goo sabolo dabalame. <sup>13</sup> Osoloso iba see dokodoo takooso, ibada Lodee Yesuye yayo hesiga odoo sabolo sibilei beeame mapoo, niyo tei too ma kulodu kibiya dobolone, ibada Ama Godeeyo mudugiyopaga, tekepo doloso tokenee goo mauwe odoo doloso dabalame.

### Godeeyo mudugiyopaga tekepo doloso badalai goo

**4** Tei telaga odoo emegei, tekepo doloso badalai goo maga Godee mapoo goomoga tenelai goo ee iyo nimapoo olo eligiso. Esiga a gooleedooso, niba egeesee goo ma kulodu ka doso. Esino tekepo goo nima kulodu egee molo oso toowa dalame, epedee ayo Lodee Yesuwo hu maga nimapoo ka taka. <sup>2</sup> Iyo Yesu Kelisoye kitulugu maga nimapoo eligi goo ee, niba olo gooleedooso. <sup>3</sup> Bei, Godee yo goomogoso, niyo o howo woola tokenee mauwe teedee dabalame. Esiga niba giso sabolo sobo sabolo heli telega tei doloso teedee debbee. <sup>4</sup> Esiga niba odoo susuga eyo howo woola tekepo doloso, osoloso goo tokenee mauwe doloso dabalame, nibada su kookoode. <sup>5</sup> Osoloso nibada su oso goo heli talame goomoga goo ee

dodolone na debee. Bei, Godee gooleedele poogoo odoo oso goo hageesi teliso. <sup>6</sup> Goo egeesee maga, nemegei tei too odoo eyo osobo heli toloso yimapoo hegi goo na tenee. Bei, Lodeeye goo tokenee hageesi teli odoo mapoo tokenee eyo nei dala tenelaiso. Iyo daga hoogoo nimapoo kitulugu takolone goo egeesi na te diso. <sup>7</sup> Bei, Godeeye ibolo osoloso nibolo hesiga ee iyo goo tokenee ma kulodu dabalame ka sele. Esino iyo Godeeyo howo woola mapoo goo tokenee mauwe doloso kibiya dabalame, yayo iba hesigasaso. <sup>8</sup> Esiga edebeeyo to hagee dadalai gowooga, yo odoo to mapoo gowolone koo seeso. Esino yayo Godeeye nimapoo Dio Tei egee tenemolo o to mapoo gowooso. <sup>9</sup> Esiga niba sooloo dala ma kulodu dobolone, tei telaga odoo oso emegei nei pidi, nei pidi dalai goo ee, niba gooleedooso. Bei, Godeeye sooloo dala goo ee nimapoo olo eligiso. Esiga iyo goo hamapoo see nimapoo hogugulei ee goo haga toowanee. <sup>10</sup> Emegei, niyo Makedoniya mi mapoo debeli tei telaga odoo mapoo sooloo dolone dobolone egee pidimolo, iba gooleedooso. Esiga iyo niba goo egeesee ma kulodu dobolone, goo oso diya toowa dalame kitulugu sabolo ka taka.

<sup>11</sup> Esiga niba nemegei sabolo medee mesie debee. Osoloso niba nibada su ee pidilei maga tou tolone dobolone, emegei dia goo na takee. Bei, iyo goo hagee daga nimapoo olo eligiso. <sup>12</sup> Niyo goo egeesee tomo siloga, peegoo debeli odoo oso nibada goo ogoloso tekepo dalaiso. Osoloso niso nediliyo pidilame nee odoo mapoo na be.

### Yesuye sibilei eyo goo

<sup>13</sup> Emegei tei telaga odoo, niyo odoo wedia eyo goo gooleedelega badalai, iba koo goomogo. Peegoo debeli odoo oso odoo wedia halo gooholone diya puspigeliso. Bei, diba odoo wedia oso see hogogadilei goo ee diba gooleedele. Esino peegoo debeli odoo diayo odoo wedia halo diya goohele sabolo debeli egeesi masi na debee. <sup>14</sup> Bei, iba Yesuye ta maga see hogadi goo mapoo tei teliso. Esiga iba see tei toso, Yesuye see wedi siboga, Godeeye tei telaga odoo wedia ee Yesubolo sibe dalaiso. <sup>15</sup> Osoloso Lodee eyo taka to ee iyo nimapoo ka taka, goo ee Lodeeye sibilei beeame omapoo, odoo wedia osee mologa, iba wedilega gie hagee do odoo oso saga malalo Yesu mapoo palaima. <sup>16</sup> Esino Lodee eyo Kei mi ma dokodooga sibulone, to kitulugu sabolo, osoloso Godeeyo mo-maiye dia wiligi odoo eyo to sabolo, osoloso Godeeyo kibu i sabolo sibileiso. Egeeseega Keliso mapoo tei toloso odoo wedia oso daga malalo hogogadileiso. <sup>17</sup> Diba olo pologa, iba wedilega epedee hagee do odoo sabolo, osoloso odoo wedia hogogadi sabolo, hodobo mooloogoodoloso, kei ma dokodoo Lodee tudogalame palaiso. Osoloso iba Lodee sabolo bado-boso kookaiyo osee badalaiso. <sup>18</sup> Esiga niba nemegei nima kulodu egee do odoo oso odoo wedia maga diya goolee sabolo debeeyaga, kibilame to hagee dimapoo takee.

### Yesuye sibilei goo mapoo mopoodoo de

<sup>5</sup> Tei telaga odoo emegei, iyo goo hageesi oso peledabalai beeame ee nimapoo see tobu hogugulei goo haga toowanee. <sup>2</sup> Bei, niba olo gooleedooso, Lodeeye see wedi siboga, heli teli odoo oso gesi sibili egeesi masi sibileiso. <sup>3</sup> Beeame omapoo odoo abo oso egeesee takalaiso, "Epee! Beeame diya tekepo. Imapoo goo hee mauwe, goomoga goo oso moloso," dalaiso. Egeesee takaga mologa, haga booloogelega dala goo oso dimapoo siboga tokenee palaiso. Esiga niba goolee, sobo koowasi oso yayo holope soomagalame, dala oso yimapoo sibili yo gooleedoloso badoga koo peledebelee. Esiga goo hagee egeesi masi. Esiga odoo abo oso beeame ee gooleedoloso badoga ka sibileime. Esiga beeame omapoo odoo heeso peegoo pulo dilei tebileime. <sup>4</sup> Esino tei telaga odoo emegei, niba neliga ma kulodu koo debeli. Osoloso niba heli teli odoo oso nibada mosopoo siboga, niba dio diliso. Esino Lodeeyo beeame oso siboga, niba dio dileime. Bei, niba beeame oso sibilei mapoo mopoodoo doloso bolone doso. <sup>5</sup> Esiga niba beeame gadeebugu mapoo kulodu silesibili odoo oso. Esiga iba tei telaga odoo gesi neliga ma kulodu koo debeli. <sup>6</sup> Esiga iba tieseli odoo oso debeli masi na dobomo. Esino iba mopoodoo doloso ibada su oso tokenee teyaga kookoodoloso bolone ka dobomo. <sup>7</sup> Bei, tieseli odoo oso gesi tieseliso. Osoloso yugune nalagaloso halabagali odoo oso gesi yugune nalagaliso. <sup>8</sup> Esino iba beeame gadeebugu ma kulodu debeli odoo oso. Esiga iba tekepo, mopoodoo doloso dobolone, ibada su oso tokenee teyaga kookoodoloso bolone dobomo. Esiga ha teli odoo oso o su tioso woodeyaga gooloogalame, ki bi o su mapoo kaliso. Esiga iba egeesi masi Saiten oso gamenee taka mapoo homodobiyaga, iba Yesu mapoo tei tolone dobolone, emegei sooloo dolone dobomo. Osoloso ha teli odoo oso o wiligi mapoo tioso woodeyaga gooloogalame, ki bi wiligi mapoo meliso. Esiga iba egeesi masi Saiten oso gamenee taka mapoo homodobiyaga, iba gie badeli talame tei tolone dobomo. <sup>9</sup> Bei, Godeeye iba hesiga hagee, yayo komonolone dala tenelame ka hesigele. Esino ibada Lodee Yesu Keliso maga gie badeli talame ka hesiga. <sup>10</sup> Esiga Kelisoye iba halo olo taso, iyo yibolo hodobo dabalame. Esiga iyo dobosowedioga, goo oso iyo Keliso sabolo badalai goo ee opusomo dalaime. <sup>11</sup> Esiga niba nee odoo oso tei too ma kulodu kibiya dabalame, pidili toso nei takoo, nei takoo dolone ka debee. Esino a gooleedooso, niba egeeselone doso.

### To hamameedee kokodo taka

<sup>12</sup> Tei telaga odoo emegei, iyo nimapoo taka, nibada soosee wiligi odoo tebisa sabolo, osoloso Godeeyo to eligili odoo sabolo mapoo mesiloso dimapoo goomoga tenee. Bei, diayo nima kulodu tou toowa diya tolone doso. <sup>13</sup> Esiga diayo tou too maga niyo diba

sooloo dolone, dimapoo mesie. Egeeseelone nemegei odoo sabolo medee mesiloso debee.

<sup>14</sup> Osoloso nima kulodu tou talai mapoo wabedeli odoo oso tou talame toso diya takee. Osoloso odoo howo woola tou talai simili odoo mapoo pidi to oso pidilone debee. Osoloso koo kibili odoo pidilone debee. Osoloso niba nemegei odoo sabolo mesiloso dobolone, saga kamanabugu dolone na debee.

<sup>15</sup> Egeeseelone dobolone, edebeeyo nimapoo tokenee goo hee toga, nei na tenee. Esino niba nima kulodu osoloso odoo susuga ma kulodu mesie sabolo tekepo goo ono tolone ka debee.

<sup>16</sup> Beeame susuga ma kulodu goomogolone debee.

<sup>17</sup> Egeeseelone dobolone beeame susuga dokodoo takolone debee. <sup>18</sup> Osoloso goo susuga ma kulodu Godee mapoo goomoga to takolone debee. Bei, Godeeye Kelisowo odoo oso goo hageesi talai ee goomogoso.

<sup>19</sup> Esiga niba Dio Tei oso nimapoo tou talai na hama-ga takee. <sup>20</sup> Egeeseelone, Godee maga to tolosa koko-do takomo sili odoo oso Godeeye taka duloso to

takooga omapoo na gowee. <sup>21</sup> Esino to mapoo medee dui, osoloso medee goolee, goo egee tei Godee maga simi beleso agalame. Goo egee tei goo daga, to mapoo tei te. <sup>22</sup> Osoloso tokenee goo telega debee.

<sup>23</sup> Esiga iyo dokodoo takooso, mesie goo teneli Godee yayo medee todoloso badalai goo ee nimapoo tenelame. Osoloso iba see dokodoo takooso, ibada Lodee Yesu Keliso oso sibilei beeame mapoo bamo du-lone, nibada dio maga, osoloso nibada su maga, osoloso niyo goolee maga tokenee mauwe poogoloso dabalame. <sup>24</sup> Esiga Godeeye nimapoo goo hagee moodoolaiso. Bei, niba hesiga Godee yayo to taka ee dadalai koo pegeli.

<sup>25</sup> Tei telaga odoo emegei, niyo iba dokodoo takolone debee. <sup>26</sup> Osoloso nemegei tei telaga odoo mapoo emegei di to takolone ka debee. <sup>27</sup> Ayo Lodeeyo hu maga niyo to hogugu hagee tei telaga odoo susuga mapoo hesigalame ka taka. <sup>28</sup> Esiga ayo dokodoo takooso, ibada Lodee Yesu Kelisoye niba sooloo dolone pidilame.

## 2 Tesalonika

### 2 Tesalonika booka goo eyo bei

Polo dio Timoti dio diayo to daga malalo hogugu ee (1 Tesalonika) Tesalonika sosee mapoo teneeso. Osoloso see hamamee a 6 poogoloso to hagee hoguguso. Bei, Tesalonika sosee ma kulodu debeli tei telaga odoo abo oso dibada tou susuga ee poogoloso see wulo dobolone Yesuye sibilei goo ee bolone debeiso. Esem Poloye goo egee ogoloso see tobu dimapoo kokodo taka to hagee hoguguloso teneeso. Osoloso odoo abo oso Yesuye sibilei goo mapoo dooboo goolone bolone doboome, Poloye Yesuye sibilei goo ee see medee dimapoo eligiso.

**1** To hogugu hagee Polo, Sailesi, osoloso Timoti, iyo Tesalonika mi ma kulodu debeli tei telaga odoo nimapoo ka teneeso. Niba Ma Godee sabolo, osoloso Lodee Yesu Keliso sabolo hedebe doloso doso. <sup>2</sup> Esiga iyo dokodoo takooso, Ma Godee sabolo osoloso Lodee Yesu Kelisoye niba sooloo dolone pidilame osoloso mesie sabolo dabalame.

#### Kelisoye see sibilei goo

<sup>3</sup> Tei telaga odoo emegei, niyo tei too goo sabolo nemegei sooloo deli goo sabolo oso nima kulodu egee kauwu maga, iyo Godee mapoo goomoga to takalai tekepo. <sup>4</sup> Esiga niba dala goo sabolo hegi goo sabolo ee ma kulodu tei tolone dobolone kibiloso osee egee do maga, iyo goomoga sabolo Godeeyo sosee abo mapoo debeli tei telaga odoo mapoo nibada goo takomo silesibiliso.

<sup>5</sup> Niyo tei too maga dala egee to goo oso, Godeeye odoo susuga dia goo medee tekepo meedilei goo ee woola ka eligiso. Goo egeesee maga Godeeye niba yayo wiligi doloso badeli mapoo gasibilei tebia dalaiso. Egeesee maga Godeeye wiligi doloso badeli goo maga niyo dala ka toso. <sup>6</sup> Esiga Godeeye hedebe hooda tei goo moodeliso. Esiga Yesuye see wedi siboga, odoo nimapoo dala egee tenemolo dimapoo Godeeye nei dala tenelaiso. Osoloso odoo dala ma kulodu egee do nimapoo hasali tekepo tenelaiso. Osoloso ibolosee hasali tekepo tenelaiso. Lodee Yesuye see wedi siboga, o momaiye kitulugu susuga sabolo Kei mi ma dokodooga dou paiya sabolo sibileiso. <sup>8</sup> Osoloso yayo sibilesi, Godeeyo goo mapoo goweli odoo sabolo, osoloso to tekepo Kelisowo goo mapoo koo mesili odoo dimapoo nei dala tenelaiso. <sup>9</sup> Omapoo Lodeeye diba tokenee poloso togobigileiso, osoloso o mudugiyopaga yayo diba toloso o kitulugu toowa maga peegoo togobisaga, diayo dala omapoo dobolone dala hoo poogoo me poogoloso osee dabalaiso. <sup>10</sup> Osoloso yayo sibilei beeame omapoo, o odoo oso yimapoo goomoga tenelone Yesuwo hu dokodoo poudileiso. Bei, Yesu yayo daga diba pidi maga. Osoloso tei telaga odoo susuga oso Yesu mapoo howodalaiso. Esiga ee ma

kulodu nibolo hodobo dabalaiso. Bei, niyo to tekepo iyo nimapoo takeme, niyo tei too maga.

<sup>11</sup> Iba goo hamapoo niba halo, Godee mapoo beeame susuga dokodoo takolone doso, niyo yayo goomoga goo ee tolone dabalame. Bei, niyo goo egeesi ee tolone dabalame, Godeeye niba hesigasoo. Osoloso iba see dokodoo takooso, nimapoo goo goolee tekepo egee molo toloso, Godeeye kitulugu maga nibada suso tou talame. Osoloso see niyo tei too ma kuloduga egee kauwu tou ee medee talame. <sup>12</sup> Esiga iyo dokodoo hagee takoo goo ee, edebeeyo nibada goo tekepo ogoloso ibada Lodee Yesuwo hu dokodoo poudilame ka seeso. Osoloso Lodee Yesuye nei nibada hu dokodoo poudulone goomoga tenelame. Esiga ibada Godee osoloso Lodee Yesu Kelisoye sooloo dolone pidi maga goo hagee ka siboso.

#### Tei magoo mapoo koo mesili odoo

**2** Tei telaga odoo emegei, ibada Lodee Yesu Kelisoye sibilei goo sabolo osoloso yayo iba gilimadoloso hodobo yo tugodalai goo sabolo nimapoo takalai iba goomogo. <sup>2</sup> Esiga odoo aboso sibilesi takolone, "Lodeeyo beeame olo simiso," dee takooga duloso, dio dulone sooloo habasagolone, dia to mapoo tei na te. Osoloso diayo takolone, "Dio Tei oso imapoo goo hagee ka eligiso," dee takooga dia to mapoo tei na te. Osoloso see diayo takolone, "Polo diayo imapoo to hogugu tenelone egeesee taka," dee takooga goo onosee omapoo tei na te. <sup>3</sup> Esiga goo hageesee susuga ee ma kulodu odoo heeso niba gamenee na takee dee. Bei, Lodeeyo beeame oso sibilei mologa, daga goo bakadio oso peledabalaiso. Esiga odoo aboso Lodee gowolone yimapoo miligi pileiso. Osoloso tei magoo mapoo koo mesili odoo oso peledabalaiso. Esino hamamee yo dou ma toodalaiso. <sup>4</sup> Yayo o su eyo nediliyo si howolone, edebeeyo goomegeli godee susuga ee tokenee dolone, hedebe yo tekepo doloso si howolaiso. Egeesee lone, yayo dileso Godeeyo tei moso mapoo badolone anosee tei Godee dalaiso.

<sup>5</sup> Esino ayo nibolo silone, goo susuga hagee nimapoo takomo silee goo ee, niyo boobado bugusomo? <sup>6</sup> Esiga epedee hamapoo tei magoo mapoo koo mesili odoosoo sibileso goo tokenee teyaga hamaga taka goo ee niba olo gooleedooso. Yo tei o beeame Godeeye magoo mapoo woola ka peledabalame yo hamaga takaso. <sup>7</sup> Esino tei magoo mapoo koo mesili goo oso mada odoosoo ma kulodu olo goo moodoo moloso. Esino goo egeesee oso toowa peyaga, goo tokenee teyaga hamaga takeli odoosoo oso hamaga takoloso badoso. Osoloso hamamee goo tokenee teyaga hamaga takeli odoosoo ee peegoo duga, tei magoo mapoo koo mesili odoosoo ee beeame omapoo peledabalaiso. Esino Lodee Yesuye sibileso, o maga maga poodi sabolo osoloso yayo toowa doloso kitulugu sabolo oso tei magoo mapoo koo mesili odoosoo ee wooloomaloso pagalaiso.

<sup>9</sup> Esiga tei magoo mapoo koo mesili odoosoo oso siboga, yo Saiteno kitulugu sabolo sibileiso. Osoloso yayo Saiteno kitulugu maga goo toowa opusomo di moodoomo sileiso. <sup>10</sup> Yayo egeeseemo silone, goo tokenee opusomo opusomo di maga peegoo debeli odoosoo ee gamenee goo maga diba talaiso. Osoloso diba ee ma kulodu dobolone wedileiso. Bei, diba gie badeli to mapoo gowolone tei tele. <sup>11</sup> Goo egeesee maga Godeeye goo tiadili goo toowa dimapoo tenelaiso, diayo tei magoo mapoo koo mesili odoosoo oso gamenee goo taka mapoo tei talame. <sup>12</sup> Esiga edebeeyo tei goo mapoo tei telega poogoloso, see tokenee goo goomegeli odoosoo ee Godeeye dibada goo meediloso dimapoo tokenee eyo nei dala tenelaiso.

### Kibiya debee

<sup>13</sup> Tei telaga odoosoo emegei, Lodeeye sooloo dala oso nibolo hodobo moloso. Osoloso iyo niba halo Godee mapoo goomoga to takalai tekepo. Bei, Godeeye daga hoogoo niyo gie badeli talame niba olo hesigasoo. Esiga niyo Dio Tei oso kitulugu maga goo tokenee mauwe dobolone, niyo tei goo mapoo tei too maga Godeeye nimapoo gie badeli olo teneeso. <sup>14</sup> Godeeye iyo to tekepo hagee takomo silo maga niyo gie badeli talame niba iso, osoloso Yesu Keliso yo toowa dolone niba yibolo hodobo dabalame. <sup>15</sup> Esiga tei telaga odoosoo emegei, iyo nimapoo eligi goo sabolo osoloso to hoguguloso tenee sabolo medee kibiya tolosoo tei too ma kulodu kibiya debee.

<sup>16</sup> Esiga iba dokodoo takooso, ibada Lodee Yesu Keliso sabolo osoloso Ma Godee sabolo oso niba pidilone nimapoo kitulugu tenelaiso, niyo goo tekepo tomo silone to tekepo komo silame. Bei, ibada Ama Godeeye iba sooloo dolone imapoo kookaiyo moloso osee malai pidili goo ee teneeso, iyo goomoga sabolo gie badeli yayo tenelai ee bolone dabalame.

### Niyo iba dokodoo takee

**3** Tei telaga odoosoo emegei, Lodeeyo goo oso mi susuga mapoo saga dudobigilame, niyo iba

dokodoo takee. Bei, iba goomogoso, Godeeyo to mapoo niyo tei tolosoo mesie egee do egeesi masi odoosoo mi susuga mapoo egee do diba nosee egeesee dabalame. <sup>2</sup> Egeesee ma kulodu tokenee odoosoo oso imapoo dala teneeyaga, Godeeye pidilame iba dokodoo takee. Bei, odoosoo susuga oso Godee mapoo haga tei tele. <sup>3</sup> Esino Godee eyo to kitulugu magoo ee dadalai koo pegeli. Esiga yayo niba kitulugu teneloso niba medee balaiso, tokenee odoosoo Saiten yayo nimapoo dala teneeyaga. <sup>4</sup> Esiga iba Lodee mapoo tei toso, niyo iyo taka goo ee tomoloso, osoloso hamamee osee tomalaiso. <sup>5</sup> Esiga iyo niba dokodoo takooso, Lodeeye pidi maga Godeeye sooloo dala goo ee medee gooleedoloso dabalame. Osoloso dala ma kulodu kibiya dobolone Yesuye dala ma kuloduga kibiya badebei egeesi masi dabalame.

### Kitulugu sabolo tou ka te

<sup>6</sup> Tei telaga odoosoo emegei, iyo Yesu Kelisowo hu maga nimapoo diya ka taka. Tei telaga odoosoo aboso iyo eligi to ee dedelega pegeli sabolo osoloso tou talai wabedeli odoosoo dimaga peegoo dooboobigi. <sup>7</sup> Bei, iyo debei goo ee niba olo gooleedooso. Esiga niba nosee egeesee dabalai tekepo. Bei, iyo nibolo hodobo debei ee ma kulodu iba wabodo buguloso debele. <sup>8</sup> Osoloso iba odoosoo heeyo nei nali bi iyo wulayo koo nali. Haye, iba nei molee teneloso nei ka nali. Osoloso beeame sabolo gesi sabolo ibada su oso tou toowa teliso, iyo nei nali bi talai eyo nei magalai ee talame. Iyo egeesee seega nimapoo hegi goo tenelega pagalame. <sup>9</sup> Iyo egeeseemo silone, niyo iba pidi doloso takalai kitulugu meleeno goo ee woola yiligebigile. Esino iyo nibolo hodobo dobolone, iba tou toowa teliso, niyo ibada goo ee padalame. <sup>10</sup> Osoloso iyo nibolo hodobo silee beeame mapoo, iyo nimapoo eligi goo ee hagooso. Odoosoo hee tou talai wabada daga, yimapoo nei nali bi na tenee.

<sup>11</sup> Osoloso iyo nima kulodu odoosoo aboso tou talai goweli goo ee taka iba duso. Egeeseelone diba tou telaga wulo mosoowe domo silesibulone odoosoo heeyo goo ee takomo silesiboso. <sup>12</sup> Iyo odoosoo egeesi mapoo Yesu Kelisowo hu maga ka taka, diayo goo egee poogoloso nei nali bi talai eyo nei magalai ee talame tou tolone dabalame. <sup>13</sup> Esino tei telaga odoosoo emegei, niyo goo tekepo talai mapoo na wabede.

<sup>14</sup> Goo egeesee ma kulodu odoosoo heeso iyo to hoguguloso tenee hamapoo mesilega poogooga, niyo o goo odoosoo woola yiligebigi. Osoloso yibolo hedebe dee na see. Egeeseega yayo goo hagee ogoloso similone wabedelega badalame. <sup>15</sup> Esino ee ma kulodu yo ha teli odoosoo dee na see. Wulo yimapoo toso kokodo takee. Bei, yayo nibolo hodobo tei too ma kulodu badoso.

### Poloye emegei di to hamameedee taka

<sup>16</sup> Esiga ayo dokodoo takooso, goo susuga ee ma kulodu mesili teneli Lodeeye beeame susuga nimapoo

mesili goo tenelame, osoloso Lodeeye nibolo hodobo badalame.

<sup>17</sup> A Polo, ayo hamapoo mo deeso emegei di to hagee ka hoguga. To ayo hogugu goo ee hagooso.

Niyo hamapoo medee hoodo ogoloso to hogugu susuga ee ayo hogugudoo dalame. Esiga ayo egeesee hoguguliso. <sup>18</sup> Esiga ayo dokodoo takooso, ibada Lodee Yesu Kelisoye niba sooloo dolone pidilame.

## 2 Timoti

### 2 Timoti booka goo eyo bei

To hogugu hagee Poloye neliga moso tegei ma kulodu badolone, Timoti mapoo see hoguguloso teneeso. Bei, edebeeyo yo wooloomalai biame olo koola toobooso doloso gooleeso. Esiga Timotiye tei too ma kulodu kiboloso badalame, Poloye kokodo taka to hagee hoguguloso yimapoo teneeso. Bei, Timotiye Polowo goo tekepo ee padalai, yo goomogaso.

<sup>1</sup> A Polo, Yesu Kelisoye diye di odoo. Osoloso Godeeye goomoga maga a hesialoso diye di tou ee amapoo teneeso, ayo o to odoo mapoo eligimo siloga, edebeeyo to ee duloso tei talame. Osoloso Yesu Keliso mapoo tei too goo maga diayo badoboso kookaiyo gie badeli talame. <sup>2</sup> To hogugu hagee mawo diya gooma holo Timoti namapoo ka tonowa.

Ayo Godee mapoo taka, Ma Godeeye, osoloso ibada Lodee Yesu Kelisoye, no sooloo dolone pidilame, osoloso mesie goo namapoo tenelame.

#### Poloye Timoti mapoo kokodo taka

<sup>3</sup> Timoti, ayo no goolone Godee mapoo goomoga to takeliso. Osoloso biame susuga sabolo, osoloso gesi susuga ayo no halo Godee mapoo takeliso. Osoloso mo awe diayo Godee mapoo tei tolosa sibadee egeesi masi anosee Godee hedebe omapoo tei tooso. Egeeseelone Godeeyo howo woola tokenee mauwe egee bado goo ee a gooleedoloso, ayo o tou ka tomoloso. <sup>4</sup> Osoloso iyo hodobo dobosoo ayo no poogoo dime, nayo a goolone pisa ee ayo koo boobado buguso. Esiga amapoo goomoga toowa malame, no ayo see agalai, a diya goomogo. <sup>5</sup> Nayo Yesu Keliso mapoo tei tolosa kibiya egee bado, a gooleedoo. Esiga nayo tei too goo egeesi masi ee daga nee eiye Lois mapoo meleeso. Osoloso see noowee Yunike mapoo meleeso. Esiga a tei toso, tei too goo egeesi oso epedee hamapoo namapoo moloso. <sup>6</sup> Goo egeesi maga ayo namapoo ka taka. Bei, ayo daga nee wiligi mapoo deeso tolosa Godee mapoo takeme, Dio Tei oso namapoo tou talame kitulugu teneeso. Esiga tou egee pailame dou masi tooee. <sup>7</sup> Bei, Godeeye imapoo Dio Tei tenee egee iba ebilame ka tenele. Esino yayo imapoo Dio Tei tenee oso imapoo kitulugu sabolo, sooloo deli goo sabolo, osoloso goo tokenee teyaga ibada su kookodeli goo ee tenee.

<sup>8</sup> Esiga ibada Lodee Yesu Kelisowo goo ee, nayo odoo mapoo takalai na simiye. Osoloso Kelisowo goo takomo silee maga, ayo neliga moso ma kulodu hagee bado goo omaga no na simiye. Esino nayo mo tou su tolone, Godeeye namapoo tou tenee ee dala ma kulduga kitulugu sabolo osee tomo di. Bei, Godeeye

namapoo kitulugu ka tenemologa. <sup>9</sup> Godeeye ibada gie badeli pidiso, osoloso yayo iba o odoo doloso gilimadooso. Iyo goo tekepo tolone doboome ka sele. Haye, Godeeye bi susuga moodelega badolone, eyo goomoga goo ee dodolone iba ka gilimadoo. Osoloso Yesu Kelisoye iba halo goo moodolai goo maga, Godeeye iba sooloo dolone pidilame goomoga magooso. <sup>10</sup> Osoloso ibada gie badeli pidili Yesu Kelisoye egee sibo goo oso Godeeye sooloo dolone pidili goo ee see woola yilige buguso. Osoloso teli oso kitulugu ee me pagalame, yayo olo dabaso. Osoloso badoboso kookaiyo gie badeli goo ee to tekepo maga, yayo woola yilige buguso. <sup>11</sup> Godeeye a hudi magooso, ayo diye di tou talame, osoloso ayo odoo mapoo to tekepo hagee takalame, osoloso Kelisowo goo ee o odoo mapoo eligilame. <sup>12</sup> Esiga ayo tou hagee tolone, dala goo ma kuloduga similega badolone tou ka tomoloso. Bei, ayo tei tolosa hagee dodomo du odoo ee, a gooleedooso. Odoo ee Yesu. Esiga a gooleedooso, to tekepo yayo amapoo taka ee, eyo medee osee bamo dimeleso, yo see wedi sibileiso.

<sup>13</sup> Esiga tei goo ayo namapoo eligime nayo du ee odoo mapoo eligi. Osoloso no Yesu Keliso sabolo hedebe doloso badeliga, tei too ma kulodu osee badebee, osoloso emegei sooloo dolone ka badebee. <sup>14</sup> Osoloso ima kulodu badeli Dio Tei oso pidili maga, Godeeye namapoo Yesuwo goo maga to tekepo tenee ee medee be, edebeeyo to egee see opusumo diyaga.

<sup>15</sup> Osoloso no see gooleedooso, tei telaga odoo Asiya mi mapoo debeli susuga oso a poogoloso diyademe, Pigelos dio osoloso Helemogenes dio onosee a poogoloso diyadeeso.

<sup>16</sup> Osoloso Onesipoloseeye Loum mi mapoo sibileso a agalame diya esiamo sileeso. Osoloso a neliga moso ma kulodu ki tiso tialogoloso badebei ogoloso, yayo similega a pidimeleso. Esiga ayo Godee mapoo ka taka, Lodeeye Onesipolos sabolo osoloso o moso kulodu debeli odoo ee sooloo dalame. <sup>18</sup> Osoloso Godeeye goo midilei biame mapoo o goo medee sooloo dala sabolo midilame. Esiga ayo Epeses mi mapoo bado-boome, yayo a medee pidimelee goo ee Timoti, no olo gooleedooso.

### Keliso halo ha teli odoo masi kitulugu sabolo badebee

**2** Mo holo emegei, Yesu Kelisoye sooloo dolone pidili goo oso namapoo kitulugu teneeye dee.  
<sup>2</sup> Osoloso ayo odoo howo woola namapoo eligi goo ee, odoo no medee tei deli mapoo nayo eligi, diayo see odoo abo mapoo eligilame. <sup>3</sup> Esiga Yesu Keliso halo ha teli odoo tekepo masi dala ma kulodu tou tomo silei na gowee. <sup>4</sup> Bei, no ege, ha teli odoo tekepo oso o wili-gi odoo ee goomogalame, hedebe yayo o to mapoo mesimo siliso. Egeeseelone yayo tou hee peegoo koo teli. <sup>5</sup> Osoloso no ege, hoguli odoo oso hogua ma kulo-du, odoo abo dagadilame, yayo tei magoo susuga medee dedelega poogooga, yo hogua eyo nei talaime. <sup>6</sup> Osoloso no see ege, nei howo segeli odoo tou toowa too oso, o nei howo segei oso bi moodoogaloso melee ogoloso daga malalo eyo talai tekepo. <sup>7</sup> Esiga to ayo hagee hogugu ee nayo medee gooleede. Bei, to ayo hogugu hageeyo bei ee nayo medee gooleedalame, Lodeeye namapoo goo goolee tekepo tenelaiso.  
<sup>8</sup> Deibidiyo amawe Yesu Keliso ta maga hogadi goo ee, nayo osee gooloomo sile. To tekepo hagee ayo takomo siloso. <sup>9</sup> Esiga ayo to tekepo hagee takomo sileeme, odoo aboso a mesiya masi toloso ki tiso tialoogoloso neliga moso ma kulodu hususo. Esino Godeeyo to tekepo hagee tiso tialoogoloso koo moloso. <sup>10</sup> Goo egeesi maga ayo Godeeye hesia odoo ee halo dala ma kulodu tou osee ka tomoloso, diayo Yesu Keliso mapoo tei toloso dia gie badeli pidilame, osoloso yibolo kookaiyo badoboso medee tekepo badalame.  
<sup>11</sup> Esiga tei goodee ee hagoso.  
 Iba Keliso sabolo taga, iba see yibolo hodobo gie dabalaiso.  
<sup>12</sup> Osoloso iyo dala ma kulodu medee kibiya doga, goo ogoso iba wiligi odoo doloso hamamee yibolo hodobo mipoo hagee gidabalaiso. Osoloso odoo howo woola iyo o goo gagadiga, nei odoo howo woola yinosee ibada goo gagadileiso.  
<sup>13</sup> Esino iyo tei too ma kulodu badolone yo boobado buguga, nei yayo iba boobado bigileime. Bei, yo eyo to edidi magoo ee gababuloso see opusomo dalai koo tebili.

### Yesuwo tou teli odoo tekepo

<sup>14</sup> Esiga to ayo namapoo hoguguloso hagee tenee ee nayo tei telaga odoo mapoo medee eligimelee. Osoloso diayo goo pepooko maga toso egee agadigamolo, Godeeyo howo woola dimapoo takee. Bei, goo egeesi oso odoo hee koo pidili. Esino to ee dulone egee do ono wulo tokenee peliso. <sup>15</sup> Timoti, tou nayo too ee Godeeye ogoloso goomogalame, osoloso nee tou too oso namapoo simili goo tenelega pagalame, nee tou medee kitulugu sabolo te. Osoloso nayo Godeeyo to odoo mapoo eligilone, dooboo dagadilega medee tei goo ono ka eligimelee. <sup>16</sup> Esino goo Godeeye goweli sabolo, osoloso goo mauwe opusumoso

silesibili odoo omaga, no peegoo di. Bei, goo egeesi oso odoo Godee maga peegoo gilimado diliso.  
<sup>17</sup> Egeesi opususu goo oso agagisa masi toowa poloso odoo su naliso. Humenayos dio Piletus dio oso goo egeesi oposusumo silesibiliso. <sup>18</sup> Odoo hagee biaso tei eligi goo maga peegoo diyadeeso. Osoloso diayo takolone, odoo wedia maga see hogogabili goo ee olo peledabaso, doloso takomo silesibume, odoo aboso goo ee duloso dibada tei too olo tokenee paso.  
<sup>19</sup> Esino Godee mapoo tei telaga odoo ee kibiya osee doso. Diba omou mi neligi doloso segei egeesi masi moloso. Omou omapoo Godeeye to hogugu hagoso ka moloso, "Godeeye o odoo dee ee gooleedeliso," diso. Osoloso to hee hogugu ee egeesi moloso, "Ede-beeyo takolone, 'A Godee dedeliso,' dee takooga, yo goo tokenee maga peegoo di," diso.

<sup>20</sup> Esiga bi bei odoowo moso kulodu peleta opusomo opusomo di moloso. Peleta abo yo gold deli oso moodoo. Osoloso abo yo siliba deli oso moodoo. Wo toowa nali biame mapoo peleta omapoo wo magoloso naliso. Osoloso peleta abo ee bogoso moodoo. Osoloso abo homososo moodoo. Biame susuga peleta omapoo wo magoloso naliso. <sup>21</sup> Esiga to hageeyo bei ee egeesi moloso: tei telaga odoo dia goo tokenee susuga ayo hogugu mapoo miligi pialoso doga, Godeeye diba toloso goo toowa mapoo maligileiso. Bei, Godeeye odoo egeesi masi ee o dalame peegoo pi magalaiso. Esiga yayo o wiligi odoo eyo tou ee medee tekepo talame mopoodoo doloso badalaiso.

<sup>22</sup> Esiga holaiso gie kakauwa oso goo tokenee talai diya goomegeli goo maga no peegoo dilesio badebee. Osoloso Godeeyo howo woola tekepo badolone, tei too goo sabolo, osoloso emegei sooloo deli goo sabolo, osoloso odoo abo sabolo mesie badalame kitulugi. Egeesi ma kulodu Godeeyo howo woola goo tokenee mauwe dobolone, Godeeyo hu dokodoo poudili odoo diba nosee egeesee dabalai tekepo. <sup>23</sup> Osoloso goo bei mauwe sabolo, osoloso to dooboo takeli goo maga toso agadigeli odoo omaga, no peegoo dooboobigi. Bei, no gooleedooso, goo egeesi oso biligeli goo ee tosibiliso. <sup>24</sup> Esiga Lodeeyo tou teli odoo oso toso agadigilone na badebee. Esino yayo odoo susuga sabolo medee mesiloso badolone, saga kamanabugu dolone na badebee. Osoloso yo eligili odoo tekepo doloso badebee. <sup>25</sup> Osoloso yayo eligiga goweli odoo mapoo, nei yayo dimapoo mesie sabolo kokodo takolone badebee. Bei, Saitenso yayo goomoga goo tomo silesibilame diba gilimadooso. Esino eligili odoo tekepo oso dimapoo mesie sabolo tei goo medee eligiga, goo oso Godeeye pidi maga dibada goo goolee su wuduloso, tei goo eligi ee toloso Saiteneeyo goo ee pagalai malaiso.

### Biame hamameedee eyo goo

**3** Goo hagono medee gooleede. Bei, biame hamameedee mapoo dala goo sabolo, osoloso hegi sabolo oso sibileiso. <sup>2</sup> Bei, biame omapoo ede-beeyo o odoo goolega, wulo dia su ono diya goolone



dabalaiso. Osoloso diayo molee diya goomogalaiso. Osoloso diayo odoo abo pepooko dolone, diba dieso nediliyo si howalaiso. Osoloso diayo odoo abo dia goo maga to tokenee takalaiso. Osoloso diayo dibada ama dio sabolo, osoloso owee dio dia to mapoo mesilone dabalaiso. Osoloso diayo emegei dimaga bi toloso eyo nei dimapoo goomoga to takalaiso. Osoloso diayo emegei sooloo delega dabalaiso. Osoloso diayo odoo heeyo goo tokenee boobado bigili goo ee malaime. Osoloso diayo emegei dia goo maga gamenee takolone dabalaiso. Osoloso diayo goo tokenee talai mapoo dia su kookoodalaimo. Osoloso diayo emegei goolega dobolone, dala tenemalaiso. Osoloso diayo goo tekepo ee diya gowolone dabalaiso. <sup>4</sup> Osoloso diayo emegei dala talame tiasalaiso. Osoloso diayo gooso hamamee peledabalai omapoo kibiya goolega, dieso goolee goo ono tomo sileiso. Osoloso dieso nediliyo goolee diba odoo toowa, dee goalaiso. Osoloso diayo dia su oso goomoga goo ono tomo silesibulone, diayo nei Godee goolega dabalaiso. <sup>5</sup> Odoo egeesi oso gamenee tei too odoo masi badolone, diayo nei Godeeyo kitulugu mapoo tei telega dabalaiso. Esiga goo tokenee ayo hogugu ee tomo sili odoo omaga peegoo doobobigi.

<sup>6</sup> Bei, odoo hageesi oso silesibulone, emegei dia moso tagaga ma kulodu galaga peleso, sobo goo medee koo gweli ee kukulo egeleso, sobo ogoso goo diayo eligi ee dadalame. Sobo hageesi masi oso biame susuga goo dia eligi dulame goomegeliso. Esino diayo tei goodee gooleedalai ee koo tebili. Bei, dia goo tokenee sabolo, osoloso dia suso goomoga goo oso dimapoo kadadigamo palaga. <sup>8</sup> Esiga daga hoogoo, Yanes dio Yambeles † dio Moses mapoo wegigasoo. Esiga goo hedebe egeesi maga gamenee goo eligili odoo epedee hamapoo egee do oso Kelisowo goo maga tei goo eligi mapoo wegigamoloso. Bei, dia goo goolee olo tokenee poloso, tei too goo ee me poogoome. <sup>9</sup> Esino diayo goo tomo sili oso biame sagalaimo. Bei, dia goo tokenee ee odoo susuga eyo howo woola yilige bigileiso. Goo hedebe egeesi onosee Yanes dio Yambeles dio mapoo peledabaso.

### No mo goo peedee

<sup>10</sup> Esiga Timoti, no ayo eligi goo sabolo, osoloso ayo badeli goo sabolo, osoloso ayo talame goomegeli goo sabolo, osoloso ayo tei too goo sabolo, osoloso ayo mesie sabolo sooloo deli sabolo badebei goo ee, no olo gooleedooso. Osoloso Antiyoka mi mapoo, osoloso Ikoniyum mi mapoo, osoloso Listala mi mapoo edebeeyo amapoo hegi goo sabolo, osoloso dala teneme, ee ma kulodu ayo kibiloso badebei goo ee, no

† YANES DIO YAMBELES DIO - Odoo hagee bia googooso moodeli odoo, diba Isipi mi mapoo debeli. Moses dio Isipi odoo dia wiligi odoo taba dia howo woola diayo goo toowa opusomo di gamenee moodooso. Egeesi ma kulodu diayo kitulugu oso Moseseeye kitulugu Godee maga too sabolo teiba, ee Isipi wiligi odoo mapoo eligilame, diba goomogaso. (Oposusu hagee Eksedes 7:11-22 mapoo moloso.)

olo duso. A dala susuga ee ma kulodu osee badebeiso. Esino dala susuga ee ma kuloduga, Lodeeye a idoloso peegoo diso. <sup>12</sup> O. Tei takoo, odoo agayo Yesu Keliso sabolo hedebe doloso, Godeeye goomoga goo ee dodolone badalai goomogoga, edebeeyo dimapoo dala tenemalaiso. <sup>13</sup> Osoloso ee ma kulodu goo tokenee teli odoo sabolo, osoloso gamenee goo eligili odoo dia goo tokenee oso toowa dalaiso. Osoloso diayo odoo abo mapoo gamenee goo eligi maga tei goodee maga peegoo gilimado dileiso. Osoloso diba nosee dieso nediliyo peegoo gilimado dileiso.

<sup>14</sup> Esino Timoti, daga Godeeyo to tekepo namapoo eligime, nayo to omapoo medee tei tooso. Esiga eligi goo omapoo medee kibiya kookoodoloso badebee. Bei, namapoo eligi odoo ee, no olo gooleedooso. <sup>15</sup> Esiga no pepooko maga bei mooloogoloso sibulone, Godeeyo to booka mapoo hogugu goo ee, no olo gooleedooso. Osoloso Godeeyo to mapoo kitulugu moloso, namapoo goo goolee tekepo tenelai, nayo Yesu Keliso mapoo tei toga gie badeli talame.

<sup>16</sup> Godeeyo to booka mapoo hogugu susuga ee Godee maga simi. Esiga Godeeyo to booka mapoo hogugu goo oso odoo mapoo tei goo eligilone, edebeeyo dooboo dagaduga, tei goo eligi mapoo ka ido sibo domoloso. Osoloso Godeeyo to booka mapoo hogugu goo oso edebeeyo tekepo badeli goo ee eligiliso, Godeeyo odoo oso mopoodoo doloso goo tekepo susuga tomo silesibilei ee tebilame.

### Poloye Timoti mapoo to hamameedee kokodo taka

**4** Yesu Kelisoye mipoo hamapoo wiligi odoo doloso badalame see wedi siboga, yayo odoo susuga epedee gie hagee do sabolo, osoloso odoo wedia sabolo dia goo midileiso. Esiga ayo Yesu Kelisowo howo woola, osoloso Godeeyo howo woola, namapoo ka taka, nayo to tekepo ee odoo mapoo eligilame. Osoloso Godeeyo to dulei goomegeli odoo mapoo, osoloso Godeeyo to dulei goweli odoo mapoo nayo Godeeyo to medee takee. Egeeseelone edebeeyo gamenee eligi goo mapoo tei toga, nayo diba to tekepo sabolo tei eligi goo mapoo see ido sibo dolone ka badebee. Osoloso diayo see goo tokenee teyaga, Godeeyo toso diba medee pidilone ka badebee. Osoloso nayo dimapoo Godeeyo to eligilone, medee mesie sabolo dimapoo kitulugu tenelone badebee. <sup>3</sup> Bei, odoo aboso to tekepo eligi goo mapoo gowoolai biame ee sibileiso. Egeeseelone dieso goomoga goo ee dodolone, eligili odoo abo ee gilimado sibileiso, to diayo dulei goomoga goo ee dimapoo eligilame. <sup>4</sup> Egeeseelone, diayo tei eligi goo ee poogoloso see gesaboo oposusu mapoo medee dulone dabalaiso. <sup>5</sup> Esino goo susuga ee ma kulodu, no tei goo ono kibiya kookoodoloso, no nediliyo nee su kookoodoloso badolone, dala ma kulodu kibiya badebee. Osoloso to tekepo eligilone badolone, tou susuga Godeeye namapoo tenee ee medee temelee.

<sup>6</sup> Esiga Timoti, ayo namapoo kokodo taka. Bei, edebeeyo a wooloomaloso mipoo hagee poogoo dilei bi-

ame olo koola tooboo. <sup>7</sup> Esino tou Godeeye amapoo tenee ee medee kibiya tomo sibilesos hosudooso. Egeesi ma kulodu ayo tei too ee medee kibiloso badoso. <sup>8</sup> Esiga ayo Godeeyo howo woola tekepo badeli goo maga, yayo Kei mi ma dokodoo mopoodoo doloso magoo nei oso a bamoloso. Esiga goo medee teiba midili odoos Lodeeye siboga, nei ee amapoo tenelaiso. Osoloso yayo nei hedebe amapoo tenelai mauwe. Haye, odoos agayo yayo sibilei mapoo bolone goomoga sabolo dogo, diba onosee nei talaiso.

<sup>9</sup> Timoti, ayo hagee bado mapoo saga sibilame, no weegeege. <sup>10</sup> Bei, odoos abolo badeli Dimaseeye mi toowa eyo goo goomoga maga, a poogoloso see Tesalonika mi mapoo diso. Esino Kelesekeseeye Galesia mi mapoo Godeeyo tou talame diso. Osoloso Taites onosee Dalamatiya mi mapoo Godeeyo tou talame diso. <sup>11</sup> Egeesi ma kulodu hedebe Luka ono abolo hamapoo badoso. Esiga nayo amapoo sibulone Maka ido sibeye. Bei, yayo mo tou pidiliga. <sup>12</sup> Esino ayo Tikikus Epeses mi mapoo diye diso. <sup>13</sup> Esiga Timoti, nayo siboga, mo kekeisu dugo kali Tolowasee mi mapoo, Kalopuseeyo moso mapoo deede poogoo ee tosibeye. Osoloso mo booka onosee tosibeye. Osoloso nayo mo booka gala koloso moodoo ee tosibilei, a diya goomogo.

<sup>14</sup> Egeesi ma kulodu ki biso bi moodoogali odoos hee Alesandaye amapoo dala toowa tenemeleeso. Esino Lodeeye yimapoo nei dala tenelaiso. <sup>15</sup> No obeeyamo, nayo odoos ogono medee ege. Bei, iyo eligi goo ee yayo diya wegigeliso.

<sup>16</sup> Esiga ayo daga malalo goo midili mapoo pala biame omapoo, odoos heeso a pidilame abolo pele. Esino odoos susuga oso a poogoo diso. Esino ayo Godee mapoo taka, yayo dibada goo tokenee ee hapoloso boobado bigilame. <sup>17</sup> Esino Lodeeye a pidilone abolo badebei maga, goo midili odoos oso a teli mapoo tenele. Esino ayo to tekepo ee Yu odoonee goo midili mi koola mapoo tebisamelee mapoo takalame, yayo a pidiso. <sup>18</sup> Esiga edebeeyo amapoo dala tenelame see-ga, dala ee ma kulodu Lodeeye a pidileiso. Osoloso yayo a Kei mi ma dokodoo ido palaiso. Esiga odoos susuga oso biame susuga hedebe Godee mapoo mesilone yimapoo goomoga poudilei tekepo. To hagee tei goo.

<sup>19</sup> Esiga ayo emegei di to ee Plisila sabolo, osoloso Akwila mapoo takoloso, see Onesipoles sabolo, osoloso o moso kulodu debeli odoos mapoo takee.

<sup>20</sup> Elastaseeye Kolin mi mapoo osee badebeiso. Osoloso Tolopimus yo paiye neme, ayo yo Miletus mi mapoo hologooso. <sup>21</sup> Esiga dugo telega mologa, no sibilei eli esialoso ayo hagee bado mapoo sibilame weegeege.

Yubulus sabolo, osoloso Pudes sabolo, osoloso Linos sabolo, osoloso Kalaudiya sabolo, osoloso tei telaga odoos susuga sabolo, oso diayo emegei di to ee namapoo takooso.

<sup>22</sup> Ayo Godee mapoo taka, Lodeeye nobolo badalame, osoloso yayo niba sooloo dolone pidilame.

# Taites

## Taites booka goo eyo bei

Poloye mi abo mapoo Godeeyo to takomo sileeme, Taites yibolo hodobo sileeso. Osoloso hamamee Poloye Taites yo Kiliti mi te mapoo sosee bamalame omapoo hologooso. Esiga to hogugu hagee ma kulodu Poloye Taites mapoo sosee bali odoo oso badalai goo ee hoguguloso teneeso.

**1** A Polo, Godeeyo tou teli odoo. Osoloso Yesu Kelisoye a diye diso, ayo Godeeye hesia odoo mapoo Yesuwo goo maga tei goo eligiga, diayo tei too ee kauwulame. Bei, tei goo ogoso diayo Godeeye goomoga goo ee tomo silesibulone dabalai goo ee eligileiso. <sup>2</sup> Osoloso diayo Godee maga kookaiyo badoboso gie badeli talai ee balame, ayo diba pidilone ka badoso. Bei, gamenee koo takeli Godeeye daga bi susuga moodelega badolone, yayo kookaiyo badoboso gie badeli hagee imapoo tenelame to olo edidi magooso. <sup>3</sup> Esiga biame yayo magoo mapoo ibada gie badeli pidili Godee yayo o to tekepo amapoo yilige buguloso a diye diso, ayo odoo mapoo to tekepo ee takalame.

<sup>4</sup> Esiga ayo to hogugu hagee Taites namapoo ka tonowa. Bei, tei too ma kulodu no tei mo holo masiga. Esiga ayo Godee mapoo taka, Ma Godeeye, osoloso ibada gie badeli pidili Yesu Kelisoye no sooloo dolone pidilame, osoloso mesie goo ee namapoo tenelame.

### Sosee bali odoo

<sup>5</sup> Ayo no Kiliti mi te mapoo hologoloso poogoo diso, nayo mi pepooko susuga mapoo sosee bali odoo hudi magalame, osoloso sosee yo tou hosudele poogoo ee hosudalame. <sup>6</sup> Nayo egeeseemo silone, ayo namapoo sosee bali odoo eyo goo taka ee no goolee sabolo sile. Bei, sosee bali odoo yo odoo susuga eyo howo woola goo tokenee mauwe badebee. Osoloso yo sobo hedebe huloso badebee †. Osoloso owolo dio oso tei toloso dobolone, ama dio owee dio eyo to mapoo mesilone ka debee. Osoloso diba wiligi me poogoloso suso goomoga goo tokenee ee tolone na debee. <sup>7</sup> Edebeeyo sosee balai goomogoga, yo odoo susuga eyo howo woola goo tokenee mauwe badebee. Bei, Godeeye o odoo medee bali tou ee yimapoo teneega. Osoloso eyo nediliyo na si hoowee. Osoloso saga na kamana bigi. Osoloso yugune naloso na halabee. Osoloso na bilige. Osoloso molee talame gamenee na takee. <sup>8</sup> Esino yayo odoo soo simi pidilone ka badebee. Osoloso yo goo tekepo goolone badebee. Osoloso yo o su eyo nediliyo medee kookoode. Osoloso yo Gode-

† *SOBO HULOSO BADEBEE - goo hagee, yo sobo hedebe huloso badalai, o, yo sobo hedebe mapoo goo maloso badalai ee takoo malaiso.*

eye tekepo deli goo ee tolone badebee. Osoloso Godeeyo howo woola medee teedee badebee. <sup>9</sup> To tekepo ee tei goodee, osoloso to hagee opusomo dee koo seli. Yayo to tekepo iyo eligimo silee mapoo kibiya kookoodoloso badebee, tei goodee eligilone odoo abo pidilame. Osoloso to tekepo mapoo goweli odoo oso eli dooboo dagadi goo ee ogoga, yayo dimapoo goo eligilame.

### Kiliti odoo aboso gamenee goo eligi

<sup>10</sup> Ayo namapoo egeesee ka taka. Bei, sosee ma kulodu Godeeyo to mapoo koo mesili odoo abo doso. Diba goo eyo bei mauwe wulo to boweliso. Osoloso diayo gamenee goo odoo mapoo eligilone, tei goo maga diba peegoo gilimado diliso. Goo hageesi egee tomo silesibo ee tei telaga Yu odoo †† aboso ka seeso. <sup>11</sup> Esiga diayo egee eligimo silesibo goo ee hamaga takee. Bei, soosooso tei too goo ee diayo tokenee pomo silesiboso. Osoloso diayo molee talame gamenee goo hagee eligimo silesibiliso. <sup>12</sup> Egeesi ma kulodu daga hoogoo Kiliti mi te mapoo badeli eligili odoo heeso, o odoo dia goo maga takolone egeesee takaso, "Kiliti odoo susuga diba gamenee takeli odoo. Osoloso diayo dibada suso goomoga goo tokenee ee dodolone ka doso. Osoloso diayo tou talai gowoolone, wulo nei diya toowa nolone ka doso," diso. <sup>13</sup> Yayo goo taka hagee ee tei goo taka. Esiga Taites, nayo gamenee goo eligi mapoo tei teli odoo hagee bia ogoloso dimapoo diya takemelee, diayo gamenee goo eligi ee poogoloso, see goo tekepo eligi mapoo medee kibiya tei ka talame. <sup>14</sup> Osoloso diayo Yu odoo dia adaga dia goo egee oposusumo silesibo ee peegeeye dee. Osoloso diayo Godeeyo goodee mapoo goweli odoo dia tei magoo mapoo egee mesimo silesibo onosee peegeeye dee.

<sup>15</sup> Esiga Godeeyo howo woola subugo mauwe badeli odoo mapoo, bi susuga medee tekepo subugo mauwe moloso. Esino goo tokenee tolone Yesu mapoo tei tele pegeli odoo dimapoo bi susuga subugo mauwe koo moloso. Bei, goo goolee tekepo dimapoo melee ee olo

†† *Yu odoo hagee biaso egeesee eligiliso, tei telaga odoo susuga oso Yu odoo dia tei magoo ee dodolone kolo koolai tekepo deliso.*

tokenee paga. Esiga goo tekepo sabolo, osoloso goo tokenee dieso teli ee ogoloso koo gooleedeli. <sup>16</sup> Esiga diayo takolone, "Godee iba gooleedooso," dee take-liso. Esino diayo goo tokenee teli oso Godee mapoo tei telega pegeli goo ee eligiliso. Diba diya tokenee odo. Osoloso diba Godee mapoo koo mesili. Osoloso diba goo tekepo talai koo tebili.

### Tei goodee eligi mapoo deede

**2** Esino Taites, nayo tei telaga odo mapoo Yesu Kelisowo goo maga tei goodee eligili sabolo teiba eligi. <sup>2</sup> Egeeseelone nayo giso adaga medee eligi, diayo mesie sabolo dobolone, dieso nediliyo dibada su medee kookoodoloso dabalame. Osoloso odo susuga eyo howo woola medee tekepo dabalame. Osoloso diayo tei too medee kibiloso dobolone, odo susuga diya sooloo dolone ka dabalame. Osoloso diayo dala goo ma kulodu kibiya dabalame.

<sup>3</sup> Osoloso nayo sobo adaga medee eligi, diayo dia suso Godeeye goomoga goo ee tolone ka dabalame. Osoloso dimapoo takee, diayo emegei dia goo maga to tokenee takelega dabalame. Osoloso diayo yugune naloso halabagamo silesibiyaga, medee takee. Osoloso goo tekepo tolone dabalai goo ee diayo odo mapoo eligilone dabalame, nayo dimapoo eligi. <sup>4</sup> Esiga diayo goo egeesi moodooga, sobo gie kakauwa diayo dibada giso sabolo, osoloso owolo dio sooloo deli goo ee eligelei tebileiso. <sup>5</sup> Osoloso diayo sobo gie kakauwa oso goo tekepo tolone, Godeeyo howo woola subugo mauwe dobolone, dia su medee kookoodeli goo ee eligilei tekepo. Osoloso omo dio sabolo, osoloso owolo dio sabolo medee balai goo onosee eligi. Osoloso omo dio eyo to mapoo mesili goo ee eligi, tei tele poogoo odo oso goo ee ogoloso, Godeeyo to maga to tokenee takelega pagalame.

<sup>6</sup> Osoloso giso gie kakauwa dibada su medee kookoodeli goo ee dimapoo eligi. <sup>7</sup> Osoloso edebeeyo nee goo susuga ogoloso padalame, nayo hedebe goo tekepo tolone ka badebee. Osoloso nayo Godeeyo to eligiga, goo tekepo goolone medee ka eligi. <sup>8</sup> Nayo Godeeyo to dooboo dagadilega medee eligi, namapoo goweli odo oso imaga to tokenee takalai similame.

<sup>9</sup> Osoloso nayo see tei telaga odo nei mauwe tou teli mapoo takee, diayo dia wiligi odo eyo to mapoo mesiloso, diayo goomoga goo ee tolone, dibolo toso agadigelega pagalame. <sup>10</sup> Osoloso diayo dia wiligi odo eyo bi heli talai tekeponee. Esino diayo medee tei dolone, tou medee goosa tolone dabalai tekepo, dia wiligi odo oso dia goo tekepo ogoloso, yayo dia goo ee tekepo dalame. Osoloso ibada gie badeli pidili Godeeyo goo maga eligi goo ee tekepo dalame.

<sup>11</sup> Tei telaga odo oso goo egeesi tolone dabalame, nayo dimapoo eligi. Bei, Godeeye iba sooloo dolone pidili goo maga Yesu Keliso mipoo hamapoo meiyedis, yayo odo susuga ibada gie badeli ee pidilame.

<sup>12</sup> Godeeye sooloo dolone pidili goo oso imapoo ka eligi moloso, mi goo Godeeye goweli iyo ee dedelega pagalame. Osoloso iba epedee hamapoo dobolone, iba-

da su iso nediliyo kookoodoloso, Godeeye goomoga goo ee tolone, o howo woola teedee dabalame. <sup>13</sup> Esiga iyo goo egeesi tolone dobolone, Yesu Kelisoye mipoo hamapoo sibilei goo ee dulone ka bamoloso. Yo tei Godee, osoloso yo ibada gie badeli pidili odo. Yayo see wedi siboga, eyo toowa doloso badeli goo sabolo sibileiso. Goo susuga egee iba gooleedooso. Esiga yayo see wedi sibilei ee bolone iba goomoga sabolo ka doso. <sup>14</sup> Yayo iba halo olo taso, iyo goo tokenee ma kulodu doboome, yayo iba neiso toloso peegoo gilimado dilame. Egeeseelone yayo olo taso, iyo o odo doloso dobolone, o howo woola medee teedee dabalame. Osoloso iyo goo tekepo talai ee diya goolone dabalame.

<sup>15</sup> Esiga nayo goo susuga hagee kitulugu sabolo medee kokodo takee, tei telaga odo oso goo ee tolone dabalame. Esino diayo goo omapoo mesilega poogoga, nayo dimapoo diya takee. Nayo egeesi eligi goo ee ogoloso edebeeyo hedebe nayo eligi mapoo mesilei tekepo. Egeeseelone odo heeso nayo eligi goo ee goo mauwe, dee na takeeye dee.

### Tei telaga odo oso dabalai goo

**3** Esiga Taites, nayo tei telaga odo mapoo goo hageesi see tobu eligimelee, diayo diba gibadeli gamalee odo dia to mapoo, osoloso mosobia eyo wiligi odo tebisa dia to mapoo mesilone dabalame. Egeeseelone diayo goo tekepo susuga ee talai olo mopoodoo doloso dabalame. <sup>2</sup> Osoloso diayo emegei dia goo maga to tokenee takolone na debee. Esino diba toso agadigelega mesie sabolo dobolone, emegei sooloo dolone dabalai tekepo.

<sup>3</sup> Esiga no iyo daga tei telega debei goo ee goolee. Iba tei telega dobolone, goo medee koo gweli odo doloso debeiso. Iyo Godeeyo to mapoo mesilega doboome, odo aboso iba tei goodee maga peegoo gido diliso. Osoloso goo tokenee iyo gilee goo ee osee tomo silone pagalai tebile. Iyo odo abo mapoo goo tokenee moodeliso, osoloso emegei dia bi ogoloso talame diya gweliso. Osoloso edebeeyo iba hegiliso, eseeega nei iyo diba hegiliso.

<sup>4</sup> Esino ibada gie badeli pidili Godeeye o mesie goo ee imapoo eligilone iba sooloo dolone, yayo ibada gie badeli pidiso. Esiga iyo goo tekepo teme, yayo iba ka pidile. Esino yayo ibada goo tokenee hapoloso Dio Tei imapoo tenee maga, yayo sooloo dolone iba pidiso, iyo see gie badeli dia toloso dabalame. <sup>6</sup> Ibada gie badeli pidili Yesu Kelisoye ibada goo tokenee hapalame ta goo omaga, Godeeye o Dio Tei ima kulodu badalame su goodegelega wulayo teneeso. <sup>7</sup> Esiga Godeeye iba sooloo dolone pidi maga, o howo woola iba olo odo tekepo doloso doso. Esiga iba kookaiyo badoboso gie badeli ee talame ka bamoloso. <sup>8</sup> To hagee tei goo, osoloso to hagoso odo susuga pidilei kitulugu moloso. Esiga a goomogo, nayo goo hagee tei telaga odo mapoo medee eligilame. Nayo egeesee seega, diba goo tekepo tolone odo susuga pidilone medee dabalaiso.

<sup>9</sup> Esino goo wulo bei mauwe maga toso agadigeli odoos omaga peegoo dooboobigi. Osoloso edebeeyo o adagaso balomo simi goo ee oposusulone, Moseseeye tei magoo goo ee dadalame toso agadigaga goo ee, nayo ogoloso na deedee. Bei, goo susuga hagoso odoos koo pidili. <sup>10</sup> Osoloso odoos agayo gamenee eligi goo ee toloso sosee ma kulodu eligimo silone odoos domo piga, nayo yo hamaga takee. Osoloso yayo nee to dulega poogooga, see tobu hamaga takee. Esino yayo nee to dulega poogoloso see osee eligimo siloga, yo peegoo wulo peegee. <sup>11</sup> Odoos ogoso tei goodee eligili maga miligi pia goo ee, no gooleedooso. Osoloso goo yayo tomo sili oso Godeeyo howo woola yo odoos tokenee doloso egee bado goo ee woola eligiliso.

#### Emegei di to hamameedee taka

<sup>12</sup> Ayo Atemas, o, Tikikus namapoo diye dalaiso. Osoloso yo nayo egee bado mapoo peledobooga, nei

nayo Nikopolis mi mapoo sibilesa a tugodalame weegeegee. Bei, dugo biame mapoo a mi omapoo badalai, a goomogo. <sup>13</sup> Osoloso Apolos sabolo, osoloso gamaleeyo tei magoo diya gooleedoo odoos Sinasi pidilone, diba mi hee mapoo dilame dogo, bi diayo dulone todilei tobuloso dimapoo tenee. <sup>14</sup> Osoloso tei telaga odoos oso goo tekepo tolone dobolone, bi tebile poogoo odoos ee pidilei tekepo. Bei, ibada odoos oso tei too ma kulodu dobolone, wulo goo mauwe mosoowe dabalai tekepenee.

<sup>15</sup> Esiga odoos susuga abolo debeli oso namapoo emegei di to ka taka. Esiga Taites, see nayo iyo emegei di to taka hagee, nobolo hodobo debeli tei telaga odoos dimapoo takee.

Ayo Godee mapoo taka, yayo niba susuga sooloo dolone pidilame.

# Palimon

## Palimon booka goo eyo bei

Palimon hagee bi bei odoo, osoloso yo Kolosi mi mapoo badeli. Esino yo tei tolosa badolone, Polo dio emegei doloso badebeiso. Egeesi ma kulodu Onisimas yo Palimoneeyo tou teli odoo doloso badolone, nei mauwe tou temeleso. Egeesi ma kulodu Onisimaseeye o wiligi odoo Palimon maga pulo dilesa Polo tugodoloso yibolo badebeiso. Osoloso Poloye eligi goo maga yo Yesu mapoo tei tooso. Egeesi ogoloso Poloye Palimon mapoo to hogugu hagee teneeso, Palimon o tou teli odoo Onisimaseeye see wedi dilesa, Palimoneeye badebei mapoo peledobooga, yayo yimapoo nei dala tenelega, yo goomoga sabolo see ka idalame.

**1** A Polo, Yesu Kelisowo goo ee takomo silee maga, neliga moso ma kulodu badeli odoo ee aso. Ibada omolo Timoti asalo hamapoo dobolone, iyo ibada odoo ibolo tou hedebe teli Palimon namapoo to hogugu hagee ka tonowa. <sup>2</sup> Osoloso tei telaga odoo nee moso kulodu howo gisili odoo mapoo to hogugu hagee ka tonowa. Osoloso to hogugu hedebe hagonosee ibada oboba Apiya, osoloso ha teli odoo masi Godeeyo tou mapoo kibiloso ibolo badeli Alakipus nimapoo ka tonowa.

<sup>3</sup> Ayo Godee mapoo taka, Ma Godeeye, osoloso ibada Lodee Yesu Kelisoye niba sooloo dolone pidilame, osoloso mesie goo ee nimapoo tenelame.

### Palimoneeye sooloo deli goo sabolo osoloso tei too goo

<sup>4</sup> Palimon, ayo biame susuga Godee mapoo takolone no halo goomoga to takeliso. <sup>5</sup> Bei, nayo Lodee Yesu mapoo tei too goo ee, a duliso. Osoloso nayo Godeeyo odoo susuga ee sooloo dolone egee bado goo sabolo, a duliso. <sup>6</sup> Nayo Yesu mapoo olo tei tooso. Goo egeesi maga, nayo tei telaga odoo sabolo hedebe doloso ka badoso. Esiga ayo Godee mapoo taka, hedebe deli goo hagoso no pidilone, iba Keliso sabolo hedebe doloso hagee do goo maga, goo tekepo susuga iyo teli goo ee medee gooleedalame. <sup>7</sup> Molo emegei, nayo Godeeyo odoo ee sooloo dolone dimapoo goomoga tenelone egee bado goo oso, amapoo kitulugu sabolo, osoloso goomoga toowa sabolo ka tenemoloso.

### Onisimas yo tei nomolo masi hesie

<sup>8</sup> A Kelisowo diye di odoo doloso badoga, amapoo kitulugu moloso, nayo goo tekepo talame, ayo namapoo to kitulugu sabolo takalai. <sup>9</sup> Esino ayo no diya sooloo doloso. Esiga ayo namapoo wulo ka woosowa. Bei, a Polo, Yesu Kelisowo tou teli goo maga neliga moso ma kulodu badolone olo adaga poloso ka badoso. <sup>10</sup> Ayo Onisimas yo halo namapoo ka taka, nayo yo pidilame. Bei, a neliga moso ma kulodu badolone, yayo tei talame ayo yo pidiso. Esiga epedee

hamapoo ayo ama masi ka badoso. <sup>11</sup> Daga Onisimaseeye nee tou teli odoo doloso badebei omapoo yayo no medee pidile. Esino epedee yayo tei tolosa badolone, asalo pidilei teiba.

<sup>12</sup> Onisimas yo ayo diya gooma odoo. Esiga yo abolo hodobo hamapoo badalai, a goomogo. Bei, ayo to tekepo takomo silee eyo goo maga neliga moso ma kulodu ka badoso. Esiga no halo yayo a pidilone babalai, a goomogo. Esino ayo yo namapoo see wedi diye deeso. <sup>14</sup> Bei, ayo namapoo wooselega yo hamapoo gidoloso badalai tekeponee. Egeesi ma kulodu nayo a pidilame, ayo no seselai, a koo goomogo. Esino no goomoga oso, nayo a pidilei, a goomogo. <sup>15</sup> Onisimaseeye biame deiyepo mapoo no poogoo dilesa badebeiso. Esino ayo goolee, goo ogoso peledabaso, yo see hamamee namapoo wedi sibilesa biame susuga nobolo hodobo badalame. <sup>16</sup> Esiga nayo yo see idoga, yo wulo nama hemi badolone nei mauwe tou teli odoo, dee na goolee. Bei, yinosee epedee Keliso mapoo tei too odoo. Esiga yo ayo diya gooma. Esiga nei nayo yo nei mauwe tou teli odoo dolone, Lodee mapoo tei too ee ma kulodu nomolo masi diya goolone badebee.

<sup>17</sup> Esiga asalo Kelisowo tou hodobo teliga, ayo no agalame siboga, nayo a idili, Onisimaseeye namapoo siboga yinosee egeesee ide. <sup>18</sup> Egeesi ma kulodu Onisimaseeye namapoo goo tokenee hee olo too daga, osoloso yayo nee bi hee nei tenelega tolosa badoga, goo onosee amapoo takee, ayo nei magalaiya. <sup>19</sup> A Polo, ayo mo deeso to hagee ka hoguga: bi yayo too eyo nei ee ayo namapoo tenelaiso †. Esino no gooleedooso, nayo Keliso maga gie badeli talame, ayo no pidiso. Esiga a goomogoga, ayo no halo pidi goo eyo nei, ayo namapoo takalai, a teiba. Esino ayo namapoo takalaime. <sup>20</sup> Esiga molo emegei. Iyo Keliso mapoo tei too ee ma kulodu doga, nayo Lodee halo Onisimas ee see ide. Eseega a goomoga sabolo badalaiso. <sup>21</sup> Ayo namapoo egee takoo goo hagee nayo tolosa, Onisi-

† Poloye o deeso to deiyepo hagee nei tenelai goo maga hoguguso. Esino to abo Poloye odoo hee mapoo takeme, yayo hogugu malaiso.

mas halo goo tekepo abo talai goo ee, a gooleedoso. Goo egeesi gooleedoloso, ayo to hogugu hagee namapoo ka tonowa.

<sup>22</sup> Osoloso goo hee hagoso. Ayo neliga moso ma kuloduga peegoo peledabalame, niyo Godee mapoo takolone debeliso. Esiga Godeeye goomogoga, a peegoo peledoboloso see niyo egee do mapoo sibileiso. Esiga ayo omapoo sibileso badalai debi mopoodoo de.

†

† *Poloye to hogugu susuga hagee Palimon mapoo hoguguloso teneeso. Esino to bes 22 ee ma kulodu egee molo, ee yayo Kolosi mi mapoo debeli tei telaga odoo dimapoo to hoguguloso teneeso.*

### Emegei di to hamameedee taka

<sup>23</sup> Kelisowo goo ee takomo silee goo maga neliga moso ma kulodu abolo badeli odoo hee Epapalas onosee yayo emegei di to ee namapoo taka. <sup>24</sup> Osoloso abolo hodobo tou teli odoo Makaye, osoloso Al-istakuseeye, osoloso Dimuseeye, osoloso Lukaye, emegei di to onosee namapoo ka taka.

<sup>25</sup> Ayo Godee mapoo taka, ibada Lodee Yesu Kelisoye niba sooloo dolone pidilame.

# Yemes

## Yemes booka goo eyo bei

Yemes booka hogugu hagee Yesuwo omolo. Yayo Yolusalem sosee wiligi doloso badolone, mi abo mapoo debeli tei telaga odoo mapoo to hogugu hagee teneeso, diayo Keliso mapoo tei too maga dala egee tomolo ee ma kulodu medee kibiya dabalame.

**1** Emegei! A Yemes, Godee sabolo osoloso Yesu Keli-  
lisowo tou teli odoo. Ayo Yu odoo bala 12 † mi  
opusomo opusomo di mapoo egee dobomo du  
nimapoo to hagee ka hoguguso.

### Dala goo sabolo goo tokenee mapoo gidodili goo sabolo

<sup>2</sup> Tei telaga odoo emegei, dala goo susuga oso  
nimapoo siboga, goomoga sabolo ee ma kulodu ka  
debee. <sup>3</sup> Bei, niba gooleedooso, dala goo hageesee  
oso sibiliso, iyo tei too kibiya beleso agalame. Egeesee  
ma kulodu iyo dala goo ee ma kulodu kibiya doga, goo  
oso iyo tei too ee ma kulodu mesie sabolo debeli goo  
ee eligiso. <sup>4</sup> Esiga niyo tei too goo ee kibilame, mesie  
goo nima kulodu egee molo oso osee mele dee. Niyo  
egeesee seega, goo susuga ee ma kulodu niba kibiya  
dabalaiso. <sup>5</sup> Esiga odoo hee niyo goo goolee tekepo  
tebile daga, yayo Godee mapoo takalai tekepo. Bei,  
Godeeye yimapoo simili goo tenelaime. Esino Godeeye  
o odoo pidilei goomoga toowa mologa, yayo yo  
pidileiso. <sup>6</sup> Esino yayo Godee mapoo tei toloso  
dokodoo takooga, goo bakadio na goolee. Bei, goo  
bakadio gweli odoo ee poo siboga, howo ki simi oso  
egee holodu odoo yo egeesi masi badoso. <sup>7</sup> Odoo  
egeesi yimapoo goo goolee hedebe koo moloso. Esino  
goo susuga ee ma kulodu goo goolee bakadio doloso  
badoso. Esiga yayo Godee mapoo taka goo ee nei ta-  
laiso doloso goolai tekeponee.

<sup>9</sup> Esiga tei telaga bi mauwe debeli odoo niba  
goomege. Bei, Godeeye o howo woola niba toowa  
diso. <sup>10</sup> Osoloso tei telaga bi bei odoo niba Godeeye  
pepooko daga, niba goomege. Bei, osoko beeam  
mapoo osokoso pukusi mapoo pounoga, siligaloso  
egee wodio, niba nose egeesee selaiso. <sup>11</sup> Osoloso os-  
okoso sibulone palapalawa tekepo mapoo pounoga,  
palapalawa tekepo oso wodoloso miyomoo dologa di-  
biliso, niba nose egeesee selaiso. Esiga bi bei odoo  
niyo nibada tou tolone doga, niba wedileiso.

<sup>12</sup> Odoo heeso dala ma kulodu kibiya badolone tei  
too goo pegelega badoga, Godeeye yo pidileiso. Bei,  
yo dala ma kulodu tei too kibiya badoga, Godeeye

† Yu odoo bala 12 egee eyo bei Yu odoo tei telaga odoo ee  
takooso.

yimapoo nei kookaiyo badoboso gie badeli tenelaiso.  
Esiga kookaiyo badoboso gie badeli hagee Godeeye  
yimapoo diya goolee sabolo debeli odoo mapoo  
tenelame to magooso.

<sup>13</sup> No goo tokenee talame gidoduga, "a goo tokenee  
talame Godeeye gidodu," dee na goolee. Bei, tokenee  
goo oso Godee gidodilei tebile. Osoloso Godeeye o  
odoo ee tokenee goo mapoo koo gidodili. <sup>14</sup> Esino  
odoo eyo tokenee goo talame diya gweli goo oso yo  
kukuga ka gidodili. <sup>15</sup> Osoloso tokenee goo talame  
gweli goo hagooso suso goo talame gidodileiso. Os-  
oloso suso tokenee goo too hagooso kauwuloso see  
odoo mapoo teli goo tosibileiso.

<sup>16</sup> Esiga tei telaga odoo ayo gooma niba goolee,  
Godeeye odoo koo gidodili. <sup>17</sup> Bei, tokenee mauwe  
tekepo goo susuga ee Ma Godeeye egee bado  
dokodoo sibiliso. Egeesee ma kulodu bi yayo  
moodoo a, giwo, osoloso osoko diayo melee mi  
hedebe omapoo koo meli, esino diba beeam heeso  
mi hee ma molo osoloso mi hee ma molo deliso. Esino  
diba moodeli Godee yo opusomo dee koo seli. <sup>18</sup> Esiga  
eyo goomoga goo ee dodolone, Godeeye o to tekepo  
maga imapoo gie badeli goo ee olo teneeso, yayo  
moodoo bi susuga ma kulodu iyo malalo dabalame.

### Godeeyo to duloso suso tou tolone debee

<sup>19</sup> Esiga tei telaga odoo ayo gooma, niba dui, odoo  
susuga oso saga duli odoo doloso dabalai tekepo.  
Egeesee niba saga to takeli goo sabolo osoloso  
saga kamana bigili goo sabolo ee ma kulodu na de-  
bee. <sup>20</sup> Bei, edebeeyo komonolone goo peledebeli oso  
Godeeyo howo woola mapoo tekepo doloso badeli  
goo sabolo koo tobuoso. <sup>21</sup> Esiga nima kulodu  
Godeeyo howo woola goo tokenee susuga sabolo os-  
oloso suso goo tokenee teli sabolo peegee. Osoloso  
niyo Godeeyo to duloso too goo ee mesie sabolo  
kibiya toloso debee. Bei, to omapoo kitulugu moloso,  
niyo gie badeli talai.

<sup>22</sup> Esiga niba Godeeyo to duloso yayo egee takoo goo  
ee tolone debee. Bei, niba Godeeyo to duloso yayo  
egee takoo goo ee telega doga, niba niso nediliyo  
dooboo gooleeso. <sup>23</sup> Bei, edebeeyo Godeeyo to duloso  
suso tou telega badoga, yo edebeeyo dio egeli mapoo



eyo nediliyo ogoloso poogoloso o mudu saga boobado bigili egeesi masi badoso. <sup>25</sup> Esino edebeeyo Godeeye kokodo taka to tekepo ee medee ogoloso boobado bigilega medee dodomologa, yayo goo susuga tomo sili ma kulodu Godeeye pidileiso. Godeeye kokodo taka to medee tekepo oso odoo susuga tokenee goo maga gilimolone ka badoso.

<sup>26</sup> Egeesee ma kulodu edebeeyo eyo nediliyo yo Godeeyo goo diya gooleedooso doloso, tokenee goo takalame o maga kookodelega poogooga, yayo Godeeyo goo gooleedoo ee goo mauwe moloso. Osoloso yo eyo nediliyo dooboo gooleeso. <sup>27</sup> Esino edebeeyo gilibo holo sabolo osoloso bauwe sabolo dala ma kulodu debei ee pidilone badolone, mi toowayo tokenee goo maga o su eyo gibadoga, Godeeye yayo tei too goo ee medee teedee dalaiso.

### Odoo abo pilega tokenee odoo sabolo tekepo odoo sabolo hodobo dabalai goo

**2** Tei telaga odoo emegei, niba ee ibada toowa Lodee Yesu Keliso mapoo tei telaga odoo oso. Esiga niba odoo abo ogoloso, diba ee tekepo dolone dimapoo goomogolone, odoo abo ee tokenee dolone diba na gowee. <sup>2</sup> Goo hageesee ee takooso, odoo heeso niyo mooloogoodoloso howo gisilone doga, dugo medee tekepo sabolo bi abo medee tekepo kaloso gasibileiso. Egeesee epedee omapoo bi mauwe odoo onosee dugo tokenee kaloso gasibileiso. <sup>3</sup> Egeesee niyo dugo tekepo kaloso gasimi odoo mapoo, "No malalo hamapoo sibilesi bie," dee takoloso, see hamamee dugo tokenee kaloso gasimi odoo mapoo, "No hamamee hoogoo dilesi tebide o, miyomoo bie," dalaiso. <sup>4</sup> Esino niyo goo egeesee egee moodoo, niba ogoo goo moodoosomo? Niba wulo odoo abo ono tekepo dolone, odoo abo ee tokenee, deeso. Esiga goo goolee tokenee nima kulodu egee molo oso odoo abo dooboo meediliso.

<sup>5</sup> Esiga tei telaga odoo ayo gooma, niba goo hagee medee dui! Godeeye mi toowa ma kulodu bi mauwe odoo ee hesigaso, diayo dibada sooloo ma kulodu tei too goo oso toowa doloso dabalame. Osoloso diayo Godeeye wiligi doloso badeli mapoo gadilame. Bei, Godeeye yo goolee sabolo sili odoo mapoo to kitulugu magooso, yayo wiligi doloso badeli mapoo gadilame. <sup>6</sup> Esino goo ee ma kulodu niyo bi mauwe odoo ee goo mauwe odoo deliso. Esino niba kasee maga bi bei odoo mapoo hamamee ka dadaga malala? Egee bia oso nimapoo dala teneloso goo meedili mapoo ido diliso. <sup>7</sup> Osoloso diayo nibada Lodee Yesu Kelisowo hu tekepo maga to tokenee takeliso.

<sup>8</sup> Godeeyo to booka ma kulodu kokodo taka to toowa egeesee moloso,

"No nediliyo diya sooloo deli egeeseelone no nemegei odoo mapoo diya sooloo dele," diso.

Esiga niyo kokodo taka to hagee medee deedeega, niba eli mapoo doso. <sup>9</sup> Esino niyo goolee ma kulodu odoo abo ee tekepo dolone, odoo abo tokenee daga, niba tokenee toso. Egeesee maga Godeeyo to oso

takooso, niba tei magoo gababili odoo diso. <sup>10</sup> Bei, edebeeyo Godeeye tei magoo susuga medee dodolone, tei magoo hedebe gababuoga, yo tei magoo susuga ee gababuso. <sup>11</sup> Esiga Godeeye egeesee takaso, "Niyo odoo heeyo sobo sabolo giso sabolo goo heli na te," diso. Osoloso Godee hedebe oso see egeesee takaso, "Odoo na wooloome," diso. Osoloso no odoo heeyo sobo sabolo giso sabolo heli koo teli, esino odoo wooloomolone badoga, no tei magoo gababili odoo oso.

<sup>12</sup> Esiga niyo to kei susuga sabolo osoloso suso goo too susuga sabolo obeeyamo. Bei, niba tokenee goo maga peegoo gilimadoo dili tei omaga nibada goo meedileiso. <sup>13</sup> Esiga goo meedilei beeame mapoo, Godeeye emegei koo sooloo deli odoo ee sooloo dala goo sabolo meedileime. Esino Godeeye goo meedilei beeame mapoo emegei sooloo deli odoo ee sooloo dala goo sabolo meediga, diba ebilega goomoga sabolo dabalaiso.

### Tei too ma kulodu su sabolo tou talai

<sup>14</sup> Esiga tei telaga odoo emegei, edebeeyo eyo nediliyo yo tei too odoo doloso, yayo suso tou too me daga, yayo tei too ee goo mauwe. Odoo egeesee seli ee yayo tei too oso yimapoo gie badeli tenelaime.

<sup>15</sup> Egeesee ma kulodu emegei tei too odoo oso nei egeesi sabolo osoloso dugo egeesi sabolo me badeliso. <sup>16</sup> Egeesee nayo yimapoo takolone, "Emegei, medee dilesi, dugo kaloso badolone wo ne," dee takooga, nayo yimapoo bi tebile poogoo tenelega wulo egeesee takoloso poogooga, no tekepo goo koo toso. <sup>17</sup> Esino bei, tei too oso obusomo molone suso goo too mauwe mologa, tei too ee goo mauwe.

<sup>18</sup> Egeesee ma kulodu odoo heeso egeesee takalai malaiso, "No tei too tebia. Esino a wulo suso goo teli odoo," dalaiso. Egeesee nei ayo odoo omapoo egeesee takalaiso, "Bei kasolone nayo suso goo too mauwe badolone, nayo tei too goo ee woola ka eligileiyo? Esino suso tekepo goo teli odoo ayo mo suso goo too maga ayo tei too goo ee eligileiso," diso. <sup>19</sup> Esiga nayo Godee hedebe egee bado mapoo tei teliso. Goo ee tekepo. Esino bo holo sabolo Godee hedebe egee bado mapoo tei tolone ebiliso.

<sup>20</sup> Esiga no goo goolee mauwe odoo, tei too ee suso tou too me daga, tei too egee goo mauwe. Esiga no goo hagee ayo namapoo eligilame ka sala? <sup>21</sup> Ibada amawe Eibalaham yo Godeeyo howo woola mapoo tekepo odoo diso. Bei, yayo tei toloso suso tou too maga. Goo ee yayo egeesee siso, yayo owolo Aisek ee Godee mapoo gala wooloso teneli dousulu mapoo wooloomalame dokodoo magooso. <sup>22</sup> Esiga no goolee. Eibalahameeye tei too sabolo osoloso suso tou too sabolo oso medee tebiaso. Osoloso yayo suso tou too oso yayo tei too ee kauwudooso. <sup>23</sup> Goo hagooso Godeeyo to booka ma kulodu taka goo sabolo tobulone egeesee takaso, "Eibalahameeye Godee mapoo tei teme, Godeeye yayo tei too ogoloso o howo woola yo tekepo odoo diso." Goo egeesee maga Godeeye

Eibalaham yo tei mo odoo diso. <sup>24</sup> Esiga niba goolee. Odoo susuga oso hedebe tei too maga Godeeyo howo woola tekepo odoo dee koo seeso. Haye. Suso tou too sabolo osoloso tei too maga Godeeyo howo woola odoo susuga ee tekepo deliso.

<sup>25</sup> Osoloso iba see domo sili sobo Leihebeeye goo too ee ogoso. Yibolosee yayo goo too oso Godeeyo howo woola yo tekepo diso. Bei, yayo Yeliko odoo dia mosobia mada agalame di Isalael odoo ee pidilone, yayo o mosopoo iyadoloso palaso. Osoloso see yayo diba eli hee maga diye dulone dibada gie badeli pidiso. <sup>26</sup> Esiga odoo o su mapoo dio mauwe odoo ee ta. Esiga tei too goo onosee egeesi moloso, edebeeyo yayo tei too ee suso tou telega badoga, yayo tei too ee goo mauwe moloso.

### Nibada i medee kookoode

**3** Tei telaga odoo emegei, niyo susuga eligili odoo doloso dabalai, a koo goomogo. Bei, niba olo gooleedooso, Godeeye goo meedilei beeamo mapoo eligili odoo susuga ibada goo ee Godeeye diya kitulugu sabolo meedileiso. <sup>2</sup> Egeese ma kulodu iba susuga eli dooboo dagadiliso. Esino edebeeyo yayo to taka ma kulodu eli dooboo dagadilega badoga, odoo yayo tei too ee kauwa moloso. Esiga odoo hageesi oso eyo nediliyo o su susuga kookoodalai tebia moloso. <sup>3</sup> Esiga iba dio masi hagee ogoso. Edebeeyo hosee be ma dokodoo buloso dilame gooleega, yo bi pepooko hosee be eyo maga mapoo magoloso tiso su mapoo bagagoo, su mapoo bagagoo dalaiso. Osoloso ti omapoo toloso dulone hosee be oso edebeeyo goolee mi mapoo dilame ti ee gimo dileiso. <sup>4</sup> Osoloso dio masi hee hagooso. Abei toowa mapoo silesibili du onosee egeesi moloso. Du oso poo toowa simi ma kulodu os-ee dumologa, du egee dooboo dileime. Bei, du egee toowa, esino du mali suda pepooko hee osio mapoo moloso. Oso du tosili odoo oso goomoga mi mapoo mamoo diliso.

<sup>5</sup> Esiga ibada maga ma kulodu i pepooko egee egeesi moloso. Ibada su mapoo bi susuga egee molo ma kulodu i ee diya pepooko moloso. Esino yayo toso hodolone diya doko topeliso. Wulo goolee, dobu ee dou pepookoso gigalogooga, dobu susuga douso nadiliso. <sup>6</sup> Esiga i ibada maga ma kulodu egee molo onosee egeesi masi moloso. Bei, i oso ibada su mapoo tokenee teneliso. Esiga iso tokenee bei mooloo-gooloso odoo su susuga dou masi nadiliso. Dou hagee Dou mi maga bei mooloo-gooloso ibada i mapoo gigaligiliso. Egeeseega dou hagooso edebeeyo gie badeli nadoloso tokenee peliso.

<sup>7</sup> Egeese ma kulodu odoo susuga oso gala seebee opusomo opusomo di só, osoloso beliyeso kolo dili, osoloso howo kulomoo debeli ee see badalame poopeliso. <sup>8</sup> Esino edebeeyo i ee be masi poopooloso badilei tebile. Bei, i diya tokenee. Esiga yayo sa masi odoo wooloomalame mopoodoo doloso moloso. <sup>9</sup> Esino i hedebe hagooso ibada wiligi taba Ma Godee mapoo goomoga poudiliso. Osoloso i hedebe ha-

gooso see Godeeye yo egeesi masi moodoo odoo susuga mapoo dala tenelame to takeliso. <sup>10</sup> Esiga maga hedebe hamaga Godee mapoo goomoga poudilei sabolo, osoloso odoo dala tenelai goo takeliso. Esiga tei telaga odoo emegei, ima kulodu goo hageesi oso malai tekeponee. <sup>11</sup> Esiga howo ou hedebe maga howo sokousoo sabolo howo kakada sabolo dilei tebile.

<sup>12</sup> Osoloso sibolo homo oso wewee koo peli. Osoloso kobolomee homo oso sibolo koo peli. Haye. Osoloso howo ou sokousoo maga howo kakada koo sibili.

### Odoo agayo tekepo gweli ka badosomo?

<sup>13</sup> Esiga nima kulodu odoo agayo tekepo badalai goolee sabolo ka badosomo? Yo tekepo badalame goo goolee omaga o suso tou too ee eligilei tekepo. Egeeseelone yo eyo nediliyo doko topalai goo goolee sabolo na badebee. <sup>14</sup> Esino niba mada nibada sooloo ma kulodu emegei hegili goo sabolo osoloso hedebe niso nediliyo gweli goo sabolo mologa, niba tekepo goo gweli odoo dee na takee. Bei, niyo egeesee egee takoo niba tei goo koo takooso. <sup>15</sup> Niba mada goo tokenee hageesi goolee sabolo badolone, niso nediliyo niba tekepo dee takooga, goo goolee egee Godee maga koo sibili. Esino goo goolee egee mi goo oso goo goolee sabolo osoloso Saitenso goo goolee maga ka siboso. <sup>16</sup> Osoloso mi kamapoo emegei hegili goo sabolo osoloso hedebe eyo nediliyo gweli goo sabolo mologa, mi omapoo abo puloso molone tokenee goo susuga oso kauwuleiso.

<sup>17</sup> Esino tekepo badalai goo Godee maga egee sibo goo oso imapoo eligiso. Malalo goo toowa ee tokenee mauwe goo oso, osoloso mesie goo, osoloso emegei gweli goo, osoloso emegei dimapoo mesili goo, osoloso sooloo deli goo, osoloso emegei pidili goo, osoloso odoo abo pilega tokenee odoo sabolo tekepo odoo sabolo hodobo dabalai goo, osoloso tei takeli goo. <sup>18</sup> Esiga edebeeyo odoo abo sabolo mesie badolone emegei odoo sabolo mesie badalai goo eligiga, odoo egee bia dima kulodu tekepo goo oso malaiso.

### Godee mapoo hegi sibadee

**4** Esiga ogoo goo oso biligeli goo sabolo toso agadigeli goo sabolo nimapoo ka tosibiliyo? Nibada goo goolee ma kulodu tokenee goo talame goomoga goo egee molo oso tosibiliso. Bei, nibada goo goolee ma kulodu tokenee goo talame goomoga goo oso tekepo gweli goo sabolo biligamoloso. <sup>2</sup> Niba bi goomegeliso, esino niba bi ee koo teli. Esiga nimapoo emegei hegili goo oso molone, emegei wooloomaliso. Esino goo hagooso niyo goomoga goo sabolo koo tebili. Esiga niba toso agadigilone biliso. Esino goo hagooso niyo goomoga goo sabolo koo tebili. Bei niso Godee mapoo koo woosali. <sup>3</sup> Osoloso niyo Godee mapoo woosaga, nei tenelega pegeli goo ee bei hagooso. Niyo tokenee gweli goo sabolo woosaloso see bi ogoso niso goomoga goo talai daga ka seli.

<sup>4</sup> Goo goolee bakadio gweli odo niba medee Godee sabolo hedebe doloso koo debeli! Esiga niba goolee, mi goo mapoo goomegeli oso Godee mapoo ha toso. Esiga edebeeyo mi goo sabolo hedebe doloso siloga, yo Godee sabolo ha tomoloso. <sup>5</sup> Esiga niba Godeeyo to booka mapoo hogugu hagee goo mauwe gooleeso-mo? Bei, Godeeyo toso egeesee takooso, "Godeeye imapoo Dio Tei tenee oso iyo hedebe Godee goolee sabolo silesibilame diya goomogoso," diso. <sup>6</sup> Esino Godeeye iba sooloo dolone medee pidiliso, iyo silesibilulone hedebe yo goolee sabolo silesibilame. Esiga Godeeyo to booka mapoo hogugu oso egeesee takooso,

"Godeeye odo eyo nediliyo dokodoo topeli odoosugaweliso.

Esino odo eyo nediliyo pepooko deli odoosooloo dolone medee pidiliso," diso.

<sup>7</sup> Esiga niba Godeeyo mudugiyopoo niso nediliyo pepooko dee osoloso o to mapoo mesimo silesibe. Osoloso Saitenso tokenee mapoo gidodilame gamenee taka ee ma kulodu kibiloso dobolone o to mapoo gowee. Bei, niyo egeeseega Saiten yo nimaga peegoo pulo dileiso. <sup>8</sup> Esiga niba Godee mapoo hegi sibadee. Egeeseega Godee yinosee nima hegi sibileiso. Esiga tokenee odo niba edebeeyo o dee subugo hapili egeesi masi nibada tokenee maga Godee mapoo bidiga debbe. Osoloso goo goolee bakadio gweli odo nibada goo goolee tokenee peegoo poogoloso, hedebe Godeeyo goo ee goolee. <sup>9</sup> Esiga niba goomoga goo poogoloso see nibada goo tokenee mapoo goohele sabolo pupusugulone debbe. <sup>10</sup> Osoloso Godeeyo mudugiyopoo niso nediliyo pepooko dee. Egeeseega Godeeye niba dokodoo poudileiso.

#### Nemegei tei too odoowo goo maga to tokenee na takee

<sup>11</sup> Esiga tei telaga odo emegei, nima kulodu nee odoowo goo maga to tokenee na takee. Niyo nee odoowo goo maga to tokenee takolone yo tokenee to daga, Godeeye tei magolone emegei sooloo dele dee taka goo ee tokenee deeso. Egeeseega Godeeye tei magoo mapoo medee kibiya koo deedeeso. Osoloso niso nediliyo tei magoo maga goo meedili wiligi tebisa deeso. <sup>12</sup> Esino iyo goo omapoo ogoso. Hedebe Godeeye tei mageli odo doloso badolone goo meedili odo doloso ka badoso. Godee hedebe yayo gie badeli pidili doloso badolone odoosugaweliso. Esiga nayo nee odoowo goo ogoloso, no tokenee odoosugaweliso. Esiga nayo nee odoowo goo ogoloso, no tokenee odoosugaweliso.

#### Godigi gooso peledabalai iba gooledele

<sup>13</sup> Esiga odo aboso egeesee takeliso, "Iba godigi mi abo mapoo dilesio sitowa moso togoloso dobolone dugo hedebe ma kulodu molee toowa talaiso," deliso. Esiga to egeesee takeli odo niba to hagee medee dui.

<sup>14</sup> Bei, niba godigi gooso peledabalai gooledele. Niba-

da gie badeli ee de i masi moloso. Bei, de i moloso see saga guododili egeesee masi moloso. <sup>15</sup> Esino niba wulo to hageesee takalai tekepo, "Godeeye goomogoga, iba dobolone goo hagee tolone dabalaiso," dalaiso.

<sup>16</sup> Esino niba niso nediliyo dokodoo topolone niso talai goo ee takolone doso. Esiga eyo nediliyo dokodoo topeli ee goo tokenee. <sup>17</sup> Esiga edebeeyo tekepo goo talai ee o goo goolee mapoo meleeno, goo ee telega poogooga, yo goo tokenee toso.

#### Bi bei odoosugaweliso bi mauwe odoosugaweliso mapoo dala egee tenemolo eyo nei Godeeye tenelaiso

**5** Bi bei odo niba mo to dui! Niba goohele sabolo pupusugulone debbe. Bei, nimapoo dala goo siboso. <sup>2</sup> Esiga nibada bi susuga ee tokenee palaiso. Osoloso nibada kali bi babooso nalaiso. <sup>3</sup> Nibada molee mosopoo mooloogoo magoo egee eyo mosoowe tokenee palaiso. Nibada molee tokenee pa oso, nibada tokenee goo ee ka eligiso. Esiga goo meedilei beame omapoo nibada molee tokenee pa oso, niba dou masi nalaiso. Esiga niba boobadaga odoosugaweliso. Bei, niba kasalame beame hamameedee ee bolone, bi bei mooloogoo malososo ka debeiyo? <sup>4</sup> Esiga niba ege, niyo nibada tou teli odoosugaweliso, nibada nei howo segei mapoo tou telagamo silesibume nei tenele. Esiga diayo nimapoo gowolone, Godee mapoo pidilei goo maga pupusugulone doso. Esiga ibada Godee kitulugu toowa yayo diayo pupusugamelee goo ee olo duso.

<sup>5</sup> Egeesee ma kulodu niyo mi toowa hamapoo dobolone, bi bei doloso, niso goomoga goo ee tolone debeiso. Esiga niba be hu poopooloso kauwuga wooloomaloso nali niba be egeesi masi doso. Bei, niba niso goomoga goo sabolo niso nediliyo poopooloso kauwuga, goo meedilei beame omapoo, be masi piligilame doso. <sup>6</sup> Osoloso niyo tekepo odoosugaweliso ee susuga ee goo meedili mapoo iyado peleso dibada goo meediloso diba piligi deliso. Esino odoosugaweliso hagee bia oso nimapoo goo koo moodeli.

#### Dala ma kulodu dulone bolone medee kibiya debbe

<sup>7</sup> Esiga tei telaga odoosugaweliso emegei, niba Lodeeye sibilei mapoo dulone bolone ka debbe. Goo ee egeesi masi moloso, edebeeyo nei howo sogoloso howo sibabeleso baliso. Howo simi oso o nei howo segei pologa kakauwuloso ko pa oso telegabeleso baliso. <sup>8</sup> Esiga nei howo segeli odoosugaweliso oso o nei howo oso kakauwulame bali egeesi masi niba dulone bolone medee kibiya ka debbe. Bei, Lodeeye sibilei olo koola toobooso.

<sup>9</sup> Esiga tei telaga odoosugaweliso emegei, nee odoosugaweliso mapoo takolone, "nibada tokenee oso ka see," dee na goolee. Bei, niyo egeesee lone doga, Godeeye nibada goo meediloso tokenee eyo nei tenelaiso. Esiga niba ege, goo meedili odoosugaweliso ee osulu miyopoo olo tobudoso.

<sup>10</sup> Esiga tei telaga odoosugaweliso emegei, niba Godee maga to tolososo kokodo takomo sili odoosugaweliso oso debei ogoloso, niba nose egeesi masi debbe. Bei, diayo Godeeyo hu maga to takomo silesibilulone dala ma kulodu mesie

sabolo debeliso. <sup>11</sup> Esiga edebeeyo dala ma kulodu kibiya badoga, Godeeye yimapoo goomogolone badoso. Esiga niba Yobowo goo olo gooleedooso. Yo dala ma kulodu mesie goo sabolo medee kibiya badebeiso. Esem Godeeye yimapoo goomogolone, yimapoo goo moodoo olo duso. Bei, Godeeye odoo susuga sooloo dolone ka badoso.

<sup>12</sup> Tei telaga odoo emegei, goo toowa hagoon medee dui! Niba tei goo takalame, Kei mi sabolo, osoloso mi toowa sabolo, osoloso bi abo sabolo hesigaloso tei na magee. Esiga odoo heeso nimapoo sibilesou hagee teye dee takooga, niyo goo egee talai goomogoga, yimapoo hedebe niyo goomoga goo ee takee. Osoloso niba goo egee talai gowooga, niyo gowe goo hedebe ee takee. Bei, niyo egeesee selega tei magooga, Godeeye nibada goo meediloso niba tokenee odoo dalaiso.

#### Godee mapoo takeli goo ee kitulugu moloso

<sup>13</sup> Esiga niyo debei ma kulodu, edebeeyo hegi goomologa, yayo Godee mapoo takalai tekepo. Osoloso edebeeyo goomoga goo sabolo badoga, yayo goomoga kosaiya sabolo Godeeyo hu dokodoo poudulone badalai tekepo. <sup>14</sup> Osoloso nima kulodu edebeeyo paiye sabolo badoga, yayo sosee wiligi tebisa gilimadalai tekepo, diayo yimapoo sibilesou, Lodeeye hu

sabolo olipi iso sooloso, yo howo gise goo oso dokodoo takalame. <sup>15</sup> Osoloso diayo tei tolosodokodoo takooga, paiye weidileiso. Bei, Lodeeye diayodokodoo taka to ee duga, paiye ka weidoso. Egeesema kulodu, odoo yimapoo goo tokenee hee too mologa, omapoo Lodeeye hapoloso boobado bigileiso.

<sup>16</sup> Esiga niso nima kulodu, nibada goo tokenee eeyiligebuguloso howo gise goo oso nei takoo, nei takoodolone ka debee, Godeeye nima kulodu paigiga odoo egee do tekepo moodoolame. Bei, Godeeyo howo woola mapoo tekepo badeli odoo oso dokodoo takeli goo ee diya kitulugu moloso.

<sup>17</sup> Esiga ibada amawe Ilaiya yo iba egeesi masi badebeiso. Yayo howo sibilega pagalame dokodoo kibiya takeme, howo sibilega dugo bakadio hedebe di poogoloso a 6 poogooso. <sup>18</sup> Osoloso yayo see howo sibilame, dokodoo kibiya takeme, howo see simiso. Esem nali bi segei see paladeeso.

<sup>19</sup> Esiga tei telaga odoo emegei, nima kulodu odoo hee oso tei goodee maga peegoo duga, odoo heeso yo see ido sibilei tekepo. Bei, niba goolee, edebeeyo emegei tokenee goo maga goo tekepo mapoo ido siboga, yo odoo egee kookaiyo moloso osee meli teli mapoo duga, o gie badeli pidilone ka seeso. Egeesega beeamo omapoo Godeeye o goo tokenee hapoloso boobado bigileiso.

# 1 Yonee

## 1 Yonee booka goo eyo bei

Gamenee goo eligili odoososo soosee susuga mapoo eligimo silesibulone, Yesuye odoosuto loso mi hamapoo sile dee takomo silesibiliso. Osoloso diayo eligi eyo kulodu goo tokenee talai goo ee haga goo toowanee, dee takomo silesibiliso. Osoloso emegei pidilei sabolo haga goo toowanee deliso. Diayo eligi goo hageesi eligimo silesibume, Yesu o hamamee dili odoosoo hee, Yonee olo adaga poloso badolone, goo hagee ogoloso to hogugu hagee soosee susuga mapoo teneeso. Bei, Yonee goomegele tei telaga odoososo soosee susuga mapoo egee do ososoo see gamenee goo eligili odoososo eligi mapoo hamamee deedeeyaga. Esino diayo daga Kelisowo goo du ee medee kibiya tolosodabalame, yoo goomogaso.

### Yesu yo gie badeli teneli to oso

**1** Iyo nimapoo gie badeli teneli to eyo goo hoguga. Goo ee daga bei mooloogoo mapoo yoo badebeiso. Iyo o goo duloso ibada howoso yoo tei egeiso. Osoloso ibada deeso yoo sigeso. <sup>2</sup> Gie badeli oso woola yiligebugume egeiso. Esiga iyo yoo tei egeiso. Kookaiyo gie badeli yimapoo moloso, esiga iyo nimapoo woola ka taka. Yo daga Ma Godeebolo badebeiso. Osoloso yoo imapoo yiligebuguso. <sup>3</sup> Esiga iyo duloso egei goo ee nimapoo ka taka, niyo ibolo hedebe dalame. Osoloso iba Ma Godee sabolo owolo Yesu Keliso sabolo hedebe doloso doso. <sup>4</sup> Esiga iyo goo hamaga nimapoo osoloso imapoo goomoga goo oso kauwuloso malame, to hagee hoguguloso ka teneeso.

### Godee yo gadeebugu

<sup>5</sup> Esiga iyo Keliso maga du goo ee see nimapoo hagee yiligebuguso. Goo ee, Godee yo gadeebugu. Yimapoo neliga hee mauwe. <sup>6</sup> Egeesee ma kulodu odoosusuga iyo takolone, iba Godee sabolo hedebe deliso doloso, see neliga ma kulodu silesiboga, iba wulo gamenee takooso. Esiga iba tei goo koo deedeeso. <sup>7</sup> Esino Godeeye gadeebugu ma kulodu egee bado egeesee badolone, iba see gadeebugu ma kulodu dogaga, oso tei telaga odoosoo iba susuga hedebe doloso dobolone ka salai. Egeesee owoolo Yesuwo sawo oso ibada tokenee susuga hapoloso tabigileiso.

<sup>8</sup> Egeesee ma kulodu iyo takolone, "Iba tokenee mauwe odoosoo," dee takooga, iba iso nediliyo gamenee takooso. Esiga imapoo tei goo mauwe. <sup>9</sup> Esino iyo ibada tokenee goo ee Godee mapoo yiligebuguga, yayo ibada tokenee goo ee hapoloso boobado bigileiso, osoloso goo tokenee susuga hapoloso iba Godeeye howo woola see medee teedee moodoolaiso. Bei, yayo o to kitulugu magoo ee dodolone, hooda hedebe tei goo moodoolaiso. <sup>10</sup> Osoloso iyo takolone, "Iba tokenee goo koo teli," dee takooga, iyo Godee yo gamenee

takeli odoosoolone ka salai. Egeesee maga Godeeye to oso ibada sooloo ma kulodu koo moloso.

### Keliso ee iba pidili

**2** Mawe dio ayo gooma, niyo goo tokenee teyaga, hogugu hagee nimapoo ka tonowa. Esino nima kulodu odoosoo heeso tokenee toga, niba goolee. Odoosoo heeso ima hodiokooga toboloso iba halo Godee mapoo takoomoloso, odoosoo ee medee teedee odoosoo Yesu Kelisoso. <sup>2</sup> Esiga Kelisoye ibada goo tokenee magataso. Egeesee maga goo tokenee susuga peegoo togobuguso, Godeeye imapoo nei tenelega pagalame. Esino hedebe ibada goo tokenee peegoo tabigilame tele. Haye, odoosusuga mipoo toowa mapoo debeli sabolo dibada tokenee peegoo tabigilame ka ta.

<sup>3</sup> Osoloso odoosusuga iyo Godeeye kokodo taka to mapoo mesimo silesiboga, iba yoo gooleedoosodoloso gooleedalaiso. <sup>4</sup> Esino edebeeyo takolone, "Godee a gooleedoosoo," dee takoloso, see yayo Godeeye kokodo taka to mapoo koo mesimo siloga, yayo wulo gamenee goo goolone ka seeso. Esiga odoosoo egeesi mapoo tei goo mauwe. <sup>5</sup> Esino edebeeyo Godeeye kokodo taka to mapoo mesimo siloga, odoosoo egeesi masi oso o sooloo ma kulodu Godee gweli goo ee kauwuloso moloso. Osoloso iba goo egeesee maga iyo tei Godee sabolo hedebe di goo ee gooleedeliso. <sup>6</sup> Goo ee edebeeyo takolone, "A Godee sabolo hedebe doloso badoso," dee takooga, odoosoo yoo Yesuye badebei egeesi masi badebee.

<sup>7</sup> Ayo gooma odoosoo, ayo nimapoo kokodo takeli to hoguguloso hagee tenee goo ee dianee. Esino niyo daga tei tolosokokodo taka to ee hagooso. Bei, kokodo takeli to nape hagee niso daga hoogoo olo duso.

<sup>8</sup> Esino kokodo takeli to nape hamapoo goo dia onosee moloso. Bei, goo dia tei ee Keliso ma kulodu osoloso nima kulodu eligiso. Goo egeesee maga neliga mauwe poogoomo dime, gadeebugu moloso.

<sup>9</sup> Odoosoo agayo takolone, a gadeebugu mapoo badosodoloso, tei too odoosoo hee gowooga, odoosoo ee neliga ma

kulodu osee badoso. <sup>10</sup> Esino odoo agayo emegei tei telaga odoo sooloo dologa, yo gadeebugu ma kulodu badoso. Esiga gadeebugu ee ma kulodu badolone, tei too odoo hee tokenee mapoo homodobilame moodoolaime. <sup>11</sup> Esiga ee ma kulodu odoo agayo tei too odoo gowolone badoga, yo neliga ma kulodu badoso. Yo neliga ma kulodu badolone, eyo egee du eli koo ogoso. Bei, neliga goo oso o howo gooloogooga.

<sup>12</sup> Esiga mawe dio ayo gooma, ayo to hogugu hagee nimapoo ka tonowa.

Bei, nibada goo tokenee Yesu maga hapoloso boobado buguso.

<sup>13</sup> Osoloso adaga nimapoo to hogugu hagee ka tonowa.

Bei, niyo daga bei mooloogoo maga badebei odoo Yesu ee niba gooleedooso.

Osoloso see gie kakauwuga nimapoo to hogugu hagee ka tonowa.

Bei, niyo tokenee odoo Saiten sabolo ha too ee ma kulodu niyo olo dagadiso.

Osoloso mawe dio ayo see to hogugu hagee ka tonowa.

Bei, ibada ama Godee niba olo gooleedooso.

<sup>14</sup> Osoloso adaga nimapoo to hogugu hagee see ka tonowa.

Bei, niyo daga bei mooloogoo maga badebei odoo Yesu ee niba gooleedooso.

Osoloso gie kakauwuga nimapoo to hogugu hagee ka tonowa.

Bei, niba kitulugu odoo oso.

Osoloso Godeeyo to oso nima kulodu mologa, niyo tokenee odoo Saiten ee olo dagadilesososo.

### Mi toowa hageeyo goo mapoo goomegeli goo

<sup>15</sup> Esiga niba mi toowa hageeyo goo sabolo osoloso ee ma kulodu bi susuga egee molo mapoo haga na goomege. Edebeeyo mi toowa hageeyo goo mapoo diya goomogoga, o sooloo ma kulodu Ma Godee goolee goo ee mauwe. <sup>16</sup> Esiga mi toowa hageeyo goo diya goomoga maga goo hagee peledabalaiso. Suso goomoga goo sabolo, osoloso mi toowa hageeyo kulodu bi egee molo ogoloso goomegeli goo sabolo, osoloso bi bei doloso badolone, si howeli goo sabolo. Esino goo susuga hagee Ma Godee maga koo sibili, esino mi toowa hagee eyo goo oso. <sup>17</sup> Mi toowa hagee sabolo osoloso edebeeyo goomegeli goo susuga sabolo mauwe pagalaiso. Esino Godeeye goomoga goo tomo sili odoo ee badoboso kookaiyo osee badalaiso.

### Keliso mapoo ha teli odoo

<sup>18</sup> Mawe dio, beame hoo pagalai koola toobooso. Esiga Keliso mapoo ha teli odoo oso sibilei goo ee nimapoo olo takaso. Esino Keliso mapoo ha teli odoo abo epedee olo peledabaso. Egeesee maga beame hoo pagalai koola tooboo doloso iba ka gooleedooso.

<sup>19</sup> Esino odoo hagee bia daga ibolo hodobo siloso see

iba poogoloso diso. Bei, diba tei ibolo hedebe doloso debele. Diba tei ibolo hodobo debei diepi, iba poogoo dile pegeliyo. Esino diayo iba poogoloso di oso tei diayo ibolo hedebe delega poogoo goo ee ka yiligebuguso.

<sup>20</sup> Esino nimapoo Kelisoye Dio Tei olo teneeso.

Egeesee maga niba susuga tei goo ee olo gooleedooso. <sup>21</sup> Esiga ayo nimapoo hoguguloso epedee hagee tenee goo ee niyo tei goo gooleedelega doga koo seeso. Esino tei goo ee niba olo gooleedooso. Bei, tei goo ee ma kulodu gamenee takeli goo mauwe.

<sup>22</sup> Osoloso gamenee takeli odoo ogumo? Edebeeyo Yesu yo Kelisonee dee takooga, odoo ee gamenee takeli odoo oso. Esiga yo Keliso mapoo ha teli odoo oso. Bei, odoo hagooso Yesu yo Kelisonee dee takooga, yo Ma Godee sabolo osoloso owolo Yesu mapoo gowolone miligi piaso. <sup>23</sup> Esiga odoo agayo Godeeyo owolo Yesu mapoo gowolone miligi piaga, yo Ma Godee sabolo hedebe doloso koo badoso. Esino edebeeyo Godeeyo owolo Yesuwo goo woola yiligebuguga, yo Ma Godee sabolo hedebe doloso badoso.

<sup>24</sup> Esiga to tekepo daga niyo du mapoo tei toloso ka debee. To oso nibada sooloo ma kulodu mologa, Ma Godee sabolo osoloso owolo Yesu sabolo hedebe doloso dabalaiso. <sup>25</sup> Esiga Kelisoye imapoo kookaiyo badoboso gie badeli tenelame to kitulugu magooso.

<sup>26</sup> Osoloso odoo aboso gamenee eligi goo eligimo silesiboga, ayo epedee o goo ee hoguguloso nimapoo ka tonowa. <sup>27</sup> Esino nimapoo Kelisoye Dio Tei olo teneeso. Osoloso Dio Tei oso nibada kulodu badolone, niba ka eligimoloso. Esiga odoo heeso tei goo eligilei niba koo goomogoso. Bei, Dio Tei oso niba tei goo susuga olo eligimoloso. Esiga yayo eligi ee ma kulodu, tei goo ee eligilone, gamenee goo koo eligiso. Esiga niba Dio Tei oso eligi goo mapoo dodolone, Yesu sabolo hedebe doloso osee debee.

### Godeeyo owolo dio

<sup>28</sup> Esiga mawe dio ayo gooma, niba Keliso sabolo hedebe doloso osee debee. Egeesee seega yayo simi mapoo o mudugiyopaga kitulugu sabolo ebilega tebisileiso.

<sup>29</sup> Godee yo goo tekepo moodeli niba gooleedooso. Osoloso niba gooleedooso, goo tekepo tomo sili odoo ee Godeeyo owolo dio doloso doso.

**3** Esiga ibada Ama Godeeye iba susuga diya sooloo dala goo toowa goo ee medee goolee! Yayo

sooloo dala maga iba yayo owolo dio deliso. Esiga iba tei owolo dio doloso doso. Esino mi toowa goomegeli odoo oso Godeeyo goo diba gooleedele. Goo egeesee maga diba ibada goo gooleedele. <sup>2</sup> Esiga emegei, iba Godeeyo owolo dio doloso doso. Esino iba medee gooleedele, iyo hamamee dabalai goo ee. Esino iba gooleedooso, Keliso siboga, iba see yo masi palaiso. Bei, iyo tei yo agalaiso. <sup>3</sup> Esiga edebeeyo goo hamapoo bolone dulone badoga, odoo oso tokenee mauwe Keliso masi badalai tekepo.

<sup>4</sup> Esiga edebeeeyo goo tokenee tomo siloga, yayo Godeeyo tei magoo gabagamo siloso. Bei, tokenee goo ee tei magoo gababili. <sup>5</sup> Niba olo gooleedooso, Kelisoye simi ee odoo susuga ibada tokenee hapoloso boobado bigilame ka simi. Bei, yimapoo tokenee hee mauwe. <sup>6</sup> Edebeeeyo Keliso sabolo hedebe doloso badoga, yo tokenee goo osee tomo sileime. Esino edebeeeyo tokenee goo osee tomo siloga, Kelisowo goo yo gooleedele, osoloso yimapoo tei tele.

<sup>7</sup> Mawe dio ayo gooma, niba obeeyamo, odoo aboso eligi maga niba peegoo na gilimado di dee. Goo tekepo teli odoo ee Godeeyo howo woola tekepo badoso. Esiga yo Kelisoye Godeeyo howo woola tekepo egee bado yinosee egeesi badoso. <sup>8</sup> Esino edebeeeyo goo tokenee tomo siloga, yo Saiteneeyo odoo. Bei, Saiten yayo daga bei mooloogoolone tokenee odoo doloso badebei osee osee badoso. Esiga Godeeyo owoloye Saitenso tou teli ee guobigilame ka simi. <sup>9</sup> Osoloso edebeeeyo Godeeyo owolo doloso badoga, yo goo tokenee osee tomo sileime. Bei, Godeeyo tei gie badeli yima kulodu moloso. Esiga yayo see goo tokenee tomo silei tebile. Bei, yo Godeeyo owolo. <sup>10</sup> Esiga goo hageesee maga iyo Godeeyo owolo dio sabolo osoloso Saiteneeyo owolo dio sabolo medee kibiya ka gooleedoso. Odoo agayo tekepo goo telega poogooga, yo Godeeyo owolonee. Osoloso tei too odoo sooloo delega poogooga, yo Godeeyo owolonee.

#### Nei sooloo dolo, nei sooloo dolo dalai

<sup>11</sup> Daga eligi goo niyo du hagooso. Esiga iyo nei sooloo dolo, nei sooloo dolo dolone dabalai tekepo. <sup>12</sup> Esiga niba Keineeyo goo na peedee. Bei, yo Saiteneeyo odoo doloso badolone, omolo wooloomaso. Bei kasalame Keineeye omolo ka wooloomayo? Bei, Kein yo goo tokenee tomo sili, esino omoloye Godeeyo howo woola goo tekepo tomo sili. <sup>13</sup> Esiga tei telaga odoo emegei, tei tele poogoo mi toowa mapoo debeli odoo oso niba hegioga, haga na goolee. <sup>14</sup> Osoloso iba gooleedooso, iyo tei telaga odoo sooloo dologa, iba teli maga see gie badeli mapoo dabagaso. Esino odoo agayo yimapoo sooloo dala goo mauwe daga, yo ta masi osee badoso. <sup>15</sup> Osoloso odoo agayo tei telaga odoo hegioga, yo odoo wooloomali odoo oso. Esiga niba olo gooleedooso, odoo wooloomali odoo ee dibada kulodu kookaiyo badoboso gie badeli mauwe. <sup>16</sup> Goo hamaga tei sooloo deli goo ee ka gooleedoso. Yesu Kelisoye iba halo o su teli mapoo magooso. Esiga iba nose tei too odoo ee halo, ibada gie badeli peegoo magalai tekepo. <sup>17</sup> Odoo yimapoo bi tebia oso tei too odoo bi mauwe badoga ogoloso, yo pidilega poogooga, o sooloo ma kulodu Godee goolee goo mauwe. <sup>18</sup> Mawe dio emegei, iyo emegei sooloo dolo doloso wulo toso takalai tekeponee. Esino suso pidilone tei sooloo dalai tekepo.

#### Godeeyo howo woola ebilega kitulugu sabolo dabalai

<sup>19</sup> Esiga iyo emegei sooloo dologa, egeesee maga iyo tei Godeeyo owolo doloso do goo ee gooleedalaiso. Esino ibada sooloo maga goolee oso takolone iba tokenee odoo, dee takooga, iba ebileime. Esino iba Godeeyo howo woola ebilega kitulugu sabolo dabalaiso. Bei, Godee yo toowa osoloso yayo ibada sooloo oso goolee dagadiso, osoloso goo susuga iyo moodeli yo gooleedoo.

<sup>21</sup> Esiga tei telaga odoo emegei, ibada sooloo maga goolee goo oso takolone, iba tokenee odoo, dee koo takooga, iba ebilega poogoloso Godeeyo howo woola dabalaiso. <sup>22</sup> Egeesee ma kulodu iyo yimapoo woosaga, yayo goo ee imapoo tenelaiso. Bei, iyo yayo kokodo taka to mapoo mesiliso, osoloso yayo goomoga goo ee tomoloso. <sup>23</sup> Esiga yayo kokodo takolone egeesee takaso, "Niba Godeeyo owolo Yesu Keliso mapoo tei te. Osoloso yayo eligi ee dodolone, emegei nei sooloo dolo, nei sooloo dolo dolone debee," diso. <sup>24</sup> Edebeeeyo Godeeye kokodo taka to mapoo mesilone dodomo siloga, diba yibolo hedebe doloso badoso. Osoloso nei Godee dibolo hedebe doloso ka badoso. Osoloso iba gooleedooso, Godee ibolo hedebe doloso badoso. Bei, yayo o Dio Tei imapoo teneloso badoso.

#### Eligi goo susuga medee ege

**4** Tei telaga odoo emegei, niba obeeyamo. Bei, gamenee goo eligili odoo bei mipoo toowa hamapoo olo silesiboso. Esiga odoo heeso sibilesi takolone, "Ayo eligi goo hagee eligimo silo Dio Tei maga siboso," dee takooga, o to duloso yimapoo saga tei na te. Esino niyo yayo egee eligimo silo tei Godee maga sibabeleso, medee hoodo ege. <sup>2</sup> Esino niba diayo eligi eyo kulodu Godeeyo Dio Tei hageesee gooleedalaiso. Diayo eligi oso takolone Yesu Godee maga sibilesi odoo poloso mi hamapoo badebeiso daga, oso diayo eligi goo ee tei Godee maga siboso. <sup>3</sup> Esino odoo agayo takolone Yesu Godee maga sibilesi odoo ka pele, dee takooga, yayo eligi goo ee Godee maga sibile. Odoo ee ma kulodu Keliso mapoo ha teli dio tokenee badoso. Esiga Keliso mapoo ha teli dio tokenee mipoo toowa hamapoo sibileisogo dee takeme dumelee ee olo sibilesi badoso.

<sup>4</sup> Mawe dio emegei, niba Godeeyo owolo dio doloso dolo. Esiga niyo gamenee goo eligili odoo oso eligi duloso o to mapoo tei tele poogoo oso, niyo diba dagadiso. Bei, odoo susuga ibada kulodu Dio Tei egee bado oso kitulugu oso tei tele poogoo mi toowa mapoo debeli odoo dima kulodu dio egee bado oso kitulugu ee dagadiso. <sup>5</sup> Gamenee goo eligili odoo hagee bia Godee gooleedele. Esiga beeamo susuga silesibilone mi goo ee eligimo silesibili. Osoloso mi odoo Godee gooleedele poogoo oso dibada to mapoo medee duliso. <sup>6</sup> Esino iba Godeeyo odoo doloso dolo. Esiga tei Godeeyo odoo oso ibada to medee duliso. Esino Godeeyo owolonee oso ibada to ee medee koo

duli. Goo egeesee maga Dio Tei sabolo gamenee takeli dio sabolo medee hoodo agalaiso.

### Godeeye sooloo deli

<sup>7</sup> Tei telaga odoo emegei, iyo emegei nei sooloo dolo, nei sooloo dolo dolone dabalai tekepo. Bei, sooloo deli goo ee Godee maga sibili. Esiga odoo agayo emegei sooloo dologa, yo Godeeyo owoloso, osoloso yo Godee gooleedooso. <sup>8</sup> Esino odoo agayo emegei sooloo delega poogooga, yo Godee gooleedele. Bei, Godee yo sooloo deli. <sup>9</sup> Esiga Godeeye iba sooloo dala goo ee yebugulone owolo hedebe mipoo toowa hamapoo meiye diso, iyo yimaga kookaiyo badoboso gie badeli talame. <sup>10</sup> Esiga tei sooloo deli goo hagooso. Iyo Godee sooloo deli goo osonee. Esino Godeeye iba sooloo dolone owolo meiye diso, ibada goo tokenee maga talame, osoloso goo tokenee susuga peegoo to-gobigilame. <sup>11</sup> Tei telaga odoo emegei, Godeeye iba diya egeesee sooloo dalaso. Esiga iyo emegei nei sooloo dolo, nei sooloo dolo dolone dabalai tekepo. <sup>12</sup> Edebeeyo Godee egele. Esino iyo emegei nei sooloo dolo, nei sooloo dolo dolone doga, Godee ibolo hedebe doloso badoso. Osoloso yayo sooloo dala oso ibada kulodu kauwuloso malaiso.

<sup>13</sup> Esiga Godeeye o Dio Tei imapoo teneeso. Egeesee maga iba gooleedooso, iba Godee sabolo hedebe doloso badoso, osoloso Godee ibolo hedebe doloso ka badoso. <sup>14</sup> Osoloso Ma Godeeye owolo mipoo toowa hamapoo meiye diso, yayo mi odoo oso gie badeli ee pidilone badalame. Osoloso iyo goo hagee ogoloso ka takomo silesiboso. <sup>15</sup> Esiga odoo agayo takolone, Yesu Godeeyo owolo dee takooga, Godee yibolo hedebe doloso badoso, osoloso yinosee Godee sabolo hedebe doloso badoso. <sup>16</sup> Godeeye iba diya toowa sooloo dala goo ee olo gooleedooso. Esiga iyo Godeeye iba sooloo dala goo mapoo tei toloso kibiya ka doso.

Godee yo sooloo deli. Esiga odoo agayo sooloo dolone badoga, yo Godee sabolo hedebe doloso badoso, osoloso nei Godee yibolo hedebe doloso badoso. <sup>17</sup> Iba goo meedilei beeamo mapoo ebilega kitulugu sabolo dabalame, Godeeye sooloo deli goo ee toowa poloso imapoo teneeso. Bei, iba Keliso masi mi hamapoo ka doso. <sup>18</sup> Edebeeyo Godeeye yo sooloo deli goo ee gooleedoo daga, yo ebileime. Esiga sooloo deli goo toowa poloso egee molo oso ebili goo habigileiso. Esino iba Godeeye ibada tokenee eyo nei tenelai mapoo obuga, yayo sooloo dala goo ee imapoo kauwule.

<sup>19</sup> Iba susuga dobolone sooloo deliso. Bei, Godeeye daga malalo iba sooloo dalaga. <sup>20</sup> Osoloso odoo heeso takolone, "A Godee diya gweliso," doloso see tei too odoo hegia sabolo badoga, yo gamenee takeli odoo oso. Bei, odoo egeesi masi oso tei too odoo yayo egeli sooloo delega badoga, yo Godee koo egeli kasee goalaiyo? <sup>21</sup> Kokodo takeli to hagee Godeeye imapoo olo teneeso. Odoo agayo Godee diya gooleega, emegei tei too odoo sabolo diya sooloo dalai tekepo.

### Godeeyo owolo mapoo tei talai goo

<sup>5</sup> Esiga edebeeyo tei tolone Yesu Godeeye hesia Keliso daga, yo Godeeyo owolo oso. Osoloso odoo agayo Ma Godee gooleega, yo Godeeyo owolo dio sooloo doloso. <sup>2</sup> Iyo Godee diya goolone, yayo kokodo taka to mapoo mesiloso silesiboga, oso iyo Godeeyo owolo dio sooloo dala goo ee gooleedoso. <sup>3</sup> Bei, iyo Godee gweli goo eyo bei hagooso. Iyo yayo kokodo taka to mapoo mesiloso silesibileiso. Osoloso yayo kokodo taka to ee imapoo haga kodianee. <sup>4</sup> Esiga Godeeyo owolo dio oso diayo tei too maga mi goo oso kitulugu ee dagadilesos doso. <sup>5</sup> Esiga odoo agayo mi goo sabolo ha too kitulugu ee ka dagadiyo? Edebeeyo Yesu Godeeyo owolo dolone tei toga odoo oso, mi goo sabolo ha too kitulugu ee dagadilesos badoso.

### Kookaiyo gie badeli Yesu mapoo moloso

<sup>6</sup> Osoloso Yesu mi hamapoo sibileso, Godeeyo owol-ogo dalame howo sauwidiso. Osoloso homo bulubo magoo mapoo tolone o sawo sologobuguso. Esiga Yesuye mi hamapoo simi ee hedebe howo sauwidilame sibile. Esino howo sauwuduloso sawo sologobigilame ka simi. Osoloso Dio Tei oso tei goo hagee imapoo takooso. Bei, Dio Tei oso hedebe tei goo ee takemeliso. <sup>7</sup> Esiga goo bakadio hedebe di hagooso Kelisowo goo ka eligiso. <sup>8</sup> Goo ee Dio Tei, osoloso howo sauwidi, osoloso sawo sologobugu goo oso imapoo Kelisowo goo ka yiligebuguso. Ee ma kulodu goo bakadio hedebe di oso goo hedebe eligiso. <sup>9</sup> Esiga edebeeyo egei goo ee imapoo yiligebuguga duloso, iba tei teliso. Esino ee ma kulodu Godeeye imapoo egee takoo goo diya toowa. Esiga iyo duloso medee kibiya kookoodalai tekepo. Bei, yayo imapoo owolowo goo ee tei goo takaso. <sup>10</sup> Esiga odoo agayo Godeeyo owolo mapoo tei toga, Godeeye owolowo goo maga tei goo taka to mapoo o sooloo ma kulodu tei too osee moloso. Esino odoo agayo Godeeye owolowo goo mapoo tei goo taka to mapoo tei telega poogoo odoo oso Godee gamenee takeli odoo, deliso. <sup>11</sup> Esiga Godeeye imapoo owolowo goo mapoo tei taka to hagooso. Godeeye imapoo badoboso kookaiyo gie badeli teneeso. Gie badeli egee owolo Yesu maga imapoo ka teneli. <sup>12</sup> Osoloso edebeeyo owolo Yesu mapoo tei toga, yimapoo gie badeli egee olo moloso. Esino odoo agayo Godeeyo owolo mapoo tei telega poogooga, yimapoo gie badeli egee mauwe.

### Yoneeye to hamameedee taka

<sup>13</sup> Esiga ayo Godeeyo owolo mapoo tei telaga odoo nimapoo to hogugu susuga hagee ka tonowa, niyo badoboso kookaiyo gie badeli too goo ee gooleedalame. <sup>14</sup> Esiga iba gooleedooso, iyo Godee yimapoo takolone iyo goomoga goo ee yayo goomoga goo sabolo tobuloso woosaga, yayo ibada to duleiso. <sup>15</sup> Egeesee ma kulodu yayo iyo yimapoo taka duso



doloso, ogoo goo yimapoo woosaga, yayo goo ee imapoo teneliso.

<sup>16</sup> Esiga edebeeyo emegei tei too odoosoo telega pagalai tokenee tomolo ogoga, yo dokodoo takalai tekepo, Godeeye o gie badeli pidilame. Esiga ayo hagee takoo goo ee, odoosoo teli mapoo koo ido dili goo ee taka. Esino teli mapoo ido dili goo tokenee moloso. Esiga ayo hagee takoo goo ee, teli mapoo ido dili goo tokenee teli odoosoo ee halo dokodoo takalame ayo koo takooso. <sup>17</sup> Tekepo goonee susuga egee, tokenee goo oso. Esino tokenee susuga oso teli mapoo koo ido dili.

<sup>18</sup> Esiga iba gooleedoosoo, edebeeyo Godeeyo owolo doloso badoga, yo goo tokenee osee tomo sileime.

Bei, Godeeyo owolo Yesu yayo yo medee bamoloso. Osoloso tokenee odoosoo Saitenso yo tokenee palaime.

<sup>19</sup> Esiga iba gooleedoosoo, iba Godeeyo owolo dio. Esino imaga mi toowa ma peegoo egee do Saitenso bamoloso. <sup>20</sup> Osoloso see iba gooleedoosoo, Godeeyo owolo olo simiso. Osoloso yayo imapoo goo gweli medee tekepo olo teneeso, iyo tei Godee gooleedalame. Esiga iyo tei Godee sabolo, osoloso owolo Keliso sabolo hedebe doloso doso. Esiga Yesu tei Godeeso. Osoloso kookaiyo badoboso gie badeli yimaga imapoo ka teneli.

<sup>21</sup> Esiga mawe dio emegei, niba medee badolone gamenee godee maga peegoo dooboobigi.

## 2 Yonee

### 2 Yonee booka goo eyo bei

Daga Godeeyo to eligimo silone, odoo eligimo silesibili oso mi hee maga hee mapoo du. Osoloso mi hee maga hee mapoo du domo silesibulone, Godeeyo to takomo silesibiso. Osoloso mi ee ma kulodu tei telaga odoo oso diba medee pidiso. Esino Godeeyo to takomo silesibili odoo mooloogoodoo ee ma kulodu gamenee goo eligili dibada mooloogoodoo onosee silesibiso. Esem diye di odoo Yoneeye goo hagee ogoloso tei telaga odoo oso gamenee goo eligili odoo pidiyaga to hagee ka hogugu.

<sup>1</sup> Esiga tei telaga odoo nibada amawe ayo Godeeye hesia wee osoloso owolo dio mapoo to hogugu hagee ka teneeso. Ayo niba diya gooleeso. Hebebe ayo niba diya koo gooleeso. Esino tei goo gooleedoo odoo susuga sabolo niba diya goolone doso. Bei, tei goo ee ibada sooloo ma kulodu egee molo oso imapoo kookaiyo moloso osee malaiso.

<sup>3</sup> Ayo dokodoo takooso, Ma Godeeye owolo Yesu Keliso sabolo oso odoo susuga iba sooloo dolone pidilame, osoloso imapoo mesie goo tenelame. Bei, iyo tei goo mapoo tei toloso emegei sooloo dala sabolo doso.

<sup>4</sup> Esiga nee holaiso aboso Ma Godeeye kokodo taka to mapoo tei toloso dodomo di duloso a diya goomogaso. <sup>5</sup> Osoloso wee emegei, to hogugu hagee namapoo dianee. Esino iyo daga du sooloo deli goo ee see ka hoguga. Esiga iyo dobolone emegei nei sooloo dolo, nei sooloo dolo dolone dabalai tekepo. <sup>6</sup> Esiga sooloo deli goo eyo bei hagooso. Iyo Godeeye kokodo taka to ee medee dadalai tekepo. Bei, niyo Godee diya goolee sabolo dobolone emegei nei sooloo dolo, nei sooloo dolo dolone dabalai tekepo. Esiga niba daga hoogoo goo hagee olo duso.

<sup>7</sup> Esiga gamenee goo eligili odoo bei oso mipoo toowa hamapoo silesiboso. Odoo egee bia oso silesibulone, Yesu Kelisoye tei odoo poloso mi hamapoo

silee goo ee koo eligili. Osoloso odoo agayo goo hageese eligimo siloga, yo gamenee goo eligili odoo oso, osoloso yo Keliso mapoo ha teli odoo oso. <sup>8</sup> Esiga niba medee debee, gamenee goo eligili eyo to mapoo tei tolone, Godee maga nei telega peegeeyaga. Esiga niyo tou toowa too eyo nei talame, medee kibiloso ka debee. <sup>9</sup> Osoloso edebeeyo Kelisoye eligi kibiya kookodelega poogoloso, see eligi hee mapoo yayo diya kookoodoga, yo Godee sabolo hedebe doloso koo badoso. Esino odoo agayo Kelisoye eligi kibiya kookoodoga, yo Ma Godee sabolo osoloso owolo Keliso sabolo hedebe doloso badoso. <sup>10</sup> Esiga odoo agayo Kelisoye eligi goo ee eligimo sibilega, see eligi hee eligimo siboga, emegei doloso nibada mosopoo na ido di. <sup>11</sup> Bei, odoo agayo odoo hageesi masi sabolo emegei daga, yayo o tou tokenee too sabolo hedebe deeso.

<sup>12</sup> Ayo nimapoo takalai goo abo moloso. Esino wulo to hogugu oso nimapoo takalai a koo goomogo. A ma-wo nimapoo sibilesi nibolo hodobo to kalai ee a goomogoso. Osoloso ayo omapoo siboga, iyo hodobo goomoga poudileiso.

<sup>13</sup> Esiga Godeeye hesia noomoo eyo holaiso diayo emegei di to namapoo ka taka.

## 3 Yonee

### 3 Yonee booka goo eyo bei

Yoneeye to hogugu hagee tei too odoo Gaiyus mapoo teneeso. Bei, Gaiyuseeye Godeeyo to eligimo silesibili odoo oso o mi mapoo sibume, yayo pidi goo ee dume. Osoloso sosee wiligi odoo taba Diotelepese mapoo yayo gowe to hamapoo hoguguso. Bei, odoo hagooso Godeeyo to eligimo silesibili odoo pidilei gowolone odoo aboso diba pidiyaga hamaga takeliso.

<sup>1</sup> Ayo gooma odoo Gaiyus, tei telaga odoowo namawe ayo no diya gweli namapoo to hogugu hagee ka tonowa.

<sup>2</sup> Ayo gooma odoo, a tei toso, no pailega medee tekepo bado malaiso. Esino ayo no halo dokodoo takooso, nayo goo susuga ee ma kulodu medee tekepo badalame. Esino a gooleedooso, no tei too ee ma kulodu tekepo badoso. <sup>3</sup> Osoloso tei telaga odoo emegei aboso sibilesi, nayo tei goo mapoo kibiya kookoodoloso osee dodomolo goo ee takeme duloso, a diya goomogaso. <sup>4</sup> Esiga goo abo toowa oso amapoo goomoga toowa koo teneli. Esino mo awe diayo tei goo ee deedeega ogoloso, a diya goomegeliso.

<sup>5</sup> Ayo gooma odoo, nayo to tekepo eligimo silesibili odoo oso eligimo silone, nee mi mapoo odoo soo masi siboga, nayo egee pidi goo ee tekepo. <sup>6</sup> Osoloso diayo sibilesi nayo sooloo dala goo sabolo bado goo ee ibada sosee hamapoo sibilesi takaso. Godeeyo to eligimo silesibili oso nee mi mapoo sibilesi see dilame do-boome, diayo eli domopoo nalai nei dimapoo tenelone, Godeeye goomoga goo sabolo tobuloso tenee. <sup>7</sup> Bei, diba Keliso halo, tou tomo silesibulone, tei tele poogoo odoo maga bi koo teli. <sup>8</sup> Esiga Gaiyus no asalo diba medee pidilei tekepo. Iyo odoo hagee bia pidiga, diayo to tekepo eligimo silesibili sabolo hedebe doloso dabalaiso.

<sup>9</sup> Osoloso ayo goo hamaga sosee omapoo to hoguguloso olo teneeso. Esino Diotelepeseeye to ee duloso mesile. Bei, nima kulodu sosee mapoo yayo wiligi doloso badalame diya goomogaso. <sup>10</sup> Esiga ayo

siboga, yayo goo tokenee teli sabolo osoloso ibada goo maga gamenee taka goo ee woola yiligebigileiso. Osoloso yo goo hedebe egee moodele. Esino yayo Godeeyo to eligimo silesibili o mi mapoo siboga, hamaga takeliso. Osoloso see sosee odoo oso Godeeyo to eligimo silesibili odoo ee pidiyaga, yayo hamaga takeliso. Esino ee ma kulodu yayo taka tei telega poogoloso, sosee odoo abo oso Godeeyo to eligimo silesibili odoo pidiga, yayo diba sosee maga peegoo mageliso.

<sup>11</sup> Esiga ayo gooma odoo, tokenee odoo eyo goo ogoloso o goo ma malo na peedee. Esino goo tekepo hedebe ee temelee. Odoo agayo goo tekepo ee tomologa, yo Godee sabolo hedebe doloso badoso. Esino odoo agayo tokenee goo tomologa, yo Godee gooleedele. <sup>12</sup> Esiga odoo susuga oso Demetiliyus odoo eyo goo tekepo deliso. Osoloso o suso tou too oso tei goo sabolo tebiliso. Osoloso iba noseeye yo tekepo odoo dee takeliso. Esiga no olo gooleedooso, iba tei goo hedebe ee takeli.

<sup>13</sup> Ayo namapoo goo abo takalai moloso. Esino wulo to hogugu oso namapoo takalai a koo goomogo. <sup>14</sup> A mawo namapoo sibilesi nobolo hodobo to kalai a goomogo.

<sup>15</sup> Esiga ayo dokodoo takooso, Godeeye namapoo mesie goo tenelame. Osoloso nee odoo diayo namapoo dibada emegei di to takaso. Esiga nei nayo ibada odoo omapoo egee do mapoo, ibada emegei di to dimapoo takee.

# Yuda

## Yuda booka goo eyo bei

Yuda booka hoguguli odoo hagee Yesuwo omolo Yuda oso malaiso. Esiga yayo tei telaga odoo susuga mapoo pidi to hagee hoguguloso teneeso, diayo gamenee goo eligi mapoo tei teyaga. Bei, gamenee eligili odoo oso tei telaga odoo ee peegoo gilimado di ogoloso.

**1** A Yuda, Yesu Kelisowo tou teli odoo, osoloso Yemeseeyo omolo. Ayo Ma Godeeye hesia odoo nimapoo to hogugu hagee ka tonowa. Bei, Ma Godeeye niba sooloo deliso, osoloso Yesu Kelisoye niba medee ka bamoloso. <sup>2</sup> Ayo Godee mapoo taka, yayo sooloo deli goo sabolo, osoloso mesie goo sabolo, osoloso Godeeye niba gweli goo oso nimapoo toowa doloso ka malame.

### Gamenee goo eligili odoo dia goo maga kokodo taka

<sup>3</sup> Tei telaga odoo emegei, iyo Godee maga gie badeli pidili too goo ee ayo olo daga nimapoo hoguguloso tenelame diya goomogaso. Esino ayo goo hee maga to hogugu hagee ka tonowa. Godeeye opusomo dee koo seli tei goodee eligi ee o odoo imapoo teneeso. Esiga tei goodee eligi egee odoo aboso see opusomo diaga, niyo medee bamelee. <sup>4</sup> Bei, gamenee eligili odoo oso tei telaga odoo masi nibada mooloogoodoo ma kulodu galaga sibilesa nibolo hodobo ka doso. Esiga odoo hagee biaso eligilone, Godeeye iba sooloo dolone pidilone, iyo goo tokenee talai koo hamaga takeli doloso eligiliso. Osoloso adaba sobo sabolo giso sabolo goo heli talai ee tei mauwe deliso. Osoloso see diayo ibada wiligi odoo Lodee Yesu Keliso mapoo goweliso. Osoloso odoo hagee biaso Godee mapoo mesilega silesibiliso. Esino Godeeye odoo hagee bia dia goo maga goo midilame daga hoogoo to olo edidi magooso.

<sup>5</sup> Egeesi ma kulodu ayo goo niso gooleedoo ee see nimapoo medee eligilei, a goomogo. Esiga niba goolee, Godeeye Isalael odoo pidilone, Isipi mi maga peegoo gilimado diso. Esino see hamamee Isalael odoo abo yimapoo tei tele poogoo odoo ee yayo piluguso. <sup>6</sup> Osoloso niba goo hee hagee goolee. Godeeyo momaiye aboso kitulugu Godeeye dimapoo tenee sabolo tou talai goomegelega, wulo see abaga kitulugu toowa talai ee goolone, mi Godeeye dimapoo tenee ee poogoloso diyadeeso. Esemee Godeeye diba ki ti moloso kookaiyo osee meli oso tiegisaloso wulu neliga poogoo mapoo huyasoloso doso, biame hamameedee mapoo dia goo ee ka midilame. <sup>7</sup> Osoloso Sodom mi sabolo, osoloso Gomola mi sabolo, osoloso mi pepuso abo koola omapoo bumodi dibada goo ee, niba

goolee. Momaiyeso goo tokenee too egeesi masi diayo tooso. Bei, mi omapoo adaba sobo sabolo giso sabolo heli teli goo tokenee oso molone, gisoso emegei giso sabolo goo heli teliso. Esiga Godeeye dibada mi ee douso nadalame dou toosooso. Odo egee bia dimapoo, osoloso momaiye egee bia dimapoo peledaba goo oso, Godeeye goo tokenee teli odoo dia goo tokenee eyo nei dala dimapoo tenelai goo ee eligiso. Dala goo hagee kookaiyo moloso osee meli Dou mi ee takooso.

<sup>8</sup> Egeesi maga gamenee eligili odoo hagee bia onosee egeese seliso. Diayo dia sapoo tieli ee Godee maga sibili dolone, ee dodolone, dia suso goo tokenee teliso. Osoloso diayo Godee mapoo mesilega dobolone, Godeeyo momaiye susuga eyo goo maga to tokenee takeliso. <sup>9</sup> Esino momaiye susuga dia wiligi odoo Maikoleeye Saiten sabolo Moses ta eyo kou maga toso agadiga † omapoo, yayo Saiten mapoo to tokenee hee takele. Esino yayo wulo Saiten mapoo egeese takaso, "Godeeye namapoo nei dala tenelaiso," diso. <sup>10</sup> Esino gamenee goo eligili odoo hagee biaso goo diayo gooleedele poogoo maga to tokenee takeliso. Osoloso diba gala seebeeso dieso goomoga goo teli egeesi masi doso. Esiga dieso goomoga goo ee tolone egee do ogoso diba tokenee peliso. <sup>11</sup> Esiga diba dala talaiso! Bei, diayo Keineeyo goo deede mago. Bei, Keineeye omolo wooloomaso. Osoloso diayo Balameeyo goo †† ee dodolone, molee talame goolee maga tokenee tolone ka doso. Osoloso diayo Kolayo goo ‡ ee dodolone, Godeeyo to mapoo mesilega doso. Esiga Godeeye diba tokenee palaiso.

---

† MAIKOL DIO SAITEN DIO TOSO AGADIGA - Moses teme, Godeeye Maikol mapoo takolone, Moses tayo kou todileso midooso, diso. Esino Saitenso Maikol dio toso agadilone egeese takaso, "Amapoo kitulugu moloso Moses tayo kou todilei. Bei, Moseseeye Isipi odoo hee woolooma maga," diso. Esino Maikoleeye Moses tayo kou ee Saiten mapoo tenelai goodoogaso. †† BALAMEEYO GOO - Balam yo Godee maga to tolosa kokodo takomo sili odoo. Daga hoogoo Moseseeye badebei biame omapoo yo badebeiso. Esino yo Isalael odoonee. Yo molee talame goolee maga, yayo Godee mapoo wegigaso. ‡ KOLAYO GOO - Daga hoogoo Kolaye Godee mapoo wegigime, mi goodaso. Esemee o odoo sabolo mi ma kulodu misigedubuloso miso togoo doloso wediaso. Esiga oposusu hagee Namba 16.1-35 mapoo moloso.

<sup>12</sup> Esiga niyo emegei sooloo deli wo ne † ee ma kulodu odoo hagee biaso dieso nediliyo diba ono diya goolone, similega wo nalagaliso. Goo egeesi maga diba bi subugobolo masi dobolone, niyo debei ee tokenee polone ka doso. Osoloso osoko biame mapoo howo hemiye mologa, howo sibilega pooso guobigili diba egeesi masi doso. Osoloso diba homo su oso ko peli biame mapoo ko pelega pegeli egeesi masi doso. Osoloso diba homo siliga peegoo alaga bigili egeesi masi doso. <sup>13</sup> Esiga abei mapoo howo ki toowa sibulone makawo sabolo sibili egeesi masi, diayo dia simili goo woola egeesee eligiliso. Osoloso diba kei ma dokodoo giwo boobadomo sili egeesi masi doso. Esiga Godeeye wulu goodomou olo mopoodoo dooso, diayo neliga omapoo kookaiyo dobosoo osee dabalame.

<sup>14</sup> Esiga Adameeye balomo simi ee ma kulodu amawe dio 7 omapoo badeli Inokeeye malalo gooso peledabalai omaga takolone, odoo hagee bia dia goo maga egeesee takaso, "Niso ege, Lodeeye o momaiye diya bei sabolo siboso, mi odoo susuga dia goo ee midilame. Osoloso Godee mapoo koo mesili odoo oso goo tokenee too sabolo, osoloso Godee maga duwa taka eyo nei yayo dimapoo dala tenelame siboso," diso.

<sup>16</sup> Esiga diayo goweli goo ee yilige bugulone emegei dia goo takomo silesibiliso. Egeeseelone diayo suso goomoga goo mapoo dodomo silesibulone, dieso nediliyo diba teiba dolone si howeliso. Osoloso see diayo odoo abo maga bi diayo goomegeli ee talame to hadaliso.

#### Tei too mapoo kibiloso debee

<sup>17</sup> Esiga emegei, niba ibada Lodee Yesu Kelisoye Diye di odoo oso malalo gooso peledabalai taka ee goolee.

<sup>18</sup> Bei, diayo nimapoo egeesee takaso, "Lodee mapoo osoloso o odoo mapoo manolone duwa takeli odoo

† EMEGEI SOOLOO DELI WO NE - Daga hoogoo tei telaga odoo oso moologoodoloso, diayo hedebe doloso emegei sooloo dolone debeli goo ee kauwulame nei naliso. Osoloso diayo wo ne hoo poogolone Yesu gooleebugu wo naliso.

oso biame hamameedee mapoo sibileiso. Osoloso diayo sibileso dia suso goomoga goo susuga ee tolone dabalaiso," diso. <sup>19</sup> Esiga odoo hagee biaso tei too ma kulodu debeli odoo ee domo piliso. Osoloso diba nosee mipoo hageeyo goo goomegeli odoo oso. Osoloso dibada kulodu Dio Tei mauwe.

<sup>20</sup> Esino tei telaga odoo emegei, Godeeyo goo maga tei eligi goo mapoo niyo olo tei tooso. Esiga tei eligi goo ee ma dokodoo nibada gie badeli ee moso masi tege. Osoloso Dio Teiso kitulugu maga Godee mapoo takolone debee. <sup>21</sup> Osoloso Godeeye niba sooloo dolone badoso doloso goolone, Godee mapoo hegi sibileso debee. Osoloso Lodee Yesu Kelisoye sooloo dala maga kookaiyo badoboso gie badeli ee talame dulone bolone ka debee.

<sup>22</sup> Osoloso tei too kibile poogoo odoo ee sooloo dolone pidilone debee. <sup>23</sup> Osoloso odoo aboso Dou mi mapoo diyadeega, niyo ogoloso see saga gilimado sibe. Osoloso nee odoo oso goo tokenee toga, diba medee sooloo dala sabolo pidilone dobolone, niso nediliyo medee bamelee, niba nosee dibada goo tokenee hedebe omapoo dedeyaga.

#### Godeeyo hu dokodoo poude

<sup>24</sup> Godee yo kitulugu. Esiga yayo nibada tei too homodobiya niba pidilei, yo teiba. Osoloso yayo niba goo tokenee mauwe odoo doloso, niba o mudugiyopoo dabalame gilimado sibilei, yo teiba. Esiga niba omapoo goomoga sabolo dabalaiso. <sup>25</sup> Esiga iyo Godeeyo hu dokodoo poudu. Bei, Godee hedebe hagoso ka badoso. Osoloso ibada Lodee Yesu Kelisoye iba halo tou too maga Godeeye ibada gie badeli pidiso. Esiga hedebe yayo toowa doloso ka badoso. Osoloso yayo bi susuga eyo wiligi odoo doloso ka badoso. Osoloso kitulugu susuga ee yimapoo moloso. Bi susuga moodelega badolone, yo egeesee badebeiso. Osoloso yo epedee hamapoo egeesee badoso. Osoloso yo see hamamee kookaiyo osee egeesee badalaiso. Goo hagee tei goo.